

**«ШАРҚ» НАШРИЁТ-МАТБАА КОНЦЕРНИ
БОШ ТАҲРИРИЯТИ
ТОШКЕНТ — 2000**

ҚАМЧИБЕК КЕНЖА

ҲИНД СОРИФА

(САФАРНОМА)

Мозийдан лавҳалар,
Кўрган-кечирилганлар,
Ҳайрат суратлари,
Шеърлар,
Ўйлар...

**«ШАРҚ» НАШРИЁТ-МАТБАА КОНЦЕРНИ
БОШ ТАҲРИРИЯТИ
ТОШКЕНТ — 2000**

Улуғ мутафаккир, шоир ва саркарда, мураккаб тақдирли, чигал қисматли шахс Захиридин Муҳаммад Бобур ва бобурийларнинг тарихий, илмий меросини, меъморчилик ёдгорликларини чуқур ўрганиш мақсадида Андижонда ташкил топган Бобур номли ҳалқаро илмий экспедиция автомобилда бир неча бор сафарга чиқиб, ўндан ортиқ Шарқ мамлакатларида бўлди.

Экспедиция аъзоси, шоир ва ёзувчи Қамчибек Кенжа ушбу сафарномасини Афғонистон, Эрон, Покистон ва Ҳиндистондан олган тассуротлари асосида битган. Асарда ўтмиш билан ҳозирги замон, тарихий ҳақиқатлар билан бадий лавҳалар уйғуналашиб кетган. Жумладан, «Сехрли Ҳиндистон» бобидаги ўзбек-ҳинд ҳалқлари ўртасидаги азалий дўйстлик ва муҳаббат ришталари, бобурийлар, бобурий маликаларнинг ижтимоий ва шахсий ҳаётига, уларнинг ишқий муносабатларига оид изтиробли ва қизиқарли ривоятлар, ҳикоятлар, тафсилотлар ўқувчини ҳаяжонга солади.

Ушбу китобнинг нашр этилишига самимият билан ҳиммат кўрса-тишган Бобур номидаги ҳалқаро жамғарма ҳамда Андижон вилоят «Матлуботсавдо» акциядорлик компанияси раҳбариятига муаллиф сидқидидан миннатдорчилик билдиради.

Кенжа, Қамчибек.

Ҳинд сорига: (Сафарнома): Мозийдан лавҳалар. Кўрган-кечирилгандар, Ҳайрат суратлари. Шеърлар. Ўйлар...— Т.: «Шарқ», 2000.—3526.

ББК 63.3(5ИД)+Ўз2

© «Шарқ» нашриёт-матбаа концерни
Бош таҳририяти, 2000

БОБУР МИРЗО ИЗИДАН

(Сўз боши)

Халқимиз хотирасида ҳам, жаҳон тарихида ҳам ўчмас из қолдирган улуг сиймолар орасида Заҳиридин Муҳаммад Бобурнинг алоҳида ўрни бор. Бобур Мирзо дунёнинг энг баланд тоғлари бўлган Помир, Олой, Ҳималой ва Ҳиндикушлардан неча бор отлигу пиёда ошиб ўтган. Марказий Осиёда, Афғонистон ва Ҳиндистонда қандай улкан дарёлар учраган бўлса, Бобур Мирзо уларнинг ҳаммасидан қулоч отиб сузиб ўтган. Парвардигор унга пахлавонларча бир жисмоний құдратни ва баҳодирларга хос буюк жасоратни даҳо даражасидаги истеъдод билан бирга ато этган. Ўзидаги барча инсоний ва ижодий фазилатларни Бобур мирзо олижаноб мақсадларга хизмат қилдирган.

Шунинг ҳаммаси туфайли уйғониш даврининг дилбар сиймоси бўлган Бобур Мирзо беш асрдан буён туғилиб ўсган диёрига оламшумул обрў келтирмоқда, Ҳиндистонда барпо этган құдратли давлати ва ёзиб қолдирган ўлмас асаллари билан янги-янги авлодлар томонидан ифтихор ва ибрат манбай сифатида эъзозланмоқда.

Ўзбекистон истиқололи шарофати билан қарамлик фовлари олиб ташланди. Улуғ аждодларимиз изидан жаҳон бўйлаб сафарга чиқсан биринчи ўзбек илмий экспедицияси Зокиржон Машрабов бошлиқ Бобур номли халқаро жамғарманинг фидойиларидан таркиб топди. Экспедициянинг ilk сафарларидан бирида қатнашган таниқли ёзувчи Хайридин Султоннинг «Бобурийнома» деб аталган романни катта муваффақият қозонди. Экспедиция кинолентага туширган гаройиб лавҳалар телевидение орқали кўрсатилди ва минглаб мухлислар таҳсина нига сазовор бўлди. Бу ҳаммаси Бобур Мирзонинг ҳаёти ва фаолияти тарихимизнинг энг ёрқин саҳифалари билан боғлиқ эканини кўрсатади. Шунинг учун адилларимиз бу мавзуда янги-янги асаллар ёзмоқдалар.

Шу асарлардан бири — истеъдодли адаб Қамчибек Кенжанинг «Ҳинд сориға» деб аталган сафарномасидир. Қамчибек Бобур номли халқаро экспедициянинг учунчи дафъа ташкил этилган ва жуда яхши самара берган сафарида иштирок этади. Асар кундалик шаклида ёзилган. Унда тасвирланган саргузаштлар, енгиб ўтилган қийинчилеклар, янги-янги ўлкалар ва мамлакатлар манзараси ўқувчини астойдил қизиқтиради. Айниқса Дехли, Агра, Ҳирот, Машҳад, Калькутта, Лохўр, Ҳайдаробод, Хайбар довонидан ўтиш ва бошқа кўпгина боблар таъсири ёзилган. Улардан айримлари «Жаҳон адабиёти» журналида «Ҳайрат суратлари» деган сарлавҳа билан 1997 йилдаёқ, чоп этилган ва адабий жамоатчиликда ижобий фикр туғдирган эди.

«Ўнта бўлса ўрни бошқа» деганлариdek, Қамчибекнинг ушбу асари Бобур Мирзога бағишлиланган китоблар орасидан ўзига хос ўрин олади, сафарнома жанрини кўпгина янгиликлар билан бойитади.

Муаллиф қайси мамлакат халқи ва табиат манзараларини қаламга олмасин, уларни «Бобурнома»даги мумтоз тасвирлар билан қиёслайди. Шу орқали биз тарихнинг беш аср давомидаги ҳаракати ва ўзгаришлари ҳақида тасаввур ҳосил қиласиз. Айни вақтда, Бобур Мирзо асарлари бутунги кун учун ҳам олий бир ҳақиқат мезони бўлиб хизмат қилишига ишонамиз.

Асарнинг яна бир қизиқарли томони — унда ташки олам тасвири билан бирга муаллифнинг ички дунёси, сафардошларига меҳру оқибати, ўзга юртларда кўп яшаган сари ватанини соғиниши гоҳ лирик, гоҳ юмористик бўёқ билан мароқли тарзда ифодаланади. Биз сафарномани ўқиш давомида Қамчибекнинг яхшигина шоирик қобилияти ҳам борлигига, унинг насрий тасвирлари эса қувноқ юмор билан йўғрилганига амин бўламиз.

Албатта, бундай катта ишда айрим нуқсонлар, ортиқча туюладиган тафсилотлар учраши мумкин. Муаллиф қўлёзмани қайта ишлаш жараёнида уни анча қисқартириди ва иложи бўлганича такомиллаштириди.

Умид қиласизки, Қамчибек Кенжанинг «Ҳинд сориға» асари бадиий бобуршуносликнинг яна бир наумаси сифатида китобхонлар томонидан яхши кутиб олинади.

*Пиримқул ҚОДИРОВ,
Ўзбекистон халқ ёзувчisi*

Ушбу китобимни отам — Кенжабой Умрзоқ, ўғли, онам — Салтанатхон Эшонжон Махсум қизи ва акам Тошпўлат Кенжабой ўғлиниң ёрқин хотираларига фарзаңдлик ва инилик эҳтироми ила бағишлайман.

Муаллиф

I ҚИСМ

УШАЛМАГАН ОРЗУЛАР САРИ

... Ўша куни март ойининг тахминан охири шанбаси эди. Қишлоқда баҳорги юмушлар қизиган пайт. Эрта туриб, ўғиллар билан ҳовлида энди иш бошлаган эдик, бирор чақириб қолди. Чиқсан, кўчада Зокиржон aka Машрабов турибди. Ҳайдовчисиз «Волга»ни кўриб, ўзи рулда келибди-да, деб қўйдим ичимда.

— Навбатдаги сафарга ҳозирлик кўярпмиз, — деб гап бошлади Зокиржон aka салом-алиқдан сўнг, — раҳбарларнинг розилигини олдик. Бу галги йўналишимиз, ниятимиз, демак, асосан Ҳинҷистон, экспедиция аъзоларини танлаяпмиз. Бобур шоир, адаб бўлгани учун, демак, сафимиизда андижонлик адиблардан ҳам бўлиши керак. Шу масалада сиз билан маслаҳатлашгани келдим. Тўғрироғи, сизни таклифингизни билмоқчиман.

— Жуда яхши, Андижонда қалби ва ижоди Бобур руҳига яқин, сизларбоп шоир-ёзувчилар кўп, — дедим мен ва бир-иккитасини санай бошлагандим, Зокиржон aka гапимни бўлди.

— Тўхтанг энди, сиз мендан ҳам фидойи чиқиб қолдингиз. Биринчи сафаримизда бир-икки гаплашдигу, лекин мени назаримда ўзингиз унча қизиқмадингиз. Иккинчидан, демак, бизда ҳам тажриба йўқ, кимни олиб, кимни қўйишни билмай, роса гангиганман. Қолаверса, сиз билан яхши таниш эмас эдик. Хуллас, шунаقا бўлди. Иккинчи сафар Тўлан Низомни тавсия қилдингиз, мен бажонидил рози бўлдим. Демак, яхши инсон, яхши шоир экан, яхши ҳамроҳ бўлди. Лекин у бу гал боролмас экан, сабаби сафаримиз билим юртида кириш имтиҳонлари бўладиган даврга тўғри келяпти.

Шунинг учун, қисқаси, бу гал ўзингиз бирга бўлсангиз. Бошқа ўртоқлар ҳам сизни тавсия қилишяпти, вилоят ҳокимиятининг фикри ҳам шу...

— Майли, ўйлаб кўрай...

— Ана холос... Қизиқ одам экансиз...

— Уйдагилар билан маслаҳатлашай ҳеч бўлмаса.

— Нимасини маслаҳатлашасиз, нима, уйдагилар йўқ, борманг, дейиши мумкинми?.. Боринг, паспортни олиб чиқинг. Ўзингиз билан душанба куни Андижонда гаплашиб олаверардим. Шу паспортиңизни деб келдим.

— Чой-пой қилайлик...

— Кейин, буёғи шошилиш...

Бобур номли халқаро жамғарма ва унинг қошидаги халқаро илмий экспедиция мустақиллик шарофати билан вужудга келган эди. Оташ қалбли инсон, ўз халқининг ўтмиши, бой тарихи ва маданияти билан фурурланаидиган, ватан ва эл фидойиси Зокиржон Машрабовнинг саъй-ҳаракати билан ташкил бўлган мазкур жамғарма ва экспедициядан кўзда тутилган асосий мақсад маданиятимиз тарихини, халқимизнинг ажойиб фарзандлари, юртдошларимиз, жумладан Заҳириддин Мұхаммад Бобурнинг илмий, адабий меросини чуқурроқ, кенгроқ ўрганиш, халқимизга етказиш, келажак авлодларга бебаҳо маънавий бойликлар қолдириб кетган улуғалломаларнинг ҳурматини, қадрини жойига қўйиш, умуман маданиятимиз тарихининг кам ўрганилган жаҳжаларига чуқурроқ кириб бориб, янги топилган маълумотлар ҳисобига мозийгоҳларимиз ва халқимиз тасавурларини бойитиш, шунингдек, ёш, мустақил Ўзбекистонимизни чет элларда тарғиб қилиш, танитиш ва бошқа эзгу ниятлардан иборат эди.

Экспедиция ўз мақсадларини амалга ошириш учун шу пайтгача уч марта сафарга чиқди. Табиийки, ҳар қандай илмий экспедициянинг, хусусан, халқаро экспедициянинг бир неча мамлакат бўйлаб саёҳат қилишига рухсат олиш, ҳозирлик кўриш ўз-ўзидан бўлмайди.

Қисқаси, экспедиция 1992 йилги иккала сафар давомида Бобур қадамжойлари бўйлаб бир неча хорижий ўлкалар — Афғонистон, Эрон, Туркия, Сурия, Иордания, Саудия Арабистони, Бирлашган Араб Амриклари ва Покистонда бўлиб, янги маълумотлар, таассуротлар билан қайтди. Энг муҳими, Афғонистон пойтахтидан, ҳарбий ҳолат ҳукм суроётган Кобул шаҳридан Бобур қабридан тупроқ олиб келинди ва шу

тупроқ Андижонда Бобур рамзий қабр-мақбарасининг қад кўтаришига асос бўлди. Бироқ, ҳар иккала сафар ҳам турли сабабларга кўра дастурдаги бош манзил — Бобур ва бобурийлар 332 йил ҳуқмронлик қилган, тарихда улуғ бир салтанат сифатида ном қозонган Ҳиндистон заминига ўтиш насиб этмади.

Экспедиция президенти Зокиржон Машрабов учинчи сафарга узоқ, пухта ҳозирлик кўрди. Дастурга, йўналиш режаларига биноан ҳудудидан ўтиш лозим бўлган мамлакатларнинг Ўзбекистондаги элчихоналари орқали ижозат олиб, ҳар бир паспортга муҳр бостирди.

Нихоят, жўнаш кунимиз белгиланди. Сафар ойининг аввали. Қадимий удумларимизга кўра, бу улуғ ойларда йўлга чиқиш олдидан бажариладиган расм-русларни адо этдик. Хонадонларимизда баҳоли қудрат эҳсон қилиб, оқсоқоллар, мўътабар кишилардан фотиҳа олдик.

* * *

1993 йил, 22 июл пайшанба. Боғишамол.

Кузатув маросими шу кунга, шу жойга тайин қилинган эди.

Эрталаб соат етти. Боғишамол (дарвоҷе, энди у Бобур боғи)нинг энг баланд ва хушманзара жойидаги ошхонада вилоят ҳокимлиги ва Бобур номли халқаро жамғарма ташаббуси билан худойи қилиниб, ош берилди.

Кейин Андижон шаҳри ғарби-шимол тарафда кафтадагидай қўриниб турадиган очиқ майдонда хайрлашув-кузатув йиғини бўлди. Вилоят ҳокимининг биринчи ўринbosари Машариф Юсупов Бобур ва халқаро экспедиция ҳақида гапириб, шундай деди:

— Биз бугун тарихий жойда, тарихга айланадиган бир кунда турибмиз. Бу куннинг аҳамиятини эҳтимол сиз билан биз чуқур англамасмиз, лекин келажак авлод англайди ва қадрлайди. Бобур Андижондан чиқиб кетаётганда тахминан шу жойда тўхтаб, шаҳар томонга юрагида армон билан узоқ тикилиб қолган экан. Билмадим, ўшанда унинг кўнглидан нималар кечган, қандай орзу-умидлар уни олға ундалган... Балки, бир кун қайтиб Андижонда зўр ишлар қиласман, обидалар қураман, деб кўнглига туккандир. Лекин орзуси ушалмади. Унинг бу муқаддас орзу-армонларини энди сиз

билин биз амалга оширмоғимиз керак. Мана шу мақсадда ташкил этилган Бобур номли ҳалқаро илмий экспедиция бугун ўзининг навбатдаги сафарига — Ҳиндистон сари жўнаб кетмоқда...

Шу лаҳзада хаёлимдан қуйидаги сатрлар ўтди:

*Сўнг бор сенга тушиб Бобурнинг изи,
Номозин ўқиди қалтираб тизи.
Ахир қаро эмас, оқ эди юзи,
Нега қайтармадинг эй, Богишамол?*

*Ортига қайрилиб хўрсинганмиди,
Отин ёлин силаб ўй сурғанмиди,
Ё у дил амрига бўйсунгандими,
Нега қайтармадинг, эй Богишамол?*

*Қалбидан отилиб чиққанда ниго,
Тоғу тош берганди унга акс-саго,
Андижонга айтган чоги алвиго,
Нега қайтармадинг, эй Богишамол?*

*Ўсмир шоҳ юртидан бўлганда қувғин,
Қушлар чирқираган, майсалар сўлғин,
Замин титраб, осмон ииғлаган юм-юм,
Нега қайтармадинг, эй Богишамол?*

*Шунчалар кўпмиди унинг гуноҳи,
Оғаю Оллоҳга еттмаги оҳи,
Тулпор, қалам бўлди дўсту паноҳи,
Нега қайтармадинг, эй Богишамол?*

*От жиловин маҳкам туттмадинг нега,
Тилга кириб фарёд эттмадинг нега,
Фофил бандаларни турттмадинг нега,
Нега қайтармадинг, эй Богишамол?*

*Шоир пешин ўтган қутлуғ асирлар,
Шоирсиз юрт-элни ким ҳам қадрлар,
Шоирин қувғани билман на дерлар,
Нега қайтармадинг эй Богишамол?*

...Бошқаларни билмадим-ку, лекин мен ўша лаҳзаларда ниҳоятда ҳаяжонда эдим. Қалбимда шарҳлаш мушкул бўлган ҳиссиётлар қирғоқдан тошаётган дарё тўлқинларидаи кўпираётганга ўхшарди. Кўнглимда тахминан Бобур қадамжойлари, хусусан мен учун афсонавор ўлка туюладиган Ҳиндистонни кўриш, томоша қилиш қувончию, бутун бир вилоят ҳалқи умиди ва ишончини оқлаш учун арзирли иш қилиб қайтаман-микин, деган ҳадик ва масъулият ҳисси уйқаш эди.

Айни вақтда, менда узок сафарга отланаётган, оёғи киндиқ қони тўкилган азиз юртидан узилаётган, кўнгил яқинларидан айро тушаётган одамда бўладиган дилгирлик ҳам йўқ эмас эди. Лекин баридан завқ ва эҳтирослар устивор эди.

Соат 8.15. Биз ёнбошиларига ўзбек, инглиз, араб тилларида «Туркистон», «Андижон», «Бобур номли халқаро илмий экспедиция» деб ёзилган «Тойота» автомашинасига ўтиридик. Машинамиз оҳиста жилди, халойиқ ҳамон бизга қўл силкиб, оқ йўл тилашарди. Бирдан кимдир: «Ие, Фаррух йўқ-ку», деб қолди. Қарасак, у эллик қадамча олдинда чўнқайиб ўтирганча экспедициянинг жўнаш лаҳзаларини тасвирга олаётган экан. Бояқиши шу дақиқаданоқ ишга тушиб кетган эди.

Дарвоқе, экспедиция аъзолари саккиз киши — Зоқиржон Машрабов (раҳбар), тарихчи олим, Бобур номли Андижон давлат дорилфунуни доценти Сайфиддин Жалилов, тарихчи ва журналист, Андижон қишлоқ хўжалиги олийгоҳининг ўқитувчиси Собиржон Шоқаримов, Ўзбекистон илмий оммабоп фильмлар студиясининг оператори, республикада хизмат кўрсатган санъат арбоби Тўлқин Рўзиев, Ўзбекистон радиоси ҳинд эшиттиришлари бўлими мухбири Аҳмаджон Қосимов (таржимон), республика телевидениесининг Андижон вилояти бўйича мухбир-тасвирчиси Фаррух Расулов, ҳайдовчи Обиджон Солиев ва каминадан иборат эди.

Бобур борининг айланаси йўлларидан тушиб, шаҳар ёнбошидан ўтган ҳалқа йўлга чиқиб олдик ва кун ботишга — Кўқон томонга қараб кетдик.

Назаримда, бутун Андижон аҳли, ҳар бир дараҳт, ҳар бир гиёҳ бизни хуш кайфият билан кузатиб қолаётгандек эди. Дилемдан беихтиёр: «Хайр Андижон, хайр эй она диёр, кўришгунча!..» деган сўзлар ўтди. Ҳарқалай, биз камида икки ойлик муддатга, олис, но таниш ўлкаларга жўнаётган эдик-да.

ЎЗБЕКИСТОН ЙЎЛЛАРИДА

Бобурнинг умри ниҳоятда оғир, машаққатлар билан кечган. Ҳаётидан кейин ҳам унга тўғаноқлар кўп бўлган. Қарангки, ҳаммамиз ўзимизда йўқ, хурсанд, чақчақлашиб келаётгандик, йигирма чақиримча юрга-

нимиздан сўнг машина силтай бошлади. Кўнгилларга озгина фулфула тушди. Овозларимиз ҳам пасайди. Ҳайдовчи бир неча марта тўхтаб, корбюраторни то- залади. Машина бир оз муддат яхши юрадио, ке- йин яна ўз-ўзидан секинлай бошларди. Бўлмади. Қўқон шаҳридан чиқаверища устахонага кирдик. Фильтр ал- маштирилди.

Йўлга тушдик. Машинамиз анча дуруст бўлиб қол- ганга ўхшарди.

Ўзаро сұхбатимиз давом этди. Собиржон аками, кимдир: Қўқон аёллари тўладан келган бўлади, агар шунаقا бўлмаса, билингки у асли Қўқонлик эмас, бош- қа шаҳардан келиб қолган, деб ҳазиллашган эди, шу муносабат билан ҳар ким шаҳарлар ва аёллар мавзуида ўз тасаввур ва тушунчаларини гапириб кетди. Кўп ўтмай, сұхбат мавзуи Бобурга кўчди.

— Қаранглар-а, улуғ бир одамнинг шарофати би- лан иккинчи бир улуғ мамлакатга отландик, — деди Зокиржон ака ички бир қоникиш ва фарх билан.

— Мана шу йўллардан Бобур неча марта ўтган — Самарқанд — Хўжанд — Ўратепа томонларга, — де- дим, мен ҳам ўзимни сал чалғитиб, бошимдан ғамгин хотираларни узоқлаштириш учун.

— Ҳа, эндиғина босиб ўтганимиз Тақачи қишлоғи- дан ҳам ўтган, — деб тасдиқлади Сайфиддин ака, — ҳозир у жой Бобур номли жамоа хўжалиги экан...

Мен Пиримқул Қодировнинг «Юлдузли тунлар» романида Бобурнинг «Андижоним», дея юрак-бағри эзилиб, тож-тахт ташвишларидан безиб, ёлғиз ўзи (шу яқин-атрофда) яланг оёқ тофу тош кезиб юрган чоғла- рини ўқиганимда шоҳнинг бу аянчли аҳволидан фоят таъсирланиб ёзган шеъримни эсладим:

ШОҲ БОБУР ҲАСРАТИ

Танг шоҳлиқдан кечайин, деги,
Тор зар тожни ечайин, деги,
Яланг тупроқ кечайин, деги,
Ховучлаб сув ичайин, деги,
Тигдай ботди сипоҳлар оҳи:
— Шаъннингизга ярашмас, шоҳим.

Ёхуд жангни бас қилсан, деги,
Ёхуд юртга от курсам, деги,
Майли, гарчанд енгилсан, деги,
Тупроқ билан тенг бўлсан, деги,

Туғдай ботди сипоҳлар оҳи:
— Шаънингизга ярашмас, шоҳим.

Андижоним — имоним, деги,
Аввал-охир маконим, деги,
Бир кўрмаклик армоним, деги,
Олсалар ҳам минг жоним, деги,
Туғдай ботди сипоҳлар оҳи:
— Шаънингизга ярашмас, шоҳим.

Туғилганди шоҳдан шоҳ бўлиб,
Қон тўймасдан, бегуноҳ бўлиб,
Тождан кечиб ва дилҳоҳ бўлиб,
Яшолмасди ҳур, фараҳ бўлиб,
Енгилишга ҳаққи йўқ эди
Ва ўлишга ҳаққи йўқ эди.

Конибодом, Патар, Пистакўз, Қўштегирмон каби шаҳар ва қишлоқларни босиб, Бекободдан чиқаётган эдик. Шу ерда божхона ходимлари: «Бу қанақа экспедиция, сизларга ким рухсат берди, нима олиб кетяпсизлар», деб бир оз дикқат қилишди. Шунданми, сал гангид, йўлни ҳам йўқотиб қўяёздик. Тўғрироғи икки йўлдан бирини танлаш керак бўлиб қолди. Зокиржон aka ҳайдовчи ёнида штурман — йўл кўрсатувчи бўлиб кетаётган эди, билмаган яқин йўлдан, билган узоқ йўл яхши деб, Зомин томонга бошлади.

Зомин туманидаги 15-давлат хўжалиги ҳудудида кетаёттан эдик, Зарбдор туманига озгина қолувди. Машинамизнинг орқа бурчагига жойлаштирилган, эҳтиёт учун 300 литр солярка қўйиб олинган бок тешилиб, мой оқа бошлади. Қалин темирдан қўлда шошилинч ясалган бу катта идиш думалоқ эмас, тўрт қиррали бўлиб, одатий шакл талабига жавоб бермас, шунинг учун, машина тормоз босиб ё газ бериб силтанган чоғида оғир юқ автобуснинг орқа деворига зарб билан урилавериб, остки чоқидан дарз кетган эди. Соляркани машина бокига кетганича қўйдик.

Дунёнинг тескарилигини қарангки, заруратда пулга топилмайдиган ёнилгини бекорга берамиз десак оладиган одам топилмайди. «КамАЗ»ларга қўл кўтарсан, ҳайдовчилари бош чайқаб ўтиб кетишади, бир трактор анча ўтиб, қайтиб келди, боким тўла, деб у ҳам кетди. Етмиш ёшлардаги бир киши келиб қолди, идиш олиб келиб, соляркадан қўйиб кетинг, десак, э, керак эмас, дейди. Хуноб бўлдик, тўкиб юборишга кўз қий-

майди. Салкам 300 литр солярка-я! Камида қирқ минг сўмлик ёнилғи!

Соляркани оқизиб, йўлга тушдик. Бир юмронқозик чап қирғоқдан йўлни кесиб югуриб ўтди-да, четтачиқиб орқа оёқларида тик турганча худди ақлли жонивордай бизни, машинамизни ва чак-чак қилиб томиб бораётган ёнилғини ҳайрат билан, қизиқиб кузатиб қолди.

Яқин-орада маҳалла кам, идора ё ташкилот ҳам кўринмас эди. «Тараққиёт» давлат хўжалиги деган йўл белгиси кўрсатган томонга юрдик. Гаражини топиб, иложи бўлса, идишимизни алмаштириб олмоқчи эдик. Хўжалик маркази катта йўлдан анча ичкарида экан. Идорада раҳбарлар йўқ экан. Қайси бир бўлимда мажлис бўляпти, гараж бошлиқлари ҳам ўша ёқда, бу ердан анча олис, дейишди.

Жиззахга етиб олишга қарор қилдик. Орқага қайтиб, катта йўлга чиқиб олдик. Автобус ичини солярка ҳиди тутиб кетди. Бу ёқимсиз ҳид колбаса ва бошқа озиқ-овқатларга ҳам уриб, бошларимиз оғрий бошлади. Нима қилиш кераклиги тўғрисида муҳокамага тушиб кетдик. Саккиз одамдан саккиз хил мулоҳаза чиқди. Бирор шу идишнинг, солярканиям баҳридан ўтиш керак, ташлаб юбориш керак, деса бошқаси, узоқ сафарга кетяпмиз, ҳали йўлда бунақа бочкага, бир литр соляркага зор бўлишимиз, мумкин, деб ҳаммани иккилантириб қўяди. Аниқ бир тўхтамга келолмаймиз. Секин-аста уф тортишлар бошланди. Бир-биrimизнинг кўнглимиизни кўтаришга ҳаракат қиласиз. Солярка эса оёқларимиз тагига оқиб, кийим, нон солинган қопчиқ, халталаримизни булғар, буруқсаган ҳид димоқларимиз, бурунларимизни ачишитирарди. Ойналарни очиб юборсак ҳам фойдаси бўлмади.

Мана сизга экспедиция! Мана сизга сайру саёҳат! Бошланиши шунақа бўлса..

Вақт номозшомга яқинлашиб қолган эди. Йўл четига чиқиб тўхтадик. Бок жўмрагидан соляркани оқизиб қўйдик. Сайфиддин aka шом ўқиш учун майсазорга тушди. Кун қизариб ботмоқда, унинг алвон шуълалари атрофга таралиб, оламни гўзаллаштириб юборган эди. Табиатнинг мана шу жозибали, ғоятда фусункор ҳолати, нафас олсангиз ўпкангиз яйрайдиган ҳалим ҳаво, ёқимли бир сокинлик руҳимизни, кайфиятимизни анча кўтарди. Шу пайт орқадан тахта юклаган иккита «КамАЗ» келиб, бизнинг машинамиз-

га етмасдан тўхтади. Ҳайдовчилар ёш-ёш йигитлар экан, ёнимизга келиб, ерга оқаётган соляркага қараб ҳайрон бўлишиди. Биз тушунтиридик. Сизлар қуийб олинглар, дедик. Бизга талон берадилар, пулимиз йўқ, дейишиди. Текинга, кўряпсизларку барибир тўкиб юборяпмиз, деганимиздан кейин улар 3—4 пақир олишиди. Ўчакишгандай, уларнинг бокида ҳам солярка деярли тўла экан.

Бу орада қуёш ботиб, кўқда янги ой кўринди. «КамАЗ» ҳайдовчилари билан бир оз сұхбатлашдик. Шаҳрисабздаги 27-ХАТП да ишлашаркан. Улардан бири — Сайдулло Мелиев анча киришимли, тарихни дуруст биладиган йигит экан. Бобур аждодлари, Амир Темур, унинг Шаҳрисабздаги машҳур Оқ саройи ҳақида гаплашдик.

— Асли экспедиция сафарини ана шу Оқ саройдан бошлиши керак эди, — дейди Сайфулло.

Қоронғи туша бошлиган, бок жўмрагидан жилдираб тушаётган солярка ҳали-вери тутайдиган эмас эди. Йўлга тушдик. Жиззахга яқинлашиб Бобур номли жамоа хўжалиги ҳудудидан ўтаётган эдик. Дастрраб рўпара келган хонадонлар оддида тўхтаб, бир ҳовлини чақирдик. Улар қўщниларига хабар беришиди. Ҳар хил катта-кичик идишлар олиб чиқишиди, машина орқасини қулай жойга тўғрилаб, бок жўмрагини солярка кўпроқ ва тезроқ тушадиган қилиб очиб қўйдик.

Солярка эвазига бизни ўз илтимосимизга кўра айрон, нон-чой билан сийлашди. Сув қайнаттириб, термосларимизга қуийб олдик. Сафардаги биринчи кечки тановулимиз шу бўлди. Темир бочкамиз бўшагач, елкамиздан тоғ қулагандай, ҳаммамиз енгил тортиб йўлга тушдик.

Лекин машинамиз яна «йўталиб» акса ура бошлиди. Обиджон ака ҳар замонда, кейинроқ тезда-тезда тўхтаб, машина остига кирадида, фильтрга кириб қолган ҳавони чиқариб ташлайди. Машина бир оз яхши юради-да, яна силкиниб, секинлай бошлиди.

ЎЗ ЮРТИНГДА АДАШМА...

Жиззахдан ўтгандан кейин рулга Зокиржон ака ўтириди. Мен раҳбаримизни бадиий фильмлардаги ҳар қандай ишни қилиб кетаверадиган бош қаҳрамонларга ўхшатиб юбордим. Дарҳақиқат, у машинани уdda-

буронлик билан бошқариб, машина секинлаганда уни ўз ҳолига қўйиб берар, беш дақиқалардан кейин газ-тезлик ўз-ўзидан кўтарила бошларди.

Тун, қоронғи, қатнов кам бўлгани, йўлни яхши билмаганимиз учун сўраб-сўраб кетавердик. Машинани кўздан кечиртириб олиш учун Жума шаҳридаги «Тойота» устахонасига кириб ўтишга қарор қилган эдик.

Самарқанднинг ўнг ёнидан ўтадиган катта трассада тўхтадик. Йўл сўрашга бир зот кўринмас эди.

Ўнг томонда Зарафшон дарёси шовуллаб оқиб турибди. Тўлқин мавжларида Самарқанд осмонининг юлдузлари жилваланиб қўзни олади: гўё олтин сочиб юборилгандаи... Бу осмон менга жуда паст, ерга анча яқиндай, юлдузлар кўп ва бошқа жойлардагига қарангандা ўзгача фусункорлик билан нур сочаётгандай туолди.

Балки, ростдан ҳам шундайдир. Улуғ мутафаккир, жаҳон мунахжимларининг сардори Мирзо Улуғбек юлдузларни кузатиб, ўрганадиган машҳур обсерватория учун Самарқандни бежиз танламагандир.

Мағрибдан эсаётган салқин шаббода дарёning намхуш шамоли билан омӯхталалиб, кўнгилга ҳузур ва роҳат бағишлайди. Беихтиёр енгил тортиб кетасан киши.

Самарқанд... Ҳа, «сайқали рўйи замин...» қадимий Турон, Мовароуннаҳрнинг маданий марказларидан бири, не-не хонлару подшоларни ўзига асир айлаб, оқибатда ўзи ҳам не-не фожиалар, вайронгарчиликларни бошидан кечирган бу кўҳна ва азим шаҳар жаҳон тарихида ўзига хос, алоҳида ўрин тутади. Амир Темур Мовароуннаҳрда марказлашган давлат барпо қилиб, Самарқандни пойтактга айлантирди. Заҳиридин Мұҳаммад Бобур бобоқалонининг парчаланиб кетган құдратли давлатини қайта тиклаш иштиёқида Самарқандга от суради. Уни бир неча бор қўлга кирилади, яна бой беради.

Бобур Мирзо ана шу Самарқандда суюкли ва меҳрибон опаси, қадрдан маслаҳатгўйи, ҳали бир гули ҳам очилмаган Хонзода бегимни ашаддий ёғийси, унинг бутун ҳаётини алғов-далғов қилиб, орзу умидларини пучга чиқариб юборган, аскарларию яқинларини пароканда этиб ташлаган Шайбонийхонга хотинликка қолдириб кетишига мажбур бўлади... Умрининг охиригача армон бўлиб қолган ана шу Самарқанд ўртага

тушмаганда, эҳтимол Бобур Мирзонинг ҳаёти бу қадар дарбадарликка юз тутмаган, ўз туғилган Андижонидан айро тушмаган бўлармиди. Афғонистонда, Ҳиндистонда қурган обидаларини, бошқа улуф, хайрли ишларини Андижонда амалга оширавмиди... Яна ким билади, дейсиз. Балки тақдир тақозоси шудир...

Чўғдай юлдузлар гужғон ўйнаётган мафтункор са- монинг жўшқин дарёдаги аксига тикилиб, шуларни хаёлимдан кечирдим.

Шериклар ҳам атрофга тарқаб кетишган, Зараф- шон тунининг мусаффо ҳавосидан тўйиб-тўйиб на- фас олиб, уйқуларини қочириш учун дарё бўйида у ёқдан бу ёқда бориб келишарди.

Биз қаёқса юришни билмас эдик. Таваккал қил- макка ботинмадик — вақтнинг, ёнилғининг беҳуда сарф бўлишини ўйлардик. Ахир заҳирарадаги бор со- ляркани одамларга улашиб тутатдик-ку.

Нихоят, рўпарадан «Тез ёрдам» машинаси кўринди. Тўхтатиб, йўл сўрадик. Улар кўрсатган тарафга қараб юрдик. Аммо яна адашиб кетдик. Самарқанд- нинг янги мавзеларини айланиб чиқдик. Шунда мен ўз юртимизни ҳам яхши билмаслигимиздан ўқиндим ва ўз кўчаларимиздаки шунчалик сарсон бўлиб юриб- миз, бутунлай нотаниш хорижий юртларнинг йўлла- рида қай аҳволга тушар эканмиз дея фаъландим.

Шунақаям тинч шаҳар бўладими, биронта тирик жон кўринмаса-я, дейман. Фалтак аравада ахлат олиб кетаётган кекса бир рус учраганда тунги соат икки ярим эди. Унинг маслаҳати билан юриб, яна бурила- диган чорраҳадан анча ўтиб кетибмиз. Дарвазаси ол- дида чўнқайиб тамаки чекиб ўтирган майкачан одам орқага қайтишимиз лозимлигини айтди. Хотини билан ғижиллашиб қолган бу кимса уйқуси қочиб, зе- рикиб турган экан, кимлигимиз, қаердан келаётгани- мизни сўради, йўлни роса майдалаб, узоқ тушунтирди. Хуллас, шу тариқа, Жума шаҳарчасидаги Самар- қанд вилоят механика устахонасини тонгга яқин, соат тўрт яримда, эртаки хўроздар бирин-кетин қичқира- ётган маҳалда топиб бордик. Қоровул аҳволимизни тушуниб, ичкари киришга ижозат берди. Бир-иккита- миз бетон супачада, қолганларимиз машинада андак мизғиб олиш учун омонатгина ёнбошладик.

Шу бир кун, Боғишамол (Андижон)дан Жума ша- ҳарчасигача бўлган масофа менга жуда узоқдай туюл- ди ва бир неча кунлик йўлни уйқусиз босиб келган-

дай, ниҳоятда ҳориган эдик, ҳаммамиз бир неча лаҳза ўтмай қаттиқ уйқуга кетдик.

Бобур номли ҳалқаро илмий экспедиция сафари-нинг биринчи куни ана шундай кечди.

23 июл, жума.

Бор-йўғи икки соатча ухладиму лекин мириқиб дам олибман чоғи, тетик уйғондим. Соат еттидан ўтганда ишчилар бирин-кетин кела бошлиқларни кутар эдик. Кечаги кун воқеаларини, сарсонликларни эслаб, муҳокама қилиб ўтиридик. Заҳира бок тешилиши ҳодисаси янгилик эмас экан. Ўтган галги сафар чоғида ҳам худди ана шундай темир идиш олишган, лекин у Бухородан ўтганда иш кўрсатиб, ташлаб юборишган экан.

— Банданинг хом сут эмганлиги шу-да, — деди Зокиржон aka қулиб. — Бу сафар бошқачароқ иш тутиш керак эди. Обиджон акага ишониб, ўзим шуғулланолмадим-да.

— Эҳтимол парвардигор, э, бандам, кўзингни оч, бу ишинг яна хом, деб шундай қилгандир, — деди Сайфиддин аками, кимдир. ... — Машинаниям ҳунар кўрсатганини қаранглар...

— Балки, — деди Тўлқин Рўзиев, — Бобур Мирзо руҳи биз билан юрган бўлса, булар мусофири юртларда қийналишмасин, шу ердан пухталаниб олишсин, деягтандир...

Ха, машқда қийин бўлса, жангда осон бўлади, дейишади. Бу кунларимиз ҳали машқ-да. Ажаб эмас, машинамиз яхши тузалиб йўлимиз равонланиб кетсан...

Барча мутахассис-усталар йиғилишиб, ҳудди шифокорлар консулиум ўтказгандай, муҳокама қилишиди, ҳамма ўз тахминини айтди, маслаҳат берди. Яна ковлаб кетишиди. Фалон жойи фалон бўлган экан, писмадон қилдик, энди юради, дейишади. Синаш учун ўттиз чақирим нарига бориб келишади. Бир гал мен ҳам бирга бордим. Дарҳақиқат яхши кетади, қайтишда, яна ўз-ўзидан тезлик пасая бошлайди...

Бечора бошлиқ, муҳандис ва бошқа мутасадди кишилар ҳам ҳайрон ва хижолат. Бири қўйиб, бири тўхтовсиз усталар ишидан хабар олиб, биздан ҳам ҳол-аҳвол сўраб туришади. Хуллас, устахонанинг омборчисиу ҳаммомчисигача атрофимиизда парвона. Биз

улардан хижолат бўлиб, сизларни ҳам анча уринтирип дик, деб узр сўраймиз. Ёш бошлиқ Шукрулло: «халқимиз маданиятини, Бобур меросини ўрганиш, тўплаш йўлида Сиздек хайрли иш бошлаган кишиларга ёрдам бериш ҳамманинг бурчи, бизнинг эса оддий вазифа-миз», дейди сидқидилдан.

Ва ниҳоят, қусурни топиши. Бочокка кир тўпланиб қолган экан. Бешинчи бор синиб қелиши, машина-нинг ростдан ҳам тузалганига ишонч ҳосил бўлгач, устахонанинг қоровулигача «рози» қилиб, хайр-хўшлашиб, йўлга чиққанимизда вақт номози аср эди.

Энди олдимиизда солярка муаммоси кўндаланг бўлди. Бугунги синовларда ёқилғимиз тугаган эди. Гўзалкент тумани ҳокимлигига кирдик, ҳоким мажлисда экан, кутиб турдик, у чоракам бир соатлардан кейин чиқди, «Беш қаҳрамон» жамоа хўжалигига кўнфироқ қилиб, 50 литр солярка қўйиб беринглар, деб тайинлади.

Қоронғида «Беш қаҳрамон»ни излаб кетдик, эсизгина кеча дуч келганга қўйиб берилган, тўкиб юборилган соляркалар! Мана, бир кун ўтмай ўзимиз тиланиб ўтирибмиз. Лекин бари бир кайфиятимиз чоғ, чунки машинанинг тортиши чиндан ҳам яхши бўлиб қолган эди. Кўз тегмасин ишқилиб...

Соат тунги бир яримларда қадимий Бухорага кириб бордик. Шаҳар четроғига тушган муҳташам «Вараҳша» меҳмонхонасида жой йўқ экан, ундан сал наридаги «Зарафшон» меҳмонхонасига тушдик. Биз Тўлқин aka иккаламиз иккинчи қаватдаги бир хонага жойлашдик. Меҳмонхона ташқаридан ҳашаматли, салобатли кўринса-да, хоналаридаги шарт-шароит, жиҳозлар сифати ўртacha эди. Дарвоҷе, узоқ йўлдан чарчаб келган, сафардаги одамга буларнинг унча аҳамияти ҳам йўқ-ку.

24 июл, шанба.

Ётишда деразани очиб қўйган эдик. Саҳарга яқин безовталаниб уйғониб кетдим. Устим ҳам очилиб қолган экан, чивин (Андижонда уни «паша» деймиз) чақиб, аъзои баданимни фурра қилиб ташлабди. Меҳмонхонада ҳам паша бўладими, деб ажабландим, лекин бу ҳали ҳолваси экан. Тоғора-ваннага тушиб, муздей сувда ювиниб чиқдим-да, маҳкам ўраниб ётдим.

Соат олтига јқин турдим. Ҳамма, ҳатто мөҳмонхона хизматчилари ҳам уйқуда эди, занжирланган эшикларни очиб, ташқарига, мөҳмонхона олдидағи кенг майдонга чиқдим. Ҳаво ниҳоятда сўлим эди. Умуман, одатда, «қўшнининг товуғи фоз кўринади, хотини қиз», деганлари дай, янги, нотаниш жойнинг ҳавоси сўлимроқ, манзаралари гўзалроқ туюлади. Лекин ҳарқалай, бу жойнинг табиати менда ўзига хос таассурот қолдирди. Қуёш жуда пастдан, шундоққина бир қаватли уйлар орасидан аста, қизғиши товланиб кўтарилиб келаётган эди.

Бухорага бундан йигирма етти йил аввал, Тошкент дорилфунининг учинчи курсида ўқиётган пайтимда келган эдим. Ўшанда бу шаҳар кўзимга эски, кичкина ва анча хароб кўринувди. Ҳозир шаҳар жуда кенгайиб, атрофи чиройли бўлиб кетибди. Кўчалар, дараҳтлар, хиёбонлар ёш, лекин батартиб эди. Афсуски, биз тунаган «Зарафшон» мөҳмонхонаси ёнидаги мўъжазгина хиёбонга кўрк бериб турган чинорлар остки, бачки япроқларидан қурий бошлаган эди. Ажириқ ва бошқа жайдари кўкатлар табиий ҳолда ўсиб ётган майсазор ҳам сувсизлиқдан сарғаймоқда эди.

Шаҳардан чиқаверищдаги чойхонанинг биринчи чойхўрлари биз бўлдик. Ҳали чой ҳам қайнамаган экан. Бўйга етмаган, соддагина кийинган қиз чойхона олдини супураётган эди.

Нонуштадан сўнг Туркманистон сари — Чоржўйга қараб йўл олдик.

Қадимги Моҳан дарёсидан чиққан Мулиён дарёси, қадимий шаҳардан қолган вайронга, Варгамза тепалиги ёнидан ўтдик. Умуман Бухоро ҳақида гап кетганда «қадимий» деган сўз кўп ишлатилади. Бу табиий ҳол. Чунки бу кўхна шаҳар Қизилкум ҳудудидаги қадимий одамлар яшаб келаётган қадимий жойдир. «Бухоро» сўзининг ўзи ҳам исломдан анча аввал пайдо бўлган.

Атроф-манзараларни завқ билан томоша қилиб, бу жойлар номи, иқлимини муҳокама этиб, тарих билан ҳозирги ҳолатларни муқоясалаб борарадик. Ҳар қадамда учрайдиган ДАН (давлат автомобил назорати) деган тўсик, божхоналарнинг ходимлари тўхтата-вериб безор қилишини ҳисобга олмагандан сафари-миз яхши давом этмоқда эди. Зокиржон aka Машрабов ҳар сафар йўл тўсувчиларга гоҳ ҳис-ҳаяжон билан, гоҳ асабийлашиб, Бобур ҳақида, экспедиция-

нинг мақсад ва вазифалари ҳақида узундан-узоқ, изоҳ беришга мажбур бўларди.

Чоржўй ҳудудига ўтаверишдаги чегарада Ўзбекистон божхонаси, сал нарида Туркманистон божхонаси тўхтатиб, ҳамма ҳужжатлар, паспортларни, одамларни, машинамизни обдан текшириб ўз дафтарларига қайд этишгандан кейингина қўйиб юборишиди. Битта асосий ғовдан, чегарадан ўтдик, деб енгил нафас олдик. Бироқ...

ТУРКМАНИСТОН ЧЎЛЛАРИДА

Бироқ, кўп ўтмай Чоржўй вилоят автомобил назоратчилари яна темир ғов билан тўсишди. Ҳужжатларни шоцилмасдан вараклаб, титкилаб, анча тутиб туришиди. Улар икки киши эди. Биттаси (ёшроғи) Туркманистон Республикаси ҳукумати қарорига кўра икки юз доллар товон тўлайсизлар, деб шарт қўйди. Иккинчи бир сержант совғалар рўйхатини кўздан кечираётисб, дўппидан кияйлик, деб қолди. Бажонидил рози бўлиб, одатда хорижлик меҳмонларга совға қилинадиган босма дўппидан иккита бериб ўтиб кетдик. Ишимиз биттанига суюндиқ.

Туркманистон ҳудудига ўтишимиз билан эътиборимизни жалб этган янги нарса онда-сонда кўзга ташланиб қоладиган туялар бўлди.

Амударёдаги паромни сув оқизиб кетган, дейишди. Шунинг учун Чоржўйга кирмасдан, етмиш чақиримлик масофадаги Элжик деган жойга қараб кетдик. Саҳрони гўё қоқ иккига ёриб ўтган ўқдай йўлдан боряпмиз. Йўл тўғри, фақат паст-баланд эди. Гоҳ қуйига шўнғиб, гоҳ тепаликка ўрлаймиз. Йўлнинг икки томони поёнсиз саҳро-юлгинзор эди. Ичкарироқдан саксовулзорлар бошланарди. Саксовулнинг танасидан томири узун бўлади, дейишади. Нам қидириб ўсаверса керак-да.

Қорақум томонга яқинлашганимиз сари саксовулзор қалинлаша борарди. Бепоён ерлар... Сув бўлса бас... Умуман, ер ости бойликларига сероб Туркманистоннинг ер усти имкониятлари ҳам ҳали кўп экан. Нариги чеккасини кўз илғамайдиган, лўмиллаган тупроқли саҳроларда саксовулки ўсяпти, демак остида нам бор—ҳаёт учун манба бор, қачондир мана шу ерлар ҳам ўзлаштирилиб, янги шаҳарлар қад кўтариши тайин.

Жайхун (Амударё) қирғоига етиб бордик. Тизза бўйи тупроқ-қум барҳанлари орасидан юриб, паром турган дарё лабига яқинлашдик. Иккита «КамАЗ», бир катта автобус турибди. Соат бир ярим, паромчилар тушлик қилишаётган эди.

Паромга машиналар чиқарила бошлагач, Тўлқин ака билан Фаррух ишга тушиб кетишди. Уларнинг кинога, телевизорга олишаётганидан хабар топган бошқа сайдёхлар бизни ўраб олишди. Қаёқдандир рубобчи, доирачилар пайдо бўлиб, ашулани бошлаб юборишли. Тижорат мақсадида Эронга ўтиб кетишаётган қирғиз жувонлари бир-бирларини қистасиб, ўйинга тушишди. Ўртада катта доира-майдон ҳосил бўлди. Ўйинга жалолободлик, бухоролик, хоразмлик, туркманистонлик йигитлар, аёллар қўшилиб кетишли. Бир ажойиб концерт бўлди. Ўйин-кулги авжга чиқди.

Паром дегани ҳам жуда кенг нарса бўлар экан. Каттароқ томга нисбатан «камбағалнинг ҳовлисидаи» деган муболага ишлатиларди, бу паромни бемалол «бойнинг ҳовлисидаи» деб таърифлаш мумкин. Иккита узундан-узун «КамАЗ», учта автобус, ўнга яқин енгил машина сифиб кетди-я!

Паром худди улкан кемадай оҳиста жилди. У дарё оқимиға қараб, нариги соҳилдаги махсус жойни мўлжаллаб сузиб борарди. Дарё суви бўтана, тўлқинлари сиртдан унча сезилмаса ҳам қудратли эди. Паром чайқалганида юзага келадиган тўлқинлар қирғоқча бориб залвор билан урилар, кучли шалоплаган товуш бемалол эштилиб турар эди. Бу анча ваҳимали ҳолат эди. Аёллар қий-чув қилиб, бир-бирларига, ҳатто ёнидаги номаҳрам эркакларга ҳам маҳкам ёпишиб олишарди.

Хуллас, Жайхуннинг у бетига ўтиб, дарё бўйлаб яна деярли орқага — Чоржўйга (йўл кўрсаттичларда русча «Чаржев» ёзилган) қараб кетдик.

Туркманистонга ўтишимиз билан машҳур туркман қовунининг тил ёరар ширинлиги ҳақида гап очилган, учраса албатта олиб еймиз, деб ният қилган эдик. Лекин аксига олиб, негадир йўл бўйларида қовунтарвуз сотаётганлар ҳам, қовун пайкалларининг ўзи ҳам кўринмас эди. Бухоро далаларидағи каби бу томонларда ҳам қуёшга салом бериб, ўзи униб чиққан заминга таъзим қилиб турган кунгабоқар кўп эди.

Ўзаро сұхбатларимиз давом этарди. Дунёда Навоий машҳурми, Бобурми деган баҳс кетди. Сўз санъат-

кори, ғазал мулкининг султони сифатида Алишер Навоийга тараф йўқ, «Бобурнома» муаллифи ва шоҳ сифатида Захириддин Муҳаммад Бобур машхур, деган холосага келинди.

Яна етмиш чақиримдан зиёд ортиқча (бориш — қайтиши 140 чақирим) йўл босиб, Чоржўйга келдик. Асов Жайхуннинг бебошлиги боис, бунақа аворагарчиликлар азалдан бор экан. Қанча ёнилфи, қанча вақт бекорга сарф бўлди-я! Техника тарақкий этган, фазолар алгов-далгов қилинаётган замон бўлса, шу бир дарёга мустаҳкам кўприк қуриш нима деган гап, деб ҳайрон бўласан киши.

Шаҳарга кирганимизда бир аёл қўл кўтариб қолди. Йўлни сўраймиз, деб чиқариб олдик. Буғдой ранг юзли, қош-кўзлари қоп-қора, сарвқадгина, ёшгина бу жувон темир йўл бекатида ишлар, исми Раъно экан.

— Туркман қизимисиз, — деб сўрадик.

— Йўқ, — деди у шартта, — бу ерда туркман жуда кам, лекин ҳамма ўзини туркман деб ёздириб олган...

Раънонинг ҳаворанг катак кўйлаги этаги қарийб тўпифигача тушар, қалин қора сочлари ҳам, бошига турмакланган бўлса-да, кўйлагининг этаги билан бемалол бўйлаша оладиган даражада узунлиги сезилиб туради.

Муҳаммад Юсуфнинг «Туркман қизга уйланаман» деган шеърини эслашдик. «Бу қўшиқ бизда ҳам машхур», деди Раъно. Биз ҳамюрт шоиримиз билан фаҳрандик.

ТУРКМАН ҚИЗЛАРИ...

Кўчанинг ўнг томони паҳтазор, чап тарафи эса полиззор эди. Бу кенг далалар қараб туриб зерикиб кетадиган, кўз толиқадиган даражада поёнсиздай туюларди.

Бундан бир неча ўн чақирим олдин, йўлдаги ДАН бўлимидагилар автобусимизга чиқариб юборишган бир кимса (қошлари сийрак, тухум бошли, кўзлари ичига ботган бу кимса кинолардаги шубҳали одамларга ўхшар, индамас эди) қовун-тарвуз пайкалига кириб кетган экан, қовун кўтариб чиқди, унинг ортидан иккита мўйсафида ҳам қовун-тарвуз қўлтиқлаб келишди. Сайфиддин Жалилов ташаббуси билан қисқагина танишув маросими ўтказилди. Отахонлар-

дан бирининг исми Берди оға, иккинчисиники Қақажон оға экан.

— Туркманлар отасини «қақа» дейди, — тушунтириди у ўз отига изоҳ бериб.

— Биз така туркманларданмиз, — деб қўйди Берди оға ўзларини бизга яхшироқ таништириш учун.

Қоракўл телпакли, чўқчи соқол, аммо мўйлови қирдирилган Қақажон оға Махтумқули давридаги кексаларни эслатарди. (Шундоқ саратонда телпак кийиб олишганини, бошлари терлаб, ачиб кетмасмикин деб таажжубландим ва ўзимга ўзим жавоб бердим: ахир бу телпак уларнинг миллий бош кийими-да!)

Бу жой Маридан 70 чақирим беридағи Байрамали районига (Туркманистанда бу атама ҳали ўзгартирилмаган эди) қарашли «Заҳмат» деган давлат хўжалиги ерлари экан. Қовун кўхна кўкча деган уруғдан экан. Қовуннинг каттароқ, банд берганини сўйувдик, пиҷоқ тегиши билан тарс этиб ёрилиб кетди. Аммо ичи негадир фўроқ, мазаси ҳам биз кутганчалик ширин эмас эди. Тарвузнинг кичикроғи ширин чиқди.

Каттароқ, бир қовун, кичикроқ, бир тарвузни олиб, хайрлашдик. Бизни Бобур юртидан меҳмон экан деб сийлашди чоғи, пул узатсак, олишмади. Боя ўспиринлар билан ҳазиллашиб анча тортишган эдик. Бола эканда, тарвузларининг хомлигини, еб бўлмаганлигини кўриб туришибди, барибир ҳар бирига икки юз сўмдан берасизлар, отам сўқади, дейди...

Ҳадемай, ёнма-ён икки ўзанда оқаётган Қоракўл каналидан ўтдик. Қуёш қип-қизариб ботаётган палла. Бу жойлар анча тепалик эканми, қуёш пастдан чиқиб, пастта, худди ерга ботадигандай тасаввур уйғотарди. Бунинг устига қуёш гўё кечикаётгандек, шу даражада тез ва ажойиб бота бошладики, беихтиёр Мақсуд Шайхзоданинг денгиз бўйидаги шундай ҳолатни тасвирлаган шеъри ёдимга тушди. Бу гўзал ва бетакрор манзарани Фаррух ҳам тасвирга олишга улгурмаганидан афсусланиб қолди.

Тарих китобларида кўп тилга олинадиган Мурғоб дарёсидан ўтиб, Марига кириб борганимизда аллақачон қоронғу тушган эди. Шаҳар бизни неон чироқлари ёғдусида товланиб турган «Марв 2500 ёшда» деган улкан ҳарфлардаги чиройли ёзув билан қарши олди. Марв чиндан ҳам жуда қадимий ва машҳур шаҳар. Бу ном хусусан биз томонларда энг узок ўлка,

жой, деган маънони англатиш учун ҳам қўлланган. Муқимий: «Мулки Ҳинду Марвдин келсам, топардим эътибор...» деб беъжиз ёзмаган. Қаранг, шундоқ мазмундор ва салмоқли сўз, тарихий ном русчада осон талаффуз этилиши учун жўнгина «Мари» деб юритилади-я!

«Санжар» меҳмонхонасидан жой олдик. Қўноқхона ҳақи Туркманистон фуқароларига 1,5 минг сўм, бошқа юртдан келганлар учун 2250 сўм экан. Биз томонда «Туркманистонда ҳамма нарса арzon эмиш, жаннат эмиш» деган гаплар юради. Ҳолбуки, озиқовқат ҳам, бошқа нарсалар нархи-навоси ҳам биздагидан кам эмас эди. Яна ҳар бир муюлишда, йўлларда президентнинг улкан суратлари, унинг нутқларидан келтирилган парчалар... уни мадҳ этувчи, масалан, «Меҳрибон президентимиз соғ бўлсин...» қабилидаги шиорнамо гаплар...

Меҳмонхона жуда қўркам, салобатли, шинам, олдидағи майдон ҳам худди Бухоронинг «Зарафшон» меҳмонхонаси майдони каби озода, саришта эди. Чиройли фавворачалар ишлаб турибди, енгилгина шабода эсяпти. Бир оз айланиб юрдик. Узун кўйлакли асл туркман қиз-аёллари шу ерда экан. Уларни кузата туриб, бизда ўзбек қиз-жувонлари фарб аёллари таъсирига берилиб кетган, бу юртда аксинча, рус ва бошқа фарб миллатларига мансуб хотинларга туркман аёлларининг таъсири кучли экан, деган холосага келдим. Чунки улар ҳам туркман қиз-жувонлари сингари узун-узун либос кийиб юришарди. Туркман қизларининг лаб-қовоқлари бўялгани ҳам жуда кам эди. Балки, ташқи таъсирга берилиш-берилмаслик эътиқод, миллий урф-одатларга садоқатнинг кучли-кучсизлигига ҳам боғлиқдир. Эҳтимол, бу узил-кесил холоса чиқариш қийин бўлган мураккаб ва ўзгарувчан жараёндир. Гап кўйлакнинг узун-калталигида гина эмас-ку, ҳарқалай туркман қиз-аёллари менда ўзига хос таас-сурот қолдирди. Улар Хоразм қизлари каби шўх ва шаддот ҳам эдилар.

Меҳмонхонанинг бир хонасига Собиржон ака билан жойлашдик. Уч кундан бери йўлда юриб сувсираб қолган эканмизми ё сув ўзи жуда мулоим, ёқимли эканми, душга тушган эдим, ҳеч чиққим келмайди. Баданларим ниҳоятда яйради. Умуман, яқин вақтларда бунаقا роҳат қилиб чўмилганимни эслай олмайман. Кўнгил ҳам жуда равшан тортиди.

«САНЖАР» АЙВОНИДАГИ СУҲБАТ

25 июл, якшанба.

Ярим кечада семиз, пўрсайган бир аёлнинг эшигимизни тақи́ллатиб, соат сўраганини ҳисобга олмaganда, мириқиб ухладик. Тонгда айвонга чиқиб, атрофни томоша қилар эканман, шоир Мулла Нафас номли катта кўчанинг икки томонидаги жуда яққол кўзга ташланиб турган хиёбон, хиёбончаларни, баланд ва нақшли биноларни кўриб, кайфиятим янада чоғ бўлди.

Соат олти яримларда Кушкага жўнадик. Йўлда қовунхўрлик қилдик. Қовунлар унча ширин эмас ва киммат: ўртаси 400 сўм.

Махтумқули туркманларнинг энг машҳур шоири. Ўзбек шеъриятида Навоий қандай ўрин тутса, Махтумқули ҳам туркман адабиётида шундай ўрин тулади. Ҳарқалай, ўзбек адабий жамоатчилигида шундай фикр мавжуд. Лекин, мана, Туркманистоннинг анча шаҳар ва қишлоқларидан ўтиб боряпмиз, Махтумқулига эътибор биз ўйлаганчалик эмасдай. Унинг номи унча кўзга чалинавермайди. Елатан (Иолатан) нефт маҳсулотлари базаси олдида Махтумқулининг жўнгина расомлар томонидан чизилган одатий паннода суратини кўриб, тўғриси ажабландик. Шоир билан нефт маҳсулотлари идораси ўртасида қандай боғлиқлик бўлиши мумкин?

Сайфиiddин ака Елатан (Иолатан)нинг Избоскандағи Элатан билан ўзаги бирлиги ҳақида гапирди. Ростдан ҳам номлар қайтариги тез-тез учрайдиган ҳодиса. Албатта уларнинг қандайдир боғланишлари бўлиши шубҳасиз.

Шу ерда ёнилғи қуяётиб, машинанинг юклар жойлашган орқа, катта капотини очишга ҳаракат қилишганини (кечаси уриниб кўришган бўлса керак, яхшиямки машинада уч киши тунаган эди) пайқаб қолдик ва «хушёр бўлиш керак экан», деб қўйдик.

Ҳар қадамда узун кўйлакли туркман қизлари, аёллари учарди. Туркманистонда миллий кийиниш одати шу даражада мустаҳкам сақланган, демак, миллий онг, миллий маданият ҳам жойида бўлиши керак.

Бу ерларда ҳайвонот олами камбағалроқ туюлди. Аҳён-аҳёнда далаларда тартибсиз сочилиб ўтлаб юрган қизил сигирлар, бузоқлар кўриниб қолади, холос.

Суҳбат мавзуи яна адабиётга, Бобурға, экспедициямиз сафари мақсадларига кўчади. Оға-боболари Ту-рон юртидан бориб, Ҳиндистонда муқим яшаб қолишган буюк алломалар — Шарқ шеъриятининг машхур даҳолари Абулқосим Фирдавсий, Мирзо Абдуқодир Бедил, Мирза Голиблар ҳақидаги билим ва тасаввурларимизни ўртоқлаша бошлаймиз. Мен 20-асрда яшаган ҳинд исёнкор шоири, Робиндранат Токурнинг сафдоши Назрул Исломнинг достон ва шеърлари, улардан қилган таржималаримни, хусусан «Исёнчи» достонини эслайман...

ЯХШИЛАР КЎП ДУНЁДА...

Тахтабозор тумани, Сандиққачи мевачилик давлат хўжалигининг Тоза ер (Янги ер) бўлими ҳудудида уйларни кўриб тўхтадик. Биронта хонадондан қайнок сув олиб, чой ичмоқчи бўлдик.

Сайфиддин Жалилов аввало одамшавандга, ҳазил-мутойибага мойиллиги, турли экспедицияларда кўп юриб тажриба ортиргани боис қаерга борса, ким бўлса тортиномай, иккиланмай суҳбатга киришиб кетаверар эди. Тарихчи, этнограф домламизнинг мана шу хислати анча иш берди. Йўлдан сал ичкарироқдаги, девортусифининг тайини йўқ ҳовлилардан бирига дадил кириб, чақирди. Бир йигит чиқди. Исми Муҳаммад Ражаб, касби — ўқитувчи экан. Отаси 40 кун аввал оламдан ўтган, уйда фотиҳага келган меҳмонлар бор экан, худо етказиб, биз кириб борибмиз. Сайфиддин ака марҳумнинг ҳақига Қуръон тиловат қилди.

Кейин ҳовлига қайтиб чиқдик. Уйлар катта-кичик, баланд-паст, хуллас анча тартибсиз қурилган ҳовлида мутаносиблик йўқ эди. Катта тут дарахти соясига шолча тўшаб, дастурхон ёзиши. Аччиқ, кўк чой, патнисда тандирнинг оғзидай катта-катта нон, кўксултон мурраббоси, қатиқ келтириб кўйиши. Қишлоқ одамлари... Содда, самимиyllиги, кийиниши, юриш-туришидан, гапларидан шундоққина сезилиб турибди. Ҳовлида Муҳаммад Ражабдан бошқа йигитлар, ёш-ёш жувонлар (келинлар бўлса керак), қизлар индамасдан турли юмушларни бажариб юришарди. Эркаклар ҳам, аёллар ҳам дароз, басавлат эдилар. Уларга қараб туриб, узун кўйлак қизларни бўйчан ва дуркун кўрсатиб, ярашиқли, бежирим ўралган рўмол билан бирга

ўзига хос жозиба, латофат бағишлишига яна бир карпа ишонч ҳосил қилдик. Жуда мазали, муздақкина, юракнинг тафтини босадиган қатиқдан беармон ичиб, аччиқ кўк чойга роса тўйгач, қовун, колбаса ва оқ қанд қолдириб, Мұхаммад Ражаб билан хайрлашдик.

Яна йўлдамиз. Икки тараф адирликлар, сийрак юлгинзор. Бу юрт фақат чўлу адирликлардан иборатми, деган фикр ўтади кўнгилдан. Туркманистон ҳудуди жуда катта экан. Қум бўлса ҳам, чўл бўлса ҳам — ерда! Салкам уч кундан бери тўхтамай йўл босамизу ҳали адоги кўринмайди.

Чоржўйдан Марвгача 240 чақирим, Марвдан Кушкагача 300 чақирим экан. Энди кинолардағи заҳарли илонлар, кобралар маконини эслатувчи Кушка сахро-лари бошланди.

Кушкага 98 чақирим қолганда дастлабки ҳарбий чегарадагилар Туркманистон ҳукуматидан рухсат йўқ экан, деб анча тутиб туришди. Чегарачилар учта ёшёш ҳарбий хизматчи эди. Уч қути тамаки ва бир бўлак қоқланган колбаса бериб ўтиб олдик. Йигитчалар: бироров сўраса, биз чегарадан эрталаб соат етти яримда ўтганмиз денглар, деб тайинлашди. Ҳаммамиз жўр бўлиб «хўп» дедик, 700 чақирим қайта йўл босиб, Ашхободга бориб келишимизга сал қолди-я...

Соат бирларда Кушкага кириб бордик. «Кушка» туркман ёзувида «Гушги» — «жанубий форфор» деган экан.

Туркманистон ҳудудидан чиқиб кетиш, Афғонистон заминига ўтишга рухсат олиш учун Мари вилоят, Гушги этрапи (тумани) ҳокимлигини қидириб топдик. Сиёсий маҳкамама идораси шаҳар четида, шабадагай тепалиқдаги эски, дарз кетган, кўримсизгина бинода жойлашган экан. Атрофи сим-тўр билан ихоталанган. Чап ва ўнг томонда шаҳарча, рўпарада тоғсимон адирликлар қандайдир сирли сукунаттга чўмиб турибди. Орқа томонда ҳам баланд адирлик маҳкамани мудо-фаа қилгандай ўраб турарди.

Этрап ҳокими яқиндагина чиқиб кетган экан. Иш юритувчи Мұхаммаджон (1975 йили Тошкент Алоқа олийгоҳини битирган, шунинг учун ўзбекчани жуда яхши галирарди) бизни шаҳардаги ошхонага олиб бориб меҳмон қилди. Мұхаммаджон бундан икки кун аввал Ҳирот (Афғонистон) губернатори Амир Исмоилшоҳнинг Туркманистонга келгани, Ашхобод ва бошқа жойларда бўлиб, Гушгидан Ҳиротгача те-

мир йўл қуриш ҳақида шартнома тузиб кетганини айтиб берди.

Ошхонада асосан соч-соқоли ўстган, ҳаракатлари вазмин, ўйчан, қаттиқ нигоҳли афон йигитлари овқатланишарди. Шу ерда чет элнинг ҳиди кела бошлади.

Тушлиқдан кейин ҳокимият олдига қайтиб бордик. Зокиржон ака Мұхаммаджон билан маҳкамага кириб кетди. Аҳмаджон, Фаррух, ҳайдовчи Обиджон ака чегарадан ўтиш олдидан машина ичларини, ашқол-дашқолларни (юқ-тақлар, кийим-бошларимиз, озиқ-овқат, совға-саломлардан, теле, кино камералар ва бошқа майда-чуйдалардан иборат) тартибга туширишга киришдилар. Қолғанларимиз Сайфиддин аканинг киришимлиги ва ташабbusи билан шу яқин-орадаги шадалоқдайгина саҳнли хонадонлардан бирига кирдик. Келинчак (Жамила) бизни бепарвогина, хушламайгина қарши олгандай туюлди. Биз ундан чой қўйиб беришни илтимос қилдик. Икки ёшга етмаган ўғилчаси Қувончбек аясининг атрофида пилдираб юрар, куёви Мақсад ишда экан. Балки эри йўқлигидан тортингандир, деб ўйладим. Лекин чуқурроқ разм солган одам Жамиланинг кўзлари тубидаги қандайдир ғам-ташвиш кўлкасини пайқashi, унинг нимадандир қониқмаслиги, норозилигини тахмин қилиши ҳам мумкин эди. Шу ҳолати билан у Чингиз Айтматовнинг Жамиласини эслатиб юборарди. Балки, уйларининг ҳароб ва торлигидан ғаш, яшаш шароитларидан кўнгли тўлмас...

Сайфиддин ака чой ичаётиб, куёв бола нима иш қиласи, деб сўраб қолди. Ҳар нарсага бир нарса сабаб, деганларидаи, Жамиладаги ноҳуш кайфиятнинг сири очилди-қолди. Мақсад ҳайдовчи экан. Маоши жуда оз, мен ишламайман, уй солишимиз, ўғлимизга тўй қилишимиз керак, — дейди Жамила ошкора нолиб. Тавба, дунёнинг бу чеккасидаим мана шу ташвиш, мана шу муаммолар-а, дейман ичимда. Бироқ бошқа бир ҳолат менда ижобий таассурот қолдириди: Жамилани, ундан аввал кўрган аёлларни эслаб, аксарият туркман қиз-жувонлари ҳовлисида ҳам озода, яхши кийиниб юришаркан, деган фикр туғилди.

Зокиржон акалар ҳокимликдан уч киши бўлиб қайтиб чиқишиди: маҳсус хизмат ходими, Тоғимурод исмли йигит қўшилган эди. Масала умуман ҳал бўлибди. Бироқ, бугун кеч бўлиб қолди, Ҳиротга кечаси етиб борсак, жой истаб довдираб юрмайлик, деган қарорга

келдик. Шунинг учун бизни ҳарбийлар мөхъмонхона-сига олиб бориб жойлашди.

Қўноқхона анча хароб эди. Сув кеч соат олтидан ўн биргача, эрталаб яна икки-уч соат бўларкан. Аммо чивини жуда баттол экан, ухлатмади даюслар.

26 июл, душанба.

Нонуштадан сўнг, соат олти яримда Тожимурод кузатувида чегарага қараб жилдик.

Чегара. Ҳамма ёқда тиконли сим деворлар, электр линиялар...

Афғонистон чегараси. Ер бир, осмон бир, ҳаво бир, сув бир, оралиқ бир қадам. Лекин одамлар ҳар хил, дунёқараашлар, фикрлаш тарзлари, одатлар, тутумлар ҳар хил, сиёsat ҳар хил...

Тожимурод борлиги учун ишимиз енгил кўчди. Узоқ йиллик қардошлиқ-қондошлиқ ришталари, дил ва тил яқинлиги барибир одамларда бир-бирига қайишиш, яхшилик қилиш туйғусини сақлаб қолар-кан-да.

Хужжатларимиз (асосан паспортларимиз)ни тек-ширишиб, машинамиз ичини бир кўздан кечиришди-да, ўtkазиб юбориши. Дарвоqe, бизни кузатиб қўйиш учун Гушги этрапи ҳокимининг биринчи ўринбосари Аманияз Гуллиев ҳам етиб келган эди, унинг аралашу-ви ҳам ишимизнинг тезлашувига ёрдам берди. Экспе-дициямиз моҳиятини яхши англаган гушгилик янги дўстларимиз бизнинг ишончли ва хавфсиз, шунчаки хайрли ният йўлида сафарга чиққан зиёлилар экан-лигимизни чегарачиларга уқдириб, биз учун кафолат беришган эди.

Лекин осма кўприксимон, икки томони темир пан-жарали дахлсиз ҳудуддан ўтишимиз билан Афғонис-тон чегарачилари тўхтатиши. Бу ерда ҳолат бошқа-чароқ эди: эски, носранг кийимли, бадқовоқ, серсо-қол чегарачиларни, узоқ тепаликларда автоматларини кўкрагига маҳкам босганича қоқдан қозикдай сер-райиб туришган кузатувчи-соқчиларни кўриб одам-нинг кўнглига ваҳима ўрмалай бошларди...

Чегарачилар (улар беш-олтита) ҳужжатларимиз-ни обдон кўришиб, ўзларича анча муҳокама қилишди. Қайси мамлакатларга боришимизни сўрашди. Дастлаб Эронга ўтишимизни айтгач, бир-бирига қараб

елка қисиши. «Ҳужжатларда бунақа ёзилмаган» деб яна ҳайрон бўлиши. Уларнинг нимага ажабланишгани ва иккиланишгани бизга кейинчалик, Ҳиротда аён бўлди.

АФОН БИЛАН ТУГИЛГАН ВАТАН...

*Афғон билан түгилган ватаним,
Ғаму ғазабга тўлган ватаним,
Қайта дунёга келган ватаним,
Куйлаб туриб йиқилгум йўлингда...*

Афғон халқининг миллий қаҳрамонидай довруқ қозонган машҳур қўшиқчи Аҳмад Зоир шаънига таниқли ўзбек хонандаси Нуриддин Ҳайдаров томонидан ижро этиладиган мазкур таъсирили сўзлар атоқди шоиримиз Туроб Тўла қаламига мансубdir. Шу қўшиқни эшитар эканман, ҳар гал ана шу афғон билан түгилган юрт ва унинг аламдийда халқига нисбатан қалбимда ачиниш ва ҳамдардлик ҳисси уйғонади. Ба бу ҳис мени анчагача тарқ этмай, ўз-ўзимдан паришон бўлиб қоламан. Бир-бирини ўлдиришдан тап тортмайдиган, аксинча, ўзининг бу ёвузлигидан ҳузур топиб, роҳатланадиган одам зотига ғазабим, нафратим ортиб бораётганини сезиб қоламан...

Афғонистон... Ҳа, бу ном бизнинг юртимизда қунига юзлаб, минглаб бора тилга олинади. Ҳамма ҳолларда ҳам уни ҳурмат ва меҳр билан эсланавермаслигини ҳам эътироф этмай илож йўқ. Гарчи айб афғонистонликларда бўлмаса ҳам, ҳарқалай узоқ йиллардан бери даҳшатли жангтоҳ бўлиб келаётган мана шу тупроқ бағрида, анави адирлар, улардан нарида ҳўмра-йиб турган тоғлар орасида минглаб ўзбек йигитларининг жаъсади қолиб кетди-да. Бир қисмининггина мажақланган, гоҳо афти-ангори таниб бўлмайдиган даражада дабдала қилинган лоши темир тобутларда келтирилиб, ўз қабристонларимизга дағн этилди. Қанчаси дом-дараксиз кетди: на тириги бор ва на ўлиги... (Экспедициямиз дастурида шу масалага тегишли банд ҳам бор, бу ҳақда кейин тўхталамиз). Қанчадан-қанча хонадонлар ўн саккиз-йигирма йил не-не қийинчилклар билан боқиб, ўстирган жигарпораларидан жудо бўлиб қон-қақшаб қолдилар. Нима учун?.. Умуман, қизил империя кичкинагина, дахлсиз Афғонистон билан шунча йил нима талашди ўзи ва нимага эришди?..

Тўғри, сиёсатдонлар бу қирғинни ҳар хил ваҳимали сабаблар билан изоҳлашади. Лекин менга бу жабрдийда мамлакатдаги мазкур ҳолат кучли чавандозлар ўртасида улоқ талашишдай, тайинли мақсад йўқ тортишувдай түюларди... Хўш, энди-чи? Энди нимага ички низолар, қирилишлар барҳам топмаяптийкин? Нега уруш олови катта ўрмонга кетган ўт каби ҳамон ўчмаяпти?

Аффонистон заминига, Турғунди қишлоғига қадам қўйишимиз билан бетон плита ётқизилган йўл четларида ана шу шиддатли ва беомон жангу жадаллардан совуқ хотира бўлиб қолаётган қўроғшин ранг ўқдонлар кўзга ташланди. Қуролнинг ҳатто ишдан чиқсан бўлаги, парчаси ҳам одамнинг этини сескантарида-я. (Менимча, бизга ўхшаган уруш кўргмаганлар шундай ҳолга тушса керак).

Икки ёндаги кенг, баланд-паст даралар билан қўшилиб кетган пайкалларда қовун-тарвуз, у ер-бу ерда кунгабоқар ўсиб ётарди.

— Бирдан, кўчанинг иккала томонида ниҳоятда зич, бир-бири билан туташ, кичкина-кичкина дўкончалардан иборат (аксарияти темир гаражга ўхшайди) савдо расталари бошланди. Дўкончаларнинг ичию таши эски-тускинлар, суратлари ўнгиб, ҳарфлари ўчиб кетган ҳар хил қоғозлар билан шу даражада «безалганки», уларнинг олдида ўта бачканга сартарошхона ҳам ип эшолмайди-ёв. Айниқса, ялтироқ нарсалар (ашқолдашқол деса ҳам бўлади) ҳаддан зиёд кўп эди. Лекин, таажжубки, бу атрофда одамлар яшайдиган уйлар йўқ эди. Расталар тугагач, йўлдан анча ичкарида, адирлар бағрида девориу томи лой-тупроқдан қилинган тўп-тўп кулбалар кўринди.

— Ҳар бир тўп-бир қавм, қора чодирдагилар-кўчманчилар, — деб изоҳ берди Сайфиддин Жалилов.

Сал юрганимиздан кейин шундоқина ялангиликда бўлаётган қўй бозорига дуч келдик. Тўда-тўда бўлиб турган қўйларнинг ҳаммаси семиз-семиз эди.

Бетон тўшалган йўлдан безор бўлиб боряпмиз. Плиталарнинг ораси беш-олти энлик, баъзи жойларда ундан ҳам кўпроқ очиқлиги учун машина фидираги ҳар ўн қадамда ана шу оралиқقا дўқиллаб тушганида бутун вужудимиз бир силкиниб қўярди. (Бу йўл қуроляроғ, замбарак ортилган каттакон ҳарбий юқ машиналари, танк, бронетранспортёrlар ташишга мўлжалланган эди).

Кета-кетгунча икки томон чўл, адирликлар, адирлар ортида тоғлар, ора-чурада яна қовун-тарвуз пай-каллари, ногоҳонда, сув сероброқ жойларда мевали-мевасиз дараҳтлар, пиёз ва бошқа полиз экинлари кўзга чалинади. Ўйлар кўп, фақат улар йўлдан анча узоқда ва бутунлай лойдан тикланган. Қуббасимон томларининг ўрталарида тешиклар бор, мўрилари кун чи-қишига қараган... Жуда ибтидой эски шаҳар қолдиқ-ларига ўхшаб кўринади олисдан.

Онда-сонда эшак минган, ёпинчиқли қизлар, аёллар, туя, от, эшак учрайди, аммо қўй, эчки жуда кўп. (Чорваси мўл юртнинг эли бой бўлгич эди. Лекин, бу ерларда унақага ўхшамасди). Енги ва этаклари узун жанда кийган афғон деҳқонлари кафтларини пешона-сига соябон қилишиб, қовун-тарвуз сотмоқчи бўлиб туришибди. Харидорлар кўринмайди. Ҳар замонда ўтадиган йўловчиларга умид билан кўз тикиб ўти-ришса керақда. Рўпарадан келадиган усти очиқ ен-гил машиналарда ўтирганлар қўл кўтаришиб бизга «салом» ишорасини қилиб ўтиб кетишар, мутлақо но-таниш кимсаларнинг бу эзгу одатидан кўнглимизга илиқдик югуради.

35-чақиримда тўхтаб, бир пиёладан чой ичдик. Бизда йўқ бўлиб кетган катта, учар чумолиларни шу жойда, қоқсов ерлардаги янтоқзорларда кўрдим.

ТОФ ЙЎЛИДА УЧРАГАН СУЛУВ

55-чақиримда уйлар ва яна ҳар хил бинолар бор гавжумроқ жойга кириб бордик. Бу ерда бизни ҳар-бий кийимдагилар тўсишди. (Ҳарбий гарнизонча экан). Чап томонда қандайдир кўрғонга ҳар турли кийинган, катта-кичиқ эрқаклар кириб-чиқишар (кейин билсак, у масжид экан), ўнг тарафда идора-симон бино, унинг ёнидаги ялангликда 5—6 та БТР саф тортиб турарди. Назаримда улар жангга шай холатда эди.

Шу ерда шифер томли, ғиштили уйлар бор эди. Демак, бу ер алоҳида аҳамиятга молик штаб ё йўл қурувчиларининг вақти маскани. Уларни собиқ Иттифоқнинг мутахассислари қурган бўлиши керак.

Зокиржон ака билан телепрограммист ва журналист, ҳам форс тили бўйича ишонган тилмочимиз Фарруҳ Расулов ҳарбийлар етовида қўрғонча ёнидаги бир хо-

нага кириб кетишиди. Қолғанларимиз машинадан тушмай, кутиб ўтиридик.

Шу пайтда рўпарадан катта бир юқ машинаси бизга яқин келиб тўхтади. Кузовнинг баланд томида, кабина билан ёндош маҳсус курсида уч киши ўтиради: чапда қалин мўйловли эркак, ўнгда бир ўспирин, ўртада, ўртада эса... тахминан ўн олти-ўн етти ёшлардаги, қалин қопқора қошлари ширмон юзларига ниҳоятда ярашган, шаҳло кўзлари ўтдай чақнаб қулимсираб турган қиз...

Бизнинг улар томонга қараётганимизни сезган эркак (биз шунақаси ҳам бор экан-ку, деб, йўлда кўрганимиз чодрали аёлларни эслашаётган эдик), қизнинг қулогига шивирлаб қўювди, эртаклардаги париларни эслатувчи маҳваш дарҳол хушёр тортиб, биз ёққа бир ҳуркак назар ташлади-да, бошидаги қора чачвонини шоша-пиша юзига тушириб олди. Чарақлаб нур сочиб турган қуёш бирдан қора булутлар қаърига кириб кетдию, олам зим-зиё бўлди-қолди гўё. Бу ҳолат, яна, Алишер Навоийнинг машҳур ғазали матлаасини ёдимга солди:

*Оразин ёпқач кўзимдин сочилур ҳар лаҳза ёш,
Ўйлаким пайдо бўлур ўлдуз, ниҳон бўлғоч қуёш...*

Ҳа, Лутфийдек ғазал пири мана шу бир байтга бутун умри давомида ёзган асарларини алмашишга рози бўлгани бежиз эмас. Улуг Фузулий: «Шифойи васл қадрин ҳажр ила бемор ўландин сўр», деганларидек мавлоно Лутфий ҳам юқоридагидай, роят латиф, таъсирли ва армонли ҳолатни ўз бошидан кечирган бўлсалар ажаб эмас. (Дарҳақиқат, бизга ҳам кейин бунақа юзи очик, гўзал қизни кўриш Афонистон ҳудудида қайта насиб қилмади).

Мен анчадан бери шеър ёзмай қўйган эдим. Мана шу оний, аммо қаламкашлар, рассомлар қўзи олдида бир умрга муҳрланиб қолажак нозик ва бетакрор лаҳзаларда менда ҳам ажид бир кайфият, тотли ҳис-туйгулар уйғониб, кўнглимда сўзлардан чечаклар уна бошлаганини сезиб қолдим. Монголоидларга ҳам, европеидларга ҳам, бошқа ирқий турларга ҳам ўхшамайдиган, чиндан-да, бир қарашда афсонавий маҳваш бўлиб кўринган ва кўпчиликни шошириб қўйган бу шаҳло кўзли қиз, балки ўзбек ё тожик, араб ё форс гўзалидир... Лекин

Афғонистон заминига қадам қўйган чоғимизда учрагани боис, уни назмга шартли равища «Афғон қизи» деб бита қолдим.

АФГОН ҚИЗИ

Тоғ иўлида учраган сулув,
Ҳарир рўмол остидан кулиб,
Дилга солдинг чўғдай бир гулу,
Кулиб лолу бежон қилдинг-а,
Афғон қизи, армон бўлдинг-а.

Ой юзингни бир бор очдинг-а,
Сўнг ёлгали бунча шошдинг-а,
Нигоҳингни олиб қочдинг-а,
Биз ғарибни ҳайрон қилдинг-а,
Афғон қизи, армон бўлдинг-а.

Айт, чинмидинг ё пари, рўё,
Тунда гўё чақнаб бир зиё,
Қайга ғойиб бўлди сўнг дунё,
Тонгни бирдан хуфтон қилдинг-а,
Афғон қизи, армон бўлдинг-а.

Фамзангми бу ёки карашманг,
Ё демишсан: «ҳаддан кўп ошманг,
Бу жафоли иўлда адашманг...»
Тилим боғлаб, гумрон қилдинг-а,
Афғон қизи, армон бўлдинг-а.

Эртакларга ишонмас эдим,
Гўзалликдан ҳеч қонмас эдим,
Ишқда бунча лов ёнмас эдим,
Кўйдирдинг-а, гулхан қилдинг-а,
Афғон қизи, армон бўлдинг-а.

Андижонга қандай кетарман,
Гар соғинсам сени, нетарман,
Шаҳло кўзинг кўмсаబ ўтарман,
Юрак-баърим вайрон қилдинг-а,
Афғон қизи, армон бўлдинг-а.

Дарвоқе, сайёҳ, шоир Зокиржон Фурқатнинг «Бир қамар сиймони кўрдим балдаи Кашмирида...» деб бошланадиган айтишув шаклидаги ғазалида ҳам шундай бир латиф манзара, ногиҳоний ҳолат ифода этилган. Афсуски, биз бу малак сиймо билан суҳбат қур-

моққа мушарраф бўла олмадик (бунинг иложи ҳам йўқ эди), бинобарин, шеърни мулоқот тарзида ёзмак ҳақиқатга хилоф эди...

Шунингдек, қисқа ва жодули бир нигоҳ баҳона, ўрис дарвеш шоири Сергей Есениннинг:

«Оқшом менга ниқоб остидан
Оху кўзин сузди гулруҳсор...» —

деган сатрларини ҳам эсладим. Албатта, Ходи Тоқтош таъбирича, эски муҳаббатни ҳар бир қалб ўзича янгилағани каби, ҳар бир ижодкор ҳам ҳаётида кам учрайдиган юқоридагидай илҳомбахш, юракка ўт қаловчи ҳолатларга ўз нуқтаи назаридан, ўша пайтда кўнглидан кечган ҳиссиётлардан келиб чиқсан ҳолда муносабат билдиради, қофозга туширади...

ОРЗУДАГИ ШАҲАР

Яна дўқир-дўқир, силтама йўлдан ичакларимиз айқаш-уйқаш бўлиб, кун ботишга қараб кетяпмиз. Далаларда туялар тўдаси кўпая борарди. Йўл четидаги яккам-дуккам уйлар томида дон шопириш ёки деворларга тапиллатиб тезак ёпишлар, қўш хўқиз билан бўғдой янчишлар бизга узоқ ва яқин ўтмишимизни эслатарди.

Мен Ҳиротни бутунлай бошқача тасаввур қилиб юардим. Ҳурсондай катта бир давлатнинг машҳури жаҳон бўлишида бу тарихий шаҳарнинг алоҳида ўрни бўлганлиги маълум. Лекин мен учун энг муҳими — бу табаррук заминда ўзбек қалам аҳлининг пири, ўзбек адабиётининг ҳазрати олийси таваллуд топгани ва яшагани эди. Ҳуллас, Ҳирот кўз олдимда афсонавий ва фусункор шаҳар қиёфасида гавдаланар эдӣ... Шунинг учун мен Ҳиротта — улуғ устоз зиёратига, унинг муборак қадамжойларини тавоф этгани ич-ичимдан тошиб чиқаётган сабрсизлик билан ошиқардим.

Ниҳоят, йўлнинг икки томонидаги тухтарни ўркачилик адиirlar оралиғидан Ҳиротнинг баланд-паст миноралари кўриндию, руҳим чоғ бўлиб, беихтиёр энтикишдан кўксим тоғдек кўтарилиб кетди. Бир чақиримча юргач, йўл ҳам, биз ҳам адиirlar қуршовидан чиқиб, шаҳарнинг рамзий дарвозасидан кириб бордик ва чапга

бурилдик. Кўз олдимизда энди бутун Ҳирот — уфқда анча пастлаб қолган қўёшнинг алвон нурлари пастак томларину юксак минораларига қизғиш тус берәётган кўхна шаҳар намоён бўлди.

Чап тарафда қолаётган адирлар пойидаги тўп-тўп тош терилган тепачаларга кўзимиз тушди. Улар қабрлар экан. Ўнгда махсус ясалган хирмонга ўхшаш усти текис чор қирра тепалик бор экан. Ўша ерга чиқиб кун ботища кафтдагидай кўриниб турган Ҳирот манзараларини энтикиб-энтикиб, мириқиб томоша қилдик, шаҳар фонида суратта тушдик, кино, телетасвирларга олишиди.

Ҳирот... Орзудаги шаҳар...

Жаҳон маданияти, фани, адабиёти, санъати тараққиётига бебаҳо ҳисса қўшган не-не истеъдод эгалари, умумбашарий обрў-эътиборга сазовор буюк алломаларга бешик, ватан бўлган, донғи дунёга кетган шаҳар бу.

Биз изларини кўзимизга тўтиё қилиб бораётган ҳамюртимиз Заҳириддин Мұхаммад Бобурнинг назари тушган, пойқадами теккан табаррук тупроқ бу...

* * *

Ҳирот губернатори (ҳокими) Амир Исмоилшоҳ қароргоҳини осонгина топдик: у ер «Дафтар» (девонхона) дейиларкан. 4 киши — раҳбар, таржимон ва телетасвирчи Фаррух, кинотасвирчи Тўлқин ака, радио мұхбири Аҳмаджонлар ҳоким билан учрашиш мақсадида унинг қабулига кириб кетишиди. Биз дам олиб, томоша қилиб турдик. Кўчанинг ўнг бетида Дафтар — маҳаллий ҳукумат уйи бўлса, унинг рўпараси, чап томон қарагайзор хиёбон бўлиб, ости тақир тупроқ эди, майса-ўт деган нарса кўринмайди. Ҳатто кўча билан қарагайзорни ажратиб турадиган ариқ ичида, унинг қирғоқларида ҳам гиёҳ унмабди. Сув ҳам тиниқ эмас. Бу ерда менга энг эриш туюлган ҳол шу бўлдики, кексалар ҳам, ёшлар ҳам шартта дараҳт панасига ўтишиб «иши» битиришарди-да, лозимбогларини осилтирганча ариқ лабига келиб, кўчага терс қараб чўнқайишганча мустаҳаб қилиб кетишаверарди...

Шундоқ кўча қирғоғида ҳар хил ичимликлар (ичкилик эмас!), фидиракли мосламаларга ўрнатилган ак-

вариумсимон ойнаванд идишда пиширилган нўхот со-тиш расм экан. Шу одатлари менга анча маъқул бўлди. Акс ҳолда бесарамжон қатновга тўла кўчада кўтари-лаётган чанг (бунинг устига бир зумда қаёқданdir қисқа муддатли шамол келиб қоларкан — бу машҳур «аффон шамолининг шунчаки енгилгина шабодаси, эп-кини бўлса керак) нўхотнинг нўхот афтини қўймай-диям-да.

Сайфиддин ака билан ичимлик-сув сотаётган жойга яқинлашдик. Домла чўнтағидан шўро пулини чиқариб кўрсатди ва «шунга сувингдан қўй», деган ишора қилди. Яланг бош, соч-соқоли ўскин, оёғидаги пойафзали тўзиб кетган сотувчи йигит пулга бир пас қизиқсиниб қараб турди-да, бош чайқади. Унинг ёнида туришган (уларнинг ҳам соч-соқоли ўстган) йигитлардан бири русчалаб «қаердан келдинглар» деб сўраб қолди. У (Аҳмад) Тошкентда қисқа муддат (олти ой) ҳарбий тайёргарлиқдан ўтган экан, рус тилида талаффуз билан бўлса-да, ҳарқалай тушунарли гапиравди. У ўз ҳисобидан бизни «Тархуна»симон яшил рангли ичимлик билан «меҳмон» қилди. Бир стакан ичимлик 50 аффони экан.

Ариқнинг у бетидаги йўлақда уч-тўрт мўйсафид ўтирас, биттаси эса узала тушиб ётганди. Улар муншийлар экан. Сайфиддин ҳожи ака ўшаларнинг бири билан тил топишиб (домла ҳам форс тилини тирикчилик қилиб кетадиган даражада билар эди) қолди. Қаррия Сайфиддин аканинг кўксултондай чойнагини олиб, қаерданdir чой дамлатиб, шапалоқдай, икки қулоқли гулдор патниста қўйиб келди. Машина ичида чойхўрлик қилиб, сухбатлашиб ўтиредик. Улар (муншийлар) ҳокимга кирадиганларга ариза ёзиб беришаркан. Битта ариза эвазига 100 аффони ҳақ олишаркан, яъни икки стакан сувнинг пули! Бир тахта (варақ) қофоз 10 аффони экан.

Транспорт қатновини кузатаман. Ҳар турли машиналар у ёқдан-бу ёққа физиллаб ўтиялти. Аксарият енгил машиналарнинг ҳам усти очиқ, жуда эски. Кўпининг орқасида «ТОЙОТА» деган ёзув бор. Лекин баъзиларининг умуман рақами, ҳарф-белгиси йўқ. Ҳар хил рангта, катак ё бошқа шаклда бўяб олишибди (юк машинаю, автобус енгил уловларни ҳам). Айниқса, велосипедни безашга ҳафсалалари зўр экан. Умуман, ҳайдовчилар бачканга жиҳозларга ўчроқ экан, деган тасаввур туғилади.

Йўрға отли извошлар жуда сероб эди.. Отнинг бошию бўйинларини ёқутдек қип-қизил матодан тайёрланган тўпсимон шокилалар, попуклар билан безашиб, қўнгириқлар осиб ташлашибди. Уни «годи» дейишаркан.

Кийимларнинг аксарияти кулранг тусда эди. Хотин-қизлар тепаси дўпписимон, қош билан бурунгача бўлган ўрталиқ, яъни кўз усти қисмига майдада (роса тикилиб қарасангиз ҳам унинг остидаги кўзни кўролмайсиз) тўр қопланган, товонигача тушадиган фижим матодан ёпинчиқ (чодра) ёпиниб (кийиб) юришарди. Онда-сонда чодралигу лекин юзи очик аёллар ҳам кўриниб қоларди. (Кейинча «ундайлар бошқа юрт ё шаҳарлардан келганлар», деб уқдиришди бизга)...

Зокиржон акалар Исмоилшоҳ ҳузуридан мамнун чиқишиди. Губернатор яхши қабул қилибди. Унга ноҳақ афғон урушида бедарак йўқолган ўзбек йигитларининг рўйхатини топширишибди. Ҳоким иложи борича бегуноҳ жабрдийдалар, она ватанидан жудо бўлганларни топиб, ўз юртларига қайтариш чорасини кўришга ваъда берибди. Хуш қабул эвазига губернаторга Ўзбекистоннинг, Андижон халқининг совфа-саломларини (тўн, дўппи, чорси, пичоқ) бериб чиқишиди.

Ҳокимият вакили бўлган икки йигит — Анвар соҳиб ва Абдуғани (буниси ҳарбий кийимда, елкасида милтиғи ҳам бор эди) бизни меҳмонхонага олиб боришибди. Меҳмонхона ташқи ишлар бўлимига қарашли, икки қаватли шинам бино экан. Полнинг очиқ жойи йўқ — ҳамма хоналар, йўлаклару зиналаргача тўлдирив гилам, палос тўшалган.

Бизни аввал биринчи қаватдаги расмий учрашувлар, ҳар турли мулоқотларга мўлжалланган хонага олиб киришибди. Хона «Г» шаклида бўлиб, атрофига юмшоқ, салобатли, қимматбаҳо (менинг наздимда) ўтиргич (кресло)лар, диван, ўртага эса бир неча ойнаванд хонтахтacha ва унинг устига билур идишларда бодроқсимон оппоқ парвардақант қўйилган эди.

Бизни ўз ихтиёrimизга кўра чойи сиёҳ (фамил) ва чойи кабук (кўк чой) билан сийладилар.

Тўри томондаги деворга — кун чиқиши томондаги ҳарир парда тўсилган катта деразадан ёруғ тушиб турадиган жойга икки кишининг — Афғонистон президенти Бурҳониддин Раббоний ва Ҳирот губернатори

Амир Исмоилшоҳнинг журнал саҳифасича келадиган суратлари осилган, деворларнинг шифтга яқин қисмига эса, айланасига, гўё симга тортилган байроқчалардай, Исмоилшоҳ сиймоси туширилган кафтдайгина уч бурчакли яшил мато (бунақа нарсани бизда «вимпел» дейиларди) илиб ташланган эди.

АЯНЧЛИ ЗИЁРАТГОҲЛАР. ҚАНИ МАШҲУР МУСАЛЛО?

Мулоқотхона билан ёнма-ён ошхонада Ҳирот ҳукумати бошлигининг муруввати билан тушлик қилгач, Анвар соҳиб ва Абдуғани кузатувида шаҳар айлангани жўнадик. Ҳирот марказига кириб келган йўлимиздан орқага — кун чиқиш томонга қайтиб, шаҳарнинг шимоли-шарқий чеккасида қад кўтарган Абдулло Анзорий мақбарасига бордик.

Ҳирот маданиятининг энг гуллаган даври намояндаларидан бири, форс-тоҷик шоири ва олими Абдураҳмон Жомийдир. Жомийнинг кўп қиррали ижод соҳиби бўлиб етишувида Ҳиротнинг ҳиссаси каттадир. Айни вактда, улуғ шоир Ҳирот адабиёти, фанининг юксалишига, бу шаҳар номининг дунё маданий марказларидан бири сифатида довруқ қозонишига ўзининг фаол умри ва баракали ижоди билан хизмат қилди. Биз учун яна бир муҳим жиҳат бу Абдураҳмон Жомий билан Алишер Навоийларнинг беғубор ва мустаҳкам дўстлигидир. Бу дўстлик, мана, беш асрки, аввало ўзбек ва тоҷик ҳалқлари орасидаги биродарликнинг, қолаверса, умуман инсоний дўстликнинг буюк тимсоли бўлиб яшамоқда.

Бизни ана шу улуғ зотнинг мақбарасига олиб боришиди. Энди уни мақбара демаса ҳам бўлади: тепаси йўқ, олди қисмини замбарақ ўқлари бузиб ташлабди. Мармар устун бўлаклари ғўласимон қилиб, қабрнинг бош томонига тахлаб кўйилибди.

Тўлқин Рўзиев афсус билан бош чайқади.

— Ўтган гал келганимда бу мақбара бутун ва жуда кўркам эди, — деди у мақбаранинг олдинги ҳолатини тасвирилаб.

Мен шу ўринда бир тарихий тафсилотни эсладим. Маълумки ўтмишда, мусулмон оламида мазҳаб талавиши асносидаги келишмовчилик кўп бўлган. Ху-

росон аҳли асосан суннийлар, Ажам Ироқи (Эрон Озарбайжони)да эса шиалар ҳукмрон бўлиб, улар ўзларининг таъсир доирасини кенгайтириш учун қаттиқ ҳаракат қилишарди. Ана шу ҳаракатлар сабабми, Султон Ҳусайн Бойқаро, жума номозидаги хутбаларга шиаларнинг ўн икки имоми номларини қўшиб ўқитишга рози бўлади ва фармон тайёрланади. Бундан хабар топган Жомий мамлакат аҳолисининг норозилигини Султонга етказади ва бу номувофиқ иш амалга ошса катта жанжал чиқиши ва ҳатто фожиалар юз бериши мумкинлигини шоҳга тушунтириб, уни фармонга имзо чекиши фикридан қайтариб қолади. Албатта, улуғ шоирнинг бу адолатли тадбири шоҳ Исмоил Сафавий қулоғига етиб борган ва Ҳиротга қилган қонли юришини (1510 йил) Жомий қабрини вайрон қилишдан бошлаган, дейилади манбаларда. Лекин, шоҳнинг бундай гаразини олдиндан пайқаган ҳиротликлар улуғ мутафаккирнинг ўғли Зиёвуддин Юсуф бошчилигида Жомий жасадини бошқа жойга кўчиришган эдилар. Жомийни жирканч йўл билан таҳқирлаб, хумордан чиқмоқчи бўлган шоҳ Исмоил қабрнинг бўшлигини кўриб, қаттиқ дарғазаб бўлади...

Хўп, шоҳ Исмоил-ку Жомий қабрини бир ният билан бузган экан. Бу гал-чи? Бу гал абадий оромгоҳда ётган бир табаррук зотнинг руҳи покини кимлар чирқиратди? Нима учун?..

Жомий қабри атрофида яна бошқа қабрлар (ҳайриятки, сағана тошлари бутун эди) ҳам бор эди. Улар Жомийнинг тасаввуф илми бўйича устози ва пири мавлоно Саъдиддин Қошғарий, биродари Шамсицдин Муҳаммад, жияни Абдуллоҳ, Ҳотифий, шогирди Абдулафур Лорийларнинг мангалик хобгоҳлари экан. Захириддин Муҳаммад Бобур «Бобурнома»да Абдулафур Лорий ҳақида алоҳида тўхталиб, «Мавлоно Абдурраҳмон Жомийнинг ҳам муриди, ҳам шогирди эди», дейди ва Хурсонга борганда Лорийнинг беморлигини, уни бориб кўрганлигини, бир неча кундан кейин унинг вафот этганини ёзади.

Абдуллоҳ Ҳотифий ҳақида эса Бобур шундай ёзади: «Яна Абдуллоҳ маснавийгўй эди, Жомдиндур. Муллонинг Ҳоҳарзодаси бўлур, тахаллуси «Ҳотифий» эди. «Ҳамса» муқобаласида маснавийлар айтибтур. «Ҳафт пайкар» муқобаласида айтқон маснавийсифа «Ҳафт манзар» от қўюбтур. «Искандарнома» муқо-

баласида «Темурнома» айтибтур. Бу маснавийлардин «Лайли ва Мажнун» машҳурроқтур. Агарчи латофати шұхратича йўқтур».

Имом Фахр Розий ва бошқаларнинг қабр-мақбаралари анча ғарип эди.

Бизнинг оңгимизга ўтмишда Шарқ аёллари, жумладан мусулмон хотин-қизлари эркисиз, ҳуқуқсиз, мазлума, чўри бўйиб яшашган, деган тушунчани сингдиришга ҳарақат қилиб келдилар. Ваҳдоланки, тарихимиз қатламларига чуқурроқ назар ташласак, бунинг аксини кўрамиз. Шўролар даврида аёллар ҳамма жабҳаларда, энг оғир юмушларда (тракторда, заводларда, қурилишларда) қуруқ мақтovлар, Фахрий ёрлиқлар, темир-терсаклар (орден-медаллар) билан «рағбатлантирилиб», эркаклар билан баробар, кўп ҳолларда улардан ортиқроқ ишлатилиб келинди. Ўтмишда эса, вафоли, оқила аёллар ниҳоятда эъзозланган ва уларнинг қадри, ҳурмати жойига қўйилган. Мисол учун Амир Темурдек ярим жаҳонни сўраган соҳибқирон ўзига энг яқин маслаҳатгўй деб билган Бибихоним, Бобурдек улуғ ижодкор отасининг муносиб издоши, тарихчи, солномачи Гулбаданбегим, Бобур чевараси Жаҳонгирнинг рафиқаси, ғоят гўзал ва доно малика Нур Жаҳон, аёл зотининг беназир тимсоли Нодира бегим каби момоларимиз амалга оширган эзгу ишлар, улар қурдирган тарихий обидаларни, айни вақтда бу азиз ва мўътабар аёлларга (айниқса, Шоҳжаҳоннинг суюкли умр йўлдоши Мумтоз маҳалга) кўрсатилган иззат-икромларни эслашнинг ўзи кифоя.

Шундай пайтда беихтиёр Нодирабегим замондошлиридан бирининг унинг хайрли ишларини баён қилувчи сўзлари ёдга тушади: «Мамлакат ҳирожларидан бешисоб тилла ва жавоҳирлар сарф қилиб мадрасаи олий, нақдош масжид, ҳаммом, расталар, карвоңсаройлар бино қилдириди. Ушбу мадраса ва масжиidlарга ҳисобсиз вақф тайин этди... ва яна китоблар ёзиш, ва уларга зеб-зийнат беришга фармон қилиб, бир китобхона бино эттириди. Китобхонада ишловчи ҳаттотлар, наққошлар, рассомларга шундай карам ва эҳсонлар кўргуздиким, овозаси атроф оламга машҳур бўлди». Ўз ҳалқининг маърифати, маданияти, маънавиятини бойитишга шу қадар ҳисса қўшган аёлга — буюк миллатпарвар, юртпарвар инсонга қўл кўтарган ва уни вахшиёна ўлдириган Насруллони ва у каби эркаклик шаънига ювилмас иснод келтирган малъунларни

кишилик жамияти абадул-абад кечирмаслиги, аксинча, лаънатлаб ўтиши керак. Ва бундай манфур, манқурт кимсалар халқ, миллат тарихи саҳифаларида қора ҳарфлар билан битилиши лозим.

Турон тарихида салтанат ишларига фаол аралашиб, подшога ўз таъсирини ўtkаза олган аёллардан бири Гавҳаршодбегимдир. Маълумки, темурий маликалар ичидаги ўзига хос нуфузга ва шухратга эга бўлган бу хоним қипчоқ амирларидан бири Фиёсиiddин Тархоннинг қизи бўлиб, дунёга Мирзо Улуғбекдай илму фан даҳосини, адолатли подшони инъом этган мўътабар она, соҳибқирон Амир Темурнинг келини, яъни Шоҳруҳ Мирзонинг тўнғич хотини эди. Мадрасалар ва бошқа қурилишларга раҳнамолик, ҳомийлик қилган, шу каби ижобий фазилатлари билан раият ҳурматини қозонгандан малика эридан ҳам, барча ўғилларидан ҳам узоқ яшаган. Умри ниҳоясида қонли тўқнашувларга сабаб бўлган Султон Абу Сайд Мирзо томонидан қатл эттирилади.

Садоқатли, қобил фарзанд Мирзо Улуғбек отаси Шоҳруҳ Мирzonинг жасадини Ҳиротдан Самарқандга олиб келиб, Гўри Амирга, бобоси Амир Темур ёнига дағн эттиради, ўзи ҳам падаркуш Абдулатиф амири билан боши танасидан жудо қилиниб, бокий дунёга риҳлат қилганида ота-боболари қаторидан жой олади. Онаси Гавҳаршодбегим эса, тақдир тақозосига кўра Ҳиротда, ўзи қурдирган мадрасадаги Бойсунқур даҳмасида қолиб кетади. Гавҳаршодбегим мадрасаси биноси ўз даврида Ҳирот шаҳрининг шимолий қисмида маҳсус бино қилинган Мусалло меъморчилик ансамблининг, нафақат ансамблнинг, балки мулки Хурсоннинг кўрки бўлгани каби, ҳозир ҳам бу яқинатрофда ундан-да улуғроқ, ундан-да салобатлироқ, тарихий обида, ёдгорлик кўринмасди.

Мазкур ансамбл меъмор Қавомиддин Шерозий томонидан 20 йил давомида қурилган эди. Тарихнинг бешафқат қуюнлари уни ҳам бир неча бора селпиб ўтиб, эндилиқда Гавҳаршодбегим мақбарасигина қолибди. У ҳам аввалги ҳусни-тароватини, оҳорини йўқотган, гўё Ҳиротнинг гуллаган, гуркираган давридан салобатли хотира сифатида, фамгин хаёллар ичидаги яшамоқда эди.

Ниҳоят...

КЎЗИМ ЧИҚСИН...

Ниҳоят, сал наридаги бир мақбарани «Навоийники...» деб кўрсатишувди, аввалига унча ишонқирамадим. Ҳатто аёллар тўғрисида ҳозиргина айтган мулоҳазаларимдан буткул воз кечиб юбораёздим, лекин айб улардамас-ку, деган фикр шаштимдан қайтарди.... Уйланмай, оила, фарзанд орзу-ҳавасидан воз кечиб, эллик йил кечасию кундузи, хира шам ёруғида қалам қитирлатиб, она тилимизнинг бой имкониятларини очиб берган, ҳар жиҳатдан мукаммал ва ибратли тўрт девон; оламга машҳур «Ҳамса» ва яна бошқа ўнлаб достонлар, рўсолалар ёзиб, дунё маданияти тарихидан абадул-абад фахрли ўрин эгаллаган, Хуросондек катта юртда вазир бўлиб кўп улуф ишлар қилган, ҳалқнинг меҳр-муҳаббатини қозонган, ғазаллари, қўшиқлари шу кунгача ҳам миллионлаб ҳонаёнларда баралла янграб келаётган беназир шоир ва улуф инсон мақбараси бир ҳукумдорнинг оддий, суюкли хотини номи билан боғлиқ обида олдида гугурт қутисидек кичкина, кўримсиз эди, ва ўзининг шу аҳволидан хижолат бўлгандай, эзилгандай, гарибона кўринишида эди.

Лекин бу гаплар ҳали холва экан.

Янтоқ, тикан, алафлар босиб, изи ҳам йўқолиб кетаёзган сўқмоқдан мақбарага қараб борар эканмиз, ичимдан беихтиёр бир нидо отилиб чиқди:

Ҳайҳот! Хароба-ку!

Менинг назаримда улуғ, беназир алломалар қабри, мақбараси дахлсиз бўлиб, ҳар қандай қирғин-баротларда ҳам безиён, бешикаст қолмоги керак эди. Лекин... жоҳиллар қўлидан учган ўқлар, снарядлар жой ҳам, одам ҳам танламайди-да...

Навоий мақбарасининг кун чиқиши томон деворини снаряд ўпириб юборган экан, фишт уриб қўйишибди. Ичкарида ва ташқарида темир ҳавдозлар турарди. Афтидан улар ана шу ўпирилган жойни беркитишига олиб келинганду шу бўйича қолиб кетган бўлса керак. Чунки, мақбара ичидаги ўюлиб ётган фишт синиклари, тош, кесакларга қараб, бу ерга яқин-ўртада таъмирловчилар ҳам; бошқалар ҳам оёқ босмаганини сезиш қийин эмас эди.

Деворларга чизиб ташланган телба-тескари ёзувларни кўриб, кўнглингиз озади.

Бош қисмига «Бу ерга Низомиддин Алишер Навоий дафн қилинган» деган ёзув битилган қора мар-

мар сағана тоши синиб, бўлиниб кеттан эди... Одамнинг хўрлиги, йифлагиси келадиган манзара... Ҳаммамизнинг руҳимиз тушиб кетди. Наҳотки, Навоийнинг мақбараси, қабри шу аҳволга тушиб қолса!

Мен беихтиёр «Алишер Навоий» драмасидаги ушбу байтни эсладим:

*Кўзим чиқсин сени кўргунча мундоқ,
Кесилсин тил сени сўргунча мундоқ...*

Сағана тоши атрофига омонат чўнқайиб ўтиридик. Сайфиддин ҳожи ака Қуръон тиловат қилди-да, ҳаммадан олдин ташқарига қараб юрди. Орқасидан чиқсак, у бир четдаги тошда, елкаларини қисганча бошини қўйи солиб ўтирибди. Назаримда кифтлари билинч-билинмас силкинаётгандай туюлди.

Менинг ҳам юрагим эзилди. Афғонистон ҳудудида уруш асорати, нохуш мназаралар кўп бўлишига гумоним йўқ эди, лекин Навоий мақбарасини шу алпозда кўраман деб сира-сира ўйламовдим.

Академик шоиримизFaфур Гуломнинг ҳам бир вақтлар, бундан 30 йилча олдин Ҳиротга келгани, «Алишер Навоий қабри устида» деган шеър ёзгани эсимга тушди. Ундан аввал, кейин ҳам бошқа ўзбек адабиёти, санъати намоёндалари, олимлар бўлишган бу ерда. Қачонлиги аниқ ёдимда йўқ, қулогимга Навоий мақбараси ўзбекистонликлар томонидан таъмирланаркан, деган гаплар чалинган эди. Лекин мақбара бино бўлгандан бери қайта таъмирланганга ўхшамас эди.

Ҳаммамиз мискин хаёллар билан Навоий мақбарасидан узоқлашиб борардик.

Қуриб, қовжираи бошлаган ўт-ўланлар орасида автомат ўқларидан бўшаган гилза-патронлар сочилиб ётарди.

Хурсон давлатига узоқ йиллар подшолик қилган, Ҳиротда маданиятнинг ривожланишига шарт-шароит яратиб берган, бу соҳага ўзи ҳам шоирлик қалами билан ҳисса қўшган, Алишер Навоийга болалик ва умрлик қадрдон дўст бўлган миллатдошимиз Ҳусайн Бойқаронинг мақбарасини топиб беришолмади. Тахминлаб бир эски мақбарага олиб боришувди, у ерда Ҳусайн Бойқаро эмас, воизлик санъати намоёндаларидан бири, мутафаккир, асли сабзаворлик Ҳусайн Кошифий дафн этилган экан.

— Шу атрофда эди, вайрон бўлиб кетибди-да, — деди Анвар соҳиб (афтидан анчадан бери у ҳам бу томонларга келмаган экан). — Биз — афон, ўзбек, тожик, туркман — асли бир ҳалқдай эдик, қадрдан дўсту биродар бўлиб, жуда аҳил яшардик. Бунга узоқ тарихимиз ҳам мисол. Кейинги вақтларда щуролар, коммунистик мафкура таъсирида ҳаммамиз бир-бirimizdan узоқлашиб кетдик...

Менга Анвар соҳиб бу гаплари билан ҳозирги аянчли манзаралар учун хижолат чекиб, ўзини оқламоқчи бўлаётгандай туюлди. Дарҳақиқат, Анзорий, Жомий зиёратгоҳларига бўлган эътиборни кўрдик-ку, уларни анча тартибга келтириб қўйишибди-ку: атрофлари ўралган, қайта тош ётқизилган, супуриб-сидириб туришаркан...

Аммо, атрофдаги уй-жойлар... Минг шуқрким, мен урушни кинолардагина кўрганман. Бузгунчи, номи қора бу воқеётнинг даҳшатли асоратларини шу ерда ўз кўзим билан кўрдим, ғоят мутаассир бўлдим ва уруш жабрдийдаларига кўп ачиндим. Катта бир ҳудуддаги — эҳтимол, шаҳарнинг ярмини ташкил этар, гувалак уй-кулбаларнинг тиккаси, бутуни деярли қолмagan—ҳаммаси вайрон бўлган, бу ҳол ҳар қандай дийдаси тош одамни ҳам даҳшатга соладиган даражада аянчли эди. Айрим уйларнинг эгалари қочган ва жон сақлаган жойларидан қайтиб келиб, ошиён ва дўкон учун янгитдан пойдевор қўя бошламоқда эдилар. Тарихда Мусалло ансамбли деб аталган бу кутлуғ масканни «ўраб», Ҳиротни гўё дунёга кўз-кўзлаётгандай кўкка бўй чўзган салобатли, нақшинкор миноралар ҳам инсонлар «талашуви»дан қаттиқ озор чеккан — замбарак ўқлари айримларини тешиб ўтган, баъзиларининг уч қисмини юлиб кетган, биттаси эса умуман йўқ — ер билан яксон қилиб ташланган эди. Ансамбл таркибидаги гўзал ва ранг-баранг обидаларсиз миноралар ёниб кетган уйларнинг мўриларидаи файзсиз сўппайиб туради...

Миноралар орасидан ўтган, ёқасида Ҳусайн Бой-қаронинг тўнғич ўғли Бадиuzzамон Мирзо мадрасаси бўлган ва тарихий китобларда кўп тилга олинадиган, «жаннатсалсабили ҳам арифининг ғайирлиги келадиган» Жўйи Инжил ўрнида қинфир-қийшиқ, кўримсиз ариқча қолган эди.

Шаҳарга қайтар эканмиз, кўнгиллар вайрон бўлганидан ҳеч ким чурқ этмас, ҳамма ўз хаёллари билан,

ҳозиргина кўрилган ачинарли манзараларнинг оғриқли таъсироти билан банд, фаромуш эди...

Меҳмонхонада бизга яна овқат ҳозирлаб қўйишган эди. Пўчоги арчилиб, тўғраб қўйилган тарвуз, турли хил рангли чанқов босди ичимликлар, айрон, пиширилган, товуқ гўшти солинган оппоқ гуруч (эҳтимол буларнинг паловидир) билан сийладилар. Ноннинг шакли енгчасимон бўлиб, юпқа, узун-узун чекилган (тилинган) чеватини эслатарди. Меҳмондўстликлари яхшику, овқатланётганингизда ошхона хизматчиларининг тепангизда амрингизга мунтазир бўлиб туришгани ноқулай аҳволга солар экан.

Овқатдан кейин меҳмонхонанинг мўъжазгина ҳовлисига чиқдик. Хиёбончада мевали ва манзарали дараҳт сифатида экилган анор (меваси ўртача олмадай бўлиб қолган эди), ёнфоқ («жавзи» дейишаркан) бор эди.

Кечқурун ҳам ана шу хиёбонда осмонни томоша қилиб ўтиредим. «Етти оғайниси» юлдузлари шундоққина бошим устида чарақлаб турарди. Менга энг танишли ва қадрдан бўлган бу юлдузларнинг уйимизда (Гуркировда) ҳам деярли шу ҳолатда, шу ўринда кўринишини эсладим. Осмонининг нақадар юксак ва бепоёнлиги-да бу. Йўқса, икки минг чақиримдан зиёд йўл босдик...

Меҳмонхонада (умуман Ҳиротда) чироқ масаласи чатоқ экан: движок билан ёнаркан. Кечқурун алла-вақтгача ёнмай, овқатланолмай ўтиридик. Ётишимиз билан яна учди.

Биз иккинчи қаватда жойлашган эдик. Оқшом шабада бўлиб турувди, кечаси дим бўлиб, қизиб кетдим. Душга тушай десам, сув совук, чироқ йўқ. Бунинг устига нималигини билиб бўлмайдиган майда нарсалар чақиб безор қилди.

Алқисса анча ҳаловатсиз кеча бўлди.

АМИР ТЕМУРНИ КЎРГАН НАМОЗГОХ

27 июл, сешанба.

Аzonда, тонг қоронфисида тақир-туқур бўлиб қолди. Сайфиддин ҳожи, Зокиржон ҳожи, Собиржон ҳожи ва Аҳмаджонлар бомдод номозини ўқиб келиш учун Жомъе масжидига отланишаётган экан. Тўлқин ака билан пастга тушдик, хиёбончада тонг отишини кутиб, суҳбатлашиб ўтиридик.

Хонага чиққан пайтимда деразадан меҳмонхона билан туташ, қўшни ҳовлига кўзим ту舍ди. Чоғроққина ҳовли ўртасидаги катта тут дараҳтига осилган ҳалинчак атрофида беш-олтига қизалоқ чуғурашиб ўйнаб юришарди. Таниш манзара...

Шу ҳовлида юзи очиқ афғон аёлларини (лекин тўпиғидан билагигача кийим ичида ва рўмол ўрашган), уларнинг кулганини дераза ойнасига пашшадан ихота қилиш учун тўсилган майда кўзли сим тўр ортидан хирагина кўрдим. Кўчада аёллар жуда шитоб қадам ташлашарди, ҳозир мен кўриб турган жувонлар ҳовлида шошилмай, соллангансимон, гёё ерни авайлаб босишарди. Уларнинг оёқлари заминга енгил, омонаттина тушаётгандай туюлди менга. Дарвоҷе, кўчада уларни бирор кўриб-танимагандан кейин, қаддиқоматини намойиш қилишга эҳтиёж бўлмагач, оҳис-та, солланиб юришнинг қизиги бормиди...

Енгилгина нонушта қилгач, Муҳаммад Анвар соҳиб билан шаҳар айлангани жўнадик. Кун ботишга — Янги шаҳар («янги» сўзи ҳам бу ерда ўз маъносини йўқотиб, шунчаки атама вазифасини бажаради) томонга юрдик. Йўлда Анвар соҳиб бир идорага кириб, икки кишини бошлаб чиқди. Ўттиз ёшлар чамасидаги бўйчан аммо озғин, сийракроқ соқолли, кўзойнак таққани Ҳирот матбуот ва маданият ишлари раиси Абдурауф Муҳлис, иккинчиси — ёши улугроги, басавлат, анча маданиятли ва хушмуомала кўринадиган мўйсафида Мавлавий Анбарий раис муовини экан. Калта, қора коло устидан сурранг нимча кийган Абдурауф Муҳлис менинг кўзимга турк зиёлиларига ўхшаб кўринди.

Мавлавий (бу сифат «мавлоно» маъносида қўлланилар экан) Анбарий бизга сайёҳбонлик қилди. Дастрраб Жомъе масжидига бордик. Мавлоно Анбарий узок йил ишлаб, ўз соҳасининг ҳадисини олган сайёҳбон каби шаҳарни, ундаги осори-атиқалар тарихию таржими ҳолини ва бошқа жиҳатларини жуда яхши билар ва фоятда сўзамоллик, ширинсуханлик билан, бироқ одатдаги расмий сайёҳбонлардан фарқли ўлароқ эҳтирос ва фахр билан, таъсирили тушунтириб борарди. Саволларимизга эринмай, лўнда ва аниқ жавоб берид, бизда қаноат ҳосил этишга ҳаракат қиласарди. Жомъе масжидини ҳам, қурилишидаю таъмирлаш пайтларида худди тепасида турган, шахсан иштирок этган одамдай жуда батафсил шарҳлаб, изоҳлаб берди. Унинг айтишича, Фиёсидин Ҳирий деган одам

асос солған бу улкан иншоот етмиш етти йил давомида қурилган ва ҳижрий 597 йилда битказилган (тариҳий манбаларда ҳам масжид қурилишига кеттган муддат салкам бир аср қилиб кўрсатилган). Заҳириддин Муҳаммад Бобур ҳам «Бобурнома»да ана шу масжидни зиёрат қилганини ёзади. Зилзилада қаттиқ шикаст топган масжид Ҳусайн Бойқаро ва Алишер Навоий раҳбарлигида таъмирланган, хусусан, кираверишдаги гумбаз остилари, ёнлари нақшлар билан безатилган. Афсуски, тарихнинг бешафқат шамоллари таъсирида мармар ҳам, ундаги безаклар ҳам емирилиб, Бойқаро ва Навоийлар давридан икки деворустунда ҳар бири бир жойнамозча қеладиган кошин қолган, холос. Масжид деворининг қуи қисмига ишлатилган мартарошлар Шоҳрух замонидан бери мустаҳкам турибди.

Масжид биносининг 460 гумбази бўлиб, ҳар бир гумбаз остида бир хона бор. Ўртадаги майдон ҳам жуда кенг, ҳайит кунлари бу ерда ўттиз минг одам номоз ўқир экан.

Масжиднинг тўрт томони нақшли девору кўшкайвонлардан иборат катта майдонда сайру томоша қилиб юрар эканмиз, мен Самарқандда соҳибқирон Амир Темур суюкли хотини, маслаҳатдоши Сарой Мулк хоним шарафига қурдирган «Бибихоним» масжидининг ҳам шундай улуғвор ва маҳобатли, катта майдонлари гавжум бўлганлигини тасаввур қилдим.

Ҳаммасидан ҳам бизни ҳижрий 776 йилда ясалган ниҳоятда улкан дошқозон, ҳайратта солди. Унда пиширилган ош ўша пайтдаги Ҳирот аҳлига бемалол етган бўлса керак, деб ўйладим.

Гумбазлар остидаги пештоқдар орасида, айвонларда, ўрталиқдаги майдонда юзлаб кулранг, ёввойи каптарлар учиб, ўйнаб юришарди. Бу ёқимтой жониворлар одамга шу қадар ўрганиб кетишганки, улари «ёввойи» дегинг ҳам келмайди.

Бир хонага кирсак усталар (асосан кексалар) узун, катта супа атрофида чўк тушиб, қўлларида чекич, эгов, қалам билан тош, сопол тараашлашипти. Улар ота-боболари ҳунарини давом эттиришиб, масжид ва бошқа обидалар учун нақшлар, кошинлар ишлашмоқда эди.

Уста Абубакр деган мўйсафид эса, супанинг бир томонида ўспирин ўғли билан эски, синган сопол кошинларни «ямаб», қайта ишлов бериб, янги шакллар

яратмоқда эди. Бир оз кузатиб турдик. Усталарнинг иши, ҳунари шу қадар майда ва ҳафсала, ихлос талаб эдики, анча-мунча бесабр одам чидамаса керак. Шунда мен нима учун ҳозир мана шундай нақшлар, кошинлар билан безатилган бинолар қурилмаслиги сабабини топгандай бўлдим.

Масжиднинг биз каби сайёхлар кутиб олинадиган, анча уринган замонавий диван, кресло, столчалар қўйилган идорасига бошлаб киришди. Бир пиёла чой устида сухбат бўлди. (Қотмагина бир мўйсафил бўшаган финжонларимизни олиб чиқиб, бир зумда чой қуйиб келар, мен бу ҳолдан ўнғайсизланиб, хижолат чекардим. Кун иссиқлиги ва эрталаб чойга тўймаганимиз учун ҳаммамиз ҳам анча чанқаган эканмиз). Хона деворларидағи рангли суратларда Ҳирот манзаралари, тарихий ёдгорликлар-мақбаралар, миноралар тасвиirlанган эди.

— Афсуски, энди бу жойлардан мана шу расмларгина хотира бўлиб қолди, ҳаммаси вайрон бўлган, — дейишиди.

— Бир неча асрлар Хурросондай катта бир давлатнинг пойтахти бўлган Ҳирот, — деди Анбарий, — асли боши урушдан чиқмаган шаҳар...

Шу ерда бизга бундан бир неча йил олдин Ўзбекистон ҳукуматининг Навоий мақбараси ва бошқа маданий ёдгорликларни таъмирлаш вазифасини ўз зиммасига олиши тўғрисидаги номасига биноан Кобулдан Ҳирот маҳаллий ҳукуматига келган хатни кўрсатишиди.

Экспедициямиз раҳбари Зокиржон aka Машрабов: Мустақил Ўзбекистонимизнинг янги ҳукумати билан гаплашман, маъқул кўрилса, ўша хатда айтилган ёдгорликларни таъмирлашни Бобур номли ҳалқаро хайрия жамғармаси ҳисобидан амалга оширамиз, деб ваъда берди.

ҲИРОТНИНГ ҚАДИМИЙ КЎЧАЛАРИДА

Кўчага чиқдик. Собиржон aka билан қизиқсиниб бир дўконга кирдик. Ёпирай! Эски-туски, темир-терсак, сопол буюмлар, анжомлар, ёдгорликсимон нарсалар... тиқилиб ётиби! Ақлингиз озади. Тарихий музей дейсиз! Лекин биронта тарихий мозийгоҳда нарса бу қадар майда ва кўп бўлмаса керак. Умуман, дунёда

инсон қўли билан яратилган, рўзгор, турмушда қўллашга мўлжалланган ашқол-дашқолнинг шу қадар ранг-бранг бўлишини тасаввур қилиш қийин. Бисотимизда бор форсча, тожикича сўзлардан фойдаланиб, сотувчига амаллаб бир-икки савол бердик — (Масалан: «бу ашёлар қайси даврларга оид? Уларни қаердан, қандай йиққансиз?» дегандай), лекин жавобларни тушунолмадик. Ҳарқалай, бу нарсаларни тўплаб-йигишга бир одамнинг умри етишига ақл бовар қilmайди. Эҳтимол, бу дўкон ва нарсалар дўкондорнинг ота-боболаридан қолгандир? Бир қисмини Ҳирот ҳудудидаги вайроналардан, эгалари ҳалок бўлишган ё ташлаб қочишиган уйлардан териб қўшган бўлиши ҳам мумкин.

Дарвоқе, дўкон хусусий бўлиб, эгасининг исмишарифи Ҳожи Ҳафизулло эди. У олтмиш ёшлардаги, ўрта бўйли, қорачагина киши эди. (Бу ерли одамларнинг сиртига қараб, «фалон ёшларда», дейиш ҳам қийин экан. Соқол, салла, кийим-бош ўрганмаган кўзларни алдар экан. Мавлоно Анбарийни мен олтмиш бешетмиш ёшларда, деб чамаловдим, ҳолбуки эллик беш ёшга кирибди). Бошқа дўконларни ҳам айландик. Бобур ҳакида, умуман қардош ҳалқдар тарихи ва адабиёттига оид китоблар изладик. Дўконларда нарсалар қалашиб ётибди. Ошиб-тошиб, чердакларга, томларга чиқиб кетибди. Кўк рангли буюм, мато шу даражада кўпки кўз қамашиб кетади. Дўконларнинг олдига, ҳовлисига ҳам, шундоқина ерга сунъий матодан (асосан пластмассадан) ишланган буюмлар, ўйинчоқлар ва бошқа ашёлар уюб ташланган. Янгисидан эскиси кўпроққа ўхшаб кўринди менга. Қисқаси, дўконлар кичкина-кичкина, тифиз, тор — оёқ босгани, бош суққани жой йўқ. Шифтларига, бурчакларига ўргимчаклар уя солиб ташлаган деворлар ҳароб, қулай-қулай деб турибди. Дарз кетган ерларини ямаб, оқлаб қўйиш ҳам эсларига келмайди ё кўнгилларига сифмайди, шекилли. Мен Ҳиротни зинҳор-базинҳор бундай тасаввур қилмасдим. Бу ердаги ҳаёт тарзи, савдо маданияти ўрта асрларни эслатарди. Қандолатчилик усулидаги чакана савдо авжида. Лекин, юқорида айтганимдай, асосий улов воситаларидан бўлган «годи» (отли извош), велосипедларини безаш, жиҳозлашга сираям эринишмас экан.

Йўлларнинг аксарияти эгри-бугри, тош-тупроқди, тартибсиз, нообод, бефайз эди. Енгил эпкинга ҳам чанг кўтариларди. Энг ачинарлиси — боф-хиёбонларда дарахтлар сийрак, кўча бўйларида гиёҳ кам, йўқ

ҳисоби эди. Бор дарахтлари асосан маҳаллий халқ «навжӯ», «чанор» деб атайдиган баланд, адл бўйли қарагай ва ғужумсимон, игна баргли арчанинг бир нави (эски китобларда чиндан ҳам қадди-қомати гўзал бу дарахтлар «сарв», «санобар» деган чиройли номлар билан юритилади)дан иборат эди.

Кўхна ва қаровсизлиги билан одамда нохуш ва дилгир кайфият уйғотувчи кўчалар, аксарияти эски, чангга беланган машиналар, буқчайиб ўтирган серсоқол баққоллар, у ёқдан бу ёққа коло, чодрадарининг этакларини ҳилпиратиб шитоб юрган эркаклар, аёллар, енги узун кўйлак, шолвор-иштон кийган қоп-қора болалар — айни тарихий кинолардаги манзараларнинг ўзгинаси эди.

Оппоқ коло кийган эркаклар (аксарияти мўйса-фидлар) ҳам тез-тез учраб қоларди. Улар мулло кишилар экан.

Эркакларнинг кўпи умрида соқол олмаганга, иягига тиф теккизмаганга ўҳшашади. Аксарият аффонларнинг чуқур боттан кўзларида аламзадалик, уруш кўра-вериб дийдаси қотган одамларнинг нигоҳида кўзга ташланадиган совуққон бир шиддат зоҳир эди.

Аёллар...

Қизлар ҳукумат қарорига ва илгаридан давом этиб келдётган мусулмончилик тартиб-қоидаларига кўра 14 ёнда чодрага киришлари шарт экан ва шу ёндан турмушга чиқара бошлишаркан. Чиндан ҳам йўлда чодра ёпиниб бораётган қизларнинг жуссасидан уларнинг ҳали балоғатга этиб-етмаган бир паллада, нозиккинча, уволгина эканлигини сезиб олиш мумкин эди.

Чодралар... Оч, тўқ ҳаво ранг, сиёҳранг, қора ялтироқ, фижим матодан тикилган, кенг, этаги бир неча қат бурмали, аксарияти ерга тегар-тегмас, баъзилари кўчани супуриб, енгил чангитиб юрадиган чодралар... Шу узун чодра қиз-аёлларнинг кўйлаги, паранжичачвони эди. Уларнинг ҳатто кўзлари ҳам кўринмайди. Бир туриб ачинасан одам, аёлларга нисбатан ўта шафқатсизликмасмикин, дегинг келади, кейин, яна ҳар бир халқ ўзи ҳал қиласиди-да қандай кийиниб юришини, балки шуниси ҳам яхшидир: эркаклар ҳам, аёллар ҳам кўз зиносидан сақланиб, анча кўнгли тўқ, хотиржам бўладилар-ку деган фикр кечади хаёлингдан. Пойафзаллари ҳар хил: шиппак, сандал, оқ лозим шалворга қора пайпоқ кийиш кўпроқ урф экан...

Кўча, дўконларни узоқ айланишнинг қизифи йўқ эди, чунки деярли ҳамма дўконлар бир-бирига ўхшашиб, қолаверса бирон нарса ҳарид қилишга пулимиз ҳам йўқ эди. Мавлоно Анбарийга кеча Ҳусайн Бойқаро мақбарасини тополмаганимизни айтувдик, у бизни олиб бориб кўрсатишга бажонидил рози бўлди.

СУЛТОН ХОТИРАСИГА ҚОЛГАН ТОШ

Афғонистон менга аввало Алишер Навоий бобомиз шу заминда таваллуд топгани, яшагани ва бебаҳо, дурдона асарлар яратгани, ўзбек адабиётини юксак чўққига олиб чақиб, адабий тилимизни байроқ қилиб кўтартгани учун, қолаверса, Заҳириддин Мұхаммад Бобурмизнинг шу ўлкага меҳри баландлиги ва унга абадий оромгоҳ бўлгани билан қадрли эди. Бундан ташқари болалигимда «Афғон эртаклари», «Гули сиёҳ» (Соҳиб Жамол асари) деган китобларни ўқигандим. Ўша рўмон ва эртакларда афғонлар жуда самимий, аҳил, эзгуликни яхши кўрадиган, олижаноб, ўзбекларни ўзларига дўст деб билувчи эди. Бу халқ тўғрисидаги тасаввурларимни кейинчалик матбуот хаబарлари анча лойқалаштириб юборган эди. Ноҳақ ва бемақсад уруш орамизга раҳна согланлигидан жуда афсусланардим. Ҳарқалай менда бизни қандай қарши олишаркин деган ташвиш йўқ эмас эди. Хайриятки баҳтимизга афғонистонликлар гуноҳ бизда эмаслигини, ўша даврда йигитларимиз афғон заминига мажбуран жўнатилганлигини яхши билишар экан. Ҳиротдаги дўстона қабул, меҳмонхонадаги сидқидилдан кўрсатилаётган хуштакаллуф муруватлар, Анвар соҳиб, Жумавой ва хусусан мана бу билимдан муаррих Анбариининг бизга нисбатан очиқ чехра, самимилиги, худди эски қадрдонлардек, юмушларини қўйиб, ҳамроҳ бўлиб юришлари шахсан менинг кўнглимдаги туманларни бутунлай тарқатиб уларга нисбатан меҳрим янада товланиб кетди.

Йўл-йўлакай турли мавзуда суҳбатлашиб, яна кечаги жойга етиб келганимизни пайқамай қолибмиз. Ҳусайн Бойқаро мақбараси... йўқ, йўқ, мақбараси эмас, мақбара деворларининг қолдиқлари кеча икки бора ўтган йўлимиздан атиги йигирма-ўттиз қадам ичкарида, Навоий мақбарасидан эса 200-250 қадамча нарида вайронага айланиб ётар эди. Ўртада, қабр узра қўйил-

ган, чанг босган қоп-қора сағана тоши эгасига мотам тутаётгандай мунғайиб турарди.

Ҳаётнинг бешафқатлиги дунёнинг бевафолигини, табиатнинг адолатсизлигини одамзотнинг лоқайд ва оқибатсизлигини кўринг! Хурросон давлатига салкам қирқ йил ҳукмронлик қилиб, Ҳиротни обод ва маданий марказга айлантиришга нечоғлик ҳисса қўшган, Алишер Навоий таъсирида илм ва ижод аҳлига яхши шароит ва кенг имкониятлар яратиб берган шоҳ мақбарасининг қисмати шу бўлибди.

Захиридин Мұҳаммад Бобур ҳам «Бобурнома»да Ҳусайн Бойқаронинг Ҳиротни юксалтиришдаги хизматларини алоҳида таъкидлаб, «...рубъи маскунда андоқ шаҳр (Ҳирот — К. К.) йўқтур ва Султон Ҳусайн Мирзонинг (Ҳусайн Бойқаронинг — К. К.) замонида мирzonинг тасарруфидин ва тақаллуфидин Ҳирининг (Ҳиротнинг — К. К.) зеб ва зийнати бирга ўн, балки йигирма тараққий қилиб эди...» деб ёзган эди. Ахир Ҳусайн Бойқаро султонгина эмас, девон тартиб берган, Навоий назарига тушган таниқли шоир ҳам-ку...

Бизнинг фоят мутаассир бўлганимизни кўрган Анбарий «бу бари узок давом этган урушлар оқибати», деди хижолат бўлиб.

Жуда ачиндим. Искандарнинг дүнёдан қўли очик кетиши ҳақидаги ривоятни эсладим.

— Мана шу сағана тошини шартта елкамга қўйиб олиб кетсан, — деди Собиржон Шокаримов бош чайқаб.

— Агар Навоий билан Ҳусайн Бойқаро хокларини беришса, олиб кетардим, — деди Зокиржон aka алам билан.

Ҳусайн Бойқаро руҳига Қуръон тиловат қилганимиздан сўнг, мавлоно Анбарий сағана тошининг нақшларини изоҳлаб берди. Тошга етти қатли нақш битилган экан. Нақшчиликнинг энг мураккаб тури Ҳиротда «ҳафт қалам» дейилган. Яъни тош қазиб олингандан бошлаб етти марта ишлов берилган. Ҳомашё — қора тош Ҳиротнинг ўзидан чиққан. Сағана тошини Ҳусайн Бойқаронинг шахсан тошириғи билан Зайнiddин сангтарош етти йил ишлаган, ҳукмдорнинг тавсиясига кўра нақшга ферузга, ложувард, олтин ишлатилган. Сағана тошининг битганини Ҳусайн Бойқаронинг ўзи кўриб кўнгли хотиржам бўлган экан. Дарҳақиқат, тошнинг умумий шакли-шамойили, нақшлар мутаносиблиги ва уйғунлиги шу даражада аниқ ва зукколик билан ишланганки, айтишларича, америкалик мута-

хассислар махсус асбоблар билан текширишганда узунлиги 170 сантиметрли тошнинг бош ва оёқ томонидаги гул-нақшлар уйғуның яъни симметриясида 0,001 миллиметр фарқ чиқсан, холос.

Мавлоно Анбарий бизга Мусалло ансамбли ҳудудидаги машҳур мадрасалар — Дорул итом (етимлар ўқиши жойи), Дорул шифо, Дорул ҳаттотин (ҳаттотлик санъати билимгоҳи), Дорул таждиқ (муқовасозлик), Дорул тазхіб ва тарсия (тилло суви юритиб ёзиш илми), Дорул машварат, шунингдек бошқа илм ва санъат даргоҳлари ҳақида жўшиб, фахр ва афсус билан гапириб берди. Бойсунқур Мирзо даврида «Қуръон» тўрт юз ҳаттот томонидан турли ҳатларда етмиш минг нусхада кўчирилиб, жаҳоннинг турли жойларига юборилганини алоҳида таъкидлади. Ҳа, Ҳирот бир замонлар мана шундай шаҳри азим, шаҳри дониш бўлган!

Кун чиқиши тарафдаги вайроналарга айланган уйларни кўриб даҳшатга тушасиз. Уруш туфайли кулбасини тарк этган, ташлаб қочганларнинг аксарияти қайтиб келиб, ўз уйларидан қолган ҳаробалар устига янгидан уй, дўкон қуришмоқда эди.

Тарихий ёдгорликлар, мақбаралар мозорига айланган собиқ «Хиёбон»дан яна шаҳарга қайтдик.

Юқоридаги тушкун кайфият мени анчагача тарк этмади, шаҳар кўчаларини айланган пайтимизда менда яна нохуш таассуротлар туғилаверди.

Ҳиротдаги энг кўхна ва катта тарихий иншоотлардан бири Ихтиёриддин қалъасидир. Минг йилча аввал барпо этилган, мудофаага мўлжалланган бу обида ЮНЕСКО ёрдамида, ўз шакли сақланган ҳолда таъмирланган экан. У қадимда «шаҳри банд» дейилган. Ҳозир ҳам уни қуролли аскарлар қўриқлашаркан. Анвар соҳибни ҳам аранг тан олишиб, бизни ичкарига қийинчилик билан қўйишиди. Лекин қалъа ичида эса, менинг назаримда нураб ётган деворлар, қоронғи хоналар, йўлаклардан бошқа қўриқлашга арзигулиқ вақо йўқ эди. Яна ким билади, дейсиз, балки, ҳарбий аҳамиятга молик, алоҳида жойларни бизга кўрсатишмагандир...

Бирдан юрагим увишгандай бўлди. Кўз олдимга жувонмарг шаҳзода Мўмин Мирзонинг мўлтираб турган чақноқ кўзлари келди.

Аслида қандай бўлгани шахсан менга қоронғу, манбаларда ривоят қилинишича Ҳусайн Бойқаро хотини Хадичабегим макри билан, мастлик чоғида ўзининг

фоят суюкли набираси ўлимига бармоқ босганида, бегуноҳ ўсмир Мўмин Мирзо мана шу совуқ, деворлар ичида эди, шу ерда қатл этилади. Фарзанд ё набира билан исён сабаб, тож-тахт талашишлар боис жанг майдонида рўпара келиш бошқаю бир норасида қатлига бекордан-бекорга фатво бериб юбориши... Ҳарқалай, тарихда бундай даҳшатли фожия камдан-кам бўлали... Наҳотки бу чиндан ҳам ичкиликнинг оқибати бўлса? Шу мазмундаги ривоят эсимга тушди. Эмишки, кўнгли бузук бир аёл мўмин бир баандани ўзи билан яқинлик қилишга даъват этибди. Эркак қатъян рад қилибди. Шунда аёл: бўлмаса ё мана бу болани ўлдирасан ё мана бу шаробни ичасан, деб талаб қўйибди. Мўмин одам шуни ичсан қутуламанми, деб шаробни танлабди, ва... маст бўлиб, аёл билан яқинлик ҳам қилган, болани ҳам ўлдирган экан... Яна, ким билади, балки юқоридаги ҳодисанинг сабаблари анча жиддийроқ бўлгандир...

— Чингизхон Ҳиротни етти кунда босиб олган, — деди мавлоно Анбарий, — лекин қалъадагилар икки ойгача таслим бўлишмаган.

(Тарихий манбаларда Ҳиротни Чингизхоннинг ўғли Тулуй қўшинлари эгаллаганлиги айтилади).

Қалъа хонадонларидан бирининг томига чиқиб, Ҳиротни, унинг кафтдагидай кўриниб турган шарқи шимол, гарб томонларини томоша қилдик. Бинолар, уйларнинг аксарияти хом ғиштили, гувала, пахса деворли, лой сувоқли томлардан иборат эди. Бинога нисбатан дараҳт камга ўхшарди. Шунинг учун Ҳиротнинг шимоли адирларга туташиб кетган мана шу манзаралари шаҳардан кўра, қадимий қишлоқни кўпроқ эслатарди. Тарихий китобларда Ҳиротда XV асрдаёқ икки қаватли, ойнаванд деразали уйлар бўлган, деб хабар берилади. Қани ўша уйлар?

Қўналғамизга қайтдик.

НАҲОТКИ ОРҚАГА ҚАЙТСАК?

Мўлжалимиз бўйича биз Ҳирот орқали Эронга ўтиб кетишимиз керак эди. Кутимаганда жиддий муаммо чиқиб қолди. Бизга Ўзбекистондаги Эрон элчинонасидан Эронга Божгирон божхонаси орқали ўтишга рухсат берилган экан. Ҳужжатларимизда Афонистон худудига ўтиш (у ҳам фақат бир марта) қайд этилгану, бу

юртдан қандай чиқиб кетиш ҳақида бирон-бир белгি-кўрсатма йўқ экан. Шунинг учун бу ердаги Эрон консулхонасидан қўшимча рухсатнома олиш зарурлигини айтишди. Лекин баҳтга қарши консул Техронга кетган, ёрдамчиси атига икки ойдан бери ишлайдиган ёш йигит экан, масалани ҳал қилолмади.

Меҳмонхонамида шахсан Ҳирот губернатори Амир Исмоилшоҳ, шу куни Ҳиротга келган Афғонистон Ташки ишлар вазирининг ўринбосари Жалил Шамс ва бошқа масъул қишилар иштирокида ҳам бизнинг ма-сала мұхқомама бўлди. Айрим ўртоқлар йўли унча яхши бўлмаса ҳам, яқинроқ деб Қандаҳор орқали кетишни тавсия қилишган эди, амир ва бошқа раҳбарлар маслаҳат беришмади.

— Яхиси, — деди Амир Исмоилшоҳ, — етти кишини тайёрада Пешаворга жўнатаильик, машинангизни, ҳайдовчига иккита соқчи қўшиб, орқангиздан етказамиш.

— Юкларимиз кўп, кино, телекамералар, бошқа аппаратуралар, совға-саломларимиз бор, — эътиroz билдири Зокиржон aka босиқдик билан.

— Барча зарур нарсаларингизни тайёрага ортамиз...

— Йўқ, бунинг иложи йўқ, — деди Зокиржон aka бироз кескинлик билан, — машинадан бир қадам ҳам жилмаймиз.

Мезбонлар ажабланишган эди, Зокиржон aka изоҳ берди:

— Экспедициямизнинг мақсади ерда, Захиридин Мұхаммад Бобур юрган йўллардан юриб, у ҳақида маълумотлар йиғиши, одамлар билан сұхбатлашишдан иборат...

Меҳмонхонанинг машваратхонасидағи бу сұхбат-музокара анча узоқ давом этди. Амир ҳам, Жалил Шамс ҳам жуда беғам ва хотиржамга, шошадиган ишлари йўққа ўхшаб кўринишарди.

Ҳирот губернатори ҳали ёш—эндигина қирқ иккига кирган бўлиб, ўрта бўйли, кичик аммо қарашлари чуқур маъноли кўзлари кулимсираб турадиган истарали одам эди. Асаби жуда мустаҳкамга ўхшайди. Суратда бутунлай акси: серсоқол, салобатли, нигоҳлари қарчи-тайникидек шиддатли... Ёшини ҳам эллик-эллик бешларда бўлса керак, деб тахмин қилувдим...

Ташки ишлар вазири ўринбосари бошининг ўртасида сочи кам, чап томондаги сийрак соchlарини ўнг

томонга силлиқ, қилиб тараган, күзойнакли, соқоли қиришилаб олинган, афт-ангори ҳақиқий эронийларга ўхшаш (нимагадир мен уни «Техрон» романидаги қаҳрамонларга ўхшатдим), кул ранг кўйлак устидан шу рангда камзул кийган, эллик-эллик икки ёшлардаги Жалил Шамс менинг назаримда анча совуққон, лоқайд одамдай, хусусан бизнинг «масала»га унча жон куйдирмаёттандай туюлди.

Сұхбатда қатнашган мавлоно Анбарий ва Анвар соҳиб раҳбарларнинг Қандаҳор йўналишига райи бўлмасликлари сабабини тушунтиришиб, Қандаҳор билан Покистон оралигининг нотинчлиги, қароқчилар ва бошқа тўдалардан хавфсирашаёттанини айтиди. Уй-жойидан, оиласидан ажралиб, аламини кимдан олишини билмай изғиб юришган қароқчилар экспедициями, бошқами — суриштириб ўтиришармиди.

— У ҳолда биз Кушкага қайтамиз, — деди Зокиржон ака бир қарорга келишмаган музокарага хulosса ясаб, — ортиқча оворагарчилик, қийинчиликдан чўчимаймиз. Ўрганиб қолганмиз.

Дарвоқе, сұхбатда Зокиржон Машрабов Ўзбекистонга қайтгач, бу ердаги аҳволни республика ҳукуматига етказиб, ҳалқимизга мурожаат қилишлигини айтди, улуғ инсонлар — Алишер Навоий, Ҳусайн Бойқароларнинг мангу оромгоҳларини Афғонистон, хусусан Ҳирот ҳукумати билан биргаликда таъмирлаш, қайта тиклаш масаласини ҳам, айнан аввал ўзаро келишиб олганимиздек ўртага ташлади. Биз Амир Исмоилшоҳ бу масалага қандай муносабатда бўларкин, оғир ботмасмикин ё ғаши келмасмикин деб ўйлаб турувдик, таажжуб ва ҳайриятки, у раҳбаримиз таклифини мамнуният билан қабул қилди ва ҳатто олдиндан миннатдорчилик билдириди.

Сұхбат расмий газеталар тили билан айтганда ва аслида ҳам жуда самимий, дўстона бўлди. Ҳирот ҳокими томонидан кўрсатилган марҳамат ва меҳмондўстликлар учун ташаккур изҳор этиб, дилимиз анча равшанлашди.

ШАҲИДЛАР МОЗОРИ

Биз шу заҳотиёқ жўнаб кетмоқчи эдик. Лекин мезбонлар бугун кеч бўлиб қолди, кейин, бизда бир зиёрат жой бор, кўриб кетмасанглар бўлмайди, дейишиди шикоятга ўрин йўқ дегандай қатъий оҳангда.

Хуллас, Анвар соҳиб билан мавлоно Анбарий иккита барваста зобит ҳамроҳлигида бизни Ҳиротга Кушга томондан кираверишда, йўлнинг ўнг томонидаги баланд адирлар оралиғида жойлашган очиқ музейга ўхшаш «Номаъум шаҳидлар мозори»га олиб боришди. Бу мозор эмас, даҳшат эди...

Ердан бир метрча баланд, қатор ойнаванд витриналар остидаги чуқур ҳандакларда калла чаноқлари, оёқ, қўл суюклари уюлиб ётарди. Баъзи бош чаноқларида кўзга боғланган латталар ҳам қолиб кетган эди. Пойафзаллар, аёлларнинг сочларини кўриб, юрагим увудиб қолғандай бўлди... қаердан пайдо бўлишди, билмадим, бир зумда атрафимизни йигирма-ўттизта одам ўраб олди. Бири қўйиб, бири афғон, ўзбек, тожик тилларида бу мудҳиш очиқ қабрлар тарихи ва тафсилотларини куйиб-пишиб, асабийлашиб гапиришарди. Биттанглар айтиб беринглар, деб илтимос қилдик. (Мавлоно Анбарий билан Анвар соҳиблар негадир сукут сақлашарди). Майманалик ўзбек йигити Фулом Саҳининг ҳикоя қилишибча, уруш даврида шўро зобитлари ва аскарлари тунда Ҳирот аҳлиниң катта бир қисмини — олимлар, зиёлилар, мужоҳидларни оила аъзолари билан, яъни «эркагу саёсар» (хотин-қиз), бача (бола)ларни кўзларини боғлаб, подасимон ҳайдаб кетишган. Уларнинг орасида камбағал деҳқон ҳам, ҳунармандлар, фарибу бечора мазлумлар ҳам кўп бўлган экан. Уларнинг қариндош-урувлари «шўролар банди қилиб олиб кетишган бўлса керак, банди бўлса ҳам, қаерда бўлса ҳам, тирик бўлса майли», деб умид қилиб юришган. Бандиларнинг тақдири қаттиқ сир сақланган. Улар тахминан уч минг киши бўлган, кўпчилиги тожиклар, афғонлар, ўзбеклар эди, деди Фулом Саҳи кўзларига ёш олиб. У савдогар бўлса ҳам жуда куйканак ватанпарвар, миллатпарвар ва гапга чечан эди.

— Шўродан асир тушганлар қаттиқ сиқувга олинганда айтиб бериши: ўша машъум кечада коммунистлар бандиларни шу ерга олиб чиқиб, бульдозер билан ковланган ҳандакларга отиб ё тириклай кўмиб юборишиган экан.

— Ҳа, — деб тасдиқлади Анвар соҳиб, — бу мозор бир неча йилдан кейин, бултур (1992 йили) аниқланиб, зиёратгоҳ қилиб қўйилди.

Биз бу ерга кетма-кет, тўп-тўп бўлиб келишаётган ва қайтишаётган ёш-ёш қизлар, болаларни кўрдик.

Эҳтимол уларнинг бедарак кетган ота-оналари, ақаопалари чиндан ҳам шу ердадир...

Норасида зиёратчилар унсиз, ўқсиб-ўқсиб йифлашарди...

Юрақларимиз тилка-пора бўлди. Бирон оғиз сўз айтишга биронтамиизда забон ҳам, мажол ҳам йўқ эди.

Йўлга чиққанимизда Собиржон Шокаримов Германиянинг Веймар шаҳри чеккасида жойлашган Бухенвалддаги 56 минг маҳбус қийнаб ўлдирилган концлагер ва музейда бўлганини, ҳозир одамхўр фашистларнинг ана шу «кушхона»сидаги даҳшат кўз олдига келганини айтиб, у ерда кўрганларини гапириб берди... Мана шундай пайтларда ваҳшийлигининг чеки йўқ бўлган одам зотидан ҳам кўнглинг совиб кетади...

Мен бу ерга бизни иҳтиёрий-мажбурий тарзда олиб келишлари боисини ўйлардим...

Пастга тушиб, Ҳиротнинг шарқи-шимол томонига қараб кетдик. Йўлда ўлжа олинган, ташлаб кетилган БТР, танклар, юқ машиналари (бехисоб), бир неча вертолёт қантариғлик отдай қаққайиб турган жойдан ўтдик. (Бу ерни тасвирга олишга ижозат беришмади).

Баланд адир қўршовида таъмирланаётган ёдгорлик олдига (Ҳусайн Бойқародан қолган ва бундан ўттиз ийл аввал бузилиб кеттан экан) бордик. Шу атрофдаги боғ-роғлар эса уруш пайтида вайрон бўлибди.

Ёдгорлик пойидаги янги ҳовузда маҳаллий болалар, ўсмиirlар, йигитлар чўмилишаётган экан. Зангор тусли сув ниҳоятда чиройли жимиirlаб турарди. Экспедициямизнинг энг кенжা аъзоси Фаррухнинг сабри чидамади. У тележурналистлик, таржимонлик имтиёзлари ва мавқеидан фойдаланиб, раҳбаримиз руҳсати билан чўмилиб чиққанида вақт номоз асрга яқинлашиб қолган эди.

ЧЕКИНИШ

28 июл, чоршанба.

Аzon даъватидан ҳам аввал годиларнинг ниҳоятда ёқимли жаранглайдиган қўнғироқчалари саҳарнинг сирли жимлигини бузиб, ҳиротликларни уйғотар экан. Тоңг ёришиши билан битта-яримга енгил машина,

кўплаб велосипед (асосий улов!), чодрасини ҳилпиллатиб, аёллар ўта бошлади.

Нонуштадан кейин Зокиржон ака билан таржи-мон Фаррух Эрон элчихонасига кетишиди. Қолганларимиз автобусимиз ёнида ўтган-кетганни томоша қилиб турдик.

Афғонистоннинг бошқа шаҳарларида қандай — билмадиму, лекин Ҳиротда кўча ҳаракати қоидалари га амал қилиш унча расм эмас экан. Ҳайдовчилар гўё «ўзингни эҳтиёт қилиб ол» қабилида бир-бирларини жуда қалтис вазиятларда ҳам кувиб ўтишар, тор, калта йўлларда ҳам юқори тезлиқда юришарди. Йўл назорати ходимларини жуда кам кўрдим. Фақат чорраҳаларда светофор вазифасини бажариб туришарди. Автобуслар тиrbанд, одамлар очиқ эшикларга осилишиб кетишавераркан. Автобуснинг орқа қисмида эркаклар, олди қисмида аёллар билан болалар кетишар, ўртага парда тутиб қўйиларкан. Мана шу одатлари менга кўп маъқул бўлди.

Зокиржон ака билан Фаррух анчадан кейин тарвузлари қўлтиғидан тушиб қайтиб келишиди. Орқага қайтишдан бошқа чорамиз қолмаган эди. Шошилинч йўлга отландик. Лекин Анвар соҳиб ва бошқалар ҳар хил баҳоналар билан бизни яна бир соатча тутиб туришиди. Билишимизча, қайтаётганимизни губернатор Амир Исмоилшоҳга етказишиб, унинг розилигини олишгандан кейингина бизга ижозат беришиди. Қайси маънода шундай қилишганини дуруст англамадик. Күшкагача аскар қўшиб беришмоқчи эди, йўқ, ҳатто катта йўлгача ҳам кузатиб қўйишмади. Биз ҳам унча хафа бўлмадик, шу шаҳардан (негадир кечадан бери безоталана бошловдик) тезроқ чиқиб кетаётганимизга суюнар эдик.

Ҳиротдан чиқиб, адирлар орасига кириб борар эканмиз, хаёлимда ортимида ҳазрат Навоий, Султон Ҳусайн мунглуқ нигоҳ билан қараб қолишгандай туюлди.

Мен эса ўзимда узоқ қидирган қадрдан кимсасини топиб, лекин унинг дийдорига тўймай, тезда хайрхўшлашиб жўнаган одамда бўладиган ғалати бир дилгирилик, ачиниш ҳиссини туярдим.

Хайр, эй, азиз ва мўътабар бобокалонларимиз. Хайр, эй, ҳар бир ўзбек хонадонида ҳамиша барҳаёт Навоий бобо! Биз Сизларнинг ҳузурингизга яна келамиз.

Менинг хаёлимдан шундай нидолар кечди.

Икки кун аввал келган йўлимииздан қайтмоқдамиз. Яна ўша дўқир-дўқир бетон, атрофда таниш манзаралар: бепоён даралар, ёнбағирликлар, катта-кичик адирлар. Қўш хўқизли омоч билан ер ҳайдётган дехқонлар. Хирот билан Кушка оралиғи 120 чақирим. Йўл яхши бўлгандаку, бизнинг учқур тойимиз учун бу бир яrim соатлик масофа эди-я. Лекин ҳар қадамда дўққилаб, салкам уч соат юрдик.

Кушкага кириб борганимизда худди ўз юртимиз худудига ўтгандай қўнглимиз хотиржам бўлиб, чехраларимиз ўз-ўзидан ёришиб кетди.

Яrim кечада, қовун сатаётган жойда тўхтадик. Қовун билан нон еб олдик. «Енгиш» (илгари Победа) жамоа хўжалиги ерлари экан. Узокроқда, жануб томондаги чироқлар кўриниб турган жой Қизил юлдуз қишлоғи экан. Қовунлар жуда ширин чиқди. Қўй ёғи-қўй гўштига палов егандай маза қилдик.

Ашхободга етай деганимизда (Кушкадан Марвгача 290, бу ёғи 380 чақирим бўлиб, шунча масофани туни билан босиб ўтибмиз) тонг ёриша бошлади. Дарвоқе, йўлда адашиб ҳам қолдик, бунинг устига темир йўлдан ўтаётганда қоидани бузиб, йўл назорати ходими билан анча можаро қилиб ҳам турдик. Охири унинг қўлига қистиришга тўғри келди.

Куллас, бесарамжон тун бўлди. Машинада яхши ухлай олмадик. Ухлаб ҳам мириқмадик. (Ҳамма!)

Ашхобод йўлининг манзаралари ўзига хос латофатли эди. Ўнг томонда чўл ва узокроқда йўл билан параллел — Қоракўл канали... Чапда ҳам чўл ва узокроқда Копет-доғ...

II қ и с м

«ФИРДАВСИЙНИНГ МОВИЙ ДИЁРИ»

ЭРОН

САРҲАДДА БИР ЖОНОН...

29 июл, пайшанба.

Уловимиз шиддат билан Эрон замини сари интилиб борарди. Ашхободга 10-15 чақирим қолганда йўлнинг икки тарафида анорзор, узумзорлар бошланди. Мевалари шифил-шифил бу боғлар бепоён тоғлар томонгача чўзилиб кеттандек эди. Мунча кўп ҳосилни қандай йигиштириб олишаркин, деб ўйладим. Ўзбекистонда пахтани талабалар ва бошқа хашарчилар ёрдамида териб олинганидек, бу юртда ҳам шундай тадбир кўлланар-да... Умуман олганда Туркманистон худуди поёнсиз эди. Демак, Ер—туркман халқининг битмас-туганмас бойлигиdir...

Мен умар Ҳайём, Саъдий Шерозий, Фирдавсий, Ҳофиз Шерозий каби жаҳон адабиётининг мумтоз, бетакрор намоёндаларига ватан бўлган ва уларга илҳом берган қадимий Эронни кўрмакка ошиқардим. Ахир, Умар Ҳайём рубоийларининг, Саъдий ҳикоятлари ва ҳикматларининг, Рустам-достоннинг, Ҳофиз ишқий лирикасининг шайдоси бўлмаган, уларни ташналиги қонмаган сахрои ийловчидаи такрор-такрор мутолаа қилмаган ким бор... Ана шундай мўъжизавор асарларга бешик бўлган заминнинг табиати, одамлари қандай экан?..

Мен кейинги давр Эрон адабиётининг таниқли на-моёндаси Мушфик Козимийнинг «Қўрқинчли Техрон» романини, шунингдек ҳаётларининг бир қисми Ўзбекистон билан боғланган, менинг жонажон ўлкам шаънига шеърлар бағишлиаган Абулқосим Лоҳутий, Устивор, Жола каби шоир ва шоираларни эслаб, уларнинг ёдимда қолган сатрларини хаёлимдан ўтказардим:

Ўзбекистон бағрида яйрайди жоним тинч, омон,
Ўзбекистонга ёмон кўз тегмасин, битсин ёмон...

«Тойотамиз» ана шу шоирлар юртига қараб интиларди. Улов бирла менинг кўнглим ҳам талпинар эрди.

Копет-дог оралиғидаги Қулмирза довонидан юриб, дастлабки чегарадан, дахлсиз ҳудуддан ўтиб, божхонага етиб бордик. Тушликка тўғри келиб, анча кутишга тўғри келди. Кутишнинг яхшиси йўғу, лекин чегарада, божхонада кутиш ташвишли, фулгулали бўлиб, одамни бетоқат қилиб юбораркан, вақт ўтиши ҳам ниҳоятда қийин экан

Тасодифни қарангки, эрталаб Эрон элчихонаси олдида Жайхундан паромда бирга ўтган қирғизистонлик сайёхларнинг автобусини учраттан эдик. Ҳамма жойда бўлгани каби бу ердаги элчихона маҳкамаларида ҳам қоғозбозлик, расмиятчилик кучли экан. Бир автобус одам беш кун деганда, кечак чегарадан Машҳадга ўтиб кетишибди. Яна бир аёл ва бир йигитни паспортларида тузишиш бор, деган гумон билан умуман қайтаришибди.

Тушдан кейин ишимиз юришиб, юкларни туширмай текширувдан ўтиб олдик. Бутун дунёда бўлгани каби, божхонада ҳам таниш-билишчилик асқотди. Экспедициямиз ўтган йили ҳам шу ердан ўтган эмасми, ўшанда бир туркман ва бир рус йигити таниш бўлиб қолган экан.

Божхонанинг кенггина ва ниҳоятда тартибсиз хонасидағи манзара-ҳолат менинг руҳимга ёмон таъсир қилди. Биз ўтаётганда бу ерда ёш, тўладан келган бир жувоннинг нарсаларини текширишаётган экан. Стол устидаги сандиқдай-сандиқдай жомадонлардан чиқаётган буюм ва ашёларни кўриб беихтиёр «Астаффурилло...» дейсиз. Никелли чўмичлар, елим халта, ип тўр халта, электр соқол олгич, электр чой қайнатгичлар, билур қантдонлар, елим ликопчалар—санофи йўқ. Хуллас, катта столнинг усти, дераза ромлари тўлиб кетди. Божхона ходими, ҳарбий кийимдаги ёш, новча туркман йигити бундай ҳолатларга кўнишиб кетган шекилли, ҳеч бир ҳайратланмай, нарсаларнинг чегарадан олиб ўтиб кетиш мумкин бўлганларини бир томонга, таъқиқланган ва меъёрдан ортиқчасини бошқа тарафга шошилмасдан алоҳида қилиб териб қўярди. Бояқиши аёл юкларнинг кўп ва оғирлигиданми ё хижолатданми, терлаб кетган, қора соchlарининг жингалак зулфлари қулоқлари ёнига, ёноқларига ёпишиб қолган эди. Шунча юкни бир ўзи қандай кўтариб шу божхонагача етказиб келдийкин. Ё бошида эри йўқмикин?... Лекин унинг кўриниши, кийинишига қараган-

да бу қилғуликлар зарурат юзасиданга ўхшамасди. Чайқовчиликка, пулга ўрганган, ҳирс қўйган одам ошибб-тошиб кетса ҳам, томоғидан овқат ўтмай қолса ҳам бу «касби»ни ташламайди.

Аёл уялганидан биз томонга, умуман ҳеч қаёққа қарамасликка, титкилаётган сумкасига кириб кетай деётган бошини кўттармасликка ҳаракат қилаётгани сезилиб турарди. Аён бўлишича, уялишининг боиси бор экан. Ҳаммамиз паспорт кўрадиган туйнукка навбатда турардик. Барчамизнинг ғазабли ва нафратли кўзларимиз ана шу жувон ва унинг серузукли бармоқларига илашиб чиқаётган ранг-баранг ашёларда эди. (Нарсаларнинг шириқлаши хонадаги барчанинг эътиборини тортмоқда эди). Дарвоҷе, у жувоннинг ортидан яна бир неча аёл ҳам навбат кутиб туришарди. Кўзини унга лўқ қилиб тикилиб турганлар орасида албатта Фарруҳ ҳам бор эди. Ниҳоят аёл қоп-жомадонларини бўшатиб бўлди, энди биз томонга қарамаслигининг иложи йўқ эди. У бирдан, кўрққан олдин мушт кўтарар дегандай, Фарруҳга қараб, Ҳоживой-Тоживойнинг латифасидагидек: «Мени танимадингиз-а?» деб гап бошлиди қизариб-бўзарип, паст товущда. Овози чиндан ҳам чўмичларницидай жарангдор эмас эди. Улар Тошкент дорил-фунунида ёнма-ён курсларда ўқишган бўлиб, ўшанда бу жувон (албатта у пайтда соchlари қўнғироқ, овози жарангдор, бегуноҳ кўзлари пориллаб турган чика бел қизалоқ бўлган) жуғрофия қуллиётида таҳсил кўрган экан. Ҳа, жуғрофакда ўқиганда хорижий мамлакатларни яхши ўрганган экан, мана дунё кезиб юрибди-да. Нима қипти, ҳам саёҳат, ҳам тижорат, деган машойихлар.Faқат, бўлганда бўп қолай, деб, нафс қурсин, нарсаларни меъёридан анча кўпроқ олиб жўнабди-да. Униси ҳам майлику-я, шундок кетворган жувоннинг мана бу ерда турли миллат вакиллари олдида томоша бўлгани чатоқ бўлиб турибди, холос. Афсуски, унга ўхшаганларнинг яна бирқанчаси ташқарида ҳам тўдажўда бўлиб ёйилиб юришарди...

Биз эркин нафас олиб, йўлга тушдик. Бироқ, олдинда ҳали тўсиқлар кўп экан. Бир чақиримча масофадан кейин яна бир назорат нуқтасида тўхтаб ўтдик, сўнг Эроннинг асосий чегараси олдига етиб бордик. Бу тепалик жойда темир ғов бўлиб, унинг бу ёғида Туркманистон соқчилари, нариги томонда эса Эрон чегарачилари туришарди. Туркман йигитлари паспортларни текширишиб ғовни очишаётган эди, эронликлар тўхтатиб

қўйиши. Яна ҳайрон ва жигибийрон бўлиб кута бошладик. Лекин бизнинг жигибийрон бўлганимиз билан чегарачиларнинг бир пуллик ҳам иши йўқ эди.

Ниҳоят, анчадан кейин бир одам пайдо бўлиб, бизни Эрон божхонаси—Божгиронга олиб борди. Ҳаммамизнинг паспортларимиз ва бошқа ҳужжатларимизни ичкарига, яъни идорага олиб кириб кетиши.

Ҳар бир пост (назоратчилар маскани), ҳар бир чегара, ҳар бир божхонада хавотириу ҳадиксирашлар жонга тегиб кетар экан.

Бунаقا ғов-тўсиқди нуқталарнинг қанчасидан ўтиб борасану, яна тўхтатиб синчиклаб текшира бошлашади. Ичингда ҳамма ҳужжатларимиз жойида-ку, шу жойгача етиб келдик-ку, дейсан, лекин назарингда бу ердагилар олдингиларнинг ҳаммасидан ҳам кўра қаттикроқдай, шафқатсизроқдай туюлади. Эҳ, энди бир камчилик топиб қайтариб қолишмасайди, деб юрак ҳовучлаб турасан...

Ниҳоят, пешиндан ўтиб, намозгарга яқинлашган пайтда йўлга тушдик. Бизга Эрон ҳукумати ва божхона таомилига кўра Мұҳаммад Ризо деган бир одамни (уни «маъмур» дейишаркан) қўшиб беришди. Водий, яъни ясси төғ оралиқлари бўйлаб жўнадик. Бу ерлар май ойида ям-яшил, ниҳоятда гўзал бўлади, дейиши аввал ҳам шу жойлардан ўтишган ҳамроҳларимиз.

Довондан тушиб, Мұҳаммад Ризонинг фахр билан айтишича, Машҳад атрофидағи энг ширин сувли Дурбодом қишлоғига кириб бордик. Ҳақиқий қишлоқ манзараси: лой сувоқли уйларнинг теп-текис томларида аёллар қоқи ёйиб ўтиришибди. Бу манзара менга болалик давримдаги, яъни ўтгиз-қирқ, йиллар илгариги томларимизни эслатиб юборди. Ҳозир бизнинг қишлоқларда бунаقا ясси томлар, лой сувоқли уйлар дейяри қолмаган. Иморат соладиган одам энг аввал тунука ё шиферини ғамлайди.

Атрофдаги кенг далалар Арслонбоб, Шоҳимардан экинзорларини эслатарди. Назаримда бу ерларда ҳам картошка кўпроқ экиларкан.

Йўл ёқалаб, бизга қарама-қарши томондан оқиб келаётган зилол сувли сой йўлнинг дам чап, дам ўнг томонига ўтиб қоларди. Икки тарафдаги тоғнинг деворсимон, қат-қат пахсасимон тошлари худди маҳсус ишлов берилгандай текис, шаклли эди.

Бир томони очиқ, қўлтиқсимон жойда тўхтаб, мириқиб сув ичдик, сув чиндан ҳам жуда мазали эди. Суратга тушдик.

Шори, Имомқули қишлоқларидан ўтдик. Бу қишлоқлар думбали, семиз қўйлар билан машҳур, деб изоҳ берди Муҳаммад Ризо ён бағирларда ўглаётган қўйларни кўрсатиб. Яккам-дуккам ўтларнинг ёнида тол, терак, бақатерак кўзга ташланади. Яна таажжубки, томларда тезак қуритиларкан — бу ҳолат ҳам бизнинг яқин ўтмишимиз. Мен Эронни жуда ривожланган, маданийлашган мамлакат деб ўйлардим.

Бир ерда икки қаватли, замонавий қурилган ғиштин бино (ҳарбий лагерга қарашли экан) ёнидан ўтгач, яна баландликка ўрлай бошладик.

ГЎЗАЛ МАШҲАД

Кашафруд дарёси водийсида жойлаштан Машҳад ҳақида ўқиган-билган маълумотларимдан энг қимматлиси — буюк Алишер Навоий ҳаётининг муҳим ва эсда қоларли даврлари бу кўхна ва машҳур шаҳар билан боғлиқлигиdir. Навоий Машҳадда болалигида Султон Ҳусайн Бойқаро билан бўлган, балоғат ёшида у ердаги мадрасада таҳсил кўрган, умрининг охирроғида муқаддас ҳаж сафарига жўнаган чоғида, Машҳаддан дўсти, Хуросон ҳукмдори Султон Ҳусайннинг дил изҳори тўла мактуби билан ортига—Ҳиротта қайтган.

Бутун умри хайру-савобли ишлар билан ўтган Навоий, олган таълими ва еган ош-тузи ҳаққи Машҳад ҳалқи учун катта иноят кўргузади. Давлатшоҳ Самарқандий бу ҳақда «Тазкират уш-шуаро» китобида шундай деб ёzádi: «(Яна) тангри инояти била бир мунча вактдирки, у вакил сайлаган кишилар тиришуви орқасида Хуросоннинг машҳур булоқларидан, жаҳон кўнглини очувчи, Тус вилояти юқорисидаги Чашмаи Гил сувини муқаддас Машҳад шахрига келтиради. (Бу билан) Машҳаднинг муқим ҳалқини сувсизлик азобидан қутқарди... Бу ҳандай эҳсон бўлдики, жаҳон подшоларию акобирлари бундай ишни удалашдан ожиздирлар. Бу ариқ узунлиги қарийб ўн икки фарсаҳдирким, ҳамма жойлар нотекисидир — (улуғ амирнинг) бу хайру эҳсони ҳамма шарофатли эҳсонларидан ҳам ортиб тушди. Бу ариқ туфайли, муқаддас Машҳад шаҳри, худо хоҳласа, беҳишт раşкини, Чин нигорхонаси ғайирилигини келтирадиган бўлади».

Мен Беҳишт раşкини келтирадиган ана шу гўзал ва обод диёрга ошиқардим.

Машҳадга кеч оқшомда Бобои Тоҳир қўчасидан кириб бордик. Лекин шаҳарга мутлақо қоронғи тушмагандай ёп-ёруғ эди. Шаҳарнинг тунги қиёфаси – кўчалардаги кўз қамаштирувчи чироқлар, турли шаклларда ёруғ юлдузлар каби жимиirlаб ёниб турган эълонлар, номлар, лавҳалар, ранг-баранг бинолар, дўйонларнинг эшиклари, ромлари, пештоқлари ҳайратомуз даражада ёрқин ва нурафшон эди. Мен киноларда кўриб, Қоҳирани шундай тасаввур қиласдим. Машҳад шунчалик бўлса Қоҳира қандоқ экан?..

Кўчалар жуда кенг, бир неча қатор, машиналар қатнови ниҳоятда тигиз. Ўртадаги бир йўл қатновсиз. Одамлар оила-оила, тўп-тўп бўлиб, (мусофиirlар, саёҳатчи меҳмонлар) машиналари ё бошқа матолар билан икки томонни тўсиб, bemalol тамадди қилиб, ҳордик чиқариб ўтиришибди. Шундоқ тунашаверар экан. (Меҳмонхоналардан бўш жой топиш амримаҳол экан).

Кўча бўйларида терак, тутқатор кўп бўлиб, шаҳар хуснига табийлик бағишилаган эди.

Вақт алламаҳал бўлишига қарамай ошхона, ресторанлар ниҳоятда гавжум эди. Биз Акбар исмли шахсга қарашли икки қаватли «Жўжа-кабоб» ресторанинг бир неча хонага бўлинган биринчи қаватига кирдик. Хоналар ниҳоятда шинам, озода, диц билан бетатилган эди. Стол-курсилар бежирим, юмшоқ.

Ҳудди Овруладагидай оппоқ юзли ёш йигитлар хизмат қилишарди. Чалпак нон (тўғралган), бодринг майдა тўғралган помидорли салат, пепси-кола (наякиси билан), саёзгина пиёлачаларда қатиқ келтиришибди. Йўл юравериб қоринлар пиёз пўсти бўлиб кетувди, келтирилган емишларнинг баракасизлигига ишора қилиб, бир-бири мизга маъноли қараб жилмайдик. Лекин бугда димлаб пиширилган қордай оппоқ гуруч таом ва семиз жўжга кабобларни кўриб, кўнглимиз анча жойига тушди.

Тўрт бурчакли, узунчоқ патнисдай келадиган нонни «нони машина» («машинада пиширилган нон») дейишаркан. Ҳиротникига ўхшаган чевати, лочирасимон нонлар ҳам бор экан.

Ресторандан чиққач, Мухаммад Ризо меҳмонхоналардан жой излаш бефойда деб, бизни шаҳарнинг янги даҳасидаги уйига бошлаб кетди. Ризонинг уйи, ҳовлиси торлигини ҳисобга олмаганда, анча маблағ ҳисобига, ҳафсала билан қурилганлиги сезилиб турарди. Хоналар кенг, шифти баланд. Ҳовлидаги ювинадиган хона, хожатхоналар полидан шифтигача чинни плита

билин қопланган, ярқирайди. Ваҳоланки, Ризоларнинг бу ерга кўчиб келишганига эндиғина уч йил бўлибди.

Ховлига бошдан-оёқ тош-плита ётқизилган, поки-за эди. Шу жойга палос тўшаб, чой ичиб ўтиридик. Мана шу ернинг ўзига ўрин солиб беришди. Беш киши—Зокиржон ака, Сайфиддин Жалилов, Тўлқин Рўзиев, Фаррух ва мен (бошқалар машинада тунайдан ган бўлишди) шу ерда очиқ осмонни, юлдузларни томоша қилиб, худди ўз уйимиздагидек латифа айтишиб, анчагача қулишиб ётдик. Мезбонимизнинг са-мимиий ва очиқкўнгиллигими, Зокиржон Машраб ўғли ва Сайфиддин ҳожи акаларнинг ҳазилкаш ва ҳазил-сурялигими, жаҳонгашга кинооператор Тўлқин Рўзи-евнинг ичак ўзди латифаларга усталагими, кайфияти-мизнинг созлигими—бизга ана шундай эркин ва бе-малол вазиятни яратиб берган эди. Болалигимда, жа-моя хўжалигида ишлаган пайтларимда дала шийпонида ўспирин йигитлар билан қизларнинг ўргага чипта тўсиб ётишлари ёдимга тушиб кетди. Фақат, у пайтларда осмон назаримда жуда бепоён ва юксак, юлдузлар ҳаддан зиёд, кўп ва зич кўринарди. Ўшанда ёши кат-тароқ йигитлар қизлар тушунишмайди, деб, уятлироқ латифаларни тескари сўзлаб айтишарди. Масалан, «Риб иднафа роб накэ...» деб бошлашарди. Йигитлар қотиб-қотиб қулишар, қизлар чиндан ҳам тушунишмай, биз ҳақимизда ёмон гаплар гапиришяпти, дея гумонсира-шиб биз томонга тош, кесак отиб қолишарди...

АЖОЙИБОТГА ТЎЛА БУ ДИЁР

30 июл, жума.

Эрталаб барвақт шимол томонга юриб, шаҳар мар-казига бордик-да, чалга бурилиб, Тус шаҳарига қараб кетдик. Йўлнинг икки бети тутқатор, экин далалари бўлиб, бизнинг қишлоқ йўлларимизни эслатарди.

Умумий ҳажми, қахрамонларининг қўплиги жиҳа-тидан ҳозиргача яратилган лиро-эпик асарлар ичида энг каттаси ҳисобланмиш «Шоҳнома» муаллифи, маш-хури жаҳон шоир Абулқосим Фирдавсий Тус шаҳри яқинидаги Бож қишлоғида (ҳозир уни ҳамма Фир-давсий қишлоғи дейишидади) таваллуд топган. Унинг отаси Тус ҳокимининг «Фирдавс», яъни «Жаннат» ном-ли боғида боғбонлик қиласи, шоир ўзининг тахаллу-

сини ана шу боғ номидан олган, дейишади. Баъзи манбаларда ривоят қилинишича Абдулқосим пойтахт Фазнага келганда уни Султон ҳузурида бўлган шоирлар сұхбатига таклиф этишади. Унинг дилкашлиги, шеърлари Султонга ёқиб қолиб «мажлисимиизни фирмавсга (гўзал гулшанга) айлантирдинг», дейди. Шоир шу кундан эътиборан ўзига ана шу гўзал сўзни таҳаллус қилиб олади.

Фирдавсий ва унинг «Шоҳнома» асари билан боғлиқ ибратли ривоятлар бор. Донишманд, қиссанагай шоир ўттиз-ўттиз беш йиллик умрини бағишилаб ниҳоясига етказган бебаҳо дуродона асарини Султон Маҳмуд Фазнавийга тақдим этади. Султон Фирдавсийга 120 олтин танга мукофот берилсин, деб амр қиласди. Лекин Султоннинг ичи қаро, ҳасадгуй, маънавий дунёси қашшоқ вазирлари аскарларга кийим-кечак, озиқовқат етишмаслигини рўйиҳа қилишиб, шоирга 120 кумуш танга ҳам кифоя қиласди, деб маслаҳат беришади. Бундай таҳқир шоирга алам қиласди ва у ҳаммомга бориб, 60 тангани ҳаммомчига, 60 тангани шаробфуршуга беради-да, Султон Маҳмудга бағишилаб аччиқ, ҳажв ёзиб, юртдан бош олиб чиқиб кетади. Ҳажвни ўқиган Султон фоят дарғазаб бўлиб, Фирдавсийни тутиб, уни филни оёғи остига ташлаб ўлдиришни буюради. Хайриятки, аламдийда шоирни тополмайдилар. Кейинчалик ўзининг катта хатосини англаб етган Султон бир тияга олтин юклаб шоирникуга жўнатади. Айтишларича, олтин юкланган тия Фирдавсий ҳовлисига кириб келганда шоир жасади солинган тобут одамларнинг елкасида дарвозадан чиқиб кетаётган эди... Буни эшитган Султон ўзига нотўғри маслаҳат бериб, тарих олдида унинг юзини шувит қилган вазирларига шафқатсиз жазо берган экан...

Машҳад-Кучон ўйлидан ўнгга бир неча чақирим юриб, Фирдавсий мақбараасига етиб борганимизда соат етти, ҳали бу зиёратгоҳнинг темир-панжара эшиклиари очилмаган эди. Биздан ҳам эрта келганлар кўп бўлиб, улар мақбараага кириш олдидаги катта, очик, майдоннинг у ер бу ерида тўп-тўп бўлиб ўтиришиб, нонушта қилишарди. Атрофда турли мамлакатларнинг белги, рақамлари ёзилган автобус, енгил машиналар турарди. Буғун жума—дам олиш куни бўлгани учун зиёратчилар кўп эди.

Фирдавсий мақбарааси тахминан эни икки юз, узунлиги уч юз метрли шинам, чорси боғ ўртасидаги ҳовуз-

дан кейиноқ салобат тўкиб турарди. 1948 йили барпо қилинган чорқирра мақбара ниҳоятда маҳобатли, ба-ланд ва гўзал эди.

У одатдаги қабр-мақбаралар каби икки қаватли бўлиб, ер усти хонасига қаймоқранг сафана тоши кўйилган, қабр эса остки хонада эди. Устки хонанинг шифти ва деворларидағи безак-ганчларда «Шоҳнома» лавҳалари акс эттирилган эди.

Ўрта ёшли бир одам биз билан қизиқиб қолди. Ўзини Алия Шамлу, Техрон шаҳар девонхонасида ходим, деб таништириб, бизга Фирдавсий, унинг ўлмас «Шоҳнома» асари, мақбара қурилишининг тарихи ҳақида эҳтирос билан гапириб берди. Лекин у Ўзбекистонни яхши билмас экан, бундан ранжидик.

Ховуз бўйидаги Фирдавсий ҳайкали ёнидан мақбарани яна бир карра завқ ва ҳайрат билан томоша қиласар эканмиз, яна Навоийнинг унугтилган мақбара-сини эслашдик, ачиндик. Дарҳақиқат, мана бунаقا мақбара қурса ҳам бўлар экан-ку, Навоий мақбарасини таъмирлашга Фирдавсий мақбарасининг тўртта устунига кеттган маблағ етиб ортарди, деб ўйладим мен.

Шаҳарга қайтдик. Тонги Машҳад ҳам жуда жозибали эди. Терак япроқлари, анвои гуллар қатидаги ҳали буғланиб улгурмаган шабнам томчилари шаҳар табиатини янада очиб юборган эди. Биноларнинг пештоқларидағи ғоят ҳафсала билан битилган ёзувлар, реклама ва эълонлар эса бинога, умуман шаҳарга алоҳида ҳусн, файз бағишлиарди. Араб алифбосини билмаслик яна бир карра алам қилди. Ҳиротда ҳам, бу ерда ҳам кўр ва гунгта ўхшаб ҳеч нарсани ўқиёлмай, сурат томоша қилгандай ўтиб кетаверардим. Катта-катта биноларнинг деворларида Оятило Ҳумайнин, мамлакат президенти Ҳошимий Рафсанжоний суратлари тез-тез кўзга чалинарди.

Тусдаги Фирдавсий мақбарами ва Машҳад марказидаги ҳудуди каттагина, ям-яшил майсазор, фаввонлар отилиб турган Фирдавсий майдонини кўриб, миллий, маҳаллий фахр ва ифтихор учун, ўзни кўрсата билиш ва танитиш учун ерини ва маблағни аяшмас экан, деган хуносага келдим.

Ҳифтаи Шаҳривор майдони атрофида дўкон кўп, одам жуда гавжум эди. Дўконларда мол-дунёнинг бисёр мўл-кўллиги ва ранго-ранглиги, хусусан тиллотус товланувчи нарсаларнинг сероблиги ақдимни олди. Оламда чиройли ранглар мен билгандан қўпроқ, экан,

деган фикр ўтди кўнглимдан. Биноларга асосан кўнгилни нурафшон қиласиган равшан, тиниқ рангли бўёқларни ишлатишар экан.

Ҳиротда эски, ниҳоятда уринган, пачоқ автомобиллар кўп эди, бу ерда, аксинча янгилари сероб экан. Ҳирот туни зимзиё эди, Машҳад туни кундуздай ёрқин. Булар ҳам юртнинг, шаҳарнинг умумий дараҷаси, иқтисодий ҳолатини белгилайдиган омилларидан бири.

Шаҳарнинг икки ёндаги кўп қаватли баланд иморатлар қисиб турган, менга Будапешт кўчаларини эслатган тор кўчаларидан ўтиб, Имом Ризо мақбарасига бордик. Мақбарани нақ музей дейсиз. Хоналари жуда кўп ва бир-биридан чиройли ойна, ёғоч нақшлар билан безатилган. Шакли шамойили юксак маъморчилик санъатини намойиш қилиб турибди. Ҳамма хоналарга ҳар хил ҳажмдаги ранго-ранг гиламлар тўшалган — кафтдай очиқ ер йўқ. Очиқ майдонларнинг ҳар қадамида зиёратчилар учун маҳсус сув ичадиган чиройли қурилмалар бор эди. Сувнинг ширинлигига таъриф йўқ. Бунаقا мазали оби замзамни шу пайтгача ҳеч қаерда учратмагандим. Ҳатто, сувга, оби ҳаётта сераблиги билан танилган она қишлоғим Гуркуровнинг аксингиз кўринадиган, хуштаъм сувларидан ҳам тоттироқ туюлди менга. Ичган сари ичгинг келади. Бунинг устига текинлигини айтмайсизми!..

Мақбарадан чиққач, тайёрагоҳга олиб борадиган, ўртаси гулзор Булвари булаттоҳ, кўчаси, Машҳадни Эроннинг асосий йўллари — Текрон, Ҳамадон, Табриз, Мозандарон йўллари билан улайдиган Шоҳид Қаландарий (у Эрон озодлиги учун курашган қаҳрамонлардан) кўчалари бўйлаб борар эканмиз, Машҳад аҳли ва меҳмонларининг барча йирик шаҳарлардаги каби шошиб юришларини кузатдим. Бўйчан, сарв қадли форс аёлларининг кийинишлари диққатимни тортди. Уларнинг аксарияти тўқ қора ридога-чодрага ўралган бўлиб, фақат юзлари очиқ эди холос. Ҳудди шунингдек, тўпифига тушадиган узун кўйлаклари ҳам қоп-қора. Юзлари оппоқ, тиниқ бўлгани учун қора либос уларга жуда ярашиб турарди. Ризодан қора кийиниш тарихи, сабабини сўрадим, лекин у бу ҳақда бош қотириб кўрмаган шекилли, қониқарли жавоб ололмадим. Миллий кийим-да, деб қўя қолди.

Форс қизлари, аёлларининг бўянганини кўрмадим ё сезмадим. Аслида улар табиатан бежирим, қош-

кўзлари тим қаро, қирра бурун, бир сўз билан айтганда соҳибжамол бўлғанлари боис, балки ортиқча пардоз-андознинг ҳожати йўқдир. Ахир машҳур ўрис шоири Есенин ҳам оҳу кўзлик форс аёлларига бежиз шайдо бўлмаган:

*Бу тонг юзли гилдор қошимда
Бир бор хиром этса ноз билан,
Шоҳи рўмол солгум бошига,
Йўлларига шерозий гилам...*

Ахир Ҳофиз Шерозийдай забардаст шоирларнинг қалбига лахча чўф солиб, уларнинг савдои ошиққа айланиши, ишқ ва гўзаллик куйчиси даражасига етишувларида ана шу гулруҳсорларнинг «хизмати» катта бўлғанлиги шубҳасиз ҳақиқат-да!.. Ва шу аснода мен яна ҳусну малоҳатда беқиёс, Жаҳонгир ва Шоҳжондек бобурий шаҳзода, шоҳларни ўзига ром этган Нуржаҳон бегим, Мумтоз бегимларнинг ҳам асли эронлик эканликларини эсладим. Мумтозбегим (Аржуманд бону) эса айнан мана шу шаҳарда таваллуд топган. Машҳадда шунчалик, Техрон, Ҳофиз юрти Шероз аёллари нечоғлик гўзал эрдийкин? Афсуски у йириқ, машҳур шаҳарлар режамиизда йўқ эди. Экспедициянинг асосий мақсади, бош йўналишимиз — Ҳиндистон ва бизнинг энг катта ташвишимиз тезроқ ҳиндлар диёрига етиб олиш эди.

ЎХШАШ, АЧЧИҚ ҚИСМАТЛАР

Яна йўлга тушдик, тез орада шаҳардан чиқиб Зоҳидон йўналиши бўйлаб жўнадик. Йўл ниҳоятда текис эди. Бунақа йўлда сайёҳни ё уйқу элтади ё хаёл.. Мен Бобур Мирзо ҳаётида туб бурилиш ясаган тарихий воқеаларнинг Эрон билан, унинг шоҳ Исмоил Сафавий билан боғлиқ тафсилотларини эсладим.

Маълумки, йигирма ёшли Бобурни қаттиқ қақшатган, сулҳ эвазига унинг суюкли опаси Хонзодабегими ни хотинликка олиб қолиб, ўзини бобо юрти Самарқанддан қувиб-чиқарган Шайбонийхон Мовароуннахр шаҳар-қўргонларини бир-бир забт этиб, ғалаба нашидасини беармон сурар эди. Бу эса Бобур Мирзога баттар алам қиласар, гижинар, оҳ урар, иложсизлигидан ўкинар, назарида тажрибали, бешафқат ва ҳийлагар хоннинг жангари, чиниқсан, беҳисоб қўшинлари-

га бас қелаодиган куч топилмайдигандай туюлларди. Лекин оҳи Оллоҳга етдими, шундай катта куч топилиб қолди, тарихнинг азалий қонуниятига кўра зўрдан зўри чиқди! Бу куч – Эрон мамлакатининг қудратли лашкари ва лашкарнинг истеъодди саркардаси йигирма тўрт ёшли ҳукмдори Исмоил Сафавий эди. Даастлаб Исмоил Сафавий ва Шайбонийхон ўзаро мактубларда келиб чиқишлари ва бошқа жиҳатларини масхаралаб, бир-бирларининг жигига тегиб юришади. Бу низолар бора-бора кучайиб, жиддий тўқнашувларга олиб боради. 1510 йили Марв яқинида бўлган омонсиз жангда Шайбонийхон қўшиналари буткул тор-мор қилинади. Бу жанг якунининг тафсилотлари тарихчиларнинг асарларида турлича баён қилинган, ҳатто бир-бирига мутлақо зид мулоҳазалар билдирилган. Вильямс Эрскин (1773-1852) тарихчи эмас, шотландиялик етук шарқшунос олим. У 1803 йили таниқли файласуф ва сиёсий иқтисодчи Жеймс Макинтоннинг таклифига биноан унга шахсий котиб сифатида Бомбайга боради ва Ҳиндистонда узоқ қолиб кетади. Эрскин Ҳиндистон тарихи, хусусан Бобур ва бобурийлар даври билан қизиқиб, бу борада жиддий тадқиқот ишлари олиб боради ва «Бобур ҳукмронлиги давридаги Ҳиндистон тарихи» деган катта китоб ёзади. Муаллиф мазкур асарида Бобур шахсига самимий хайриҳоҳлик билан холис баҳо берар экан, бобурийлар салтанатининг асосчиси ва унинг авлодлари ҳаёти, фаолиятини кенг, батафсил ёритади. Демакки, у тарихий китобларни ўқиган ва улардаги хилма-хил маълумотлар, ҳикоятлар ва ривоятларни саралаб, нисбатан ҳақиқатга яқинроқ фикрларни танлаб олган, жамлаган бўлиши керак. Қисқаси, унинг хабар беришича, ўша жангда мағлуб Шайбонийхоннинг ўзи оёқлар остида қолиб, эзғиланиб кетади, уруш ниҳоясида унинг жасадини ғарам-ғарам ўликлар орасидан аранг топиб, Музаффар шоҳ Исмоил оёқлари остига ташлайдилар. Фолибнинг тантанавор амири ила марҳум хоннинг боши танасидан жудо қилинади, танаси бўлакларга ажратилиб, унга тобе бўлган юртларга сазойи қилиш учун юборилади. Бош чаноқ суюги эса олтин билан қопланиб, шоҳ Исмоил учун шарбат ичадиган қосага айлантирилади. Шилиб олинган бош териси Туркия султони Боязидга жўнатилади. Мана шу борада тўқилган ривоятлардан бирида ҳикоя қилинишича, шоҳ Исмоил Шайбонийхоннинг танасидан кесиб олинган бир

кўлини Мозандарон ҳокими Оға Рустамга юбориб, күйидаги қочиримли хатни ҳам илова қилган эмиш: «Сенинг қўлинг ҳеч қачон Шайбоний чопонининг этагига етмаган эди, мана, унинг қўли сенинг этагингга тегадиган бўлди». (Хатто, Бухоро ва Мовароунахр тарихи ҳақида маҳсус китоб ёзган Герман Вамбери маълумотида ҳам Оға Рустамга юборилган нома матни тамомила бошқачадир. Хуршид Даврон тарихий маълумотларга бой «Самарқанд хаёли» деган асарида ана шу, кейинги манбани келтиради).

Хуллас, улуғ бобомиз бошига кўп жабру жафолар, мусибатлар селини ёғдирган Мұхаммад Шайбонийхоннинг умри шу тарзда ғоят аянчли ва шармандали ниҳоя топади.

Бу ҳақдаги хабар Бобурга етиб келади, албатта. «Хушхабар»да, шунингдек, ийигирма мингга яқин лашкари ўзбеклардан (яъни Шайбонийхон қўшинидан) ажраб, Қундузга келгани ва бу ерда ҳоким бўлиб турган Хон Мирза бошчилигида улар Бобурга қўшилишга тайёр эканликлари ҳам айтилган эди. Бобур бу вақтда Кобулда эди. Қиши бўлишига қарамай, у Обдара дово ни орқали Бомиёнга, ундан Қундузга келади. Бобур шу ердалигида шоҳ Исмоилдан элчи келади. (Дарвоҷе, мана шу далилда ҳам хилла-хиллик бор. Ҳофиз Таниш ал-Бухорий ўзининг ўша давр воқеалари анча батафсил ёритилган «Абдулланома» асарида Исмоил элчисининг Қундузга эмас, Кобулга келганини ёzáди). Шайбонийхон Хонзодабегимни укаси Бобур билан тил бириткириб ўзига қарши ҳужум қилиши мумкинлигидан чўчиб уни талоқ қилган ва Зиёд Ходи исмли кишига никоҳлаб берган эди. Зиёд Ходи Марв яқиндаги жангда ҳалок бўлиб, Хонзодабегим эронийларга асир тушади. Хонзодабегимнинг Бобурнинг опаси эканлигидан хабар топган шоҳ Исмоил унга иззат-икром кўрсатиб совға-саломлар, хизматчилар билан укаси ҳузурига жўнатади. Бобур чопардан опаси келаётганини эшитиб, сарой аъёнлари билан анча масофага кутгани чиқишиади. Орадан ўн йил вақт ўтган бўлиб, табиийки, ғурбат, мусибат ва мусофиричилик ҳар иккисининг ҳам ташқи қиёфасини анча ўзгартириб юборган эди, улар бир-бирларини яхши таниёлмай, бирпас туриб қоладилар... Бу таъсирли ҳолат ёзувчи Пиримқул Қодировнинг «Юлдузли тунлар» («Бобур») романни асосида ишланган видеофильмда жуда яхши ифодаланган.

Бобур ҳам дарҳол совға-саломлар билан шоҳ Исмоил ҳузурига элчи жўнатиб, уни катта ғалаба билан қутлайди, опасига кўрсатилган иззат-икром учун миннэтдорчилик билдириб, Мовароуннахрдаги салтанатини тиклашда ёрдам кўрсатишни сўрайди.

Шоҳ Исмоил кетма-кет қўшилар жўнатади ва уларнинг ёрдамида Бобур Шайбонийхоннинг укалари, жиянлари ва бошқа ёғийлар устидан ғалаба қозонади, салтанати аввалгидан ҳам кенгроқ ҳудудни қамраб олади. Кобул, Фазна, Қундуз, Хисор, Самарқанд, Бухоро, Фарғона, Тошкент, Сайрамни ҳам эгаллайди.

Шунчалик зафарларга қарамай, Бобурнинг кўнгли нотинч эди, чунки унга қарши фитна уюштирувчи кучлар ҳали кўп эди. Иккинчидан, шоҳ Исмоил томонидан кўрсатилган ёрдам холис ва беғараз эмас эди. Унинг бир неча оғир шартлари бўлиб, бири шундан иборат эдики, Бобурнинг ўзи ҳам, лашкарлари ҳам эронийларча ҳарбий кийим кийишлари ва уларга ўхшаб ўн икки қаватли салла ўрашлари, яъни шия мазҳабини қабул қилишлари лозим эди. Мана шуниси сунний мазҳабидаги аҳолини қаттиқ ранжиттан ва Бобурдан кўнгилларини совутган эди... Айрим тарихчилар ҳам мана шу далилни Бобурнинг катта хатоси сифатида қоралайдилар. Менинг назаримда бу Бобурнинг ўз мавқеини тиклаб олгунча қўллаган вақтингчалик сиёсати эди, ёшундай йўл тутишдан бошқа иложи йўқ эди. Дарҳақиқат, кўп ўтмай яна Исмоилдан мадад сўрашга тўғри келади. Эрон шоҳи Амир Нажим ва Байрамхонларни катта қўшилар билан ёрдамга юборади. Бироқ, Қаршидаги жангда Амир Нажим ўта шафқатсизлик билан Убайдуллахон бошчилигидаги шаҳарнинг ўн беш минг кишилик аҳолисини ёпласига қиличдан ўтказишга буйруқ беради. Бобур Амир Нажимдан бундай хунрезликин тўхтатишни сўрайди. Эронийларнинг ўз қўшилари ҳам бундай қақшатрич жангдан бош тортиб, тарқаб кетишади. Натижада Бобур ва унинг тарафдорлари яна чекинишга мажбур бўладилар. Бобур ўзининг озчилик ишончли кишилари билан Ҳисор, Кундуз ва Бадахшон орқали яна Кобулга келиб, шу ерда яна бошқатдан куч тўплашга киришади...

Ҳа, бу йиллар шоҳ Бобур ҳаётида чиндан ҳам алам ва умидсизлик, армон ва пушаймон билан кечган жуда оғир дамлар бўлди. Балки шоир Бобур ушбу рубоийни айни шу даврлар машакқати, дарди-ҳасрати хусусида битгандир:

Даврон мени ўткарди сару сомондин,
Айирди бир йўли мени хонумондин.
Гаҳ бошима тож, гаҳ балои таъна,
Неларки бошимга келмади даврондин...

Биз айни ана шу, ғоят танг ҳолатида Бобур жонига ора кирган шоҳ Исмоилнинг юрти ҳудудида кетмоқда эдик. Лекин Бобурнинг Эрон билан бошқа муносабатлари тўғрисида кенгроқ маълумотга эга эмас эдик. Ҳали биз Вилямс Эрскиннинг «Бобур ва Эрон» деган катта китоби борлигидан бехабар эдик...

Эрон Бобур ҳаётида бўлгани каби, унинг суюкли фарзанди Ҳумоюн тақдирида ҳам ўчмас, тарихий из қолдирган мамлакат. Маълумки, Ҳумоюн 1530 йили 30 декабрда, отасининг ўлимидан 4 кун кейин подшолик тахтига ўтиради. «... Отасининг (Бобурнинг-Қ.К.) укаларига яхши муносабатда бўлиши ҳақидаги васияти итоаткор ўғилни (Ҳумоюнни-Қ.К.) кўп мушкулотларга дучор қиласди...» деб ёзади Л.П.Шарма.

Аффонларнинг хонлари Баҳодир шоҳ ва Шерхон Ҳумоюн билан кўп олишади, уни мудом таъқиб қилиб юришади. Ниҳоят уни Ҳиндистондан қувиб чиқарган асосий ғанимлар ҳам ўшалардир.

1540 йили 17 май куни Шерхон билан Кануждаги жангда мағлубиятга учрагандан сўнг Ҳумоюн Аграни ҳам, Деҳдини ҳам бой бериб, Лоҳўрга чекинади, тўғриғи қочишга мажбур бўлали. Шу вақтдан эътиборан Ҳумоюннинг сарсонлик-саргардонлик кунлари бошлиланади. 1541 йили укаси Ҳиндолнинг пири бўлмиш Мир Али Акбар Жонийнинг қизи Ҳамида Бонуга ўйланади. 1542 йили ўғли Акбар туғилади. Синд ҳокими Шоҳ Ҳусайн Ҳумоюннинг Қандаҳорга ўтиб кетишига ёрдам беради. Ҳумоюн Ҳиндистондан бутунлай чиқиб кетади. Қандаҳорда ўғли-гўдак Акбарни укаси Ҳиндол (Бобур Ҳиндистонни олган чоғида туғилган бу ўғлига рамзан «Ҳиндол» деб исм қўйган эди)га қолдирб, Эронга ўтиб олади.

Эрон шоҳи Шоҳ Тахмасп Ҳумоюнни яхши кутиб олади, унга (албатта марҳум отаси жаҳонгир Бобур ҳурматидан) иззат-икром кўрсатади, маблағ, қўшиндан ёрдам беришга вაъда қиласди. Лекин бўлажак ёрдам аввалги сафаридек беғараз эмас эди. Шоҳ Ҳумоюнга шиа мазҳабини қабул қилишни ва бошқаларга ҳам шуни тарғиб этишни шарт қилиб қўяди. Ҳумоюн оғир аҳволда қолади...

1554 ва 1555 йиллардаги қаттиқ жангларда Ҳумоюн яна Ҳиндистонни қайтариб олади. Афсуски, бу улкан мамлакатта ҳукмронлик қилиш гашти унга узок насиб қилмайди. Бир йилдан кейин вафот этади. Лекин, шуниси диққатга сазоворки, Ҳумоюн кўлдан кетган салтанатни ўн беш йилдан кейин қайтариб олиб, аждод-авлодлари олдида ёруғ юз билан оламдан кўз юмади. Акс ҳолда бобурийлар салтанати ва сулоласи-нинг умри жуда қисқа бўлиб қолиши мумкин эди.

«Ҳумоюн жасур ва юмшоқ кўнгилли эди, — дейди П. Шарма. — Айниқса, саҳоватпешалиги уни омадсизликка олиб келган хислатларидан асосийси эди». Лейн Поул ҳам Шарма фикрини тасдиқлайди: «унинг муваффақиятсизликларининг асосий сабабчиси гўзал, лекин ўринсиз юмшоқ кўнгиллиги эди».

Лекин, ҳарқалай, Бобур бобурийлар салтанатига асос соглан бўлса, Ҳумоюн бу салтанат пойдеворини мустаҳкамлади. Гарчи, омадсизликлар уни анча қийнаган бўлса ҳам, охир-оқибатда ғолиб бўлди, асосий ниятига эришди, отасининг руҳи қошига мағрур кетди. Балки, ота васиятларини иложи борича адо этишга ҳаракат қилгани учун ҳам ўз навбатида ота руҳи яна уни қўллаб-куватлагандир. Бўлмаса, кўлдан кетган тожу таҳтни ўн беш йилдан кейин яна қайтариб олиш осонми? Албатта, юқорида айтганимиздай бу тарихий жараёнда Эрон давлатининг ҳам озми-кўпми ҳиссаси бор эди...

ТЎЛҚИН АКА РАНЖИГАН ТОНГ

Турбат деган қишлоқ ёнидан ўтарканмиз, мен шоир Туроб Тўлани эсладим — у таваллуд топган қишлоқ (Ўзбекистон билан туташ Жанубий Қозогистон)нинг номи ҳам Турбат эди.

Ҳадемай, йўлимиз яна бепоён пастак адирлар орасидан — Довоңдан ўта бошлади. Йўл жуда текис, аммо жуда серқатнов — олдимиздаги машиналарни қувиб ўтиш мушкул эди.

Икки бора узунлиги беш юз-олти юз метр чамасидаги нариги туйнути ярим ойсимон ер ости йўлидан ўтдик, лекин туннел ёп-ёруғ экан.

Тез-тез дуч келиб турадиган айланма ҳаракат жойларининг ўртасидаги доирасимон майдонларда барпо қилинганд зина шаклли, ранго-ранг гулзор, гулпушталар кўзни ҳам, дилни ҳам яшнатади.

Фақат, уловимиз ичига қамалиб олган афғон пашшаларидан қутилишимиз анча қийин бўлди. Ойналардан ҳайдаб чиқараверамиз, бир оздан кейин оралиқ-бурчакларга беркиниб олганлари яна пайдо бўлиб, гинфиллаб таъбимизни хира қила бошларди.

200-чақиримда тўхтаб, анорзор ичидаги бедазор четида қўзивой тарвуз, «нони машина» билан тамадди қилдик.

250-чақиримда чўл, юлгинзор бошланди. Дарё, сой умуман йўқ, олислардаги ясси товлар (маъмуримиз Ризо уларни Сулаймон тоғлари деб тушунтириди) худди туман ортида қолгандай хира кўринарди. Ички чети ва ўртаси оқ хошияли йўл ниҳоятда тик, тўғри, гўзал эди. Ҳар замонда, автомобил назоратчилари тўхтатиб қолишар, лекин Ризо ўзини таништириб, бизнинг ҳужжатларимизни кўрсатиши билан оқ йўл тилаб, ўтказиб юборишарди.

Йўл-йўлакай биримиз қўйиб, биримиз Ризони сўроққа тутиб, унинг бошини қотириб борардик. Аксарият ҳали у, ҳали бу нарсанинг нархини сўраб, ўзимизнинг сўмга чақиб (Эронда пул бирлиги реал, туман) қимматсирайвердик. (Фарруҳ тилмочлик қиларди). Ризо ҳам охир чидамади шекилли, ҳа, бизда ҳамма нарса қиммат, деди (У кесатдими, самимий гапирдими — юз-ҳолатидан билолмадим).

— Арzon нарсаям борми? — яна унинг жигига тегди Аҳмаджон.

— Бор, — деди маъмур, — инсон!

Демак, бу гап ҳамма жойда бор экан-да.

Шундан кейин мавзуни ўзгартириб, Тўлқин Рўзиевнинг чекишини муҳқокама қилишга ўтдик. У дарҳақиқат шу қадар ашадий кашандада эдики, сигаретнинг бирини иккинчисига улаб юборарди. Охири машина ичидаги чекишини ман этишга мажбур бўлдик. Бечора машина тўхташини шунаقا сабрсизлик билан кутардик, эшик очилмас ўзини ташқарига отарди.

— Сизнинг чекишингизга оламда сигарет туриш берганига, ҳайронман, — дедим мен ҳазиллашиб. Тўлқин aka ҳам кулади: — Бизни Тошкентдан Андижонга олиб келиб қўйган ҳайдовчи Василий ҳам куюниб, «Ҳиндистонда йоглардан илтимос қилсанг, чекишини ташлатиб юборишади», деб маслаҳат бериб қолди. Ташлаттириб бўпти, ҳарқандай йогингнинг ўзини чектириб юборарман, дедим.

600-чақиримда нақш-безакли каттагина масжидаға дүч келдик. Бу яқин-атрофда ахоли яшамас эди. Қай бир савдогар бой йўловчилар учун савоб йўлига қурдирган экан.

Тунгги соат бирда Зоҳидонга кириб бордик. Бу ҳам ранго-ранг чироқлар шуъласида товланувчи шаҳар экан. «Садаф Инн» деган меҳмонхонани топдик. Иккинчи қаватдан жой беришди. Икки кишилик, жиҳозлари кам ва эски, кўримсизгина хоналар экан. Хоналар ёнида, шундоқ том-очиқ майдонда йигирма чоғлиқ одам ўраниб-ўранмай ётишарди. Бу «ўринлар арzonроқ бўлса керак, деб ўйладим ўзимча.

31 июл, шанба.

Эрталаб уйғониб, (Фаррух билан ҳамхона эдик) ҳафсаламиз яна анча пир бўлди. Кечаси чироқда ялтираб кўринган меҳмонхона хийла путурдан кетган, кигизсимон палослари эски, чанг эди. Одамлар жой тўшаб ётган томда хас-хазонлар, бино ёнидан ўсиб чиқсан дараҳтнинг қуриб, синиб тушган новдалари сочилиб туради. Зоҳидон — тоғлар орасида, тўғрироғи кун чиқицдаги тоғ бағрида жойлашган чигилинг шаҳарча экан...

Ўта оғир, босиқ одам Тўлқин Рўзиев шу кун эрталаб бир оз асабийлашди. Сабаби — кеча Машҳадни дурустроқ томоша қидолмадик. Бозорга кирайлик, деганда, катталар тезроқ кетайлик, Зоҳидон бозори яхши, дейишган эди. Кечқурун, ҳатто эрталаб ҳам машинага солярка қуямиз, яхшилаб нонушта қилиб, Зоҳидон бозорларини айланамиз деган фикр айтилган эди. Бир пайт, нонушта ҳам қилмай шаҳардан чиқиб кетаётганимиз маълум бўлиб қолдию, Тўлқин aka аста раҳбарга ваъдасини эслатди. Зокиржон aka «бўпти, қайтамиз», деган эди, Сайфиддин Жалилов «энди орқага қайтмай қўяқолайлик», деб қолди. Шунда Тўлқин aka: «нимага қайтмаймиз?» деб юборди биринчи марта баланд овоз ва дағалроқ оҳангда. Шундан кейин президент буйруғи билан орқага қайтиб, чойхонага кирдик. Нонушта юқорида айтганимдай ҳаминқадар бўлди. Ўн беш дақиқага рухсат берилди, бозорга кирдик. Бозор дегани тимлар остидаги қатор хусусий дўконлар экан. Мол-дунё, майда-чуйда матоҳ бисёр кўп, лекин бисёр қиммат. Айланиб юриб, Афғонистоннинг Лағоридан келиб қолган, Марғilonда қариндошлари бор Хўжа

Носир деган ўзбек киши билан учрашиб, гаплашиб қолдик. У биз билан кўришганидан жуда хурсанд бўлди, чойга таклиф қилди. Лекин бизнинг вақтимиз зиқ эди, йўлга чиқдик.

— Ҳеч ким ҳеч нарса олмади-ку, — деди кимдир.

— Гап бир нарса олишдамас, — деди Тўлқин ака шаманинг ўзига қаратилганини пайқаб, — чет эл бозорини кўриб қўйсак ёмон бўлмайди. Тасаввуримиз бойийди...

Энди биз Покистон сари илгарилаб бораардик. Ҳамон ўша-ўша манзара: тасмадай текис, тўғри йўл ва икки томонда ясси, қорамтири тоғлар... Машинамиз сувда балиқ сузгандай енгил учади. 900 чақирикли Машҳад-Зоҳидон йўли Ризо Паҳлавий даврида жанубий Кореяликлар томонидан қурилган экан.

Чап ёндаги тоғлар яқинлашиб, ўнгдаги тоғлар биздан узоқлашиб бораётган жойда туялар карвонига дуч келдик. Бунча кўп туяни мен фақат киноларда кўрган эдим.

Сафарда кўпчилик бўлсангиз яхши экан. Ҳар кимдан ҳар хил гап чиқади. Кўрган-билганингизни ўзаро муҳокама қиласиз.

Эрон, хусусан Зоҳидон меъморчилиги ҳам бизга анча мавзуу бўлди. Зоҳидонда иморат-биноларга асосан фишт ва мармар ишлатиларкан. Ҳар қалай, темир-бетондан кам фойдаланишаркан.

Миржова шаҳрига кирмай, чегарага етиб келдик. Соат ўн бир. Божхона ҳовлисида анча туриб қолдик. Кун иссиқ. Кейин билсам, Покистон саҳроларининг ҳарорати уриб тураркан. Ҳали у ҳужжатдан, ҳали бунисидан камчилик топишга уринишарди...

Қаерда тўхтасак, шу жойда бизга, хусусан машинамиз ёnlаридағи «Бобур, Туркистон — Ўзбекистон — Андижон» деган сўзларга қизиқиб қолишади, ҳижжалаб ўқишига ҳаракат қилишади. Ҳеч нарса англамаганлари елка қисиб, кимсизлар, қаердан келяпсизлар, деб сўрашади. Биз таржимонимиз Фарруҳ орқали «Ўзбекистон» деган юрт борлигини, экспедициямиз мақсадини тушунтиришга ҳаракат қиласиз. «Бобур...», «Ўз-ба-гистон»... дея пицирлаб тақрорлашади. Шунинг ўзи ҳам бизда фахр уйғотар ва экспедициямиз бежиз тузилмагани, беиз қолмаслигига ишонч ҳосил қиласиди.

Шу ерда маъмур Муҳаммад Ризога бизни эсономон кузатиб келгани, яхши ҳамроҳ ва ҳамсуҳбат

бўлгани, уйидан қўноқ бергани (гарчи ҳақини олган бўлса ҳам) — ҳамма-ҳамма илтифоти ва хизмати учун миннадорчилик билдириб, хайрлашдик.

ПОКИСТОН

ҚАЙДАСАН, ЛОҲЎР?

Маълумки, ҳозирги Покистон ҳудудига жойлашган машҳур Лоҳўр шаҳри Бобур замонида Ҳиндистон таркибида, тўғрироғи унга кирадиган асосий дарвоза, унинг маданий марказларидан бири бўлган. Шахсан Бобурнинг ўзи Лоҳўрда кўп турмаган, лекин унинг авлодлари учун доимий қароргоҳ бўлиб кўп йиллар хизмат қилган. Бу қадимий шаҳар ўзининг кўп асрлик ҳаёти давомида бир қанча урушларни кўрган, вайрон бўлган, қайта-қайта тикланган. Ана шу қайта тиклашлардан бирини Бобурнинг набираси Акбаршоҳ 1566 или амалга оширган. Акбарнинг ўғли Жаҳонгир ва унинг суюкли хотини Нур Жаҳон бегим қабр-мақбаралари ана шу шаҳарда. Хуллас Лоҳўр ва Бобурийларнинг бу тарихий шаҳар билан боғлиқ ҳаётлари, қилган ишлари, қолдирган маданий мероси, меъморчилик ёдгорликларини ўрганиш экспедициямиз дастуридан алоҳида ўрин олган эди. Шунинг учун ҳам биз Лоҳўрга ошиқмоқда эдик.

Шундай қилиб, Ризо билан қадрдонлардай хайрхўшлишиб, Миржова (Эрон) божхонасидан Тафтан (Покистон) божхонасига ўтдик. Яна текшир-текширлар, кутиш изтироблари... Чегарадан ўтиш даҳмазала-ри жонга тегиб кетаркан.

Божхона ҳовлисида беш-олтита «Мерседес-Бенц» юқ машинаси турган эди. Ёпирай! Нақ улқан сандиқнинг ўзи! Лекин имоним комилки, ҳар қандай моҳир сандиқ безовчи ҳам бу машиналарнинг безаги олдида ип эшолмайди.

Кутяпмиз. Раҳбар билан таржимон ичкарига — божхона маъмуриятига кириб кетишган. Собиржон aka бетоқат бўла бошлади.

— Кун исиб кетди, йўл юриш қийин бўлади. Саҳар жўнашимиз керак эди, — дерди у ташвишланиб.

Дарҳақиқат, ҳарорат анча баланд эди. Чанқадим. Божхона айвонида сопол кўзада сув бор экан, лекин хом сув ичиш қатъий ман қилинган эди. Зокиржон

аканинг ичкаридалигидан фойдаланиб ичволдим. Сув шўртангроқ эди, лекин барибир маза қилдим.

Соат ўн беш минути кам учда маъмур Парвез Султон ҳамроҳлигида йўлга чиқдик. Озгина юргач, тарвуз, нон билан тушлик қилган бўлдик.

Квettагача 600 чақирим экан.

Йўл сўқмоқда ўхшаган тор, нотекис, дўқир-дўқир эди. Худди дарё ўзанидан юраётганга ўхшаймиз. Чапроқда янги йўл қурилмоқда экан. Машҳад-Зоҳидон трассасидан кейин бундай чанг-тўзонли даштда юриш жуда малол ва оғир эди.

Юзинчи чақиримга борганимизда икки томони тептекис саҳрого чиқдик. Жон асорати, тиккайган яшилроқ гиёҳ, кўринмайди. Узоқларни туман босгандай хира...

140-чақиримда Ноккунди қишлоғи бор экан. Уйларнинг томи текис, лой сувоқли, орқа томонида туйнукдан каттароқ деразалари бор эди. Сувни қудуқлар ёрдамида олишар экан.

Кеч соат тўққизларда Жакмач деган жойда тўхтадик. Усти ёпиқ, кенг чойхона бор экан. Эски, катта-кичик бўйралар тўшалган. Бизга ўхшаган йўловчилар, бангилар ўтиришибди. Фақат қайнаган сувидан термосларга қўйиб олдик-да, бир четроққа чиқиб, бўйрада давра куриб тамаддиландик: колбаса, тарвуз, чалпак нон билан...

Яна озгина юрганимиздан кейин яшил оламга кира бошлидик. Палма дараҳтини ўзининг асл ватанида кўрдик. Шундан кейин жуда узоқ юриб, ярим тунда Амадвал деган жойда тўхтадик. Чойхона ҳам меҳмонхона экан. Кенг майдонга ип тўрли, четлари темир каравотлар қўйилган экан. Очиқ осмон остида ётдик. Ҳаво очиқ бўлса ҳам ой, юдузлар нечуқдир хирароқ кўринарди. Мен қадрдон «етти оғайнимни» излай-излай, тополмай, ухлаб қолибман.

1 август, якшанба.

Узоқ юриб роса чарчаган эканмиз, мириқиб ухладим. Лекин эрталаб атрофни кўриб, табиатим тирриқ бўлди. Ивисиқ «Меҳмонхона»нинг ўртасидан ўтган бетон ариқчада бир эмас, учта кучук қатор бўлиб, чалиллашиб сув ичарди. Оғизни чайқамай, қўлни ҳўллаб юзларга сурдик-да, чой ҳам ичмай жўнавордик. Ҳадемай, динозавр шаклли қора тоғлар орасидан ўтиб,

экинзорга дуч келдик: пиёз, тарвуз, помидор пишиб ётибди. Кейин олма боғлар келди, кўп ўтмай, яна дашту биёбон бошланди. Гоҳ-гоҳ гуллаб ётган алиандра (бизда уйда ўстирилади) кўзга ташланиб қолади.

Покистон ҳудудига ўтиш билан чап қўл ҳаракати бошланган эди. Ҳайдовчини огоҳлантириб туришга тўғри келаркан: чапдан юриш, чап, чап... деб қўямиз. Айниқса, рўпарадан машина келаётганда ваҳима босади. Дарҳол «Зокиржон ака» ё «Обиджон ака, чап...», деб қоламиз бир нечтамиз бир варакайига.

Йўл ёмон бўлишига қарамай, қатнов тифиз. Юк машина ҳаддан ташқари кўп экан. Ҳаммаси безакдор. Гўё кузовсиз машиналар катта сандиқларни ортиб кетаётгандай кўринади. Бу юртнинг ҳайдовчилари бутун ҳафсаласи, диди-фаросатини машинасини жихозлашга сарфлашарканми, дейсиз. Рақобатга безашгани шундоққина сезилиб туради. Афтобуслари ҳам шунаقا...

Белужистон ҳудудига ўтганда тўхтаб, тушлик қилдик.

Лакбос деган жойдаги назорат постида Абдуғаффор деган йигит билан кўришдик. У машина ичига қарадиу Зокиржон акани таниб, ҳаяжон билан: «Ҳажи! Ҳажи!...» деб шитоб чиқди-да, худди отасини топиб олгандай қучоқлашиб кўриша кетди. Абдуғаффор экспедициянинг биринчи сафарида маъмур-кузатувчи бўлган экан.

Анчагача Зокиржон ака, Собиржон ака ва Фаррух, Абдуғаффорни таъриф-тавсиф қилиб кетишиди. Ҳақиқатан ҳам, келишган, истарали бу йигитнинг самимийлиги, инсонийлиги билиниб турибди. Мусулмон, миллати белуж экан.

Бизда, яъни Фарғона водийсида йўлнинг икки томони асосан пахтазор ва ора-сира полиз-сабзавот экинзорлари ё мева боғлари бўлади. Бу ерларда бепоён дашту биёбон. Қўл текизилмаган, лекин кўринишидан ҳосилдор ерлар ҳам кўп экан.

Квettтага кириб боряпмиз. Йўлнинг икки томони анча пастлик ва текис майдон. Қатор чодирлар тикилган. Чодирлар атрофида юзлаб эр-хотин бўйра тўқиш билан банд. Ҳамма ёқ бесарамжон, ивирсиқ, чанг... Ярим-яланғоч қоп-қора болалар тўзиб юришибди. Ҳар ер-ҳар ерда шотиси тепага қилиб қўйилган арава ва унинг ёнида эшаклар... Ўтин бозорида ўтин тарозида тортиб сотиларкан. Туя қўшилган эшак араваларга ҳар хил нарсалар: бўйра, сомон, ўтин ор-

тилган... Кичкина аравага улкан түя қўшилса жуда қизиқ туюларкан. Сувсизлик сезилиб турибди — гиёҳлар қуриб, ерлар қақшаб ётибди. Умуман, ҳолат — бир неча аср аввалги ҳаётни эслатади. Кветтага яқинлашган сари мотоцикллар кўпая бошлиди. Обдан заб-жихозланган «муравей» типидаги мотороллерлар... Автобуслар аэробусга ўхшайди. Бензин ташийдиган машиналарнинг ёnlарида ҳам қўлда чизилган чиройли қизларнинг суратлари...

Типу Султон кўчасидан шаҳарга кириб боряпмиз. Борган сари икки ён кўкаламзорлашиб, ободонлашиб, маданийлашиб кўринмоқда. Худди асрдан асрга ўтаётгандай бўлдик.

Кветта ҳам тоғлар қуршовида жойлашган ихчамгина шаҳар бўлиб, кираверишдаги янги массив менга неғадир Тошкентнинг Қўйлиқ даҳасини эслатиб юборди.

Кўчалар икки ёқлама, лекин ниҳоятда тифиз, серқатнов. Сарпойчанглар юрти экан, деб қўйдим ичимда.

Чаман кўчасига бурилдик.

«Муслим» меҳмонхонасига жойлашгач, Тўлқин ака, Фаррух — учаламиз шаҳарни томоша қилгани чиқдик. Бу ерда ўзбеклар ҳам анча бор экан. Рамазон деган йигит бизга қизиқиб, ўзини таништириди: Мозори Шарифдан (Афғонистондаги уруш боис) келиб қолишибди. Боболари асли бухоролик экан. Унинг етакчилигига, дўконлар, бозорларни айландик. Кўчалар тор, анча ифлос, чанг, бетартиб. Қандаҳор бозорига бордик. Ё бафармони худо! Мол-дунё, транспорт, одам дегани шунаقا тифизки, оёқ босгани жой йўқ. Марказий дўконга кирдик. Шу жой анча тартибли, маданий экан. Ҳамма нарса сероб. Лекин қиммат. Кейин пул бозорига ўтдик. Қатор расталарда турли давлатларнинг пулларини даста-даста қилиб ёйиб ўтиришган пулфурушларни кўриб яна Есенинни, унинг:

*Бу кун дедим саррофга атай,
Алишаркан сўмни туманга:
«Ўргат, гўзал Лаълимга айтай,
Ўргат севдим демокни манга», —*

деган сатрларини эсладим. Лекин бу ерда пул бирлиги туман эмас, рупийдир. 32 рупий I АҚШ долларига тўғри келаркан.

Рамазон бизни Шаҳобиддин деган акасиникига олиб кирди. Шаҳобиддин ўзи ёш бўлса-да, соқолни тарвакайлатиб қўйиб юборгани учун анча катта кўринарди.

Афғондан қочиб келиб, шу ерга ўрнашибди. Ҳали уйлари тўла битмабди. Бечора биз билан қучоқдашиб кўришар экан, кўзларига ёш олди.

Қайтишда кинога кирмоқчи бўлувдик, кеч қолибмиз. Манго шарбати ичдик. Менга жуда-жуда ёқди. Унинг мазасини биздаги ичимликларга ўҳшатолмадим.

Меҳмонхона орқасидаги узун, чорқирра ҳовлиси атрофини бинолар ўраб турар, ям-яшил майсазор эди. Тўри томонга, иккинчи қават айвончасига телевизор қўйилган экан. Бошқа мусофиirlар қатори биз ҳам майсазорга ёдёл тўшаб, ёнбошлаб, телевизор кўриб ўтиридик. Рангли тасвир ниҳоятда тиниқ эди. Ё, қўшни-нинг товуғи фоз кўринади, деган гап ростмикин?..

2 август, душанба.

Меҳмонхона ошхонасида нонушта қилгач, соат саккиз яримда йўлга тушдик. Шаҳардан чиқаверишда яна кечагидай қамишлар тўзиб ётган бўйрасозлар маҳалласидан, эски деворлар нураб тушаётган расталар ёнидан ўтар эканмиз, назаримда яна ўтмишга қараб юргандай, ўрта асрларга кириб бораётгандай бўлдим.

Хайриятки, кўп юрмай очиқдикка чиқиб кетдик, ясси тоғли даралар бошланди. Ёнбағирликларда қулоғи чипор, дўмли оқ қўйлар, қора эчкилар, калта шохли сигирлар ўтлаб юради.

Довои. Туннел. Водий. Сувининг ранги ёқимсиз сойлар. Шакарқамиш плантациялари, дарё ўзанига ўхшаган ерлару зерикарли тоғлар оралаб ўтиб боряпмиз. Сойларда, йўл бўйларидағи ариқларда, шундок сув ичида бурама шохли сигирлар ётишарди. Иссиққа чидамай сувга тушиб олишаркан-да, жониворлар.

Умуман, табиат манзаралари тез-тез ўзгариб турарди. Бирдан оппоқ баданли, қайнисимон евкалифт, бамбук дараҳтлари, экинзорлар кўзга ташланиб қолар, бироздан кейин қаршимизда яна дара, чўл, саҳро пайдо бўларди.

Иссиқ ҳаво, нам ҳароратдан терлай бошладик.

Йўлнинг бошқалигини пайқаб, Собиржон ака билан Фарруҳ (улар ўтган сафар келишган) маъмур-кузатувчимиз Парвезга айтишган эди, Парвез: «Ҳа, сизлар айтган йўлни сув олган, кейин, у томонда қароқчилар бўлиши мумкин, шунинг учун менга шу йўлдан юришни маслаҳат беришган», деди. Анча дароз, қора юзли, кўзлари катта-катта, лаблари қалин Парвез жуда кам-

гап эди. Бизнинг кимлигимиз, нима қилиб юрганимиз билан ҳам тузукроқ қизиқмасди. Тўғриси, башараси тундроқ, овози дўриллаган, ёқимсизроқ эди. Шунинг учун биз ҳам уни кўпам гапга солишини хоҳламай келәётувдик. «Қароқчилар» сўзини эшитиб, ҳаммамиз хушёр тортдик ва Парвездан «қароқчилар кўп бўладими, қаерларда бўлади?» деб сўроққа тутиб қолдик. Лекин маъмурнинг қиёфасидаги, юз-кўзидағи ифода заррача бўлсин, ўзгармади. Ҳа, ҳар замонда учраб турари, деб қисқагина жавоб бериб қўйди, холос.

Хуллас, «Парвез қора» билан суҳбатимиз қовушмади. Ўзимиздаям гаплашиб кетишга иштиёқ, анча пасайиб қолган эди. Узоқ йўлда гаплашавериб ҳам чарчайсан, зерикасан экан одам. Мен яна бизни қувиб ўтаётган, рўпарадан келаётган сандиқ-машиналарни томоша қилиш билан андармон бўлдим. Назаримда, сафар давомида мен учраттган энг қизиқарли, ўзига хос янгилик Покистон машиналарининг безаги эди. Эҳ-хе, бу рангли тасвир-безакларда нималар ифодаланмаган дейсиз! Баланд қояда гердайиб ўтирган ёки илон билан олишаётган бургутми, чиройли қанотларини хитой елпугичидай ёзиб турган ё боғда солланиб юрган товусми, шохлари пружинасимон тоф эчкисими, шер, йўлбарсларнинг важоҳатли ё осоийшта ҳолатлари, Кашмир манзаралари, қуббадор, минорали бинолар, юлдузлар, буғдой бошоқлари, катта-катта тоқ ё жуфт кўзлар, турли-туман паррандаю жониворлар, мўйловдор эркаклар, соҳибжамол қизлар, ошиқ-маъшукларнинг висол онлари... Қисқаси, расмларда акс этмаган мавзунинг ўзи йўқ. Нақ санъят музейининг қўлбола расмлар кўргазмаси! Лекин, тан олиш керак, расмларнинг жуда маҳорат билан чизилганлари кўп. Ўзиям, машинанинг икки ёни, орқасию олдида, кабина эшиклари, қанотларида бир парча холи жой қолдирмасликка ҳаракат қилишаркан.

Тахминан 300-чақиримда тушлик қилиш учун бир чойхона олдида тўхтадик ва машинадан тушиб, ташқарида ҳароратнинг баландлигини, нафас олиш қийинлигини сездик. Сафаримиз давомида биринчи марта чой ичидан терладик, тўғрироги терлаб чой ичдик ва ўзимизни машина ичига урдик.

Экспедициянинг биринчи сафаридаёқ «Тойота»га қоғия қилиб, молиявий раҳбар бўлгани учун Зокиржон акага «бой ота», чойни кўпроқ ичгани учун Собиржон акага «чой ота» деб «таксаллус» қўйишган экан,

мен ҳозирги ҳолатимизни ифодалаб ушбу тўртлиқни битдим:

*Ташқариға қайнок, ёз,
Оҳ, «Тойўта», «Тойўта»,
Совутгичи мунча соз,
Раҳмат сизга, бой ота...*

— Бобур: ғалабам омилларидан бири тулпорларим, деган экан, — деди раҳбаримиз. — Бизнинг тулпоримиз — «Тойўта»миз, уни эҳтиёт қилишимиз керак. Мана, шу тулпорда қанча мамлакатларни айланиб келдик. Ҳали яна қанча юртларга боришимиш лозим...

Зокиржон ака жуда серзавқ одам, рўлга ўтиrsa дарров музика янграб кетади. Асосий ҳайдовчимиз Обиджон ака табиатан оғир бўлгани учунми, ё рулда чалғимай дебми, магнитофон овозини унча хуш кўрмасди. Умуман, ҳаммада ҳар хил феъл, одатлар бўлади-да. Сайфиддин ҳожи ака ёшига нисбатан анча серҳаракат, қизиқувчан. Тўлқин ака бўлса: менга ош-нон берманглар, лекин чекишга имкон беринглар, дейди.

Ўтган куни Фаррухнинг бир оз мазаси қочганди, кечадан бери дуруст. Иқлим ё ҳар хил ажабтовур овқатлар илғади шекилли. Собиржон ака ҳам ўзини эҳтиёт қилиб, авайланиб юрибди. Ҳар қанча чанқаса ҳам, совуқ сув ичмайди (бу ҳақда раҳбаримизнинг оғзаки фармони ҳам бор эди). Аҳмаджон ҳамма ишни одоб ва маданият доирасида, ўз расамадида қиласди. Тўлқин ака иккимиз унча овқат танламаймиз, совуқ сувдан ҳам раҳбаримиз кўзини шамғалат қилиб симириб-симириб оламиш. Сув, тўғриси bemaza, лекин наchora: иссиқда юрак ўртаниб турса, бу ярим саҳройи йўлларда Гуркуровдагидай мазали сувлар бўлмаса...

Икки томонда шолизор бошланди. Онда-сонда, йўл бўйларида ўтлаётган елкаси ҳўкки ёввойи ҳўқиз (қўтос), похол ортган юқ машиналари учрайди. Йўлдан ичкарироқдаги катта-катта хирмонларда усти лой билан сувалган дон ғарамлари бу ерларда асосий дехқончилик-шолицилик эканидан далолат берарди.

Крам Ражвали, Ер Оллаяр деган шаҳарчалардан ўтдик. Хароб, ифлос... Шундай жойларда «Седои Бахор» деган меҳмонхона... Чиройли номга ҳайфимиз келди.

Яна шолизор далалар йўлига чиқдик. Қора ботқоқларда оппок лойхўраклар, узоқроқларда шалпанг-қулоқ қўйлар, эчкилар ўтлаб юришибди.

Шикарпур деган шаҳарчадан ўтиб боряпмиз. Ян-

тicha, яъни замонавийроқ бинолар ҳам бор экан, лекин барibir ҳароб қишлоққа ўхшайди.

400-чақиримдан дараҳтзорлар қуюқлаша борди, хусусан, палмазорлар. Субтропик замин фарзанди палма чиндан ҳам бу ерларга ўзига хос манзара бағишиларди.

Йўл ниҳоятда носоз, шаҳар ва қишлоқлар нообод эди. Секин юрардик. Шунинг учунми, шу бугун ниҳоятда узун ва зерикарли туюла бошлади. Ўзимизни чалғитиш мақсадида биримиз қўйиб биримиз Парвездан (таржимонимиз Аҳмаджон орқали) шаҳар ва қишлоқларнинг номларини ва бошқа нарсаларни сўраб-суршишириб бораардик. Тумрайган маъмуримиз охири: бутун Покистонни сўраб чиқасизларми, деди зада бўлганини яширмай.

Умуман, Покистонда уч-тўртта дурустроқ биноси бор каттароқ қишлоқ шаҳар дейиларкан. Секхур ҳам мўъжазгина шаҳарча эди. Лекин бу ерда ҳарқалай, чиройли бинолар кўзга ташланди.

Секхур дарёси бўйидан кетаётган эдик, ўтин бозорига дуч келдик. Бунчалик катта ва ивирсиқ ўтин бозори оламда бошқа бўлмаса керак. Беғам туялар тик турганича кавш қайтаришарди. Балчиқли жойларда машинамиз тиқилиб қолмаса эди, деб хавотирга тушамиз. Шунаقا расво йўлга бошлагани учун, «қоравой»дан ранжирик. Қаттиқроқ кулиб юборсак, ҳайдовчи ёнида йўл кўрсатувчи, штурман бўлиб бораётган Парвез орқасига ўгирилиб, бизга хўмрайиб қараб қўяди.

Дарё ўнг томонда эди. Бир пайт узокроқда, дарёнинг ўртасида бир оролча кўринди. Парвезнинг ҳеч нарса билмаслигига, гапиришга хуши йўқлигига ақдимиз етиб турса ҳам, оролча хақида сўрашга мажбур бўлдик. «Дам олиш зонаси» деди Парвез таваккал қилиб. Лекин оролча менга сирлидай туюлди, «10 та негр бола» деган кинодаги оролга ўхшаб кетди.

Кетма-кет иккита узун осма темир кўприк орқали дарёнинг ўнг қирғогига ўтдик ва Роҳри шаҳарчасига кириб бордик. Шаҳарнинг ғиштли бинолари жиҳози нуқтаи назаридан анча ўзига хос кўринди: деворларига бўёқ жуда кўп ишлатилган эди. Умуман, Покистонда машиналар ва деворларга асосан бўёқ билан ишлов бериларкан. Қизғиши, яшил, ҳаворанг, тилло рангни яхши кўришаркан. Наҳотки бўёқ шу қадар сероб ва арzon бўлса, деган фикр ўтди яна хаёлимдан.

Лекин шаҳардан чиқиб кетгунча (икки чақиримча юрдик) кўзимиз тўрт бўлиб кетди. Шахсан менинг кўнглим алоғ-чалоғ бўлиб, ўзимни аранг тутиб ўтирадим. (Йўлнинг икки томони табиатингизни тириқ қила-диган даражада қаровсиз, ташландик, ивирсиқ эди). Бу ерда яшаётганлар қанақа тоифа экан, билмадим, ҳар-қалай белкурак ё супурги деган нарсанинг умуман номини ҳам эшитишмаган бўлса керак, деб ўйладим.

Дунёда энг озода жонзор ҳам, ифлос жонзор ҳам инсон эканда. Шаҳар ҳудудидан чиқишимиз билан яна бирдан сердараҳт, ям-яшил, покиза олам (одам-сиз!) бошланди. Хурмозорлар... Мевалари щифил-ши-фил осилиб ётиби... Кейин яна боягига яқинроқ, ўхшашроқ, одам яшайдиган жойлар келди. Зокиржон ака қараб юринглар, кўнгил тортадиганроқ ошхона кўринса, тушлик қилиб оламиз, деб эслатиб борар, лекин унақа жой учрамасди. Тушлик қилмасликка қарор қилдик. Бошқалар индашмадию, Тўлқин ака жуда хуноб бўлди: чеколмагани учун (Кветтадан чиқ-қанимиздан кейин машинада чекиши ман этилган эди). Дарвоҳе, Сайфиддин ҳожи ака Жалилов тарихчи олим эмасми этнография ҳам тарихнинг бир қисми, деб сават ё бўйра тўқийдиган ивирсиқ жойларни томоша қилгиси келиб қоларди. Зокиржон ака ҳайдовчига пин-хона «тўхтаманг, тезроқ ҳайданг», деб буйруқ берарди-да, кулиб, эҳ, аттанг зўр этнографик жойлар қолиб кетяпти-да, деб домланинг жигига тегарди.

— Шундай жойларда расмга тушиб қўйилса, зўр тарихий эсдалик бўларди-да, — дейди Собиржон ака.

Сайфиддин Жалилов ўзини эшитмаганга олади. Хиргойига тушиб кетади. Асаби ҳам мустаҳкам одам. Қойил қолиш керак.

Роҳридан чиққанимиздан кейин табиат манзаралари анча ўзгарди: ям-яшил шакарқамиш плантациялари, хурмозорлар бошланди. Борган сари сув-ариқлар, каналлар кўпроқ учрарди. Чап ёнда, йўл ёқалаб кетган каналда қоп-қора болалар чўмилишар, тўп-тўп қора сигирлар ҳам ариқда фақат бошларини сувдан чиқариб туришарди. Бояқиши жониворлар иссиққа чидамай, сув ичига тушиб олишаркан.

Хурмо теришаётган жойда бу ажойиб манзарани кино, телетасвирга олиш учун тўхтадик. Катта, текис майдонга бўйралар солиниб, хурмо тўкиб ташлаган экан. (Хурмо шундай қуритиларкан). Даражат тепасида узум шингилидай фужум-фужум қизғиши сариқ, хурмо

олтиндай товланарди. Хурмо дараҳтига чиқиши учун шотининг ҳам кераги йўқ; порсиљоқсимон танаси оёқ қўйишга жуда ўнгай эди. Лекин барибир белига арқон боғлаб олишаркан. Хурмо теришаётган етти-саккиз эркак бизга ажабланиб қарашарди-да, бир-бирларига қаттиқ-қаттиқ гапириб, шитоб ҳаракат қилишарди. Кўчанинг ўнг томонида аёллар чой теришаётган экан, Парвез: хотинларни суратга олманглар, эрлари уришади, деб тасвирчиларимиз ҳафсаласини пир қилди.

Бир дехқон орқасига бидон боғлаб олиб, қулуп-найсимон экинга дори сепаётган экан, сўрасак, «Пинди» деб жавоб берди.

Сал юргач, автомобил ҳалокатига дуч келдик. Катта юқ машинаси билан бензавоз тўқнашиб кетибди. Бутун бундай «тўқнашувлар»га, йўлнинг икки томонида ағдарилиб ётган машиналарга учинчи ё тўртинчи марта дуч келишимиз эди.

Аҳоли яшайдиган жойларда таниш манзара: фўза пайкаллари ҳам учрай бошлади. Бироқ фўзалар ола, ҳали унча амал ҳам олмабди.

Қорин очди. Лекин овқатланадиган жойларни кўриб, иштаҳалар бўғилиброқ қолди. Хайриятки, уловимиз учун бундай муаммо йўқ эди: ҳар қадамда ёнилғи қуядиган жойлар—нисбатан покиза, саришта, навбат ҳам йўқ. Ярим тунда борсангиз ҳам бир зумда муҳайё...

Соат тунги иккиларда бир очиқ «карвонсарой»да тўхтаб тунадик.

Мен машинада ётувдим, ҳар хил тушлар кўриб (бутун ўтган жойларимиз анчагача кўз олдимииздан кетмаса керак) ухлай олмадим. Пастга — каноп каравотга тушиб ётдим. Катта вентилятор қўйилган, лекин у ҳам иссиқ шабада тафтини қайтаролмас эди. Радиода ҳинд қўшиқлари (Покистонда ҳам ҳинд қўшиқларини яхши кўришади ўёкилли) янграмоқда эди, тинглаб ётиб, кўзим илинибди. Саҳар уйғониб кўзимни очсан чала тўлган ой ва «Етти оғайни» бошним узра заррин шуълаларини тўкиб туришибди.

3 август, сешанба.

Соат беш яримларда турдик. Пащшалар ғужғон ўйнамоқда эди. Лекин ҳарқалай, атрофга сув сепишибди. Анча салқин, нисбатан сариштароқ... Чой ичиб, йўлга тушдик. Энди икки томон пахтазор эди. Ярим яланғоч бўлиб, тўрт бурчакли сопи калта кетмонда

ғўза чопаётган қорамагиз эркакларни кўрдик... кўп юрмай, яна шакарқамишзор, хурмозорлар бошлианди. Фарона каналини жудаям эслатиб юборадиган каналдан ўтдик. Бироқ суви лойقا, бўтана эди. Йўлдан сал ичкарироқдаги хирмонларда беҳисоб қопларда шоли бетартиб тахланиб ташланган эди, бир-икки чақиримдан сўнг канопга ўхшаган ўсимлик далалари... хуллас, далалар ранг-баранг бўлиб, экинлар, мевалимевасиз дараҳтзорлар тез-тез алмашиб, табиат манзаралари ўзгариб туради. Катта қорни икки томонга чиқиб кетган семиз, симобранг сигирлар ҳар қадамда учрар; аксарияти сув ичида ётган бўларди.

Квадрат қилиб экилган анорзорни кўриб, анча тажжубландик. Энди гуллабди. (Ҳиротда меваси анча катта бўлиб қолган эди).

Одамларнинг олифталари ҳам кўп, лекин ўзига унча қарамайдиган, кийинишга эътибор бермайдиганлари ҳам кам эмас экан. Мўйлов қўйиш Эрондагидай, бу ерда ҳам урф экан: бурнининг остига тук чиққанки эркак, мўйлов қўяркан. Иссиқданми, аксарият оқ кийинишаркан. Дуч келган жойда ўтириб, дуч келган жойда ётиб ҳам кетаверишаркан, хусусан, йўловчилар.

Далаларга, боғларга қарасанг завқинг келади, одамларга қарасанг — ҳайфинг.

Бу ёқларда шоли қўчат қилиб экиларкан (биз томонларда ёппасига сепилади). Белигача лой бўлиб кетган қорамагиз аёллар катта-катта майдонларда шоли қўчат қилишяпти.

Катта-катта ер майдонлари экинсиз эди. Ҳайрон бўлиб, кузатсак, ер ости сувлари кўтарилиб, ерлар захлаб ётаркан. Хандак жойларда сув кўллаб турибди. Бу захоб сувлар ҳатто баъзи ерларда уйларнинг пой-девори, деворигача чиқиб кетган, шунинг учун уйларнинг эгалари ташлаб кетишибди. Ҳукумат бунинг чорасини излаётганга ўхшамасди.

Омочга қўтосларни қўшиб, ер ҳайдашяпти. Ер бепоён, ҳаммаёқ ўтлоқ, мол-қўй, эчкилар кўп.

Бурни ерга теккудай бўлиб, букчайиб ғўза чопаётганларни кўриб ачиндик. Беллари толмасмикин? Кетмонининг сопини сал узунроқ қилишсаю, деймиз. Лекин, ернинг бели оғриб қоладигандай, кетмонни енгил-енгил, омонат уришарди.

Бўйра тўқиётганлар бу йўлдаги шаҳарчаларда ҳам учради. Ямаш, бутлаш, созлаш, майда ҳунармандлик устахоналари.

Шаҳарчалар тугаши билан табиат қучобига кириб қолгандай бўламиз. Мевали-мевасиз дараҳтзорлар, экинзорлар борган сари қуюқлаша боради. Покистонликлар ерни бизга ўхшаб яйдоқ қилиб ташлашмас экан. Катта-катта пахтазор ичида турли дараҳтлар ўсиб ётибди. Менимча баланд ҳароратли иқлимда япроқлар орасидан ўтган иссиқлик ҳам кифоя қилса керак.

Ўрмон бошланди. Бадани оқ, тол-терак — мажнунтол чатишмасига ўхшаган чиройли дараҳт кўп экан. Оқ қайнинга ҳам ўхшаб кетади.

У ёқдан, бу ёқдан сухбатлашиб боряпмиз. Сай-фиддин ҳожи ака, ўзи тарихчи бўлса ҳам, адабиётни, адабиёт ҳақида гаплашишни яхши кўради. Гапни айлантириб Андижон адабиёти ва санъатига бурди. Сухбатга Собиржон ака ҳам қўшилди. Ўша йили баҳорда Адабиёт ва санъат музеи бўлиб турган Жомъе мадрасаси диндорлар ихтиёрига ўтганди. Музейга эса тайинли жой йўқ. Мозийгоҳнинг мавжуд ҳужжатлари (экспонатлари) — суратлар, китоблар, кўлёзма ва бошқа ашёлар Ўлкашунослик музейининг ертўласига тахлаб қўйилганди.

Узун кўприкли каттагина дарёдан ўтдик. Номини Жумабой ҳам айтиб беролмади. (Дарвоҷе, бу исм Парвезга ҳеч ёпишмади). Чапда сават тўқувчилар, ўнгда эса, ариқ бўйида қатор ўтириб олиб, кир юваётган аёлларни кўриб, кирни ҳам жамоа бўлиб ювишарканда, деб ўйладим.

Аллақандай корхонасифат бино олдида бир одам эшак аравага ҳарсанг тошдай яхлит бир музни юклапти шошилмай, пухта қилиб. Арқон борлаб тортятпти. Машинани секинлатиб, кузатдик. Пастаккина бино ичидан сувнинг гёё новдан тушаётгандай бўғик овозини эшитдик. Билсак, бу муз тайёрлайдиган цех экан.

Музни кўриб сув ичгимиз келиб кетди. Лекин соvuқ сув ичмаслик ҳақидаги оғзаки фармон ҳар қадамда, ҳар соатда эслатиб турилади. «Хом сув қоринни оғритади» деган тушунча онгимизга шу қадар сингиб кетдики, сувни ўйлашимиз билан қорнимиз оғрий бошлагандай туюладиган бўлиб қолди.

Йўловчиларга мўлжаллаб «қурилган» осмон остидаги очиқ майдоннинг ёнида чойхона, ошхона, сартарошхона—ҳаммаси жамулжам эди. Ҳатто ҳаммом ҳам шу ерда экан — водопроводнинг тагига чордона қуриб ўтиришиб олиб, чўмилишавераркан. Оппоқ совун кўпиклари ичида қорамағиз бадан ғалати кўринар-

кан... Шундан жойларнинг бирида наридан-бери тушлик қилиб олдик. Ташқари иссиқ, шунинг учун тезроқ «Тойота»га кириш пайида бўлиб турамиз.

Бирдан осмонда ола-чалпоқ булатлар пайдо бўлиб ёмғир савалай бошлади. Суюниб кетдик. Лекин қувончимиз узоқча чўзилмади. Ёмғир бир пасда тинди. Лекин қатнов тифизлаша борарди. Ҳайдовчилар ўта бесарамжон юришаркан. Дам у ёнимиздан, дам бу ёнимиздан гувиллаб ўтиб кетишади. Ҳалиям «штурман» «чапчап» деб ўтиради. Яхшики, Обиджон ака тажрибали, феъли ҳам вазмин ҳайдовчи. Ортиқча тез юрмайди, шунинг учун шошиб ҳам қолмайди. Зокиржон ака машинани жуда шитоб ҳайдайди, лекин ниҳоятда ҳушёр. Умуман, Зокиржон ака экспедицияга ҳам, унинг раҳбарлигига ҳам муносаб, мос одам: анча хушчақчак, ҳазилкаш, шу билан бирга, кўнгилчан, ишонувчан...

Парвезд раҳнамолигида кўп адашиб, довдира б юриб, ниҳоят Лоҳурга яқинлашиб қолдик шекилли, атрофдаги уй ва бошқа бинолар, одамларнинг юриш-туриши, кийинишлари маданийлаша бошлади. Хусусан, аёлларнинг лиbosлари рангин тус ола борарди.

Инглизча ёзувлар ҳам тез-тез кўзга ташланиб қолди. Йўлнинг ўнг томонида қатор қилиб териб ташланган беҳисоб, хилма-хил тувакли гуллар бозорига етганимизда оқшом туша бошлаган эди. Таажжубки, гулларнинг эгалари ҳам, харидорлар ҳам кўринмасди. Демак, шундоқ ташлаб кетишавераркан.

ЛОҲЎР МАНЗАРАЛАРИ. ОШИҚ САЛИМ

Тун қўйинидаги Лоҳурга кириб боряпмиз. Худди Машҳаддагидай. Чироқлар, зълонлар... Уясига кириб чиқаётган арилардай физ-физ қатнаётган оғир ва енгил машиналар, мотоциклли, велосипедли кишилар... Шаҳар менга негадир нотинчдай туюлди.

Барокко усулида қурилган черковлар кўриниб турган Абдумажид Руд кўчасидан юриб, истаб-сўраб «Ал-Нур» меҳмонхонасини топдик. Баҳтимизга бўш ўринлар бор экан, жойлашиб енгил нафас олдик.

Шериклар бир хонага жам бўлиб, гурунгга тушишди. Мен ўз хонамда Бобурийшунос доктор Каромат Алихоннинг «Лоҳурга бир назар ёхуд Лоҳур манзаралари» китобини варақлай бошладим. Унда Бобур

ва бобурийларнинг Лоҳўр шаҳри билан дахлдор ҳаёти, муҳим тарихий санаалар муҳтасар, лўнда қилиб ёритилган эди. Мана бу далил ва рақамлар мен учун жуда қимматли маълумотлар эди:

- 1524 йили** Бобур Лоҳўрга ҳужум қилди ва шаҳарни катта қирғин билан қўлга киритди.
- 1555 йили** Ҳумоюн Лоҳўрни афғонлардан қайтариб олди.
- 1556 йили** Акбар Қаланур ҳокими, кейинроқ Лоҳўрнинг бир қисмига ҳукмдор деб эълон қилинди.
- 1584 йили** Лоҳўр Бобурийлар салтанатининг пойтахтига айланди. Акбар Лоҳўр қалъасини қайта курдирди.
- 1614 йил** Жаҳонгирнинг онаси Марям Замоний Бегим Шоҳи масжидини қурди.
- 1615 йил** Жаҳонгир Анор кали (Анор гули) мақбрасини қурдирди.
- 1627 йили** 8 ноябрда Жаҳонгирнинг жасади Кашмирдан келтирилиб, Дилкуш боғига дағн этилди.
- 1628 йили** 17 январда Шоҳ Жаҳон Лоҳўр ҳукмдори деб эълон қилинди.
- 1642 йили** Шоҳ Жаҳон Шалимар боғи қурилишини бошлади.
- 1638 йили** Шоҳ Жаҳоннинг энагаси Дай Оқа ўзномига масжид қурдирди.
- 1646 йили** Шобуржи боғлари қурилиши бошланди...

Шунингдек, Лоҳўрга Аврангзебнинг акаси Доро Шукуҳ, Аврангзебнинг ўзи, унинг ўғли Шоҳ Аъламлар ҳам ҳукмдорлик қилишган.

«Мўғуллар (Бобурийлар) шаҳарда гўзал боғлар ва кўркам бинолар барпо этдилар, — деб ёзади Ка-ромат Алихон. — Улар шаҳар қалъасини кенгайтириб, унга ўн учта дарвоза қурдилар... 1752 йилгача Лоҳўр улар (Бобурийлар — Қ.К.) таъсирида бўлди... 1767 йилдан 1846 йилгача Панжобга сикхлар ҳукмронлик қилдилар. Бу давр Лоҳўр тарихида энг оғир давр бўлди. Сикхлар мусулмонлар (яъни бобурийлар — Қ. К.) қурдирган меъморчилик обидаларини шафқатсизларча вайрон қилишди. Биноларни бутун-

лай қўпориб, «Нур Жаҳон» ва бошқа мақбаралардаги безаклар (мозаика)ни кўчириб, мармарларни ташиб кетишиди».

Каромат Алихон ўз китобида тарихий Лоҳўрдаги меъморчиллик обидалари, масжид ва мақбаралар, борлар ҳақида анча батафсил тўхталади. Шулардан бири Лоҳўр қалъасидир. Докторнинг ёзишича, қалъани дастлаб, Маҳмуд Фазнавийнинг яқин кишиларидан бири Аёз Малик оддий лойдан қурдирган. Кейинчалик турли хукмдорлар даврида бир неча бор вайрон бўлиб, қайта-қайта тикланган. 1556 йили Акбаршоҳ қалъани бутунлай буздириб, гиштдан қайта қурдирган.

Дарвоза деворига ишланган нақш ва гуллар ҳақиқий ҳунармандчилик намунаси бўлган. Деворлардаги ниҳоятда гўзал, рангдор безаклар Жаҳонгирнинг кўрсатмаси, тоғаси, тавсияси ва бевосита унинг раҳбарлигида ишланган дейишади. Суратларда сарой маросимлари, буқалар, филлар жанги, спорт, кураш саҳналари, байрам шодиёналари, сарой аъёнларининг либослари маҳорат билан тасвирланган. Бу безаклар, ранглар уч юз йилдан кейин ҳам ўз жозибасини йўқотмаган. Қалъанинг «Шиш маҳал» (ойнаванд сарой) деб аталган ҳарам қисми Шоҳ Жаҳон томонидан асосан соф мармардан, жилоланиб турадиган тошлардан қурдирилган. Унинг ҳовлисида улкан ҳовуз, ҳовуз ўртасида эса маҳсус йўлак билан бориладиган шоҳсупа бўлган. Қисқаси ҳарам инжу ва кўзгулардан ишланган ноёб ҳунармандчилик намунаси эди.

Каромат Алихон келтирган маълумотлар ичida Анор кали (Анор гули) мақбараси тарихи жуда қизиқ тафсилотларга бойдир.

Лоҳўрда Анор кали деган машхур бозор бор. Анор кали мақбараси ана шу бозор яқинида қад кўтарган. Акбаршоҳ саройидаги Нодира бегим ёки Шарафнисо исмли раққоса-канизакни, ҳусну латофатига нисбат беришиб, Анор гули деб аташган. Ривоятларга кўра Шаҳзода Салим бу канизакка ошиқ бўлиб қолади ва қиз рақс тушаётган маҳалда у билан кўз уриштиришганини шаҳзоданинг отаси Акбаршоҳ сезиб қолади. Салимга ишқи тушиб қолган Дилором исмли канизак ҳам шаҳзода билан Анор гули ўртасидаги муносабатларни Акбарга етказган. Маълумки, подшолар саройида паст табақали аёлни юқори доирага яқинлаштириш азалдан мумкин эмас. Нақл қилинишича, Акбар Шарафнисони тириклайнин Лоҳўр қалъаси деворига қўшиб

урдириб юборган эмиш. Шаҳзода Салим тахтга ўтиргач, Анор гулига бўлган муҳаббати хотирасига қизнинг номига катта мақбара қурдирган экан.

Бу ҳақда ўн еттинчи асрда Покистонга саёҳат қилган оврўпалик ёзувчилар Вилям Финч ва Гербертлар бутунлай бошқача ривоят тўқишиган. Гўё, шаҳзода Салим ўтай онаси, яъни шаҳзода Дониёнинг онаси билан дон олишиб қолгани учун шоҳ жазо, бошқаларга ибрат тариқасида аёлни деворга қўшиб урдириб юборган эмиш. «Лекин тарих бунга шоҳидлик бермайди, — дейди Каромат Алихон. — Акбаршоҳ ва Жаҳонгир давридаги тарихий манбаларда бу ҳақда ҳеч нарса ёзилмаган. Афтидан, оврўпалик сайёҳлар ўз ватандошлигини ҳайратга солиш учун шундай уйдирма тўқишиган бўлсалар керак»...

Ривоятларнинг бошқа қисмлари ўз йўлига, ҳаётда нималар бўлмайди, бироқ қўлланган жазога менинг мутлақо ишонгим келмайди. Акбардек эл ичра катта ҳурмат қозонган шоҳнинг шу қадар ваҳшиёна йўл тутганини тасаввур қилиш қийин.

«Лекин, ҳарқалай, қабр тошига «Ошиқ Салим Акбар ўғлидан» деган ёзув битилган, — деб ёзади Каромат Алихон. — Бу аёл шаҳзода Салимнинг хотини, Султон Парвезнинг онаси бўлиб, Заин хон Коқанинг қизи эди. Акбар аввал уларнинг никоҳига рози бўлмаган, кейин, ўғлининг муҳаббати кучлилигини англаб, розилик берган...». Шу гап билан яна ҳамма нарса чалкашиб кетгандай туюлди менга. Маълумки, жуда кўп манбаларда шаҳзода Салимнинг бошқа бир аёл — Меҳринисога шайдолиги нақл қилинади...

Хуллас Каромат Алихон «Лоҳўрга бир назар ёхуд Лоҳўр манзаралари» китобида муаллифнинг Бобур ва бобурийлар ҳаёти ва ишларини жуда синчилаб, пухта ўргангандиги, тарихий воқеаларга холис баҳо беришга ҳаракат қилингани сөзилади. Унинг ёзганларига қараганда Лоҳўр бобурийлар даврида тарихий обидаларга бой, ниҳоятда гўзал шаҳар бўлиб, «Боғлар шаҳри» номини олган. Акбаршоҳ фамхўрлиги туфайли бу ерга олиму фозиллар, донишманлар, шоирлар, етук саркардалар тўпланган эди. Ҳа, Ҳиндистан дарвозаси ҳисобланган Лоҳўрдан қанча улуф кишилар, донолару саркардалар, подшою фотиҳдар неча бор у ёқдан бу ёққа ўтишган. Ана шундай нодир, ноёб тарихий шахсларнинг назари тушган шаҳар бу...

ТОНГТИ ТАҲЛИКА ВА ЧАРАҚЛАГАН УМИДЛАР

4 август, чоршанба.

Меҳмонхона иссиқ эди. Деразадаги совутгич ва шифтдаги катта паррак ҳам ҳарорат дамини кесишига ожизлик қиласди. Шунга қарамай, узоқ ва хуш-но-хуш манзарали, гоҳ текис, гоҳ нотекис йўл юриб чарчаганимиз учун қотиб ухлабмиз. Соат олти яримда турдик. Душ қилгач, кийимларимни алмаштириш учун пастта тушиб, ташқарига чиқдим. Обиджон аканинг бир ўзи машинада тунаб қолган эди. Қарасам машина берк. Обиджон ака йўқ. Кута бошладим. Зокиржон ака тушди. Анча турдик. Ҳайдовчимизнинг дараги бўлавермади. Кейин, бирдан хавотирлана бошладик. Истаб, икки-уч марта учинчи қаватга чиқиб тушдик. Тўлқин Рўзиев билан яқин-атрофни айланиб келдик. Обиджон ака йўқ. Бу орада ҳамма машина ёнига тўпла-нишган эди. Муҳокама қилиб, ҳар биримиз кўнгли-мизга келган шубҳа ва гумонларни айта бошладик. Шаҳарда кеча кечқурун ва бутун эрталаб соат олтида қандайдир портлаш юз берган экан. Буни эшитиб, ваҳима, хавотир кучайди. Кимдир: «елкасига сочиқни ташлаб, анқайиб турган бўлса, шубҳали одам сифатида полисменлар тутиб кетишган бўлса-я», деди. «Шантаж», «диверсия», провокация» деган иборалар иштироқидаги тахминий мулоҳазалар билдирилди.

— Ўзбекистон билан Покистон давлатлари муносабатини бузишга ҳаракат қилувчилар бўлиши мумкин, — тасдиқлади Зокиржон ака раҳбарона оҳангда.

— Айланиб келаман деб, адашиб кетгандир. Тилни билмайди, кўчанинг, меҳмонхонанинг номини айтолмайди, — деди Тўлқин Рўзиев.

Машина ичига қарасам, Обиджон аканинг майдачуда солиб юрадиган қора чамандончасининг калити осилиб, ўзи ҳам омонат қўйилган жойда — эшик рўпапрасидаги ўриндиқда турибди. Демак, эрталаб нарсаларини олган.

— У узоққа кетмаган, биронта хонада қамалиб қолган бўлса керак, — дедим қандайдир ишонч билан.

Лекин Обиджон акадан дарак йўқ эди. Ҳаммамиз жуда хуноб бўлдик. Нуқул уф тортамиз. Кўнглимиздан нима хаёллар ўтмади. Қаердан исташни, кимдан нима деб сўрашни билмаймиз. Тўлқин ака бир қути

сигаретни чекиб адои тамом қилди. Бошқаларнинг камиди бир неча тола сочи оқарди. (Зокиржон ака шундай деди).

Нихоят, бир ярим соатдан кейин ўзимиз тахмин қилгандай, елкасида сочиқ билан тепадан ҳеч нарса бўлмагандай илжайиб тушиб келди. Бир хонани ўзимизникларники, деб кириб, душ қилгач, ёнбошлаб ухлаб қолган эмиш. Нима ҳам дердик. Топилганига шукур, деб, раҳбар ҳам қаттиқ гапирмади.

Ўзбекистон—Покистон дўстлик жамиятини излаш баҳонасида шаҳарнинг анча чиройли кўча ва жойларини кўрдик. «Ал-Ҳамро» деган марказий кўчадан бормоқда эдик. Ўнг томондаги қуюқ дараҳтзор боғ ҳайвонот бори экан. Шундоққина йўл ўртасидаги булвар-гулзорда кўрганим ажойиб бир манзара—рақамлари ва миллари устида ранго-ранг гуллар ўстирилган улкан соат мени чинакам ҳайратга солди. Ҳаммасидан ҳам соат-гулнинг катта кўчада безиён, бешикаст яшнаб турганини айтинг. Демак, бу гўзаллик тимсолини тепиб, депсаб, бузиб кетадиган тарбиясиз малъунлар йўқ экан-да!

Кўчалар, биноларнинг пештоқлари, деворларда очиқ жой кам. Инглизча ва урдуча эълонлар, рекламалар... Айниқса, «Пепси-кола», «Кока-кола» ва аллақандай сигарет турларини ташвиқ қилувчи ёзувлар, суратлар, лавҳалар ҳаддан ташқари кўп эди.

Биз юрган замонавий, янги кўчаларда шаҳарнинг қадимиyllигини, тарихини эслатувчи ёдгорликлар, иншоотлар деярли кўринмади.

«Дўстлик» жамиятида биз истаган одамлар йўқ экан. Парvez маъмур эса божхона-чегарага ошиқар, у биздан тезроқ ҳалос бўлиш пайтида эди. Биз эса унга бўйсунишга мажбур эдик. Лоҳёр канали бўйлаб жўнадик. Яшил майсазор майдонларnihоятда кўп ва хўп экан. Эрта тонгданоқ, каналда қийқиришиб чўмилаётган қорамагиз болакайларни кўриб ҳавасимиз келди. Шаҳар ўртасидан кесиб ўтган бу канал менга Тошкентнинг машҳур Анҳорини, ҳукумат биноси билан туташ хиёбонни эслатиб юборди. Канал бўйида мажнунтоллар майда «кокилларини» сувга солиб, хитой атиргуллари ва бошқа турфа гуллар очилиб ётибди. Канал ёқасидаги майсазорда аёллар қатор ўтиришиб олиб, таёқлар ёрдамида кир ювишмоқда...

Жуда узоқ айланиб юрдик. «Қўнқавой», яъни Парvez бу йўлларни яхши билмас экан, ҳар чақиримда,

ҳар бир бурилишда машинани тўхтатиб, одамлардан ўйл сўрайди.

Шаҳардан четга чиқиб, яна бир хароб шаҳарчадан ўтдик, кейин яна кенг дала йўлларидан, ўрмонзорлар оралаб ўтган қўчалардан юриб, ниҳоят, божхона — чегарага етиб бордик.

Қирқ беш—эллик ёшлиардаги, соқол-мўйлови қиртишлаб олинган, қалта енгли, қора тутгали оқ, кўйлак, кулранг шим (яъни фарбча) кийган, истараси иссиққина (буғдой юзли) бошлиқ бизни ўз хонасида илиқ (менинг назаримда самимий) қарши олди, унинг илтифоти билан хизматчилардан бири ҳар биримизга қолқоғи очилиб, ичига найча солинган муздай пепси-кола келтириб берди. Бошлиқ биз билан яхши хол-аҳвол сўрашди, мақсадларимизни, режаларимизни шошилмай тинглади, яъни дипломатик тарзда муомала қилди.

— Мен сизларни тушундим ва қойил қолдим. Эзгу ният билан йўлга чиқибсизлар. Ҳаммаси жойида-ю... Лекин, гап шундаки, Ҳиндистон ҳукуматининг Ҳинд заминига ҳеч қандай транспортни ўтказмаслик ҳақида ёзма кўрсатмаси бор-да, — деди у афсус билан бош чайқаб.

Бирдан тарвузимиз қўлтиғимиздан тушиб кетаёзи-ди. Ахир Андижонда ҳаммага Ҳиндистонга кетдик, деб келганимиз. Бунинг устига экспедициянинг Ҳиндистонга ўтиш учун учинчи марта ҳаракат қилиши... Агар бу сафар ҳам ўтолмасак, унда нима бўлади?..

Таажжубки, Зокирjon aka мутлақо умидсизликка тушмади (балки экспедиция аъзолари олдида ўзини шундай тутгандир).

У Бобур ҳақида, унинг Андижонда туғилгани, экспедициянинг мақсади ва аҳамияти ҳақида, Ҳиндистоннинг Ўзбекистондаги элчиси Делип Мехтанинг икки марта Андижонда бўлгани, Ўзбекистоннинг мустақилликка эришгани, бу ергача қанча қийинчилклар билан етиб келингани ва ҳоказолар ҳақида ҳаяжон билан гапириб, Аҳмаджонга яхшилаб таржима қилинг, деди. Бироқ, Аҳмаджон, негадир анча совуққонлик билан, гўё бу одамга бунаقا гапларимизнинг қизифи йўқ, дегандай, қисқа-қисқа таржима қилди. Назаримда унинг ҳам ҳафсаласи пир бўлиб, руҳи тушиб кетдими... Лекин ҳарқалай, бошлиқ юмшади. — Бунчалик бўлса, чегарага бориб, ўтказадими, йўқми, сўраб келинглар, — деди у мулојимлик билан ва бир ходими ни қўшиб берди. Зокирjon aka, Аҳмаджон, Парвез—

учаласи кетиши. Ҳиндистоннинг чегара-божхонаси ўз юз қадамча нарида экан холос. Қолганларимиз улкан Пипал дарахти остига қўйилган ўриндиқда нима гап топиб келишаркан, деб сабрсизлик билан ҳам иссиқдан бетоқат бўлиб кутиб ўтиредик.

Ярим соат ҳам ўтмай қайтиб келиши. Зокиржон аканинг оғзи қулоғида.

— Бобурдан кейин, сал кам беш юз йилдан сўнг Ҳиндистон ҳудудига биринчи марта улов билан Бобур экспедицияси ўтадиган бўлди, — деди у ишонч билан.

Бошлиқдан (дарвоқе, унинг исми-шаърифи Шавкат Али Шайх эди) Лоҳўрда икки кун қолишга рухсат сўрадик. Аввалига у унамади. Ҳатто Парвез ҳам илтимосимизга қатъиян қаршилик қилди. Лекин, Зокиржон аканинг «дунё кўрганлиги» туфайли, бошлиқقا тўнлар кийдирилиб, Шаҳрихон пичоғи тақилиб, қора пахта гулли чойнак-пиёла сервислар инъом этилгач, бизга рухсат тегди. Лекин кузатувчи (маъмур) беришга барибир тирриқлик қилиши. Парвез ўзи бирга бўлади, дейиши. Парвез эса, алмаштиришга кийимим йўқ, ёқаларим қорайиб кетди, хотиним касал, бунинг устига менга чегарагача олиб келиб қўйиш топширилган холос, деб анчагача бўйин товлаб турди. Ундан кўплашиб ўтинишга, қўшимча ҳақ ваъда қилишга тўғри келди.

Шаҳарга қайтиб, гилам тижорати билан шуғулланувчи ака-ука ўзбеклар дўконини тоғдик. (Экспедиция аъзолари улар билан ўтган галги сафар чоғида танишишган экан). Бироқ Абдужалил ҳам, Ўзбекистон ва Покистон дўстлик жамияти ходими, бобурийшунос Ансориддин Иброҳимов ҳам Ўзбекистонга кетган экан. Абдумажиднинг укаси Саҳидод бизга ҳамроҳлик қила-диган бўлди. Лоҳўр миллий музейига кетаётиси, тушлик қилиб олиш учун қип-қизил қилиб пиширилган бутун товуқ гўштлари маҳсус тахтакачларга тизиб-илиб қўйилган жойда, жўжа-кабоб ошхонаси олдида тўхтадик. Одатдагидай, бу ерда ҳам ейдиган таомингизни айтсангиз, бозорданми, бошқа жойданми, топиб келиб, пишириб-куйдириб беришаркан. (Ташқаридағи илифлик товуқлар реклама учун экан.)

Узун зал охиридаги овқат тайёрланадиган хона эшиги тепасига осиб қўйилган рангли телевизорда видео фильм бўлаётган экан. Тушунмаганимиз учун бепарвогина томоша қилиб ўтирувдик, биздан Саҳидод мана шу кино Бобур ҳақида, деб қолди. Ҳаммамиз

ҳушёр тортиб, бутун диққат-эътиборимизни ойнаи жаҳонга қаратдик. (Тасодифни, омадимизни қаранг). Видео фильмнинг айни шу палладаги лавҳаларида Бобур Ҳиндистон сари юриши олдидан бетоб бўлиб ётарди. У тузалгач, мулозимлари, аскарларини йиғиб мен эшитган машҳур нутқини сўзлади, яъни: биз бу ерга босиб олиш учун, талончилик қилиш учун келганимиз йўқ,... деди. Кейин тарихий Понипат жанги бошланади ва Бобур ғалаба қилади. Сўнг Бобур умрининг сўнгги дамлари кўрсатилади. Ўша, бизга таниш, жаҳон илми донишларию алломаларини ҳайратта солган фидойилик! Яъни... Ҳумоюн бетоб бўлиб қолади. Сарой маслаҳатчилари ўғлингиз учун Кўҳи Нурни баҳшида қилинг, дейдилар. Бобур Кўҳи Нур нима бўлибди, мен фарзаңдим учун жонимни беришга тайёрман деб, қўлида, тасбеҳ билан, худога илтижо қилиб, Ҳумоюн ётган ўрин атрофидан бир неча марта айланади.

Ҳумоюн кўзини очади.

Бобур ётиб қолади ва... қазо қилади.

Бобурни ҳам, Ҳумоюнни ҳам ҳар жиҳатдан келишган актёrlар ўйнашибди. Ҳаммасидан ҳам тарихий ҳақиқат холис ифодалантани ва Бобур, бобурийларга бўлган ҳайриҳоҳлик, ҳурмат ва эҳтиром бизни мамнун қилди.

Бу Покистон кино ижодкорлари томонидан ишланган икки қисмли видеофильмнинг иккинчи қисми экан. Ошхонадан чиқибоқ дўконга бориб, юқоридалаги видео фильм кассетасини сотиб олдик. Ҳаммамизнинг, айниқса Зокиржон aka хурсандчилигининг чеки йўқ, эди.

Саҳидод бизни «Шоҳ қалъя»га бошлади. «Покистон ёдгорлиги» деб аталмиш кўкка бўй чўзиб турган улкан ва юксак минора яқинидан ўтдик. Минора атрофидағи жуда катта ҳудуд—ям-яшил майсазорли бўлак-бўлак майдонлар спорт мусобақалари ва машгулотлари учун мўлжалланган бўлиб, айни вақтда ҳам турли хил кийимдаги ёшлар, спорт ишқибозлари, ўйничилар билан гавжум эди.

Ҳукмдорлар алмасиб, эътиқодлар ўзгариб туриши, табиий оғат ва табиий емирилиш-нурашлар, бошқа сабаблар оқибатида тарихий шаҳарлардаги обидалар, кўхна биноларнинг айримлари бутунлай вайрон бўлади ё кўрки-тароватини йўқотади. Лоҳурнинг қадимий шаҳарлиги ва бобурийларга севимли макон бўлганлигидан шоҳидлик бериб турувчи «Шоҳ қалъя» ана

шундай қисматни бошидан кечирган машхур обидалардан бири. Катта майдон қамровида бунёд этилган бу шоҳлар қароргоҳи ниҳоятда мустаҳкам қурилган ғиштин нақшли бинолар, боф, хиёбонлар, йўлаклар, сайдроҳларни ўз ичига олган. Қароргоҳ, худудининг таҳминан қоқ марказида олди кун юришга қараган бир бино турибди: икки қаватли, олди айвонли. Иккинчи қават айвони шоҳ, ҳалқни, арзгўйларни (улар ерда туришган) қабул қилиб, уларнинг дардини тинглайдиган маҳсус жой бўлган... Кўз олдимга ичкаридан зарбоф тўнларда салобат ва виқор билан чиқиб келган шоҳ, пастда-майдонда унинг юзига ва сўзига маҳтал бўлиб турган оломон келди.

Бинонинг олди томонидаги кенггина майдон ям яшил, майнин майсазор эди. (Эҳтимол ўз даврида гулзор-чаманзор бўлгандир).

Мазкур «қабулхона» орқасидаги тўрт тарафи баланд-паст бинолар билан ўралган очиқлик менинг хаёлларимни яна ўтмиш қаърига олиб қочди. Ўртасида фавворалар бўлган ҳовуз, ҳовуз ўртасида эса шоҳ пашшахона тутиб (балки маликаси билан) ётадиган чигиллинг жой...

«Қабулхона»нинг орқа томонида, иккинчи қаватда худди ана шу ҳовузга, ҳовузда навозиш билан, солланиб юрадиган жонон балиқларга қараб ўтириладиган олди очиқ хоналар бор эди.

Қалъа худудида аскарлар парад бўладиган майдонлар, ҳукумат ишлари билан шуғулланишга мўлжалланган маҳсус хоналар бор эди, лекин уларни инглизлар ҳароб қилишган экан. Ҳайриятки, кираверишдаги гумбаз остидан таъмирлаш ишлари бошланибди.

Каромат Алихон «Шоҳ қалъа»нинг шимолий ва гарбий ички деворлари ташқи юзасининг бобурийлар ҳаёти ва жангларини акс эттирувчи расмлар, нақшлар, от пойгалари, филлар жангি, ҳар турли спорт ўйинларини ифодаловчи суратлар билан безатилгани ҳақида завқ-шавқ билан ёзди. Афсуски у манзаралар ҳам ўз охорини, асл рангини йўқотган эди.

Қайтишда китоб дўқонларини айландик. Зокиржон aka Бобур ва бобурийларга алоқадор қандай китоб бўлса, неча пул бўлса ҳам оламиз, диққат билан қаранглар, деб кўрсатма берди. Дарҳақиқат китоблар жуда сифатли ва ўта қиммат эди. Масалан, ўртача бир китоб 150—200 рупий, 1000 рупийдан ошиқроқقا бобурийлар салтанати ҳақидаги китобни сотиб олдик.

Кейин «Хоруд» майдонидаги кассета дўйконларига кирдик. Ёпирай! Ашула, бадий фильмлар ёзилган кассеталар ғарам-ғарам бўлиб ётибди. Деворларда очик жой йўқ: ҳаммаёққа актрисалар, сохибжамол қизларнинг суратлари ёпиширилиб, шифтларга ҳам осиб ташланган.

Видеомагнитофонни кўрдик. Фақат кўрсатадигани 200, ёзиб, ўраб, кўрсатадигани 300 АҚШ долларидан ошиқ экан. Асил японларники, деб ташвиқ қилишяпти дўйондорлар.

Кун ҳам кечкириб қолган эди. Саҳидод бизни уйларига бошлади. Нихоятда қуюқ меҳмон қилишди. Лоҳўр патирлари (бизнинг қатламадан сал қалинрок), товуқ шўрва. Покистоннинг узун гуручидан дамланган, сабзиси деярли йўқ, аммо сергўшт, картошкали палов... Ҳар хил салат, мевалар... Чунончи: банан, манго... Айниқса, мангоси жуда ширин экан. Сайфиддин ҳожи ака ўзидан ё уруғидан олиб кетсан бўларкан, девди, сизларнинг шароитингизда ўсмайди, факат Ҳиндистонда ва Покистонда ўсади холос, дейишиди.

Овқатдан кейин янги мустақил давлат — Ўзбекистон, унинг ҳозирги аҳволи, келажаги ҳақида, Афғонистондаги ҳолат, у ердаги ўзбекларнинг Эрон, Покистонга кўплаб қочиб келишаётгани ва бошқа мавзуларда сухбатлашиб ўтиридик. Дарвоқе, даврада Саҳидодларнинг қариндоши Ҳожи қори Абу Бакр деган ўрта яшарли киши ҳам бор эди. У гапга чечан, маҳмадонагина экан, гурунгни қизитди.

Шу кеча «Шохтож» меҳмонхонасида сув-сув бўлиб тунадик.

ИШҚ ГИРДОБИДА ҚОЛГАН МАЛИКА

5 август, пайшанба.

Соат бешларда турдик. Кеча «Шоҳ қалъа» музейи ходимларидан бири билан Анорбоғдаги ёдгорликларни зиёрат қилишни келишган эдик. Абдужалилнинг қайноғаси Муҳаммад Шафиқ ҳам бизга ҳамроҳ бўлди.

Шаҳардан чиқаверишда Лови дарёсидан ва шаҳар дарвозасидан ўтдик. Йўлдаги атрофи сим тўр билан ўралган боғ-майдонда саҳарлаб хоккей (дарвоқе, бу мусобақа турини бобурийлар даврида «Човгон» денилган) ўйнашаётганларни кўриб тасанно айтдик.

Маълумки, бобурийлар ҳаёти ва фаолияти ҳақида шарқ ва ғарб олимлари, тарихчилари, адибларининг илмий-тарихий, бадиий тадқиқотлари, асарлари кўп ва баъзан уларда бир-бирига зидроқ маълумотлар, тафси-лотлар, далил ва рақамлар ҳам учраб туради. Жумла-дан, бобурий шоҳларнинг тўртингчиси Жаҳонгирнинг Нур Жаҳон (Меҳринисо бегим)га уйланиши борасида шундай хилма-хиллик бор. Аввало Меҳринисо бегим-нинг биринчи эри Аликулибек тахаллуси бир манбада Шер Афғон дейилса, иккincinnисида Шерафкан, яна бош-қасида Шеровган деб юритилади. Унинг Бенгал ҳокими Қутбиддин билан ҳар иккисининг ўлимига сабаб бўлган ўзаро низолари ҳам турлича изоҳланади.

Тарихий маълумотларга қараганда, Жаҳонгирнинг сultonlik даври ҳам бобурийлар салтанатидагина эмас, балки Ҳиндистон мамлакати тарихида муҳим ўрин ту-тади. У ўз давлати сарҳадини анча кенгайтиришга эри-шади, отаси Акбар давридан қолган, хусусан мусул-монларга номақбул бўлган айрим урф-одатларни ман этади, айни вақтда мусулмонлар билан ҳинҷдар ора-сидаги ўзаро низоларга ҳийла барҳам беришга эри-шади, ўз тузуклари, яъни тартиботларини эълон қила-ди. Юртда адолатни мустаҳкамлашни шоҳнинг асосий бурчларидан бири деб билади ва шунга ҳаракат қила-ди, аёллар, қизларга ношаърий ва зўравонлик билан эришмоқчи бўлган ўз амирлари, амирзодаларни са-зойи қилиб, шармсор этади.

Жаҳонгир шеъриятга, санъатга мойил бўлгани учун санъат, илмни ривожлантиришга алоҳида эътибор бе-ради, бу масалалар билан шахсан ўзи шуғулланади.

Жаҳонгир даврида Ҳиндистон хукуматининг ғарб давлатлари (хусусан, Англия, Португалия, Голландия) билан савдо-сотиқ алоқалари кучаяди, лекин афсуски, мана шу алоқалар кейинчалик, секин-аста инглизларнинг Ҳиндистон ичига чуқурроқ кириб олиши, унинг марказида мустаҳкамланиши ва ниҳоят давлатни эгал-лашларигача олиб боради.

Жаҳонгир Акбаршоҳнинг тилаб олган ўғли эди. Маълумки, Акбарнинг дастлаб кўрган бир неча фар-занди болалигидаёқ, нобуд бўлиб кетишади. Шундан кейин Акбар Агра яқинидаги Фотеҳпур Секри шаҳ-рининг кўзга кўринган уламоларидан бири Шайх Са-лим Чештийга ихлос қилиб, унга Оллоҳдан ўғил тилаб беришни сўрайди. Салим Чештийнинг дуоларию Ол-лоҳга илтижолари сабабми, хуллас, Акбарнинг хоти-

ни, Жайпур маликаси Марямуз-замон 1569 йили ўғил туғади ва унга шайхга миннатдорлик ва ихлос рамзи сифатида Мұҳаммад Салим деб исм қўядилар.

Салим укалари Мурод ва Дониёл вафот эттакч, 1605 йили 3 ноябр куни осонгина отаси Акбарнинг таҳтига ўтиради ва ўзини «Нуриддин Мұҳаммад Жаҳонгир подшоҳи Фозий» деб эълон қиласди. Лекин ўғли Ҳисрав ва бошқалар билан тож-тахт талашишлар натижасида анча кўнгилсиз воқеалар бўлиб ўтади. Чунончи: Л. П. Шарманинг ёзишича, 1607 йили Жаҳонгир Кобулдан Лоҳургта кетаётганда унга суиқасд уюштирилади. Бу ишда ўғли Хисравнинг қўли борлигини аниқлаган Жаҳонгир ўз ўғли кўзларига нил тортириди, бироқ, кейинчалик, ота—ота-да, Хисравнинг бир кўзини даволатишга эришади.

Салим-Жаҳонгирнинг хотинлари кўп бўлган. Биринчи хотини жайпурлик Рожа Бхагван Дағнинг қизи Ман Бай бўлиб, у Салимнинг катта ўғли Хисравнинг онаси эди. Иккинчи хотини Рожа Удай Сингхнинг қизи Жагат Гўсай (Жода Бай) — шаҳзода Хуррам (Шоҳ — Жаҳон)нинг онаси. Соҳибжамол Бегимдан туғилган ўғил Парвез эди. Тўртинчи ўғли Шаҳриёрнинг онаси эса канизак бўлган.

Лекин Жаҳонгир ҳамма хотинларидан кўра Мехринисо бегимни ортиқроқ яхши кўрган, унга ишонган; суюнган. Бундай бўлишига, албатта, маълум асослар бор эди. Ўрта асрлар тарихида Нур Жаҳончалик ишқ-муҳаббат гирдобида қолган аёл бўлмаса керак, — деб ёзади доктор Бени Прасад, — Жаҳонгирнинг ҳукмронлик даврида энг кўп диққатни жалб этган воқеа — унинг Нур Жаҳонга уйланиши бўлди. У шоҳ, бўлган ўн беш йил давомида Нур Жаҳон бобурийлар салтанатининг энг жозибадор ва қудратли ҳукмдори бўлиб келди. Маълумки, Нур Жаҳон ўттиз тўрт ёшида Жаҳонгирга турмушга чиқади. Шу ёшида ҳам у ниҳоятда гўзал аёл эди, — дейди бобурийшунос тадқиқотчи Л. Шарма. Бундан ташқари, Нур Жаҳон маълумотли, яхши тарбия кўрган, маданиятли аёл бўлиб, шеърият, мусиқа ва тасвирий санъатни яхши кўрар эди. У форсийда «Махфий» таҳаллуси билан ғазаллар битар эди. У жуда ақлли, доно аёл бўлган. Янги бичимдаги кийимлар ва янгича хашамларни жорий қиласди. Унинг маъмурий ишларга ҳам қобилияти, уқуви яхши бўлиб, жиiddий муаммоларни ҳал этишда шоҳга маслаҳатгўй ва кўмақдош эди. Жасур, серғайрат, оли-

жаноб, тақводор аёл бўлган Нур Жаҳон бева-бечо-
раларга, камбағалларга, илм аҳлига доимо ғамхўрлик
қилиб юрган.

Нур Жаҳон эри Жаҳонгирнинг кучли севгисига
оташин муҳаббат ва садоқат билан жавоб берган. Шоҳ-
нинг ичкиликка берилиб кетишидан кўп вақт сақлаш-
га эришган. Кейинчалик, Жаҳонгирнинг соғлиғи за-
ифлашиб қолганда, давлатни идора қилиш ишларига
фаол аралаша бошлайди. Давлат аҳамиятига эга бўлган
ҳар қандай қарор ва фармон Нур Жаҳон иштироки,
розилиги билан қабул қилинадиган бўлади. Бироқ, Нур
Жаҳоннинг давлат ишларига, сиёсатга аралашуви жид-
дий оқибатларга, бир неча марта Жаҳонгир ҳукума-
тига қарши исёnlар кўтарилишига, бобурийлар сал-
танатининг кучсизланишига, обрўсига жиддий пугур
етишига ҳам сабаб бўлади. Чунки у ҳам барча подшо-
ларнинг хотинлари каби табиий равишда тож-тахт та-
лашишларда ўз тарафини кўзлаб, ўз мавқеидан фой-
даланишга ҳаракат қилган.

Шунга қарамай, Жаҳонгир юртда кўп ободончи-
лик ишларини амалга оширади, катта-катта қурилиш-
лар, боғлар барпо қилади. Жумладан, Лоҳўрдаги,
«Анор гули» мақбарасини ҳам Жаҳонгир курдирган.

Афсуски, «Анор гули» мақбараси ҳам, Жаҳонгир
ва Нур Жаҳон мақбаралари қад кўтарган «Чор ча-
ман» деган гўзал боғ ҳам — бу ерни Шоҳ Дара (ма-
ҳаллий шевада «Шадара») ҳам дейишаркан — ўз
оҳорини йўқотган эди. Албаттга, вақт шундай бир бе-
шафқат нарсаки, унинг олдида ҳеч нарса боқий эмас,
у ҳар қандай мустаҳкам бинони емиради, ҳар қанча
гўзалликни ҳам юрат қилади.

Шоҳ Жаҳонгир Ҳиндистоннинг гўзал Кашмир
воҳасини ниҳоятда яхши кўрган. Ёши ўтиб, сало-
матлиги заифлашган ва тож-тахт ташвишларидан зе-
риккан Султон тез-тез Кашмирга бориб кўнгил ёзиб
қайтарди. Навбатдаги Кашмир сафаридан қайтиб ке-
лаётib 1627 йили, .58 ёшида, йўлда вафот этади. Уни
Лоҳўрдаги Нур Жаҳон томонидан барпо қилдирил-
ган Дилқушо боғига дафн этадилар. Кейинчалик,
қабр тепасига Шоҳ Жаҳон томонидан мақбара
қурилади.

Жаҳонгир мақбараси бир замонлар «ноёб гўзал-
лик намунаси», «Ҳиндистоннинг Тож Маҳал ва Қут-
биiddin Ойбак мақбарасидан кейинги энг гўзал, «улуг-
ворлик намунаси» деб эътироф этилган.

Жумладан доктор Каромат Алихон уни шундай таърифлайди: «...Бу мақбара қизил ва оқ мармардан Султон Шоҳ Жаҳон томонидан қурилган. Бу боғ тенг ўн олти бўлакка бўлинган бўлиб, бир-биридан чиройли йўлаклар, ям-яшил гуллар ҳамда сержил сув отадиган фавворалар билан ажралиб турган. Бу ёдгорлик ўз гўзаллиги билан бобурийлар қурдирган меъморчиллик намуналари орасида Аградаги Тож Маҳал мақбара расидан кейин туради... Қабр жойлашган хона гўзаллиги кишини ҳайратга солади: хонақо деворлари соф мармардан ишланган. Қабр тошига Оллоҳнинг 99 хил аломатлари ўйиб ишланган. Тўрт йўлакнинг ҳар бири охири қабрга олиб боради. Бу мақбара Лоҳўр ва бобурийлар меъморчилигининг инжуси ҳисобланади ва қиммати 1 миллион рупийни ташкил этади...»

Афсуски, биз буни сезмадик. Тўгри, ҳудудда умуман боғ тахлити бор, тўғрироғи, қачонлардир чаман-боғ бўлганлигини тахмин қилиш мумкин. Мақбаралар ҳам жойида турибди. Пастки, ер ости қаватида даҳма-қабрлар бор. Лекин... мақбаранинг ташқи деворлари анча эскирган, нураган, мармар ўз асил жилосини йўқотиб, хиракашган. Шунга қарамай, мақбара ичи, сағана тошлари хийла дуруст сақланган. Бироқ мақбара ичи қоронғи эди. Тўлқин ақа билан Фарруҳ тасвирга олиш учун анча азият чекишиди. Мақбара қоровулидан илтимос қилган эдик, қўшимча чироқ ташкил этишга ёрдам берди.

Жаҳонгир мақбара сидан нарироқда унинг суюкли хотини, маслаҳатгўйи Нур Жаҳон мақбараси бор. «...Бобурийлар меъморчилигининг ёрқин намуналаридан бири малика Нур Жаҳон мақбара сидир, — деб ёзади Каромат Алихон. — Нур Жаҳон ўз даврининг энг гўзал аёлларидан бўлиб, унинг ҳусни-жамоли олдида хукмдор ўз салтанатидан кечишга тайёр эди...»

Нур Жаҳоннинг отаси Мирзо Фиёсбек сарой амалдорларидан бўлиб, Эрон шоҳи Тахмасп саройида Язд қалъаси доругаси бўлиб хизмат қилган. Кейинчалик, мамлакатда сиёсий вазият ўзгариб кетиб, Мирзо Фиёсбек анча мусибатли кунларни бошдан кечиради ва икки ўғли, бир қизи билан паноҳ, излаб Ҳиндистонга йўл олади. 1577 йили Қандаҳорга келганда Мехринисо туғилади. Мирзо Фиёсбек Акбаршоҳ хизматига қабул қилинади. 1594 йили Мехринисо Алиқулибекка турмушга чиқади. Бу борада ҳам турли фикрлар мавжуд. Бир олим Салим Мехринисога қизлигидәёқ ошиқи

бекарор бўлиб қолганди, деса, иккинчи бобурийшунос Мехринисо эри ўлиб, пойтахтга қайтиб келганидан кейин Жаҳонгир уни яхши кўриб қолади, деган мулоҳазани билдиради. Хуллас, кенгроқ тарқалган маълумотларга кўра, ёшлар орасидаги ишқий муносабатларни сезиб қолган Акбаршоҳ Мехринисони ўғли Жаҳонгирдан узоқлаштириш мақсадида сарой аъёнаридан бири бўлган Алиқулибекқа зудлик билан турмушга чиқариб, уларни Бенгалияга хизматга жўнатиб юборади.

Л. П. Шарманинг «Бобурийлар салтанати» асарида айтилишича эса, 1599 йили Алиқулибекнинг бир ўзи қўли билан йўлбарсни ўлдиргани учун Салим унга Шер Афғон номини берган эди. Салим отасига қарши исён кўтарганда у Салим хизматидан қочиб, Акбаршоҳ ҳузурига борган эди. Акбаршоҳ вафотидан сўнг Салим тахтни эгаллаб, Шер Афғонни авф этади ва Бенгалияning Бурдван вилоятига жагирдор (ер-мулк посбони) этиб тайинлади. Бундан ранжиган Шер Афғон маҳаллий афғонлар исёнини бостириш ишига соvuқонлик билан қарайди. 1606 йили Ман Сингх ўрнига Қутбидин Рожа Бенгалияга ҳоким қилиб тайинланади. Қутбидин Шер Афғонни унча менсимайди, аксинча, ҳузурига чақириб, унга шоҳга садоқат билан хизмат қилмаяпсан, дегандай писанда қилади. Буни ўзи учун ҳақорат деб билган Шер Афғон қилич билан Қутбидинни чопиб ташлайди. Қутбидиннинг хизматчилари Шер Афғонни чопиб ўлдиришади. Шер Афғоннинг хотини Мехринисо ва қизи Лодди бегим пойтахт Аграга маҳбус сифатида юборилади. Мехринисо Акбаршоҳнинг беваси Салима бегим хизматига қўйилади. Жаҳонгир 1611 йили март ойида, Наврӯз кунларидан бирида Мехринисони тасодифан кўриб, ишқи тушиб қолади ва ўша йилиёқ унга уйланади.

Мехринисо ўзининг соҳибжамоллиги, оқила, тадбиркорлиги ва бошқа ажойиб фазилатлари билан тез орада саройда иззат-ҳурмат топади. Жаҳонгирнинг ўзи эса дилбар хотинини қаттиқ яхши кўрарди. Шунинг учун Мехринисони Нур Маҳал (сарой нури), кейинчалик Нур Жаҳон (жаҳонга нур берувчи) бегим деб атаб, гоҳида давлат ишларини ҳам унга топшириб қўйиб, ўзи ичкилик, кайфи сафога берилади.

Жаҳонгир ва Нур Жаҳон ўргасидаги муносабат ўша пайтда бўлгани каби, кейинги даврларда, ҳозир ҳам кўпчиликни жуда қизиқтиради. Ҳамма бу ошиқу

шайдолик билан боғлиқ воқеа-ҳодисаларнинг аслини билишга ҳаракат қиласи. Чунки, Шер Афғоннинг ўлими ва Жаҳонгирнинг Мехринисога уйланиши ҳақида ҳатто, ҳиндистонлик тарихчиларнинг ўзлари ҳам турлича фикрга эга. Баъзилар Жаҳонгир Мехринисони биринчи марта Бенгалиядан қайтиб келганидан кейин кўрган, эри Шер Афғоннинг ўлимига Жаҳонгирнинг алоқаси йўқ, деган тахминни айтса, бошқалар Жаҳонгир Мехринисони илгаридан яхши кўрган, лекин Акбаршоҳ уларнинг турмуш қуришини хоҳламаган, шунинг учун Жаҳонгир отасининг ўлимидан кейин орзусига эришмоқчи бўлган, яъни Шер Афғоннинг ўлимида унинг қўли бор, деган мулоҳазани баён қиласидилар.

Ҳарқалай, Нур Жаҳонбегим бобурийлар салтанатида анчагина катта нуфузга ва мавқега эга бўлган, ўзининг бир қатор яхши ишлари билан тарихда қолган фаол аёллардан бири. Бинобарин, унинг мақбараси ҳам ҳаётлигида иззат-обрўйига яраша бўлган (Нур Жаҳон 1645 йили 68 ёшида вафот этади ва Дилкушо боғидаги ўзи ҳаётлигида қурдира бошлаган мақбара дафи этилган). Унинг мақбараси, — деб ёзди Каромат Алихон, — эри Жаҳонгир ва акаси Асиф Жах (бу исм баъзи ўзбекча татқиқотларда Осафхон дейилади) мақбара ларининг ғарб томонида қад кўтарган. Бу мақбара «Чор чаман» деб аталган, ҳар бири 100 ярд (10 гектар) майдонни эгаллаган тўртта боғнинг ўргасида жойлашган бўлиб, бино оқ, жилокор мармарлардан ишланган, унга муқаддас Қуръондан оятлар ўйиб ёзилган. Шундай безаклари билан эри ва акасининг мақбара ларидан қолишмас эди. Ҳозир бу безаклардан асар ҳам қолмаган, фақат фиштдан қурилган мақбара турибди холос. Сикхлар Нур Жаҳон ва унинг қизи Лоди бегим қабри тошларини ҳам кўчириб олиб кетишган.

Мақбара ларнинг ён атрофлари қаровсиз қолган боғни эслатарди. (Дарвоқе, боғ ёнида катта қазиш ишлари бормоқда эди). Бир-иккита пипал, ўртача бир ҳовлига соя соладиган, тарвақайлаган баниян дараҳтларини ҳисобга олмаганда бошқа мевали ё манзарали дараҳт жуда кам эди. Бир чиройли дараҳтгул бор экан: оқ-сарик, ўзимиздаги шом пайтида чирсиллаб очиладиган гулга ўхшаш. Афсуски унинг номини сўраб ҳам билолмадим.

Барги узун-узун қамишсимон палманинг танасини нақ бўяб қўйилган столба дейсиз.

Бобурийлар барпо қилган боғлар ичида энг машҳурлари учтадир, дейилади манбаларда. «Шалимар», яъни «Севги маскани» деб аталган мазкур уч боғнинг бири Жаҳонгир, иккитаси Шоҳ Жаҳон раҳномалигида бунёд бўлган. Улар Шринагар (Кашмир)да, Дехдида ва Лоҳўрда...

«...Боғ ичида пештоқли айвонлар, арклар қуриш, боғ ичидан анҳорлар ўтказиш фикри тарихда «қурувчи шоҳ» номини олган Шоҳ Жаҳоннинг ихтироси эди», — деб ёзади Каромат Алихон.

Афсуски биз Лоҳўрда ана шундай боғни кўрмадик...

МОЗИЙГА НАЗАР. АРМОНЛАРИМ

Собиқ Дилкушо боғидан тўғри Лоҳўр миллий мозийгоҳига келдик. Шу ерда бир нарса менинг эътиборимни жалб этди: катта кўчаларнинг икки бетидаги йўлакларга гул, манзарали дараҳт кўчатлари ўтқазилиб, тўрт бурчак темир панжара билан ихота қилиб қўйилибди. Баъзи жойларда темир-панжара ўрнига пишиқ фиштни катақ-катақ қилиб териб қўйилган. Шу ҳолича, худди гул-соатдай, тураверганига ҳайрон қолдим. Бирор беҳос тегиб кетса бузилиб тушади. Нима бу ерда шўх, шумтака болалар йўқмикин?..

Қизил рангли фиштдан Покистон миллий меъморчилик услубида қурилган уч қаватли мозийгоҳнинг ичидаги ашёлар ҳам ташқи савлатига мос даражада бой эди. Xоналар кўп ва айниқса биринчи қаватдаги зал ниҳоятда кенг бўлиб, ашёлар Лоҳўр ё Покистон тарихидангина эмас, балки яқин-атрофдаги шарқ мамлакатлари халқларининг ўтмиши, маданияти, санъати ва бошқа соҳалардан ҳам ҳикоя қиласи. Тартиб ва дид билан жойланган тарихий, ноёб ашёларни кўриб кўзингиз яшнайди, фикрингиз бойийди. Турли тарихий, бадий асарларнинг қўлёзмалари, миниатюра санъати мактабларининг ранг-баранг намуналари. Бобур замонидан қолган нақшли эшиклар, тарихий анжомлар, гул солинган мармар идишлар, араб алифбосидаги ҳусниҳат намуналари, қурол-аслаҳалар (қилич, ўқ-ёй, камон)нинг хилма-хил турлари, кулхари (жант болтаси), ханжар, пичоқ, совутлар... Ойна-нақшли нафис буюмлар, шахмат, идиш-товоқ, сопол лаган, коса, гулдон, кўзалар... Турли халқларнинг турли даврларига оид кийим-либослари... Бир-биридан гаройиб чолғу

асбоблари: сетор, товус, саранги, вина, банери (най), рубоб... Эҳ-хе, нималар йўқ дейсиз бу мозийгоҳда. Лекин биз учун энг муҳими Бобур ва бобурийлар давридан ёдгорлик бўлган кийимлар, миниатюра суратлари, тангалар ва бошқа анжомларнинг мозийгоҳнинг марказий жойларидан ўрин олганлиги эди. Бу нарсалар, афсуски, ҳали Бобурнинг ўз ватанида йўқ...

Ашёларни томоша қилиб бўлганимиздан кейин музей директори, тарихчи олим Сайфур Раҳмон (бизнинг тарихчимиз Сайфиддин aka у билан таниш экан, исмлари ҳам уйқаш) ўз хонасига таклиф этиб, муздай ичимлик ва чой билан сийлади. Шу ерда бобурийлар, экспедициямизнинг мақсад ва вазифалари, мустақил Ўзбекистон мавзуларида сухбат бўлди. Даврада мозийгоҳнинг илмий ходимлари, маҳфий хизмат ходими бор эди. Одатдагидай биз Бобурнинг (ўзбек) эканлигини айтдик. Музей илмий ходими Рафиқ Дўга фикримизни маъқуллади ва кеча Покистон телевидиние-сидағи маҳсус кўрсатувда ҳам Бобурнинг ўзбеклигини таъкидладилар, умуман, Лоҳурда Бобурни ўзбек дейдилар, деди. Сайфур Раҳмон экспедициямиз режаларини маъқуллади, бундай илмий сафарни биринчи марта кўраёттанини эътироф этди.

— Лоҳурда яъни бобурийлар даврида қурилган тарихий обидалар кўп, — деди у. — Бобурийларга бағишиланган манбалар ҳам кўп, лекин уларнинг тарихи, кимлиги билан маҳсус шуғулланадиганлар кам, жуда кам. Бу қамчилик бизнинг мозийгоҳимизга ҳам тааллуқди. Кейин, маълумотлар ҳам ҳар хил бўлиб кетган. Албатта, шоҳлар тарихини кимdir дўстона, ҳайриҳоҳлик билан, кимdir душманлик, файирлик билан ёзади. Лекин дўст ҳам, душман ҳам билиб-билмай ё атайн хато қилиши, ёлғон ёзиши мумкин. Ҳақиқатни аниқлаб олиш керак, лекин бу анча қийин йиш...

— Покистонда Бобур авлодларидан қолмаганмикин, ахир улар Лоҳурда қўним топиб, узоқ йиллар яшашган, ҳукмдорлик қилишган-ку, — деда савол бердик.

— Жалолиддин Ақбар деган одам ўзини Бобур авлодиданман дер экан, лекин анигини билмадим, — деда тан одди олим.

Менда, (балки экспедиция аъзоларнинг аксариятида ҳам) умид учқунлари пайдо бўлди. Учқундан алантга олдириш ўзимизга боғлиқ эди. Лекин...

Соат ўн иккidan ошганда музейдан чиқиб, шаҳардаги кўркам боғларни томоша айламоққа жўнаш ол-

дидан «Тош қўрғон» ёдгорлигини зиёрат қилдик. Покистоннинг ҳақиқий ислом мамлакати эканлигини ифода этувчи далиллардан бири бўлган бу ёдгорлик шахарнинг қоқ марказида, хукумат биносининг рўпарасидаги чиройли хиёбонда, катта кўча бўйида бўлиб, у атрофи очиқ мўъжазгина шийпонча ичига қўйилган муқаддас «Қуръон» китобининг тош «ҳайкали» эди:

Шу ердалигимизда ҳаво айниброқ қолувди. Ҳайвонат боғи томон йўл олганимизда ёмғир томчилаб туриб, бирдан шаррос қуийб юборса бўладими. Фаррухнинг оғзи қулоғидан ҳам ўтиб кетди. Покистон ҳудудига ўтганимиздан бошлаб, йўл-йўлакай бир муссон ёғсайди, деб келувди. Муссон бўлмаса, бизга шунисиям бўлаверади, ош пишгунча чучвара, деб шиддатли ёмғир пайтидаги Лоҳўр манзараларини роса тасвирга олди.

Ёмғир ўн беш дақиқача ёғди, лекин қаттиқ ёғди. Ҳайвонот боғи ҳам қолди. Мен-ку шундай жалада ҳам боғни, ундаги ажойиб дов-дараҳтлар, турли жониворларни томоша қилишга тайёр эдим, лекин тушлик фамидаги шерикларимиз тезроқ меҳмонхонага етиб олишни афзал билишди. Боғни кўриш мен учун ширин бир армон бўлиб қолаверди.

Лоҳўрлик ўзбек танишларимизнинг яшаш жойлари ҳам, дўкони ҳам икки қаватли бинонинг ичida—бир ерда эди. Ўша жойда Муҳаммад Шафиқ ёрдамида шўрва қилдик (кечаги меҳмондорчиликка жавобан).

Кейин бўш вақт берилди. Зокиржон Машрабов билан Тўлқин ака кечаги «Шоҳ қалъа»ни суратга олиш ва машинани устага кўрсатиш учун кетишиди. Менга бундай бўш вақтдан кўра лоақал шаҳарнинг кўча, боғларини айланиш яхши эди, лекин шерик бўлмади. Аҳмаджон билан Фаррух телевизор кўрамиз, кир ювамиз деб, хоналарига кириб кетишиди.

Биз Собиржон ака билан «Шоҳтож» меҳмонхонасининг 102-хонасида эдик. Хонанинг на деразаси ва на тирқиши бор эди. Телевизор кўриб ётишдан бошқа чора йўқ. Лоҳўр телевидениесида асосан ҳинд фильмлари ва кўрсатувлари намойиш этиларкан. Тилига тушунмагач, телевизорнинг ҳам унча қизиғи бўлмайди. Собиржон ака уйқуда. Мен шаҳарда кўрганларимни ўйлаб ётдим. Кечадан бери шундай хуносага келдимки, новвот ранг сари Покистон аёлларига жуда ярашаркан. Хотин-қизларнинг кўзойнак таққани кўп

эди. Лекин уларнинг аксарияти эронликлар экан. Юзини қора чодра билан тўсиб олган аёлларнинг кўзлари чақнаб кўринарди. Бироқ катта ёшдаги аёлларнинг очиқ юзлари унча тиниқ эмасдай туюлади. Аксарият қизлар хипча эди, катта аёлларнинг анча шаддодлиги уларнинг одамга дадил қарashi ва шўх кулишидан сезилиб турибди.

Ҳа, дарвоқе, йўлда бу юртда қўй сероб экан, деб ўйловдим. Бунинг сабаби: қўй гўшти ейишмас экан, асосан эчки гўштини истеъмол қилишаркан. Қўйни қурбонлик учунгина сўйишаркан. Бугун тушдаги шўрванинг гўшти эчкини эканлигини Муҳаммад Шафиқ соддалик қилиб, тўғрироғи бизнинг мижозимизни, гўшт масаласидаги таомилимизни билмасдан айтиб қўйган эди, бирпастдан кейин Зокиржон ака билан Фаррухнинг қорни оғриб қолди.

Лоҳўр қассобларининг (бошқа шаҳарда қандай экан, билмадим) гўшт сотиш тартиблари менга унча маъқул бўлмади. Улар дўкон орқасида, ерда ўтириб олишиб, гўшти оёқ панжалари билан қисиб туриб кесишаркан.

Гўштнинг нархи 34 рупий экан. Қатиқ — 10, тухум — 1,5, булочка 2 рупий 16 пул. Зира анча қиммат—килоси 150 рупий эди. Бизда нарх-наво ва пул биз сафарга жўнаётганимизда кун сайин ўзгариб, ошиб бормокда эди. Шунинг учун бошқа жойлардаги нарх-навонинг ўзимизда қанчага тўғри келишини ҳисоблаб чиқариш қийин эди. Масалан Кветтада 50 граммлик Исфахон кўк чойини 5 рупийдан сотиб олдик. 300 граммлик шиша-лардаги салқин ичимликлар ҳам 5—6 рупий атрофида бўлиб, булар бизга анча қиммат туюлди.

Саҳидодларнинг дўкони ёнида бир оқсоқол билан гаплашиб қолдик. Ислим Ҳожи Бекзода бўлиб, туркман экан. Бу ерга Афғонистоннинг Анхай (Ашхободга яқин) жойидан кўчиб келган экан. Етмиш беш ёшга кирибди, учта хотиним бор, дейди. Тап тортмайдиган, чапанироқ ва ҳазилкашроқ одамга ўхшаб турибди, гаплари ҳам кескир, дадил, сўкирнамо... Унинг айтишича, Лоҳўрда йигирматага етар-етмас ўзбек хонадони бор экан холос, маҳаллий халқ вакиллари билан деярли қудачилик қилишмас экан...

Мен негадир уларга ачиндим. Тақдирни қаранг, ўн беш-йигирма оилани минглаб чақирим наридаги юртдан шу ёқларга олиб келиб ташлабди. Тўғри, савдо ишлари дуруст, демакки, молиявий-иктисодий аҳвол-

лари ҳам ёмон эмас. Лекин гап фақат шундами?.. Яна ким билсин, дунёда бунақа ҳодисалар кўп-ку... Балки шунинг учун ҳам «тақдир» дейилар...

Кечки пайт Тўлқин ака, Аҳмаджон, Фаррухлар билан шаҳар айланганӣ чиқдик. Мотоцикл, машина, пойафзал, газламанинг қатор расталари ва дўконлардан иборат кўчаларни айланиб зериқдик. Юриш қийин: кўчалар тор, қатнов кўп ва тартибсиз; машина, мотоцикллар чинқириб келаверади, велосипедилар, пиёдалар кўз очирмайди. Дўконларда мол-дунё бисёр, харидор билан тўла. Бир нарса олиш нияти бўлмагандан кейин бисёр нарсаларнинг ҳам қизиги йўқ...

Ёмғирдан кейин дамлик ва намлик кучайиб, нафас олиш қийинлашиб кетувди, кечқурун сал енгиллаши, лекин ҳаво тоза эмас, чанг кўп.

Меҳмонхонада осма ел ҳайдагич тинмай айланиб тургани учун чидаётса бўлади, лекин душхонанинг эшигини очсангиз, гуп этиб, нафасингизни қайтаради...

6 август, жума.

Кеча оқшом Жалолиддин Акбарнинг уйига қўнғироқ қилиб ололмадик. Бугун эрталаб ҳамма ишни ийғишистириб қўйиб ўша одамни исташга қарор қилинган эди. Кўнғироқ қилиб кўрилди, яна ҳеч ким олмади. Эҳтимол, телефони ишламаётгандир. Манзили номаълум. Сайфур Раҳмон ҳам тополмади. Бунинг устига эрталабда яна озгина дилхиралик бўлди. Маъмуризмизнинг фирофи ошяпти. Ниҳоятда камгар, камсуқум бу кимсанинг оғзидан шунча кун ичида уч-тўртта дурустрок, тўлароқ жумла чиққанини эшитмадим. Тунд бащарасию йўлда ҳайдовчи ва аравакашлардан жаҳли чиққанда ишлатадиган «бенарва» деган иборасини ҳисобга олмаганда одамнинг эсида, кўз олдида қоладиган тузукроқ жиҳати ҳам йўққа ўхшарди. Лекин хотини касаллиги учун гап кўнглига сифмаганиданми ё биз унинг таъбига унча тўғри келмаганимиз учунми, бояқишининг қорни дам бўлиб кетган экан, кечқурун Аҳмаджон билан бир соатдан ортиқ гаплашибди. Биздан шикоят қилибди. Мўлжалдан бир неча кун ортиқ юрдим, шунинг учун менга яна беш минг рупий берасизлар, дебди. Ҳарқалай, овқат емаган эди—ўчакишган экан. Эрталаб яна шу гап бўлди. Бу етмагандай, ўз орамизда ҳам андак дилхиралик бўлиб ўтди. Таржи-

монимиз ўзи ўта маданиятли, нозик таъб зиёли бўлгани учун «бу оддий ишчи экспедиция аъзолари» деган тушунчага кўниқолмаяпти...

Хуллас, соат тўққизларда Ҳиндистон сари, чегара-га жўнавордик. Яна ўтган гал юрган йўлдан—икки қирғоғида гўзal дараҳтлар, дараҳтсимон гуллар яшнаб турган Анҳор ёқалаб бормоқдамиз. Аммо, мен юрагимда иккита армон билан кетяпман. Биринчи-си—бобурийлар авлоди (агар рост бўлса!) Жалолиддин Акбарни тополмаганимиз... Ахир бу биз учун, экспедициямиз учун жуда муҳим янгилик эди-ку, нега дурустроқ шуғулланмадик? Нега кеча тушдан кейин меҳмонхонада бекор ётдик? Ахир Сайфур Раҳмон Жалолиддин Акбарни таниши, уйини билиши мумкин бўлган кишиларни топиб бериши ёки шаҳар адреслар бюроси орқали унинг манзилини аниқлаши мумкин эди-ку. Хўп, Сайфур Раҳмонку бу ишга жиддийроқ бош қотирмагандир, нега энди ўзимиз астойдил киришмадик, Сайфур Раҳмоннинг этагига маҳкам ёпишиб олмадик? Менинг назаримда экспедиция аъзоларида Жалолиддин Акбарнинг Бобур авлоди эканлигига ишонч бўлмади, чоғи. Чунки агар бу гап рост бўлса, шу пайтгача фан, илм аҳлига маълум бўлардику... Лекин барибир Жалолиддин Акбар менинг кўнгдимда армон бўлиб қолди.

Иккинчи армоним — Лоҳўрнинг менга ёққан АлҲамро кўчаси ва ўша кўча ёқалаб кетган катта боғни кўролмаганим. Ҳаёлимда боғнинг ичи ниҳоятда гўзал ва мафтункор манзараларга бойдай туулганди. Айнан ана шу жой учун бошқа жаъми ёқимсизликларни кечиришга ва бобурийлар нафаси, руҳи кезиб юрган бу муazzзам шаҳарга яна келишга рози эдим. Ва яна афсуски, Лоҳўр кўчалари ва хиёбонларига файз ва алоҳида кўрк бағишлиб турган гўзал гуллар, дараҳтларнинг аксарияти номини билиб ололмадим. Бу масала-да менга таржимон ҳам, бизни олиб юрган маъмур ҳам, муҳожир дўстларимиз ҳам, ҳатто маҳаллий ҳалқ вакиллари ҳам ёрдам беришолмади. Агар буларнинг тилини билганимда, ўзим кексалардан, зиёлилардан сўраб-суриштирган бўлардим.

Мана ҳозир чегара-божхона ҳовлисида бошлиқ келишини кутиб ўтирибмиз. Олмахонга ўхшаш, ундан ҳам жажжироқ чипор, жуда чиройли, ёқимтой бир жонивор шитоб ўрмалаб дараҳтларга чиқиб-тушиб юриди. Тераксимон, аммо барглари каттароқ, ёнидан

ўсадиган шохлари тарвайганроқ, дараҳт шоҳидаги лойхўракка ўхшаб кетадиган, боши кичкинагина, тумшуғи ингичка ва узун; оёқлари ҳам узун, бир қараашда жигарранг, бироқ қанотларини ёёса оппоқ бўлиб кўринадиган қушнинг ҳам номини билолмадим. Демак, аслида ўзим ўрта мактабда зоология, ботаника фанларини яхши ўқимаган эканман, ўсимлик, жониворларни — умуман табиат оламини яхши билмас эканман, деган хуросага келдим,

Кутиш азоблари, хавотир изтиробларини тортиб ўтирибмиз. Кун иссиқ. Не баҳтки, бутун бу ерда енгил шабада бўлиб турибди. Танамиз ва жонимиз учча қийналмаяпти.

Шу кунгача 6,5 минг километр йўл босибмиз.

Божхона бошлиғи бизни кундуз соат иккига келинглар, деган эди, биз тўққиз яримдаёқ келиб олдик. Бошлиқ муовини учча рўйхушлик бермай қаршилади бизни. Аҳмаджон: «татьмагирроқ одам шекилли, ўтган куни унга совға бермагандик», деди. Муовин яна ўша кунги гапни такрорлади, яъни, ҳиндлар сизларни машина билан ўтказишмаса керак, деди елкасини қисиб. «Сўраганмиз-ку, керак бўлса, яна сўраймиз», деб раҳбар, таржимон ва маъмур ҳиндларнинг чегара-божхонасига бориб совуқ хабар олиб келишди. Ўша куни навбатда турғанлар алмашибди, янгилари рухсат йўқ, дейишибди. Тарвузимиз қўлтиғимиздан тушиб, ёрилибоқ кетди. Ҳар ким кўнглига келган мулоҳазани айтди. Ўша куни Ҳиндистонга ўтиб кетавермабмиз, Лоҳўрни қайтишда кўраверардик, дедик. Ҳалқимизнинг «отамнинг ўлишини билганимда чакса кепакка сотиб ердим» деган ажойиб мақолини эслашдик. Энди бутун умидимиз бошлиқдан эди. Ахир у Ҳиндистон божхонасига буйруқ беролмайди-ку, деб ўйласак ҳам, негадир ундан најот кутардик.

Нихоят 10 дақиқа кам иккida бошлиқ келди, (унинг исми-шарифи Шавкат Али Шайх эди). У оппоқ узун кўйлак кийиб, чинакам покистонлик жанобларга ўхшаб олган эди. (Дарвоҷе, бугун буларда дам олиш куни эди). Кўришишлар қуюқ бўлди. Яна ўтган кунгидай кока-кола, пепси-колалар билан сийландик. (Ҳатто ташқарига—ўтирган жойимизга олиб келиб беришди).

Бўлган гапни айтган эдик, бошлиқ майли, бир уриниб кўраверинглар-чи, зора омадларинг чопиб, ўтиб кетсанглар деб, ходимларига тезроқ ҳужжатларимизни тайёрлаб беришни буорди.

Ҳа, Бобур ҳам Ҳиндистонга осонлик билан ўтмаган-ку, дея ўзимизга таскин бердик.

Ҳиндистон чегарасига соат уч яримгача қўйишаркан. Покистон божхонаси бошлиғи билан қучоқдашиб хайрлащдик, унга ташаккурлар айтдик.

— Ассалому алайкум, — деб қолди Шавкат Али Шайх. Бу ёқда бу калима кўришганда эмас, хайрлашаётган вактда ишлатиларкан.

Апил-тапил машинага чиқдик. Ҳаммамизниң юракларимиз ҳаяжондан, хавотирдан бесарамжон уради.

Дарвоҷе, садоқатли маъмуrimiz Парвез ҳам елкасидан тоғ қулагандай бўлди шекилли, биз билан тищларининг оқини кўрсатиб видолашди. Сафар давомида биринчи марта унинг чеҳраси туман ичидаги қуёшдай ёришганини кўрдик. Унинг худди шу ҳолати Ҳиротдаги Жумавойимизга сал ўхшаб кетди. Шошилишда унга раҳмат айтдикми, йўқми — эсимда йўқ...

Менинг кўнглимда ҳам Ҳиндистонга етиб боришга умидсизлик бор эди, чунки илгари ҳам икки марта ҳаракат қилишган, лекин турли сабаблар билан чегарадан ўтолмай қайтишган эди....

III қ и с м

СЕҲРАЛИ ҲИНДИСТОН

ЧЕГАРАДА УЧ КЕЧА

6 август, жума.

Соат учдан ўнбеш дақиқа ўтгач Покистон чегарасидан жўнаб, беш дақиқада Ҳиндистон чегарасига етиб бордик. Бизнинг шиддат билан келаётганимизни кўрган посбонлар темир дарвозани ланг очиб юборишиди, лекин дахлсиз ҳудуддан ўтиб, машинамиз фидираги Ҳиндистон заминига теккан пайтда бир нечаси бараварига қўл силкиб тўхтатишиди. Паспорт ва бошқа ҳужжатларимизни қўлма-қўл қилиб, бири олиб, бири қўйиб текшира кетишиди, ўзларича роса муҳокама қилишиди. Улар борган сари кўпайиб боришарди. Ҳақиқий чегарачилардай бизни кўп хуноб қилишиди. Ҳеч юмшай дейишмайди. Айниқса, носранг кийимли (уларнинг кийимлари ҳар хил рангда эди—унвони, мансабига қараб ўзгарса керак), соқол-мўйлови қоп-қора ва кўринишидан қаттиқ, хира қаймоқ ранг салласини (эҳтимол бу ҳам ҳарбий қалпоғидир) қулоғи билан қўшиб ўраб ташлаган жиккаккинаси жуда батарин экан. Ким гапирса ўшанга қараб «йўқ» деган маънода бош-бош қиласади (афтидан унинг айрим шериллари бизнинг ёнимизни олишаётган эди, шекилли).

Бир тўп зобиту аскарлар ўртасида қолган Зокиржон aka аввалига босиқдик билан тушунтиришга ҳарарат қилди. Ҳиндистоннинг Ўзбекистондаги элчихонаси орқали автомашинага рухсат олинганини, шунинг учун ҳам паспортларга машина рақами ёзib қўйилганини айтди. Чегарачилар эса эшитишини ҳам хоҳдашмас, ҳаммаси фақат бош чайқаб, «йўқ, мумкинмас», деган ишорани қилишарди. Шундан кейин Зокиржон aka ошқора «хужум»га ўтди:

— Ўзбекистон билан Ҳиндистон ҳукуматларининг ўзаро дўстлик муносабатларини йўлга қўйиш сиёсатига хилоф иш қиляпсизлар! Премьер министрингизга бораман! БМТга арз қиламан! Нима, сизлар учун

элчингиз Делип Мехта ҳеч ким эмасми?!. Мен унга қўнғироқ қилиб айтаман!..

Зокиржон ака шу қадар куйиб-пишиб, тез гапи-рардики, бечора таржимонимиз Аҳмаджон Қосимов унинг эҳтиросли сўзларини хинҷчага ўгириб улгурмасди.

Ниҳоят, узоқ тортишувдан кейин чегарачилар бош тебратишдан тўхташиб, бир-бирларига қарай бошлишиди. Зокиржон ака янада дадиллашиб: мени бошлиқла-ринг олиб киринглар, деб ғуриб олди.

Машинамиз раҳбарнинг буйруғи билан постдаги-лар ҳай-ҳайлагунча Ҳиндистон ҳудудига бир неча қадам кириб олган, чегарачилар ҳайдовчимизга «ор-қага қайт!» деб буюрар, Зокиржон ака эса «бир қадам ҳам жилмайсиз», деб тайинлаб қўйган эди. Ўшанда Зокиржон аканинг ўрнида бошқа одам бўлганида, яна Ҳиндистонга ўтломай, шалвираб қайтиб келишимиз турган гап эди...

Хуллас Зокиржон ака билан Аҳмаджон Андижон чопонию Шаҳрихон пичоғидан олиб, икки зобит ҳам-роҳлигида бошлиқ ҳузурига кириб кетищи. Бошқа ходимлар бизнинг паспортларимизни рўйхатдан ўтка-зишиб, бир неча жойга қайд этишиди. Кейин биз машиналар турадиган, «ПАРКИНГ» деган ёзув ёпиширилган дараҳт остидаги майдончага қўйилган сават (темир труба ва тасмадан ясалган) курсиларда кутиб ўтиридик.

Биз ҳаяжонда ва мамнун эдик. Нима бўлса ҳам, Ҳиндистон ҳудудига ўтиб олдик-ку, энди ҳайдашса ҳам чиқмаймиз, зўр келса, «Ҳиндистон-таймс» газе-тидан муҳбир чақириб, очлик эълон қиласиз, деб, латифалар билан ўзимизни овутиб ва совутиб ўтиридик. Бир пайт соқоллари ўскан, бундайроқ кийинглан иккита йигит пақир кўтариб ёнимизга келищи. Улар бизга пепси, фантага ўхшаган салқин ичимликлар олиб келишган эди. (Худди Покистон божхонасида гидай. Буларнинг шу одатлари яхши экан. Бизда чиллада ҳам, саратонда ҳам қайноқ чой тутилади). Кўнглимизга анча ёруғлик тушди: хайрият, сийлашларига қараганда мис-риш чопонлар кийдирилиб, Қорасув пичоқлари тақил-ганга ўхшайди...

Биз олтovлон алоҳида, жуфт-жуфт бўлиб ўтиридик. Ҳар ким ўз хаёллари фикр-режалари билан банд. Мен эса атрофни кузатиб, томоша қиласидим. Тан олиш керак, сарҳад ҳудуди кўркли — хиёбон, боф сифат эди: баланд-паст дараҳтлар, гуллар, жониворлар...

Ёқимли, салқин шабада эсяпти. Мана бу ернинг ҳавоси ўзимизнинг водий иқлимини эслатиб юборди. Биз ўтирган майдончага тўқ яшил барглари кўп ва силлиқ, шохлари шажара-шажара бўлиб кетган баланд, кекса ва улкан дараҳтлар соя солиб турарди. Қарға, муттаҳам олақанот ва бошқа қушлар чирқираб юришарди. Бир олақанот қаёқдандир оч яшил рангли тўтини қувиб келди. Тўти тепамиздаги дараҳтнинг бўқоқдай шишиб турган, тешиги пастга қараган ковагига қочиб кириб кетди. Олақанот пастроқдаги шохга кўниб, пойлаб турди-турди-да, учиб кетди. Кавакдан бошини чиқармай кузатиб турган тўти «душман» даф бўлганига ишонч ҳосил қилгач, чиқди-да, майдоннинг нариги четидаги дараҳтга ўтиб кетди.

Покистон божхонаси ҳовлисида кўрганимиз олма-хонсимон жониворлар бу жойда дараҳтда, ерда жуфт-жуфт бўлиб, ҳуркимай-чўчимай, бемалол юришарди. Дарвоҷе, уни бурундуқнинг бир тури, дейишди. Жуда чаққон жонивор экан. Айниқса, жажжи қулоқларини митти оёқчаси билан қашиши торнинг резидай тез эди.

Қушлар чуғур-чуғури борган сари авж ола бошлади. Жуда майда, чимжилоқдай келадиган қора, кулранг қушчаларни (колибранинг бир тури бўлса керак) биринчи марта кўришим эди. Тўтилар bemalol учиб юришибди. Эҳтимол, булар қафасда бокиладиган турларидан эмасдир. Мусича ҳам бор, бироқ сал ихчамроқ, ранги очроқ эди. Бўйни қаймоқ ранг қарғалар ғалат бир салобат билан қанотларини сор каби аста қоқиб учишарди. Олақаноат ўз юртида (биздагиларни зиёнли қурт-ҳашоратни йўқотиш мақсадида шу Ҳиндистондан олишган дейишади. Лекин у ҳам анойи эмас-екан, bemazsa қурт-қумурсқадан кўра ширин узумларни яхшироқ кўраркан. Ўзиям бутун ютади жонивор) янада эркин, гердайиб, ювош тўти, беозор мусичаларни тизғиратиб қувиб юрибди. Умуман, бу ердаги қушларнинг уни ўткир, жангарироқдай туюлди.

Шу ерда икки қоши ўртасига қизил хол босилган ҳинд аёлни ўз юртида, ўз кўзим билан кўрдим. У оқ ҳарир кўйлак (сарий эмас), қизил гулли нимча кийиб, елкасига янада тўққизил гулли сари ташлаб, бола кўтариб олганди, ёнида яна бир қопқора бола онасининг этагидан тутиб пилдираб борарди.

Хуллас, шаббода, кўқаламзор хиёбонлар, қушлар сайроғи, бошқа кўнгилхуш манзаралар асабларимизга

анча ором берди. Умуман олганда ҳам, чегарачилар бизни қанча диққат қилган бўлишмасин, барибир кай-фиятимиз яхши, руҳимиз баланд эди. Сабаби — биз сеҳрли Ҳинд диёрига кириб олгандик ва мана шу биз ўтирган майдон-хиёбоннинг чиройли табиати, ранго-ранг қушлар чуфур-чуфуридан Улуғ Ҳиндистон нафа-си, ҳиди келиб турарди. Яна биз мулоҳаза қилардик: Ҳозир Бобур авлодлари бўлганида бизни бошқача кутиб олишармиди... Бу ерда сарфайиб ўтирамасмидик...

Ниҳоят, раҳбар билан таржимонимиз чиқишибди. Машқлари ўртacha эди. Шундай қарорга келишибди: Зокиржон Машрабов таржимон билан бундан ўттиз чақирим наридаги Амритсар шаҳрига бориб Дехлига қўнғироқ қилишадиган, қўнғироқ билан иш битмаса, пойтахтгача бориб, керакли идоралардан машина билан ўтишга маҳсус рухсат олиб келадиган бўлишибди. Унгача биз шу ерда кутиб турар эканмиз. Чегара маъмурияти бизни ётоқ билан таъминлайдиган ва бугун кечкурун меҳмон қиладиган бўлибди.

Дарҳақиқат, ҳадемай майдонча ёнидаги ошхонага таклиф этишибди. Овқатлари бизнинг таомномаларда йўқ: озгина саби (ё сабзисимон бир нима) бўтқаси, бақла-жон бўтқаси (аччиқ), нўхотсимон сариқ (ё қуюқмас ё суюқ) бир овқат... Нон бу ерда ҳам чевати экан, чеватининг ҳам кулчаси—кафтдайгина, юм-юмалоқ. Ҳамма ёвқатлари, ҳатто чеватиси ҳам заҳардай аччиқ, эди. Бир замонлар сайёҳ Афанасий Никитинни ҳам аччиқ таом билан «сийлашиб» устидан кулишган эди. Шу воқеани эсладим...

Раҳбар билан таржимон биздаги «Муравей»га ўхшаган моторолёртаксига ўтириб, жўнаб кетишибди. Биз Синток сингх, Кулвон сингх деган зобитлар ихтиёрида қолдик. Тўғрироғи бирон гап чиқса шу иккаласига мурожаат қиласизлар, дейишди чегара раҳбарлари. Машинамизни бир четга тортишиб, калитини ана шу зобитлардан бири олиб қўйди. Кейин бизни бу ердан юз қадамча наридаги бир қаватли пастаккина бинога бошлаб боришибди. Катта бир хонага (бир вақтлар ресторанинг зали бўлган экан) би кишилик жой ҳозирлаб қўйишибди. (Шунисигаям раҳмат).

«Меҳмонхона» мизнинг орқа томонидаги ҳовлига чиқдик. Сийрак дароҳтзор ва ям-яшил хиёбон. Озодалиги унча эмасу лекин чиройли, кўзни яшнатади, пойафзал билан босгинг келмайди. Шу майсазорга тўшакларимизни солиб, ўз уйимиздагидек хотиржам

ёнбошлаганча сухбатга тушдик. Ҳаво очиқ, осмон мусаффо эди. Ҳамишагидай, «Етти оғайним» мен билан бирга, фақат, сал баландроқда эди холос.

Хиёбоннинг у ер-бу ерида нимадир худди олис юлдузларнинг хира ва заиф шуъласидай йилт-йилт қиласарди. Шуълалар гоҳ йўқолиб, бир оздан кейин сал нарида пайдо бўлиб қоларди. Аввалига бу бизга сирли бир нарсадай туюлди. Кейин улар бирданига кўпайиб, хиёбоннинг ҳамма бурчакларида, дараҳт-гуллар узра живир-живир қилиб, йилтиллай бошлади. Шундагина бу гаройиб мавжудотнинг ёнар капалак-лигини англадик. (Унинг митти жисмида фасфор борда!) Тутиб кўрдик: қўлга ҳам илашмайди. Табиатнинг мўъжизаси ҳам кўп-да!..

Ётоқхонамиз, иккита катта кондиционер, шифтда ҳам бир жуфт шамол ҳайдагич айланиб турган бўлишига қарамай, дим эди. Темир парраклар гўё иссиқ шамол пуркарди. Ухлаш айчада қийни бўлди...

7 август, шанба.

Эрта уйғондим. Андижон, ёру биродарлар, эски танишлар тушимга кирибди. Умуман, йўлга чиққанимиздан бери ўзимизнинг она юрт, кўнгил яқинларим тушимга кираверади. Бобур ҳам шундай тушлар кўрган, соғинган, қийналган бўлса керак.

— Ҳиндистон заминида ҳам бир кеча туналди, — деди ён каравотда ётган Тўлқин aka ва менга қараб, қалай, яхши тушлар кўрдингизми, деб сўради. У ётган жойида бемалол, ёзилиб тутатарди.

— Авалиё бўп кетинг-е, — дедим ва миямдан бу одамнинг кўп чекишидан бошқа камчилиги бўлмаса керак, деган фикр ўтди. У ҳар жиҳатдан сафарбоп, ҳаммабоп, касби боис дунёнинг кўп жойларини кўргани учунми, дунёқараши — фикр доираси кенг, ўта синик, камтар, ювош эди.

Дарвоқе, таажжубки болалик қадрдан дўстим Баҳром кунда ё кун ора тушимга киради.

Ётогимизнинг орқа томонида душ бор экан, роҳат қилиб чўмилдим. Қанча сув тегса ҳам баданим совий демасди. Елкамга шовуллаб қуюлаётган душ «шаршара»си остидан чиққим келмайди. Аммо, бошқалар ҳам навбат кутиб туришарди.

Яна ҳамма хиёбонга чиқди. Мўъжазгина бу хиёбонга тонг янада ажойиб жозиба, фусункорлик ба-

фишлаганди. Ранго-ранг дарахтлар, гуллару гиёхлар ҳиди, қушлар сайроғи тутиб кетган эди. Хиёбон жуда текис, майса кийгиздай қалин ва чим-чатир; кафтдай ер очилиб қолган жойи йўқ.

Не баҳтки, ҳаво айниб, онда-сонда битта-иккита ёмғир ҳам томчилаб турибди. Лекин қилт эттан шабада йўқ. Майсазор шудрингдан нам эди.

Хиёбонда пастак, манзарали дарахтлар кўп эди. Айниқса, маржон-маржон майда қизил гулли, бутасимон ўсимлик хиёбон ҳуснини жуда очиб юборган эди. Бу сершоҳ дарахт-гулнинг шокила-шокила шакли кўзмунҷоқсимон (ундан сал каттароқ ва узунроқ) қизил шоналари очилган сари пушти тусга кира борарди. Унинг ҳиди ҳам хушбўй, бинобарин нектари ҳам жуда ширин бўлса керак, колибра қушчалари ҳам, ҳар турли капалаклар, асаларилар ҳам ўзларини ана шу бута гулларига уришарди. Асалари белигача узунчоқ шонагул ичига ўнғиб, нектар сўриб бол йифарди. Табиатан бесабр капалаклар кўним билмай, гулдан-гулга кўчиб юришади. Колибралар эса... Ҳа, дарвоҷе, колибралар ҳақида... Катталиги қовоқ аридай келадиган бу митта жонивор ер юзидағи қушларнинг энг кичкинаси, энг жажжисидир. Шунга қарамай уларнинг юраги бургутницидай катта ва жасур. Улар баъзан гала-гала бўлиб, ҳатто ёлғиз ҳолатда ҳам қирғими, бойқушми; хуллас ўзидан юз баробар улкан ва кучли, яна, йиртқич қушларга дап қилиб қолишади. Улар бошқа ҳеч бир қуш, паррандада йўқ ғаройиб хислатта эга, яъни колибралар ҳар томонга — олдинга ҳам, орқага ҳам, ёнига ҳам ҳатто вертолёт каби тиккасига пастга ҳам, юқорига ҳам бемалол учаверади. Бир кунда ўз вазнидан икки баробардан ортиқ овқат ейди, — деб ёзишади китобларда. Йўғ-е, дегинг келади. Лекин табиатда қанақа ғайри ҳодисалар бўлмайди дейсиз... Дарвоҷе, бу антиқа қушларнинг асосий ватани Америкадир. Биз ёқларда, яъни Ўзбекистонда, ҳатто Фарғона водийсидай ҳар турли қуш-паррандалар, ўсимликларга бой масканда, табиат ўз саҳоватини ва тароватини намойиш қиладиган Кавказнинг курорт шаҳарларида, Венгрия, Чехословакия ва бошқа хорижий юртларда ҳам колибраларни учратмаганман. Булар Ҳиндистон ҳудудида азалдан бормикин ё Америка томонлардан олиб келиб кўпайтиришганмикин?... Хуллас, ана шу камёб ва ноёб жониворлар бута-гул узра шоҳдан-шохга учиб-қўниб ўйна-

шар, бир жойда жажжи чиройли қанотчаларини пиріллатиб, узоқ-узоқ туришар ва гул ичига шүнғишаради. Бирон хавф сезишса бир зумда күздан фойиб бўлиб қолишаради.

Хиёбонда ўзини кўз-кўзлаб турган ўсимликлардан бири сариқ, карнай гулли магнолиялар эди. Яқинроқ борсангиз димогингизга «магнолия» атрининг ҳиди урилади. Хиёбоннинг чап бурчагида бир тўп банаң ўсиб ётиби. Узун ва энли, қамишсимон новда-япроқлари, бодрингсимон мевалари фужум-фужум бўлиб, учидаги қовунсимон сиёхранг гули осилиб турарди. Меваси ҳозирча пишмаган: ям-яшил эди.

Бошқа бир бурчакда бир туп папайя — қовун дарахти ҳам бор эди: унинг мевалари ҳам тепада, фужум бўларкан. Бизнинг иқлимга нохос бу неъматни жуда шифобаҳаш деб таърифлайдилар. Ўта озғинликда, тинка қуриш хасталигида, безгакни даволашда, гижжани ҳайдашда қовун дарахтининг меваси, барги, уруғидан фйдаланишаркан.

Банаң ёнида бамбуқдан ясалган шоти туриби. «Туғилмаган бузоққа қозик» дегандай, банаң, папайялар пишганда ишлатиш учун олиб бориб кўйишибди шекилли.

— Бананнинг тўрт донаси бир одамга кечгача овқат бўлади, — дейди бу бораларда анча «илми» бор Тўлқин ака. — Калорияси жуда кучли: фазогирларнинг сиқма идишдаги овқатлари таркиби асосини банаң ташкил қиласди.

Осмонда калхатлар катта-кичик доира ясад, ўз худудини қўриқлаётгандай айланиб юришаради.

Нонушта масаласида бошимиз қотиб ўтирувдик, тахминан қирқ беш-эллик ёшлардаги сўйлоқ тишли бир одам келиб, «чой ичасизларми?» дегандай бир гап сўради. Биз тушуниб-тушунмай «ҳа» дедик. Фақат Тўлқин ака «цукар» деганини англаб, «йўқ, керак-мас», деди.

Йилтироқ қофозга ўралган икки қути печене (бир сўмлик сўлкавойдай) билан олтига 100 грамлик истиконда ширчой олиб келди. Термосимизга қайноқ сув қуийб бериб, кетди.

«Буларнинг одамгарчилиги тузук экан,» деб ўзимизда йўқ мамнун, чойни майда хўплаб, тамадди қилдик. Ярим соатлардан кейин бояги одам қўлида калкулятор билан келиб, имо-ишора билан ҳисоб-китоб

қилиб, 34 рупий чўзинглар, деб қолди. Капалагимиз учди. Худди ўзимиздагидай, «қиммат-ку» дегандай эътиroz билдиридик. У одам бир парча қофозга ёзиб аранг тушунтириди: иккита печенье — 12 рупий, бир истикон чой — 2 рупий, қайнаган сув — 10 рупий эмиш! Мен шарқ мамлакатларида озиқ-овқат қиммат деб эшитганман, лекин бунчалик бўлишини ўйламовдим.

Бизда ҳинд рупийси йўқ эди. Ҳаммада оз-оздан Покистон рупийси бору, бу икки давлат пулининг қиммати ўртасидағи озгина фарқни тўғри келтиролмай, ҳинд ҳам, биз ҳам анча хуноб бўлдик. Тўлқин ака билан Фаррухнинг бу борадаги озми-кўп тажрибаси ва тушунчаси иш бериб, бир амалладик. (Тўлқин ака анча-мунча инглизча сўзларни ҳам биларди).

Шундоққина теппамиздан «қий-қий-қий», деб қийғир учеб ўғди. Ундан кейин яна бир қора қуш ва бошқа қушлар, жигарранг катта капалак...

Хиёбонга сафар кўрпаchalаримизни тўшаб ўтирибмиз. Дарвоқе бу жойни хиёбон деб ҳам бўлмайди: бир томони—бизнинг «меҳмонхона»миз, қолган уч томони бетон девор билан ўралган. Худди уй қамогидай. Узоққа чиқиш мумкин эмас. Давра қуриб бадиият ҳақида, Бобур ва унинг «Бобурнома» асари ҳақида суҳбатлашамиз, ўша даврдаги ва ҳозирги жой номлари ва қиёфасини мулоҳаза қиласиз, дастлабки сафар таассуротларимизни ўртоқлашамиз.

Ҳаво айниброқ турибди, бироқ дам, нафас олиш қийин — нам ҳарорат юқори. Ёнбошлаймиз, турамиз, диққат бўламиз, муҳокама қиласиз, тахминий башпоратларимизни айтамиз, умидвор бўламиз... Яхшиямки гуллар, қушлар, бурундуқ бор экан, шуларни томоша қилиб, ўзимизни чалритиб вақт ўтказяпмиз.

«Бизнинг» бор-хиёбонда бурундуқ дегани роса кўп экан. Ҳар бир дараҳт атрофида, деворлар устида жуфт-жуфт бўлиб қувлашиб юришибди. Табиат ажойиботларининг яна бир жонли мисоли бўлган бу хуббичим жониворнинг думи жуссасига нисбатан уч баробар узун, сичқондан катта, қаламушдан кичик, лекин чўзинчоқ, тепа қисмида думидан то бўйнигача, қулогигача панжа изисимон учта йўл-йўл ҳошлия бор. Дараҳт танасида пастта физиллаб тушиши ва гоҳо ерга етай деганда тек қотиб узоқ туриб қолиши яъни хатти-ҳаракатлари ниҳоятда жозибали. Ҳавф-хатар сезса икки оёғида тик турганича атрофни олазарак кузатади, митти кўзлари бесарамжон жовдирайди...

Кечаси бутун баданимга иссиқдик тошиб кетган эди. Ҳар замонда душга бориб, марганцовка билан ювиниб келаман. Бир оздан кейин яна терлаб кетавераман, намчил иссиқ бетоқат қиласаради. Яхшиям шундай кўкаламзор майдон. Бўлмаса...

Пешинга яқин бурундуқлар қаёққадир ғойиб бўлиб қолишли, бошқа қушлар ҳам: салқинроқ, захроқ, вакларга уриб кетишиди шекилли...

Тушликка тушонка иситдик. Кўчадан чевати олиб келдик. Ўнта. Осмонга тутсангиз қуёш бемалол кўринади. Бир донаси — 1 рупий.

Нон-кулчаларимиз могорлаб кетибди. Сайфиддин хожи ака саралаб, эринмасдан майдалаб ташлади. Бир дунё қаттиқ нон бўлди.

Бу ернинг қарғалари ҳам жуда жангари эди. Қоровулимизнинг шумшайғанроқ ити биз ташлаган бир-икки бўлак қаттиқ нонни қусурлатиб чайнаётган эди, бир қарға қаердан пайдо бўлди—бильмай қолдик, шиддат билан, сорсимон учиб келди-да, нонни тумшуғи билан илиб олиб, яна шиддат билан кўтарилиб меҳмонхонамиз томига қўнди... Бечора ит фингшиб, ноннинг қолганини ҳам ташлаб қочди...

Ўзимиз томонда фўза ҳашоратига қарши сепиладиган заҳарли дорилар туфайли йўқ бўлиб кетган сассиқ попишаҳ (худ-худ)ни ҳам шу ерда кўрдик.

Кечки пайт хиёбоннинг кун ботиш томонидаги тарвақайлаб, ер бағирлаб ўсган магнолия ва ғужум-ғужум оқ, карнай гулли (гул-барглари ғоят нафис) дараҳт-гуллар оралиғида қирговулнинг бир жонон нори пайдо бўлиб қолди. У жуссаси кичкина бўлишига қарамай камалак ранг, чиройли патларини кўз-кўз қилгандай, ёш, олифта бўйдоқларсимон солланиб юарди.

Ажаб, нари борса йигирма беш-үтгиз сотихли хиёбон, дараҳт ҳам кўп эмас, аммо қушлар, парранда-даррандалар шунча бисёр ва хилма-хилки... Чумчуқлар, калласи катта, қоп-қора шоҳ чумолилар, митти қумурсқалар, чивин (биздагига қараганда майдароқ), қўнғиз, ниначи, пашшалар... ва яна ҳар турли майда ҳашоратлар, мавжудотлар...

Мен «Бобурнома»ни эслайман. Бобур Мирзо Ҳиндистон табиатини—иқлимини, тоғларию, ерларини, сувларини, ҳайвонот оламини, парранда-даррандаларию ўсимликларини жуда кенг, батафсил, ҳарқандайин журрофийшунос, биолог, зоолог олимлардан-да мукаммалроқ ҳам илмийроқ таъриф ва тавсиф этган-а. Маса-

лан, адашмасам, элликга яқин, балки ундан ҳам кўп парра́нда турларини келтириб, ҳар бирининг шакли-шамойили, ранги-туси, ўзига хос белгиларига алоҳида-алоҳида тўхталган. Жумладан товус сифатларининг ўзи салкам бир саҳифа, беш-олти хил тўтининг феълатворию бир-биридан фарқлари, қай бири қай дараҷада сўз ўзлаштира олишигача шарҳланиб, тасвиrlа-нади... Дарҳақиқат, шу кафтдай жойда шунчалик, Ҳиндистоннинг катта ўрмонларида қанақа экан, деб ўйлайман ва юрагим ўша томонларга орзиқиб талпинади...

8 август, якшанба.

Кеча иссиқдан шикоят ва арз қилганимиздан сўнг божхона маъмурияти ходимлари хонамизга яна бир жуфт иккита одамнинг қучоги аранг етадиган вентилятор қўйиб беришган эди. Бел, оёқларни чатоқ қилмасайди, деб хавотирланиб ухладим. Қаёқда, эрталаб яна терлаб-пишиб уйғондим.

Ховлига чиқсан хиёбонда бир жуфт лойхўраксимон қуш юрибди: оёқлари узун, ингичка, тепаси кулранг, боши, бўйни ва белининг учи қора, тумшуғи қизил, елка ва қорни оқ... Майда қадамлар билан озгина-озгина юриб, у ёққа-бу ёққа анча қараб туради-да, мўлжаллаб туриб бир жойга тезда юриб боради ва майсалар орасидан ниманидир шиддат билан чўқилай бошлияди.

Шайтонча бурундуқлар яна жуфт-жуфт бўлиб, пилдираб ўйнаб юришибди.

Бугун шабнам кечагидан ҳам қалинроқ тушган, майсалар йилт-йилт қиласарди.

Қизил кўзмунчоқ гулли ўсимлик шохларида колибраалар ғунчаларнинг totli нектарини эҳтирос билан сўриб юришибди. Уларнинг пириллаб, арилар каби гулдан гулга учиб-қўнаётганини кўрган одам беихтиёр жони ичига сифмайдиган бесарамжон, бетоқат жонивор экан-да, деб ўйлаши шубҳасиз. Лекин бугун хиёбон маликасидай очилиб-сочилиб турган гул-дарахт атрофида ҳақиқий асаларилар ниҳоятда кўпайиб кетган эди.

Девор ортидаги оқ баданли дарахтда тўп-тўп зангори тўтилар кўринди. Яна, жуссаси ва думига қарангандан тўқ қизил тумшуғи узун ва эгри, икки ёни, қанотларининг чети ҳаворанг бир қуш, чумчуқсимон, фақат, қорамтири, қорни билан думи ўртасида ҳошия бор қуш, яна бир кулранг тусли, думи ингичка ва

узун қуш пайдо бўлиб қолди. Хиёбонимиз жонли табиат бурчагига айланиб бораради. Менинг назаримда, бу ранго-ранг қуш, паррандалар хиёбонга биз ошиён қурганимиздан кейин бошқа ёқлардан кўплаб учиб келишмоқда эди. Ё улар ҳам бўйига етган навозишли ҳинд қизларидаётган ўзларининг бор-йўқ бисотию ҳусни жамолларини одамларга, ҳусусан биз каби ўзга юртдан келган ва уларни маҳлиё бўлиб томоша қилаётган меҳмонларга кўз-кўзлашни яхши кўришармикин...

Мен ботаника ва зоология илмидан анча узоқлигимни яна бир бора ва чуқурроқ ҳис қилдим. Агар шу ўсимликлар ва паррандаларнинг номларини, табиатини яхши билганимда икки бора ортиқроқ завқ олган бўлардим, деб ўйладим. Мен бу жониворларни ўзимдан ҳам кўра катта ўғлим Жаҳонгирга кўпроқ илиндим. У ҳайвонот дунёсини жуда яхши кўради. Сетон-Томпсоннинг китобини ўқийвериб ёдлаб юборган менимча...

Чевати олиб келиш учун (дарвоҷе, уни ҳиндулар «чепоти» дейишаркан) божхона гузарига чиқиб кетаётуб, меҳмонхонамизнинг оди томонидаги майдончада чайла-чодирини йиғишириётган япон йигитини кўриб қолдик. Тўлқин ака билан Фаррухнинг бутун маҳоратиу билимларини ишга солишлари натижасида японнинг сайёҳ, биз каби мусофир эканлигини, мотоциклда дунёни айланиб чиқмоққа аҳд қилганини англадик. (У бизга йўналишлари харитасини кўрсатди). Мотоциклига илиб ташланган ашқол-дашқол мотоциклга икки баробар (ҳатто примуси ҳам бор) келарди. Шунча юк билан қандай юраркин, деб ҳайрон бўласиз.

Айтгандай, бугун тушимда Турсунойни, Жаҳонгирни ва бошқаларни кўрдим. Бир қизни таниёлмай, «Сиз Зуҳромисиз» деб сўрасам (аслида Зуҳро исмли танишим ҳам, қариндошимиз ҳам йўқ), «йўқ, мен Моҳимман», дейди...

Пиримқул Қодиров тасвирлаган Моҳим бегим (Бобур Мирзонинг суюкли хотини) менда ўзига нисбатан кучли меҳр уйғотган ва унинг латиф қиёфасини ўзимча тасаввур қилиб, гўзал исмини суюб-суюб тилга олиб юрардим. Шунинг учун ё балки унинг меҳрибон ёри-султони изларини тавоғ айлаб кетаётганимиз учун тушимга кирдимикин...

Соат саққизларда Зокиржон ака билан Аҳмаджон кулиб кириб келишди. Худди йўқотиб қўйган шерикларимизни топиб олгандай хурсанд бўлиб кетдик.

Уларнинг ҳам машқи баланд эди. Қисқаси, Дехлига боришиб, Ўзбекистоннинг Ҳиндистондаги консули Аҳмаджон Луқмоновга учрашибди, у орқали Ҳиндистоннинг Ўзбекистондаги элчиси Делип Мехта билан телефон орқали гаплашишибди. Лекин иш вақти тугаб қолиб (кеча—шанба, иш—соат иккигача экан, бугун дам олиш куни), Ҳиндистон ҳукумати билан гаплашишолмабди. Эртага душанба куни ҳам қандайдир байрам муносабати билан иш куни эмас экан. Луқмонов кўнгилни тўқ қиласеринглар, ҳаммаси жойида бўлади, деб жўнатиби.

Суюнчли хабар муносабати билан ош қиласеринглар бўлдик. Аҳмаджон билан катта ҳожи ака (Сайфиддин Жалилов) икки чақиримча наридаги қишлоққа бозор қилгани кетиши.

Хиёбонимизда (энди у бизники бўлиб қолди, чунки бу ерда биздан ва қоровулдан бошқа ҳеч ким йўқ, унинг биргина лапашанг ити ҳам қора қарғанинг бир ҳамласи биланоқ ўтакаси ёрилганми, ўша жуфтакни рослаган бўйича қораси кўринмайди. Қайси бир бурчи—кавакларда писиб юрган бўлса керак). Яна бир қуш пайдо бўлди: қумрига ўхшайди, лекин кичикроқ, дараҳт танаси билан рангдош. Таажжубки, худди бизнинг кўзимизни куйдирмоқчи бўлишгандай аксарият қушлар жуфт-жуфт юришарди. Бурундуқлар-ку бир неча жуфт ва ҳеч бир-биридан ажralишмайди, доим қувлашмаочоқ ўйнашиб, бир-бирига суркалишгани-суркалишган. Чарчашса, ўртачароқ шоҳ танасига тўрт оёқлаб чирмашиб, қорни билан қапишиб ором олишарди. Ҳар бир қилиғи шундай ёқимлики, томоша қилиб зерикмайсиз.

Сайфиддин ҳожи ака иккимиз навбатчи, яъни бош ва ёрдамчи ошпазлар бўлиб тайинланишимиз муносабати билан қадрдан хиёбоним ва суюкли эрмагим бўлиб қолган жониворларни бир неча соатга тарк этишга тўғри келди.

Юқорида айтганимдай, бизнинг ётобимиз собиқ обод ва гавжумгина ресторанинг умумий овқатланиш зали бўлиб (юқори тарафда буфетнинг кенг дарчали ромлари турибди), ён томонида собиқ жуда катта ошхона (кухня)си ҳам бор эди. Унинг анчадан бери тузук-қуруқ фойдаланилмаётгани сезилиб турарди: деворлари қорайиб, сувоқлари кўча бошлаган, у ер-бу ерга тўнтариб қўйилган кострюлкасимон қозонларни чанг босиб ётар, полига ҳам яқин-ўртада супурги тегмаган эди.

Ҳожи ака майкачан, йўл шалварининг почасини қайриб, яланг бошига чамбарак қилган оқ дурранинг бир учини қулоғи ёнига тушириб, ишга киришди. Дарвоҳе, ошхонада овқат пиширишга ҳам ижозат олдик. Қоровул Мали (биз уни Абдумалик деб атай бошлидик) бизга унча рўйхушлик бермай юрувди, примус ёқишига, чой қўйишга ҳам рухсат бермаётганди. Кеча кечқурун қиёмат маст бўлиб хиёбонда, майсазорда роса у ёқдан бу ёқда думалаб ётди. Эргалаб ҳам қовоқтумшуғи осилиб, гангирбошга ўхшаб юрувди, раҳмимиз келиб, боши оғрифига дезинфекция учун олиб юрган спиртимиздан озгина қўйиб берувдик, ҳамма нарсани инъом қилиб юборди, примусни ванғиллатиб ёқиб берди, чой муаммоси юз фойиз ҳал бўлди. «Оғизни мойлаш»нинг хосияти шунаقا зўр-да! Абдумаликнинг чехраси ҳам ёришиб кетган эди. У қаёқдандир ўзига ўхшаган шеригини топиб келиб, бизга ёрдам бера бошлади. Улар анча ҳазилкаш ҳам чиқиб қолишди. Аччиқ емаслигимизни билиб, нуқул қалампирни кўрсатишади, қозонга ташлашмоқчи бўлишади, ҳайҳайлаб қоламиз. Абдумаликка «ўтказиб қўйганимиз» учун биз ҳам анча дадиллашиб қолган эдик, ҳожи ака «кафир билан бошингни ёриб қўяман», дегандай, пўписа қиласи. Барибир гўшт қовураётганимизда кўзимизни шамғалат қилиб туриб чаён қалампирдан иккитасини солиб юборишибди.

Яхшигина ош бўлти. Ўзиям, паловимизни соғиниб қолган эканмиз, маза қилиб едик. (Абдумаликка ҳам бир лиқоб солиб бердик). Кейин, яна бекорчилик. Истисқ. Дам ва нам. Нафас олиш, вақт ўтиши қийин.

Ниҳоят, соат ўнларда хушхабар келди: божхона маъмуриятига Ҳиндистон диёрига машина билан ўтишимиз учун Деҳлидан Ҳиндистон ҳукуматининг махсус кўрсатмаси (факс орқали) келибди! Ҳужҷатларни текшириш ва расмийлаштириш бошланди. Қоғозбозлик ва расмиятчиликнинг учига чиққан жойи шу ер экан. (Айтгандай божхона жойлашган бу жойнинг номи Баага эди).

НИҲОЯТ ДАРВОЗА ОЧИЛДИ!

Соат ўн бирдан эллик дақиқа ўтганда Ҳиндистон дарвозаси очилди! Раҳбар ҳам, бошқаларимиз ҳам «ҳайданг, тезроқ, ҳайданг» дедик Обиджон акага. Че-

гарадан Дөхлигача 488 километр экан. Қани энди, иложи бўлсаю учиб кетсак ва тез етсак... Ҳадемай анча ичкарига кириб олдик, гўзал манзарали жойлардан ўта бошладик. О, Ҳиндистон табиати!.. Шу экинларни, шу дараҳтларни шу ҳинд ҳалқи ўз қўли билан экканмикин? Жуда бепоён-ку, жуда кўп-ку...

Атрофдаги экинларнинг аксарияти шоли ва маккажўхори эди.

Кўча текис, йўлнинг икки бети ўрмонсимон дараҳтзор. Идорага ўхшаш биноларнинг олди хиёбон. Аммо, савдо расталари бошланган жойдан ивирсиқлик, ифлослик кўзга ташланарди. Яшнаб келаётган кўзингиз хиралашади, дилингиз равшанлигига дарз кетади.

Кўй, эчкилар, чўмилаётган сигирлар сероб эди, онда-сонда «ғўрт-ғўрт» қилиб юрган чўчқалар учрайди. Мотоцикл миниб кетаётган аёлни кўриб ҳайрон бўлдим. Ўзимизда ҳеч учрамаган воқеа.

Ўн икки яримда Панжоб штатига қарашли Амритсар (AMRITSAR)га кириб бордик. Пештоқдар, деворлардаги ранго-ранг тусдаги эълонлар, рекламалар ва бошқа лавҳаларни кўрибоқ ичимдан бир энтикиш келди. Ҳиндистоннинг мен кўраётган биринчи шаҳри!

Кўринишидан анча эски шаҳарга ўхшайди: кўчаларида дараҳт жуда кам. Бироқ, меъморчилиги ўзига хос: аксар фиштили бинолар...

«Сангам» номли кинотеатр кўз олдимда ҳинд фильмларини жонлантирди.

Велосипед ҳамма кўчаларда ғарам-ғарам бўлиб ётибди, шаҳар велосипед бозоридан иборатми, деб ўйлайсиз. Афсуски... ахлат ҳам кўп эди.

Бироқ, баҳри дилингизни очадиган манзаралар ҳам бор. Булар юзлари очиқ, ўзига оро берган ҳинд аёллари, шўх-шаддотлиги юз-кўзидан билиниб турган зебо қизлар... Извошларда виқор билан ўтирган қиз-жуонларнинг қайси миллатга мансублигини дафъатан ажратолмайсиз: ҳинчча кийинган, яъни калта, юпқа камзуларда, беллари очиқ (ҳаммасиники эмас), елкаларига сарий ўраган, манглайида холи ҳам бор, бироқ жуда оппоқ, «сутга чайиб олингган» деган иборани уларга нисбатан бемалол қўллаш мумкин. Мен умуман Ҳиндистон аёлларининг бу дараҷадаги оппоқ юзлилари бўлмаса керак, кинода грим билан оқартиришади, деб ўйлардим.

Шаҳардан чиқишимиз билан яна икки томонда тумонат семиз моллар (қорни ерга тегай дейди), молҳо-

налар, боғ-роғлар, кўкаlamзорлар, тўлиб оқаётган катта анҳор бошланди. Бизнинг йўлларимиз шу жиҳатдан анча қашшоқ экан, деган хulosага келдим: катта йўлга-ча қадаб пахта экилади. Кўп жойларда йўл билан пахта далалари орасини фақат бир қатор тут ажратиб турди. Амритсар — Дехли йўлининг иккала томонида ўн-йигирма қадамча дараҳтзор (ости ям-яшил майса-зор, мол-кўйлар маза қилиб ўтграб юришибди), ундан ўёғи шолизор ё бошқа экин... жуда катта ҳудуддаги шолилар ниҳоятда бир текис, яшнаб ўсялти. Шунча майдонлардаги шолини қўл билан кўчат қилиб экиб чиқишаркан. Қойил-ей, дейман. Лекин одам кўп, ишчи кучи етарли бўлса керак-да. Ҳам, турган гапқи, экин-нинг оласи, чаласи йўқ, бинобарин, ҳосил кўп ва мўл бўлади. Ҳинд замини, иқлимининг ажойиблигини қарангки, бир жойда шолини ўришяпти, нарироқда эса, экишяпти. Демак ердан кетма-кет камида 3 марта ҳосил олиш мумкин. Аммо, сув ҳам сероб экан. Сал аввалроқ йўлни бир канал кесиб ўтган эди, ҳозир ўнг ёнимизда йўл ёқалаб канал оқяпти, кўп юрмай, катта бир дарё келди. Дарёдан кейин йўл бир оз торайди. Икки томонда терак қатордай саф тортиб ўсган оқ баданли дароз, сарв қомат, оққайинга ўхшаш (Тўлқин aka евкалифт бўлса керак, деб тахмин қилди) дараҳтларнинг учлари бир-бири томон эгилиб, кўчага қалин соя солиб турарди.

Менинг кўнглим энди анча хотиржам бўлиб, табиатнинг ўзгарувчан манзараларидан олам-олам завқ олиб борардим. Албатта, Бобур ўтганда бу текис, чиройли йўллар йўқ, эди, балки тупроқли, сўқмоқдан каттароқ оддий йўл, атрофи тўқай, ботқоқликлар бўлгандир. Лекин, имоним комилки, Бобур шу атроф-худуддан, Понипатда бўладиган жанг тадоригида борар экан, қалбида бир дунё ташвишу саосима, ҳадигу хавотир билан ўтган. Шу жойларнинг ҳавосидан нафас олган. У бир неча кун қўниб, фаним билан тўқнашув бўлиш эҳтимоли бор жойларнинг азмойишини олган, Султон Иброҳим Лўдийнинг ҳарбий имкониятлари, сирларини ўрганган қишлоқ Шоҳобод шу йўлга яқин бўлгандир. «Бобурнома»да ўша йўллар, ўша кунлар ҳолати шундай тасвирланган:

«Ул юртдин кўчиб, Шоҳобод келдук. Тил тутар учун Султон Иброҳимнинг ўрдусига киши ийбориб, неча кун бу юртта таваққуф бўлди... Ушбу юртта душанба куни жумодил-аввал ойининг йигирма секки-

зида офтоб ҳамал буржига таҳвил қилди. Ўн секкиз ёшда эди, ушбу юртта Ҳумоюн юзига устара ё микроз тегурди, тарих сана 961 бўлғай.

Иброҳимнинг ўрдусидин ҳам мутавотир хабарлар кела бошладиким, бир курух-икки курух, кўчуб ҳар юртта икки-уч кун мақом қила-қила келадур. Биз ҳам мутаважжих бўлуб, Шоҳободдин ора икки кўниб, Жўн дарёсининг ёқосига Сарсова гарбиси келиб туштук. Ҳожа Калоннинг навкари Ҳайдарқулини тил тута йи-борилди.

Мен Жўн дарёсини гузар била кечиб бориб, Сарсовани сайр қилдим. Ул кун маъжун ҳам едук. Сарсованинг чашмаси бор, озроқча сув бу чашмадин чи-қиб борадур, ёмон ер эмас. Бир Турдивек хоксор таъриф қилди. Мен дедимким, сеники бўлсун... Бу тақриб била Турдивекка Сарсова берилиди.

Бир кемада толор ясатиб, гоҳи кема сайри қилур эдим, гоҳи кўчларда кема била андин келур эдим.

Ул юрттин дарё ёқалай қуиға боқа икки кўч кўчу-луб эдиким, тил тута борғонлардин Ҳайдарқули хабар келтурдиким, Довудхон Ҳайтимхонни беш-олти минг киши била Миёни дуоб сари кечурубтур. Уч-тўрт курух Иброҳимнинг доирасидан берирак доира уриб ўлту-рубтур...

Ҳаммасидан ҳам ўз аскаридан қарийб ўн баробар ортиқ кучга эга бўлган ёғий билан тенгсиз ва беомон жанг қилгани кетаётган одамнинг кўнглига сайру боғу сайри дарёлар сиққанини қаранг. Шундай имконлар ҳақида ўқиганингда беихтиёр шоҳу султонларга ҳава-синг келиб кетади-да. Аммо бу қадар дарёдиллик ва завқворлик ҳамма султонларга ҳам насиб қилавер-маслигини ўйлаб, яна шаштингдан тушасан киши... Ҳозирги аҳволимиз ҳам ёмон эмас: оромижон маши-нанинг юмшоқ ўринларида бемалол ёнбошлаб, кўнгли-мизга келган гапларни гапириб, латифалар айтиб бор-япмиз. Раҳбаримиздан бошқа ҳеч ким бизга хўжайин эмас. Биз ҳам ҳеч кимга хўжайин эмасмиз. Йўллар кенг, обод... У ёқдан-бу ёқса безаклари Покистонни-кидан бошқачароқ, яъни сал соддароқ ҳавтобус, «Татл» юқ машиналари физиллаб ўтятти. Аммо, биз учун аллақачон экзотикага айланган ҳўқиз аравалар ҳам юрибди—битта-иккита.

Икки ёнда биздан қолмай келаётган узундан-узун хиёбонда сарбойчанг сув кечиб турган адл теракзорлар туташиб кетган Лудхиана шаҳридан ўтиб боряпмиз.

Кўпприк қурилишига дуч келдик. Ёш-ёш қизлар (кейин билсам аслида улар унчалик ёш эмас, жуссаси кичиклигидан менга шундай туяулган экан), аёллар бетон-қоришма, фишт солинган патнисга ўхшаш идишларни бошига қўйиб, кўпприксимон ҳавозаларда тепага ташишиятти. Мен беихтиёр Фарғона канали қурилишини эсладим. Лекин биздаги қурилишда эркаклар кўп бўлган, бу ерда, аксинча, эркаклар аёлларга нисбатан жуда кам эди. Қолаверса, булар ёлланган ишчилардир. Фарғона канали эса хашар йўли билан қазилган...

Мен аёлларга жуда-жуда ачиндим. Асли қорамагиз юзлари шундоқ иссиқда, тик тушаётган қуёш нурида баттар қорайиб, жизғанаги чиқиб кетган, бўйинларида, калта камзулчаларининг пастидаги очиқ баданида тер томчилари симоб қатралариdek йилтираб кўринарди.

Ҳарорат чиндан ҳам баланд, машина эшиги ё ойна сал очилса, ёқимсиз иссиқ шабода қириб, бир зумда нафасимизни қайтариб юборарди. Биз шундайда ишлаётганларга қойил қолиб уларга раҳмимиз келди.

Хиндистонга келиш Бобурга шунчалик зарур бўлувдимикин? Шунчалик иссиққа қандай дош бериб яшаган экан, деб баҳс қилдик. Мен подшозода, қайгадир подшолик қилиши керак эди-да, дедим ҳазил аралаш. Бошқалар фикримни жиҳдий англаб, эътиroz билдиришиди.

Йўл кенг ва ханжардай тўғри эди. Икки ёқдама ҳаракатга мўлжалланган бу катта қўчанинг ўргалиғида эни 2,5—3 қадам чамасидаги гулзор-хиёбон бўлиб, паст бўйли дараҳтлар кўп, ости ям-яшил майсазор эди. Борган сари йўлнинг икки томонидаги дараҳтзор ҳам кенгайиб, қажинлашиб, қуюқлашиб бораради. Мен яна Венгрия, Чехословакия йўлларини эсладим. У ёқда биз автобусда юрган кўчалар ниҳоятда текис, равон бўлса-да бунчалик кенг эмас, илон изисимон айланаси кўп, қатнов ҳам сийрак эди. Йўл нарёғидаги (ўрмонзордан ташқари очиқ жойларда) далалар, экинзорлар ҳам жуда режали, батартиб, озода, шинам эди. Бепоён далалардаги экинларни маҳсус мосламалар ёрдамида сугоришни ўша ёқда кўрганман. Бекор ётган ерлар деярли йўқ эди.

Тошкент билан биродарлашган Патиала шаҳри ёнидан ўтдик, лекин шаҳар ичкарисига кирмадик.

Яна кўпприк қурилишига дуч келдик. Энди бу ерда бетон, лой ташиёттан аёллар ичида олис африка-

ликлардай, боласини орқасига боғлаб олганлари ҳам бор эди.

Кўчада негадир қуролли аскарлар кўп учрамоқда. Улар усти очик ҳарбий машиналарда ўтишар ёки йўл четида қатор бўлиб туришафди. Бирон ҳодиса юз бергана ўхшайди, деб тахмин қилдик.

Йўлимиз энди анча ихчам тортиб, торайиб қолди. Лекин серқатнов, айниқса мотоцикл, велосипед мингандар кўп, тез юриб бўлмайди. Одам диққинафас бўлиб кетади. Фақат, атроф, табиатнинг гўзал манзаралари кўнгилни ёзиб юборади. Сарвқомат евкалипт ниҳоятда кўп (биздаги мирза тераклар каби), улар гўё йўлнинг безаги эди. Бир кам дунё... Шундай ажойиб табиатта биздагидай мўътадил ҳарорат бўлганида борми...

Соат кечки еттиларда далалар узра оқиш-кулранг шудринг туман каби туша бошлади.

Соат биздаги вақт билан тўққиз (21) ярим, бу ердаги вақт билан ўн(22) да бесарамжон шаҳарлардан бири, Бобур ҳаёти ва Ҳиндистон тарихида муҳим бурилишларга сабаб бўлган Понипат шаҳрига кириб бордик. Пештоқлар, деворлардаги ёзув, лавҳаларнинг аксарияти инглиз ёзуви ва тилида эди.

«ПЕҲДАЛВАН» («пахлавон» деганимикин) номли мусофиরхонага жойлашдик.

Понипатта тезроқ етиб олайлик, деб йўлда деярли тушлиқ қилмагандик, қоринлар оч эди. Яхши, кеч бўлса ҳам, емакхоналар ишлатган экан. Мусофирихонамиз ёнидаги кўча ошхонасида бир истикондан пиво, иккитадан тухум қўймоғи билан тамаддиландик. 0,75 лик бир шиша пиво — 30 рупий экан.

Хона деразаларига кондиционер, шифтда шиддат билан ишлайдиган катта вентилятор қўйилган бўлишига қарамай, яхши ухлай олмадик. Пашиба (чивин) ниҳоятда кўп экан, чақиб бодроқ қилиб ташлади. Ваагада тошган иссиқлик авж олиб, бадан шунақа қичишиб бердики, чидаб бўлмайди. Бир неча марта марганцовкали сувда ювиниб чиқдим... Бунинг устига деворларда, шифтда кўрганда этинг сесканадиган, шунинг учун бизда номини ҳам аташдан ҳазар қилиниб, «чиқилдоқ» дейиладиган калтакесакнинг каттароқлари бемалол ўрмалаб юришарди. Улар пашибага қарши маҳсус қўйиб юборилармиш. (Топган чорасини қаранг буларнинг)... Қолаверса, мусофирихона йўлнинг шундоққина ёқасида бўлгани учун тўхтовсиз, чинқириб

ўтаётган машиналар бинони зириллатиб юборарди. Машина сигнallарининг овози ниҳоятда ўткир, асабни эговладидиган даражада ёқимсиз эди. Ҳайдовчилар одамларни ўйламай, бефаросатларча, кўпинча бекордан-бекорга сигнал чалишарди.

Тўлқин ака, Фаррух билан учинчи қават айвонига курси қўйиб, шаҳарни томоша қилиб ўтиридик. Кеч бўлиб қолгани учунми, чироқлару рекламалар унча ярқирамайди, бинобарин шаҳар унча обод эмасдай кўринарди... Лекин бу жуда машҳур тарихий шаҳардир...

ЭНГ ТАРИХИЙ ЖАНГ...

Ҳиндистон... Понипат...

Тарихга яна бир чуқурроқ назар ташланса, ювош; ўта кўнгилчан бечора ҳиндлар ва шу ҳудудда яшовчи бошқа халқлар ҳам ўзга мамлакатларга ҳужум қилмаган, аксинча, мудом бошқа мамлакатлардан бу юртга ҳужум бўлаверган.

Ҳиндистон ва унинг таркибига кирувчи кўп сонли аҳолининг манглайига азалдан шимолдан келувчи фотихларнинг қурбони бўлиш қисмати битилганга ўхшайди. Бу халқлар ўз мамлакатининг табиий чегараси бўлмиш Ҳимолай тоғларидан Ҳинд уммонигача бўлган ҳудуддан ташқарига қадимги даврлардан бўён ҳеч қандай босқинчилик юришлари қилмаган. Форслар ва греклар, осиёлик мусулмонлар (афонлар, форслар), оврупалик христианлар бу ўлкага бирин-кетин юриш қиласверишган.

Мамлакатдаги аҳвол мусулмонларнинг кириб келиши билан тубдан ўзгарди. Уларнинг бу едаги ҳукмронлигини татқиқотчилар тарихан икки даврга бўлишади. Биринчи давр—Султон Маҳмуд Фазнавийнинг келиши (1021 йил) дан Бобурнинг келишигача бўлган беш асрлик даврни ўз ичига қамраб олади.

Иккинчи давр уч юз ўттиз икки йилдан иборат Бобурийлар салтанати замонидир. Бу тарихни «Ҳиндистондаги темурийлар сулоласи даври» деб аташади.

Фазнавийлар сулоласи ўrniga Афғонистоннинг Fur шаҳридан чиққан Шоҳобиддин Муҳаммад Furий сулоласи келган эди. Улар Ҳиндистонда мусулмонлар мавқеи ва ҳукмронлигининг кучайишига катта ҳисса қўшдилар.

Улардан кейин XIII асрнинг охирроғида Гилжи-лар келишиб (аффонлар), нисбатан қисқа вақт-33 йил ҳукмдорлик қиласидар.

1321 йилдан Дехли түглоқлар ҳукмронлиги остида бўлади.

1412 йили Ҳиндистонга соҳибқиран Амир Темур юриш қиласидар. Бироқ у бу юртда кўп турмай, салтанати пойтахти Самарқандга қайтиб кетади. Шундан кейин Дехлига ҳукмрон қилиб қўйилган Зиёдлар сулоласи давлатни узоқ бошқариб туришолмайди. 1450 йилдан Дехли аффонлар қўлига ўтади. Бахлул Лодий даврида катта давлат парчаланиб кетади. Лекин унинг ўғли Искандар Султон Лодий салтанатни қайта тиклашга, кенгайтиришга муваффақ бўлади ва ўттиз йилча ҳукмронлик қиласидар. 1518 йили Дехли тахтини Султон Иброҳим Лодий эгаллайди.

Бобур Ҳиндистонга биринчи юришида (1519 йили) Лоҳур, Ширинд вилоятларини қўлга киритади. Тўртинчи юришида, 1522 йили, Бобур қўшинлари Лоҳур яқинида Бехорхон Лодий лашкарлари билан қаттиқ жанг қиласидар.

Маълумки, Бобур Ҳиндистон сари беш марта юриш қиласидар.

Ҳинд тарихчиси Л. П. Шарманинг хабар беришича биринчи сафар Бобур (1519 йили) Бажур ва Бера вилоятларини бўйсундиради. Иккинчи юришида (шу йили) Пешавордан қайтади. Учинчи марта (1520 йил) Панжобгача етиб боради, Сиалкот ва Сайдпур қалъаларини забт этади. Тўртинчи сафар 1524 йили Лоҳур ва Диболпургача бўлган худудни эгаллайди.

Вилямс Эрскиннинг бу борадаги маълумотлари бошқачароқ. Унинг ёзишича, Бобур иккинчи юришида Мўлтон, Лоҳур, Ширинд вилоятларини ўз салтанати тасарруфига киритган бўлса, тўртинчи юришида, 1522 йили (саналарда ҳам фарқ бор) Бобурнинг қўшинлари Лоҳур яқинида Бехорхон Лодий лашкарлари билан қаттиқ жанг қиласидар.

Эрскин Бобурнинг Ҳиндистонга юриш қилишларининг сабабларини шундай изоҳладиди: Бобурнинг наазари Ҳиндистонга тушиб турган кезларда Дехлида Иброҳим Лодий ҳукмрон эди. Лекин салтанатда, шаҳзодалар орасидаги тарқоқлик, бўлиниш, бир-бирларига бўлган рақобат салтанатни анчагина бўшаштириб қўйган эди. Иброҳимнинг амакиси Аловуддин жиянининг давлат юритиш сиёсатидан норози бўлиб, мадад

сўраб, Бобур ҳузурига, Кобулга келган. Бизга маълумки, Бобур Кобулга янги келган кунларданоқ уни Ҳиндистонга таклиф этишган эди. Султон Иброҳимнинг рақиби бўлмиш Лоҳур ҳокими Давлатхон ҳам афғон беклари билан тил биритириб, Бобурдан ёрдам сўраб мурожаат қиласи. Чунки у ўз кучлари билан унга қарши жўнатилган Бехорхон Лодийнинг қўшинига бас келишига кўзи етмас эди. Кўрсатилажак ёрдам эвазига Бобурни шоҳ қилиб кўтаришга ваъда беради...

Алқисса, Бобур бешинчи юришга узоқ ва жиддий ҳозирлик кўргач, ўз ўрнига шаҳзода Комрон Мирзони қўйиб, 1525 йил 17 ноябр (ҳижрий 932-йил), сафар ойининг 1-куни) Ҳинд сорига жўнайди. Бадахшондан Ҳумоюн Мирзо, Фазнадан Хожа Калон ўз қўшинлари билан келиб қўшиладилар...

Мазкур тарих ибтидоси, жанг учун Понипатни танлаш қарори «Бобурнома»да шундай баён қилинган: «...Ва бу асбоб ва олот тайёр ва мукаммал бўлғондин сўнг, тамом бекларни ва сўз билур ўбдан йигитларни даги кенгашга тилаб, ом кенгаш қилиб, раъйлар мунга қарор топтиким, Понипат шаҳредур, маҳаллот ва уйлари қалин, ҳар тараф маҳаллот ва уйлар бўлур, яна атрофини ароба ва тўра била беркитиб, туфакандоз ва яёқни ароба ва тўра орқасида таъян қилмоқ керак.

Бу қарор била кўчуб, ора қўнуб, панжшанба куни жумодил-охир ойининг салхи Понипат келдук. Ўнг қўл шаҳр ва маҳаллот бўлди. Олимизда тартиб қилғон тўралар бўлди. Сўл қўлда ва баъзи ерларда хандақ ва шоҳ бўлди. Ҳар ўқ отими ерда юз-юз эллик отлиқ чиққудек ерлар қўюлди...

«Фанимнинг ҳозир черикини бир лак ченарлар эди. Ўзининг (яъни Иброҳим Лодийнинг — Қ.К.) ва умаросининг минг-икки мингга ёвуқ фили бор дерлар эди...»

«Одина куни ражаб ойининг секкизида фарз вақтида қоровулдин хабар келдиким, фаним ясад келадур. Биз даги жибаланиб, яроғланиб отландуқ...»

Шундан кейин Понипатда тенгсиз жанг бошланади. Бобур 12 минг кишилик аскарлари билан Лодийнинг 100 минг лашкар ва мингдан ортиқ филларига қарши от суради. «Бу ҳол ва бу қувват била таваккул қилиб, ўзбакдек юз минг қари ёғини орқада кўюб, Султон Иброҳимдек қалин чериклик ва васиъ мулк-лук подшоҳ билә рўборў бўлдук...» Ўз қўшинидан қарийб ўн баробар ортиқ ёйига рўборў чиқмоқ ҳар

қандай шоҳ, саркардага ҳам насиб этавермайдиган улув бир жасоратким, буни овруполик бобурийшунослар ҳам, Ҳиндистоннинг ўз тарихнавислари ҳам эҳтирос билан, сидқидилдан эътироф этмоққа ошиқадилар. (Умуман, ҳинҷ тарихчи олимлари, тадқиқотчилари, бобурийшуносларининг Бобур ва унинг авлодларига са-мимий хайриҳоҳлиги, меҳри уларнинг ҳар бир аса-рида яққол сезилиб туради). Бобур шижаатли шахс эди. У улкан империя тузиш иштиёқи билан ёнарди. У чидамли, матонатли, жасур, ўлимдан қўрқмас, ўзига ва ўз тақдирига ишониш каби хислатларга эга эди. Бундай хислатлар унда кишиларни олға етаклаш туй-гусини кучайтирас эди. «Шундай қилиб, унинг туган-мас ғайрати ва шахсий хислатлари ўз баҳтини Ҳиндис-тонда синааб кўришга чорлар эди» (Л. П. Шарма).

Бобур Понипатда ўзи севган ҳарбий санъат — «тўлғама» усулини қўллаб, лашкарбоши ва жангчиларининг ва шахсан ўзининг юқорида айтилгандаи бе-қиёс журъат ва жасоратлари туфайли зафар қозона-ди. Лекин камтарин Бобур бундай улкан ғалабасини аввало Оллоҳнинг иноятидан, деб билади. «Тангрি та-оло фазл ва қарами билан мундоқ душвор ишни биз-га осон қилди ва андоқ қалин чеरикни ярим кунда ер била яксон қилди... Таваккулимизга яраша тенгри та-оло ранж ва машаққатимизни зое қилмай, мундоқ зўр ғанимни мағлуб қилиб, Ҳиндустондек кенг мам-лакатни мафтуҳ айлади. Бу давлатни ўзумизнинг зўр ва қувватидин кўрмасбиз, балки тенгрининг маҳзи лутф ва шафқатидиндур ва бу саодатни ўзумизнинг саъй ва ҳимматидин билмасбиз, балки тенгрининг айни ка-рам ва иноятидиндур...»

(Ҳайҳотки, ярим кунда саранжом бўлган беомон жангда қирқ — эллик минг одам ҳаётдан кўз юмган эди!)

...Бобур Иброҳимга нисбатан анча тажрибали ва қобиятли саркарда эди,—деб ёзади Бобур ғалабаси-нинг бош сабаблари ва омилларини ҳалол ва холис изоҳлаган ҳинҷ тарихнависларидан бири Л.Шарма.— Бобурнинг кучли артиллерияси ва ҳарақатчан отлиқ-лари бор эди, бунинг устига у уруш олиб боришнинг энг яхши усуllibарини қўллар эди. Иброҳимда эса зам-бараклар йўқ эди ва урушни одатдаги усул билан, ўз филларига ишониб олиб борарди. Тўпларнинг гум-бурлашидан даҳшатга тушган филлар эса ўз аскарла-рини оёқлари остида мажақлаб ташлар ва ҳар томон-

га қочар эди. Иброҳим қўшини яхши ташкил қилинмаган эди. Бунинг устига афғон амалдорлари ва уларнинг қўл остидаги фуқаро назарида ҳам Иброҳимнинг обрўси яхши эмас эди. Қўшиннинг кўпчилик қисми унга содик бўлмаган ёлланма аскарлардан иборат эди. Бобурйлар лашкари эса, аксинча интизомли ва тажрибали аскарлар эди. Бу ҳам саркарданинг мөхирлигидан далолат берарди».

Доктор Р.П. Трипатхи: «Унинг (Бобурнинг - Қ.Қ.) бобоси Темур түғлоклар сулоласига (Деҳлига - Қ.Қ.) қандай якун ясаган бўлса, бу жанг ҳам (Понипат жанги — Қ.Қ) Лодийлар сулоласига ана шундай нуқта қўйди». «Шундай қилиб, — Трипатхи хуолосасини якунлайди Шарма, — Лодийлар ҳокимияти Ҳиндистон сиёсати сахифаларидан бутунлай супуриб ташланди...»

10 август, сешанба.

Эрталаб турибок, нунушта ҳам қилмасдан йўлга тушдик. Мақсад тезроқ оламшумул Понипат жангоҳини кўрмоқ ва зиёрат қилмоқ эди.

Понипат кўчалари... Шундай машҳур шаҳар ноободгина эмас, ноозода ҳам эди. Шундоқ кўчада ха-лойиқ билан аралашиб кетган мол, от, эшакларнинг эгаси йўқмикин дейсиз. Белигача балчиқ из солган чўчқалар бемалол ахлат титишиб юрибди. Ёнида чи-йиллаб юрган болачалари ҳам бор... Шундай жойларда кўзингни юмиб олгинг келади. Лекин истасанг ҳам, истамасанг ҳам эрталабки довdir шамол учираётган ифлос қофоз парчалари, хас-хазон, чангдан қўзларинг беихтиёр юмлади.

Собиқ жангтоҳга шаҳарнинг ўртасидан чапга—ши-мол томонга кириб кетиларди. Ана шу кўчада бир ман-дир (ҳиндуларнинг, тўғрироғи буддага сифинувчиларнинг ибодатхонаси — мусулмонларнинг масжиди каби) учради. Очиқ дарвозасидан ҳовлиси кўриниб турибди. Бино ниҳоятда ҳафсала билан, буддизм ақидалари асосида қурилган ва ҳашамдор қилиб жиҳозланган, ҳовли ҳам покиза эди. Юқоридаги ҳолат билан қиёсласангиз, жез узукка қўйилган бриллиант қўзга ўхшайди...

Понипат жанги ёдгорлиги шаҳардан тўрт чиқиримча ичкарида, экинзор, дараҳтзор, ям-яшил далалар ўртасида экан.

Жангтоҳ мемориал - музейга айлантирилган бўлиб, атрофи темир панжаралар билан ўраб, қўргон қилин-

ган эди. Биз боргандა қўрғоннинг темир-панжара дарвозасида қулф осиғлиқ эди. Дарвозанинг икки ёнидаги девор-устунда урду ва инглиз тилларида битилган ёзув қалбимиз торларини титратиб ўтди.

«ПОНИПАТ» ЖАНГИГА ҚЎЙИЛГАН ЁДГОРЛИК

Бу ёдгорлик Понипат майдонида бўлган машҳур, муҳим жанглар ёдгорлигиdir. Бу жанглар Ҳиндистон тарихида катта ўзгаришлар ясаган. Биринчи жанг Бобур ва Иброҳим Лодий ўртасида 1526 йилда бўлиб ўтган. Бу жангда Бобур Иброҳим Лодий устидан ғала-ба қозониб, Ҳиндистонда буюк империяга асос солди. Иккинчи жангда, 1556 йили Акбар Байрамхон ёрдамида Одилхон Сурининг бош вазири Хейму устидан ғалаба қозонди.

1761 йили бўлиб ўтган учинчи жангда эса Аҳмадшоҳ, Ал-Абдолий Содашиб Бҳад ва Рав Пешва бошчилигидаги марахатларни енгади.

Тарихий ёдгорликларни сақдаш жаъмияти.

ХАРИЯНА.

Тарихий ҳақиқат нақадар мардона эътироф этилган битиклар эди бу!

Тарих ва тақдирларнинг ўхшашлигини қаранг.

Бобур ҳам, унинг валиаҳд ўғли Ҳумоюн ҳам айнан шу жойда, шу тарихий тешалиқда ўз қўшинидан бир неча бор кўп ва қудратли лашкарга эга бўлган рақибларини тор-мор этишган.

«Бобурийлар тарихида унча кўп жанг бўлган эмас,— деб ёзади Дуглас Е. Стреусанд ўзининг Оксфорт университети нашриётида, 1989 йили чоп этилган «Темурнийлар империясининг шаклланиши» китобида, — бу суоланинг ғанимлари билан бўлган жанглари орасида учта тарихий жанг ўз моҳиятига кўра бобурийларни дунёга танитган. Понипат шаҳри яқинидаги икки улкан ғалаба. Бобурнинг 1926 йили Иброҳим Лодий устидан қозонган ғалабаси, Байрамхоннинг (Ҳумоюннинг бош вазири, кейинчалик Акбарнинг лашкарбошиси - Қ.Қ.) 1556 йилдаги Хейму устидан қилган ғалабаси, Ханва ёнида (1527 йил) Бобур томонидан Рона Санганинг тор-мор этилиши...»

Дарвоҷе, Ханва жангига Л.П. Шарма хulosасига кўра, Понипат жангидан ҳам муҳимроқ аҳамиятга молик

бўлган, чунки Ражпутлар ҳақиқий маҳорат кўрсатиб, қаҳрамонона қурашиштан. Уларнинг қўшини анча интизомли бўлиб, Рона Санга раҳбарлигида жасурлик билан жанг қилишган. Уларнинг ҳеч бири хоинлик қилмаган. Сон жиҳатдан ҳам Ражпутлар устун эдилар (тариҳий манбаларнинг кўпчилигида ражпутлар 80 минг, Бобур қўшиналари 40 минг эди, деб маълумот беради).

«Бобурийлар жангларда устунлик қилдилар,— дея давом этади Дуглас Е. Стреусанд юқоридаги асарида,— ва бу ҳарбий ҳақиқат Ҳиндистон ярим оролида ХУIII асрғача ўз кучини намойиш қилиб келди. Жангдаги Бобурийларнинг устунлиги ўт очувчи қуроллар туфайлигина эмас, балки сарбозларнинг яхши ҳарбий таълим кўрганликларида ҳамдир».

Ана шундай тўқнашувларда бир неча бор вайрон этилган жой энди шундай кўркам хиёбонга айлантирилган эдики, бир замонлар шу ерда жанг бўлганлигига ақлинг бовар қилмайди. 1992 йили август ойида ниҳоясига етказилган мазкур мемориал комплекс боғида евкалифт дараҳтлари аза тутаётган мўйсафидалардай савлат тўқиб турибди. Бошқа ёш, ранго-ранг манзарали дараҳтлар раста бўлиб ўсмоқда. (Уларни синдирган, зиён етказганга жарима белгиланган. Тўғри, жарима миқдори жуда оз — 10 рўпий. Лекин менимча мана шу 10 рўпийнинг қиммати биз тасаввур қилгандан анча юқори бўлса керак). Афсуски яшнаб турган бу чиройли дараҳтларнинг номларини айтиб берадиган одам бўлмади. Ажриқнинг ниҳоятда сўлим, гўзал гиёҳдигига шу ерда амин бўлдим. Хитой атиргули, гули беор, қиззиш районлар хиёбон манзарасини жуда очиб юборган эди.

Қирқ ёшлардаги боғбон-қоровул Прэмд Кумар бизнинг Бобур ютидан эканлигимизни эшиттач, бу ерда бўлиб ўтган жангу-жадаллар, хиёбон тарихини билганича гапириб берди. Дараҳт кўчатлари уч жангда ҳалок бўлган ватан ўғлонларига атаб экилганини қайта-қайта таъкиддади.

Хиёбон йўлакларига мармар ётқизилган, мемориал деворлар текисланган, силлиқланган харсанг тошдан кўтарилиган эди.

Бўйи икки метрлар чамасидаги мармар деворларда, барельеф-панноларда эса Бобур ва Иброҳим Лодий жанг манзаралари акс эттирилган эди. Бобур ва Иброҳим Лодий бир-бирларига яқинлашишмоқда. Уларнинг ортидан жангчилар келишяпти. Бобур зам-

бараклар, аравалар, отлиқлар, пиёдалари билан, И.Лодий эса филлари, отлик аскарлари билан...

Девор пастида панжара билан иҳоталанган гулзорлар...

Сайфиддин ҳожи ака жуда кўнгли бўш одам-да. Тиловат қилаётганида ҳам сарасоф солиб қараб турсангиз, киприклиридан майда томчилар сизаётганини пайқаб қоласиз. Ҳозир ҳам шундай ҳол рўй берди. Унга қўшилиб бошқаларнинг ҳам кўнгли бўшашиб кетди.

Соат ўнларда яна йўлга тушдик. Деҳлигача 88 чақиримли масофа қолган эди. Хайриятки, яна баҳри-дилимизни очадиган табиат қўйнига кириб одик. Лекин, бу жозибали табиат фақат бизнинг совутгичли уловимиз ойнасидан томоша қилишга яхши эди. Баъзан ташқарида, ям-яшил оламда бирдан енгил шабада эсиб ҳаво мириқиб симирадиган – салқин, оромбахшдай туюлади. Аммо ойнани очсан, яна гуп этиб оғзибурнимизга иссиқ шамол, оғир ҳаво урилади. Ҳатто катта дарё бўйларининг ҳавоси ҳам оғир эди.

Табиат манзаралари эса, Деҳлига яқинлашганимиз сари янада гўзаллашиб бораради. Арилардай тўзиб юрган сўзанак-ниначилар галасига дуч келиб, фоят ҳайратга тушдим. Назаримда улар минглаб, миллионлаб эди...

ЭСКИ ВА ЯНГИ ДЕҲЛИДА

Соат ўн икки. Деҳлига кириб боряпмиз. Чап томонда Хиндистоннинг машхур эгизак дарёларидан бири, деярли ҳар бир ҳинд бадиий фильмида «иштирок этадиган» Жамна осойишта оқмоқда эди.

Лал қалъа (Қизил форт) биноларини туташтирувчи кўприк-туннел остидан ўтаяпмиз. Атрофда, шундоқ майсазор ерларда қашшоқлар, беишлар олчайиб ётишибди қашиниб, аксарияти кийимлари хароб, сочсоқоли ўсиб, патак бўлиб кетган эркаклар...

Жавоҳирлаъл Неру, Махатма Ганди, Индира Ганди ва бошқа сиёсий арбоблар куйдирилган зиёратгоҳ тепаликлар ёнидан ўтдик.

М. Ганди шоҳкӯчасидан, Ражив Ганди хотирасига барпо қилинаётган боғ оралаб юрдик.

Биз «Стреет Д-2-А» деган манзилни, яъни Ўзбекистон консулонасини излаб борарадик. Деҳли жуда маҳобатли, аҳолиси қалин шаҳар экан.

Маълумки, Деҳли жаҳондаги улкан ва кўхна шашарлардан бири. У Индрапрастха шаҳри яқинида, VIII асрнинг I ярмида, яъни бундан 1200 йилдан зиёдроқ аввал барпо қилинган.

(Ҳинд афсоналарида ривоят қилинишича, соҳибжамол, соғдил қиз Драупади худолардан (ҳиндлар худони кўп деб ўйлашади) ўзига ҳар жиҳатдан етуқ умр йўлдоши ато этишни илтижо қиласди. Қизнинг ҳусни-жамоли, иффату ҳаёси, оқила ва зукколиги қошида лол бўлган худолар унга бир эмас, бирданига бешта баркамол эр ато қиласдилар. («Махобхарат» видеофильмини эсланг). Индрапрастха – ана шу беш эр томонидан севикли рафиқалари Драупади шарафига қурилган шаҳардир. Деҳли 1526 йилдан бобурийлар салтанатининг пойтахти бўлган. 1800 йилларнинг бошида Деҳлини инглизлар эгаллади. 1857—59 йилларда бу ерда ҳинд миллий қўзғолонлари бўлиб ўтган ва уларга бобурийлар сулоласининг сўнгги вакили – Баҳодир шоҳ, II Зафар бошчиллик қиласган. Ҳинд халқи инглизларнинг босқинчилик, талаш, талон-тарож қилиш сиёсатидан нафратланиб, фазабга тўлиб, уларга қарши курашган. Ҳолбуки, тарихий манбаларда бобурийларга нисбатан бундай умумхалқ норозилиги ва қарши ҳаракатлари ҳақида маълумотлар учрамайди. Деҳлини Маҳмуд Фазнавий, Амир Темур ва бошқа шоҳ ва лашкарбошилар забт этишган.

Бобурнинг узоқ йиллар юрагини ўртаб келган орзуумидлари беш бора қиласган юришларининг ижобати, рўёби шу шаҳарда воқе бўлди.

Дарҳақиқат, Бобур Кобулда қўним ва қарор топган вақтдан (1503—1504 йиллар) бошлаб ҳамиша Ҳиндистон иштиёқи билан яшаган эди. Гоҳи бекларнинг сустлиги, гоҳи оға-иниларнинг ноҳамжиҳатлиги боис Ҳиндистонга юриш нияти амалга ошмай, сурилиб келади. Ниҳоят Бобур бу масалани бек ва бошқа аъёнлари ўртасида узил-кесил кўндаланг қўяди, бу гал ҳеч ким бу режага қарши бир сўз айтишга ботинолмайди. Шундан кейин 1519 йили биринчи марта Ҳиндистон сари лашкар тортади. Бажурни қийинчилик билан эгаллаб, Бехрагача етиб боради. «...Талон ва тарож қилмай,—деб ёзади Бобур ўзининг «Бобурнома» асарида ўша юриш тафсилотларини муҳтасар баён этар экан, — Бехра элиға моли омон солиб, нақд ва жинсдин — тўрт лак шаҳрухий олиб, черик элиға навқар адади била улашиб, Кобулга мурожаат қилилди (яъни қайтилди - К.К.) ...»

«Ушбу тарихдин тўқиз юз ўттиз иккигача (мело-
гий 1526 йил — К.К.), — давом этади Бобур,—бажид
юрушуб, етти — секкиз йилда беш навбат Ҳиндустонга
черик торттук. Бешинчи навбат Тангри таоло ўз
фазл ва карами била Султон Иброҳимдек ғанимни
мақхур ва абтар қилиб Ҳиндустондек васъи мамла-
катни бизга мусаххар қилди...»

Понипатдаги ғалабадан сўнг Бобур йўл-йўлакай
Шайх Низом авлиёнинг қабрини зиёрат қилиб, Дех-
лига етиб келади. «Дехли қўргонини сайр қилиб..,
Ҳожа Қутбиддиннинг мозорини тавоб қилиб Султон
Фиёсидин Филбон ва Султон Алоуддин Хилжийнинг
мақбара ва иморатлари ва минорини ва ҳавзи хосни
ва султон Бахлул ва Султон Искандарнинг мақобири
ва боғотини сайр қилиб ўрдуға» тушади. Ва одина
куни Мавлоно Маҳмуд ва шайх Зайн, яна бошқалар
иштирокида жума номозида Бобурнинг номини хут-
бага кўшиб ўқийдилар ва уни Ҳиндистон ҳукмдори
деб халқقا эълон қиласидар. Балки айнан ана шу куни
Темурий Умаршайхнинг ўғли, андижонлик Заҳирид-
дин Муҳаммад Бобур қирқ уч ёшида Дехли таҳтига
ўтиради. Бу тантанали маросим 1526 йилнинг 10 ма-
йида (ҳижрий 932 йил ражаб ойининг 28-ида) содир
бўлган. Мана шу тарихий воқеаага ҳам 470 йил, салкам
беш аср бўлиби (Албатта Дехли у даврларда ҳозир-
гидай катта ҳудудга, маҳобатли биноларга, халқаро
мавқега, шунча гавжум кўчаларга ва ҳозиргидаи кўп
сонли аҳолига эга бўлмаган).

Мана, шунча йилдан кейин Ўзбекистон давлати-
нинг мустақилликка эришуви шарофати ва республи-
камиз Президентининг қўллаб-қувватлаши, Андижон
вилоят ҳокимлигининг қарори ва фидоий инсон Зо-
киржон Машраб ўлиининг саъй-ҳаракатлари билан
Бобурнинг(ва бобурийлар сулоласининг) чет мамла-
катларда, шу жумладан Ҳиндистонда кечган ҳаёти ва
қолдирган илмий, адабий, маъморчилик ва бошқа со-
ҳалардаги мерослари, ёдгорликларини чуқурроқ ўрга-
ниш мақсадида ташкил этилган Бобур номли халқаро
илмий экспедиция таркибида Бобур изидан Дехлига
келиб турибмиз. Албатта, бизгача ҳам Ўзбекистондан
адиблар, олимлар кўп келишган, лекин Андижондан
бундай маҳсус экспедиция уюштирилмаган эди.

Шунинг учун ҳам биз масрур ва мамнун, айни
чоғда зиммамиизда тогдек мастьулиятни ҳис қиласидик.
Биз Бобур ва бобурийларнинг Ҳиндистон заминида

қилган ишлари, қолдирган мерослари, қурган тарихий обидаларининг мумкин қадар кўпроғини кўрмоғимиз, атрофлича ўрганмоғимиз зарур эди. Бизни Ҳиндистон ҳукумати, илм аҳдию зиёлиларининг, оддий халқ ва-килларининг Бобур ва бобурийларга муносабатлари қандайлиги жуда қизиқтирарди. Қолаверса, бу ердаги сиёсий вазиятни, Ҳиндистон ҳукуматининг мустақил Ўзбекистон ҳақидаги фикрини билиш жуда муҳим эди. Буларнинг ҳаммасини бир томонга қўйиб турган чоғимизда ҳам, бу катта мамлакатда икки ҳукумат ва икки халқ ўртасидаги дўстлик, биродарлик, ҳамжи-ҳатлик, ҳамкорлик муносабатларини, алоқаларини яна-да яхшилаш, янги погоналарга кўтаришдек олижаноб ва foятда масъулиятли, шарафли вазифани уddaлаш учун Ўзбекистондан ваколатли вакил бўлиб келган кон-сулимиз билан кўришмоқ, унинг ҳоли-баёни, ишла-ридан огоҳ бўлиб, белини ва қўлини қисиб қўймоқ бизнинг оддий инсоний ва юртдошлиқ бурчимиз эди.

Хуллас, қидирган манзилимизни топиб бордик. Дeҳ-линиг нисбатан чеккароғида жойлашган икки қаватли вилла(бой-бадавлатларнинг уйи экан) кираверишига, тахтакачга инглиз тилида «Ўзбекистон консулхонаси» деб ёзиб қўйилиби. Мана шу иккита сўзда Ўзбекисто-нимизнинг чинақам мустақиллиги нишони ва эътиро-фини кўриб, англаб қалбим беихтиёр мавжланиб кет-ди, ичимдан фурур ҳисларига йўғрилган чукур энти-киш отилиб чиқди. Мана, энди бизнинг ҳукуматимиз ҳам жаҳондаги жаъмики мустақил, озод, эркин мамла-катларнинг ҳукуматлари қаторида ва улар билан тенг ҳукуққа эга, улар билан ўзгалар иштирокисиз, восита-сисиз, йўл-йўриқларисиз борди-кељди ва исталган со-ҳада ўзаро ҳамкорлик қила олади. Ўзгаларнинг кўзига мўлтирамай, изн сўрамай иш тута олади. Жумладан бизнинг экспедиция ҳам ана шундай эркин ҳаракат, ўзбеконаликининг қалдирғочларидан бири эди...

Зокиржон ака билан Аҳмаджон ичкарига кириб кетишибди ва бир оздан кейин тахминан қирқ-қирқ беш ёшлардаги (кейин билсан элликнинг остонасидан хатлаб қўйган экан, лекин ёш кўринади), соч-мўйлови қоп-қора, миқтигина, оппоқ юзли, истараси иссиқ (у кулиб келарди) киши билан чиқишибди. Демак Аҳмад-жон Луқмонов шу одам. Мен олдинроқда турган эдим. Аҳмаджон қучогини очиб яқинлашди-да, «Келинг, Қам-чибек ака» деб кўришибди. Демак у мени таниркан. Менга ҳам бу йигитнинг чехраси танишроқ эди.

Консулимиз ҳамма билан қучоқлашиб кўришаркан, мен унинг ҳаяжон зоҳир кўзларидан, енгилгина титраб чиқаётган сўзларидан ватан соғинчи, ҳамюртлари, миллатдошларига зорлик-интизорлик ифодаси ва оҳангларини пайқадим.

Ичкарига — Ўзбекистоннинг Ҳиндистон республикасидаги расмий ваколатхонасига кирдик. Хоналар шинам, кресло, диванлар ниҳоятда замонавий: катта, кенг, юмшоқ эди. Консулхонада мустақил республикамиз байроғидаги юлдузлар атрофга жило таратиб турарди.

Луқмоновнинг хатти-ҳаракатларидан, телефондаги инглиз тилида эркин ва дадил сўзлашувларидан, ёрдамчиларига муносабатларидан, биз билан бўлган сұхбатидан унинг ўз ишини яхши биладиган ва яхши кўрадиган, масалаларга юксак масъулият билан ёндошадиган, тажрибали дипломат консул ва дилкаш инсонлиги билиниб турарди. У икки давлатнинг ўзаро алоқалари, Ҳиндистоннинг ёш Ўзбекистонга муносабати жуда яхши эканлиги, катта доираларда бизнинг юртимизга қизиқиш кундан-кунга ортиб бораётганини аниқ мисоллар билан гапириб берди. Айниқса мустақил Ўзбекистон Республикасининг биринчи Президенти Ислом Абдуғаниевич Каримовнинг Ҳиндистонга, Ҳиндистон премьер министри Нарасимха Рао жаноблари нинг Ўзбекистонга қилган самимий, дўстона ташрифлари қадимдан кўнгиллари яқин ва ошно икки халқ дўстлиги ва қадрдонлигининг яна бир ёрқин ифодаси бўлганлиги, ўзаро ҳамжиҳатлик ва ҳамкорликнинг янги, янада самарали босқичга кўтарилишига ишончли ва таянчли замин яратилганлиги ҳукумат доирасида ҳам, зиёлилар даврасида ҳам мамнуният билан эътироф этилаётганини алоҳида таъкидлаб ўтди.

Биз Аҳмаджон Луқмонов билан сафаримиз йўналиши, йўл-йўлакай кирадиган, кўрадиган жойларимиз ва бошқа ташкилий масалалар хусусида маслаҳатлашиб, ундан йўл-йўриқлар олгач, консулхонамиздан кўнглимида анча хотиржамлик тууб, бу ерда суюнчимиз борлигига, ишларимизнинг бароридан келиши, сафаримизнинг самарали бўлишига ишонч билан чиқдик.

Биз бу ерга келишда Деҳлининг чағ биқинидаги айланма йўлдан, нисбатан нообод кўчалардан юрган эканмиз. Энди бутунлай бошқа тарафдан шаҳарнинг марказига томон кетдик ва ўзимизни бутунлай янги оламга кириб қолгандек ҳис қилдик. «Тинчлик» кўча-

сининг кенглигини ифодалашга «ҳайҳотдай» деган сифат ожизлик қиласи. Кўчанинг икки томонида Америка, Канада, Англия, Покистон, Россия ва бошқа қудратли давлатларнинг башсанг биноларга жойлашган элчихоналари... Ораларида анча масофа бўлиб, ҳар бирининг олди, ён-атрофлари катта-катта хиёбон-майсазорлар, асосан манзарали дараҳтлардан иборат чигилинг боғлар...

Бу – Дехлининг янги шаҳари эди. Маълумки, Дехли уч маъмурий қисмга бўлинади: Дехли муниципиал корпорацияси ҳудуди, ҳарбий шаҳарча – форт ва Янги Дехли. Инглиз истилочилари асосан бу бепоён мамлакат бойликларини ташиш, бобурйлар қурган тарихий обидаларнинг девор ва йўлакларидағи тоза мармарларни, пештоқлардаги қимматбаҳо безак-тошларни кўчириб олиш билан шуғулланишган. Аммо мана шу Янги Дехлини Нью Дели номи билан (1911—31 йиллар), оврупо юртларининг шаҳарлари андозасида, тан олиш керак, гўзал қилиб-қуришган. Менимча инглизлардан ҳинд ҳалқига қолган ижобий ёдгорлик ва хотиралардан бири ҳам шу бўлса керак. Дарҳақиқат, биз Ҳиндистоннинг Амритсар, Понипат, Агра, Фотехпур Секри, Ферузобод, Канпур, Лакнав, Банорас, Калькутта, Пури, Ҳайдаробод, Аврангобод, Жайпур каби йирик машҳур ва яна бир неча кичикроқ шаҳарларини кўрдик. Лекин биронтаси озодалиги, осойишталиги, айланма кўчаларининг кенг ва батартиблиги, хиёбонларнинг ораста ва ям-яшиллиги жиҳатидан Янги Дехлига ўхшамас эди. Бу шаҳар, асосан маъмурий идоралар, элчихоналар, банклар, ёдгорликларга ва меҳнаткашлару меҳмонларнинг сайр этиб дам олишларига мўлжалланган чоғи, марказда хонадонлар ҳам жуда кам эди. Ҳа, айтгандай, ҳукуматнинг марказий қароргоҳи ҳам Янги Дехлида жойлашган. Хуллас, менинг фикри ожизимча, жаҳондаги энг дилбар, энг кўркам шаҳарлардан бири...

Салқин кўчалардан бирида катта дараҳтга тирмашиб чиқиб тушаётган маймуналар (мартишкалар)га дуч келдик. Бир галаси дараҳт ёнидаги бинонинг томонида, яна бир қанчаси ерда ҳам уймалашиб юришарди. Дараҳтнинг номини «жаму» дейиши. Маймуналар ҳудди тут қоққандай ана шу дараҳтнинг шоҳларини силкиб, таёқ билан қоқишараб, тўқилган меваларини (майда ги-лосга ўхшайди) югуриб-югуриб териб олиб, шерикларидан қизғонгандай, апил-тапил оғзига тикишарди.

Палика – Деҳлидаги энг катта бозорлардан бири ёнида бизни Аҳмаджон Луқмоновнинг танишлари – ўттиз-ўттиз беш ёшлардаги икки йигит кутиб олди. Улар меҳмонхонага жойлашиш масаласида бизга ёрдам беришлари керак эди. Меҳмонхона излаб Эски шаҳарнинг жуда кўп бурчакларига кириб чиқдик. Йўллар тор, қатнов тифиз, юриш ниҳоятда қийин ва секин. Меҳмонхоналарнинг бири дидимизга, бири эса пули-мизга тўғри келмасди (меҳмонхона нархлари жуда ба-ланд эди). Кеч кириб кетди. Юравериб (тўғрироғи тор кўчалардан машинамиз билан· бирга ўзимиз ҳам қисилиб, бир ёнлаб ўтаётгандай бўлардик), чарчаб, эзилиб кетдик. Охири, сўраб-сўраб, кимларнингдир тавсияси билан яна бир жойга бордик. Қарасак, даст-лаб келганимиз «Интернационал-Ин» меҳмонхонаси. Мен беихтиёр кулиб юбордим ва Абдулла Ориповнинг айланиб-айланиб ўз уйига келиб қолган чол ҳақидаги ривоятини эсладим.

Энди бошқа борадиган жойимиз, тоқатимиз ҳам қолмаган эди. Бунинг устига мезбон-кузатувчиларимиз сабрларининг ҳам таги кўриниб, безовтароқ бўлиб қолишганди. Тўғриси, ўзимиз ҳам улардан хижолат бўлиб кеўдик. Нималар деб ўйлашдийкин?

Меҳмонхонада қизиқ бўлди. Юравериб, ичаклари-миз ҳам бир-бирига ёпишиб кетган эди. Ошхонага буюртма берсак тайёrlаб беришаркан. Уларнинг овқати қанақаю, қачон пишади, деб, ошпазлардан ту-шонкаларимизни иситиб беришни илтимос қилдик. Улар рози бўлишди, лекин тушонкаларни олиб ки-рувдик, капалаклари учиб, «ҳай-ҳай, тезда йўқотинг-лар, бошлиғимиз кўриб қолса, бизларни ишдан, сиз-ларни меҳмонхонадан ҳайдашади», деб ваҳима қилиб юборишиди. Шундагина ҳиндаларнинг ҳали ҳам сигирни муқаддас билишиб, мол гўшти емасликларига амин бўлдик. Тушонка банкасининг лоақал мол сурати ту-ширилган ёрлигини йиртиб ташлаш биронтамизнинг хаёлимизга келмабди...

11 август, чоршанба.

Деҳли сайрини бобурийларга гувоҳ бўлган жой-лардан бошлашга қарор қилиб кўчага чиқдик. Эски ва Янги Деҳлининг марказий кўчаларидан ўтиб боряпмиз. Кайфият, таъбимиз тарози посангисидай гоҳ, у ёқقا, гоҳ, бу ёқقا оғиб туради. Бирдан юқорида тас-

вир этилгандай, озода, чиройли манзарали жойларга чиқиб қоламиз. Яшаш уйлари йўқдай, фақат дараҳтзор-хиёбон-йўллардан иборатдай, маҳкама бинолари ҳам кўчадан анча ичкарида—дараҳтлар орасида кўринади. (Шаҳарнинг эски ва янги ҳудудлари чегарасини билиб олиш қийин эди, менимча бундай қатъий чегаранинг ўзи йўқ бўлса керак.) Бирдан хароба бинолар, олди-атрофида ахлатлар уюлиб, биноларнинг айвонлари, деразалари остида, шундоқ йўл четларида, хиёбон ўрталарида, каттароқ дараҳтлар тагида олчайиб, фужанак бўлиб ётган бекорчи, бечора қашшоқларни кўриб ҳаммамиз бош тебратса бошлиймиз... «Бирни кўриб зикр қил, бирни кўриб шукр қил», деганларидай, мен Андижонимизнинг бурчак-бурчак жойларида тўпланиб қолган ахлатни кўрсам табиатим тирриқ бўлиб, ғашим келарди. Деҳлидай катта ва машхур шаҳардаги ноорасталик, бесарамжонлик, бетартибликлар, ахлат, ҳас-хазонлар, хусусан дўконларнинг олди-орқасию ёнларида ғарам бўлиб ётган чиқинди қофоз ва бошқа ашёлардан иборат ёқимсиз манзараларни кўриб, эҳ-ҳе, Андижоним кўчаларидан сув ўтириб ичсан арзир экан, деб кўнглим анча таскин топди. Бу ерда асосий кўчалар ҳам тор, одам ниҳоятда кўп, туртнимай юришнинг сира иложи йўқ эди. Балки шу сабабдан озода, саранжом-саришта тутиш, тартибга солишнинг иложи йўқдир...

Айниқса, шаҳар четларида хунук кўринадиган жойлар, эски, кир-чир кийинган эркаклар, аёллар, болалар кўп учрарди. Улар баъзи ерларда аралаш бўлиб ётишарди...

Жума масжидини орқа йўлдан бир амаллаб топиб бордик. Шаҳарнинг кўҳна қисми — Шоҳжаҳонободда қад кўтарган ва катта ҳудудни эгалловчи бу салобатли бинонинг пойдевори ердан бир неча газ баланд бўлиб, унга кириш учун кенг зиналардан чиқиб бориларди, — масжид гўё шаҳарнинг елкасида тургандай туюларди. Чор тарафи хона-хонақолардан иборат бўлиб, ўртада бир неча минг киши номоз ўқиидиган очиқ майдон бор эди. Ақбаршоҳнинг невараси, Жаҳонгирнинг ўғли Шоҳ Жаҳон даврида ва шубҳасиз унинг амри билан мустаҳкам қилиб қурилган бу тарихий иморатнинг яна кўп йиллар ҳалқа хизмат қилиши аён. 1193—1200 йилларда Маҳмуд Фазнавий Шимолий Ҳиндистонга ҳукмронлик қилиб турган даврда барпо қилинган Қувват ул Ислом масжидини қидир-

мадик. Менимча Бобурнинг Ҳиндистон ҳукмдори деб эътироф этилиши ва эълон қилиниши муносабати билан унинг номига ана шу масжида хутба ўқитилган бўлиши керак.

Масжидан тушаверишда бир морбоз қария илон ўйнатиб ўтирибди. Очроқ нос рангдаги қўзойнакли илон қопдан бошини чиқариб қилпилляяпти. Воҳ, одамзот-ей заҳарли илонни ҳам авраб ноғорасига ўйнатади-я.

Бу ердан Лаъл қалъя («Лил қалъя» ҳам дейишиди) — Қизил форт сарой комплекси яқин эди, пиёда ўтдик. 1947 йил 15 август куни Ҳиндистоннинг озодлик байроғи дастлаб ана шу маҳобатли қалъя пештоқига тикилган эди. Афсуски у ерга, ҳатто унинг яқинига ҳам йўлатишмаётган эди. Футбол майдонларига киришдаги темир ғовлар каби Лаъл қалъя атрофи ҳам ана шундай панжаралар билан ихота қилинган бўлиб, полисменлар туришарди. Яна тўрт кундан кейин, яъни 15 августда бўладиган Ҳиндистон миллий озодлик байрамига ҳозирлик муносати билан қалъя беркитиб қўйилган экан.

— Қозоқнинг айрони кўп, ҳиндларнинг ғайрами, деб бекорга айтилмаган, — деди Аҳмаджон.— Бу мамлакатда бир йилда 243 кун байрам.

— Олинг-а, жуда оширвордингиз-ку, — эътиroz билдириди кимдир.

Ростдан ҳам оширворган бўлиши мумкин, лекин ҳар ҳолда Аҳмаджоннинг Ҳиндистон ижтимоий-сиёсий ҳаётини, бу юртдаги таомиллар, урф-одатларни яхши билиши турган гап. Чунки у Тошкент Давлат дорилфунунининг шарқшунослик куллиёти ҳинд бўлимини битирган, Ҳиндистонда икки йил ишлаган.

Шоҳ Жаҳон, Акбаршоҳ, Аврангзеблар номига қўйилган катта, обод кўчалардан қалбими'з фурур ва ифтихор ҳисларига тўлиб ўтиб, Миллий мозийгоҳни топиб бордик. Баҳтимизга ҳаво булатли, нисбатан салқинроқ эди, бир оз шабода ҳам эсиб турибди.

Музей биноси менимча Деҳлидаги энг кўркам, салобатли бинолардан бири эди. Икки қаватли. Бўлимлари кўп ва хўп. Ашёлар унданда бисёр. Ҳинд ҳалқи ҳаётига оид жимжилоқдай темир ё сопол парчаси ҳам кўринарли жойдан ўрин олган. Бўлимларнинг, ашёларнинг жойлашиш тартибида ҳафсала, юксак дидалий, батартиблик сезилиб турибди. Хоналар, заллар озода, ёруғ, шинам.

Бобурийлар (Бобур, Ҳумоюн, Ақбар, Шоҳ Жаҳон, Аврангзеб, Баҳодиршоҳ), уларнинг хотинлари ва бошқа яқинлари ҳаётига оид миниатюра суратлар анчагина бор экан. Айниқса, бобурий маликаларнинг суратлари ниҳоятда гўзал эди. Албатта улар ҳаётда суратдагидан-да гўзалроқ, соҳибжамол бўлишган. Мана шу суратларни тасвирларга туширмоқчи эдик, мозийгоҳ мутасаддилари рухсат беришмади. Фотоаппаратда хуфягина қилиб олинди холос. Шунингдек миниатуralарда Лаъл қалъа, Тож Маҳал, Жомъе масжиди ва бошқа тарихий обидалар ҳам акс этган.

Қўлёзмалар бўлими мозийгоҳнинг энг аввалги, кираверищдаги хонасида жойлашган эди. У ерда «Бобурнома»нинг 1598—99 йилларда кўчирилган нусхаси, «Жаҳонгир тузуклари», «Акбарнома», Фирдавсийнинг «Шоҳнома»си ва бошқа асарларнинг қўлёзмалари бор эди.

Лекин, мозийгоҳдан энг кўп ўрин олган ашёлар — ҳиндларнинг тош, ганч ва бошқа воситаларда акс этган худолари эди...

Кечки пайт соат олтиларда Аҳмаджон Луқмонов таклифига биноан консулхонамизга бордик. Иккинчи қаватдага каттагина хонага дастурхон тузасибди. Консулхона ходимлари, жумладан Тошкент Давлат дорул-фунуни шарқшунослик куллиётининг ҳинд тили бўлимини битириб, хизмат сафарига келганига анча бўлиб қолган Баҳромжон деган йигит ватандошлари билан учрашганидан мамнун, елиб-югуриб хизмат қиласди. Лекин, Аҳмаджон Луқмоновнинг ҳаммадан кўра хурсандроқ, самимий, чин юрақдан мезбонга айланганиги яқзол сезилиб турарди. Ўзбекистон юртининг бир бўлаги, дахлсиз ҳудуд — консулхонамиз Ҳиндистонда собиқ шўро республикалари ичida биринчи бўлиб фаолият кўрсата бошлаган эди. Кейин Украина элчинонаси очилган эди холос, ҳозирча.

Зокиржон Машрабов экспедициямизнинг хусусан кейинги икки кун ичидағи фаолияти ҳақида гапириб берди. Ҳаммаси жойидаю, фақат ҳиндларнинг байрами кўп экан, ишимизни сал орқага тортияти, — деди у кулиб.— Бугун Қизил қалъани кўришга катта иштиёқ ва не-не умидлар билан борувдик, берк экан... — Кейин Зокиржон aka эртага ва ундан кейин қиласиган ишларимиз борасида консулимиз билан маслаҳатлашиб одди.

— Бошлаган ишинглар жуда хайрли, — деди Аҳмаджон Луқмонов, — натижаси зўр бўлишига ишончим

комил ва ўйлайманки, бу экспедиция Бобур ва бобурийларни излаш баҳонасида икки ҳалқ ўргасидаги дўстлик ришталарини мустаҳкамлашга хизмат қилиши билан ҳам катта сиёсий аҳамиятга эга сафар бўлиб тариҳда қолади. Бундай экспедицияни ташкил этиш, ўн минглаб чақирим масофаларни босиб, мослашилмаган иқдим шароитида юриш, изланишлар осон эмас. Агар чинакам фидойилик, ватанпарварлик бўлмаса, шунчаки қизиқиши, ҳавас билан менимча, иш битмас эди. — Консулимиш шундай деб, зарур бўлса ҳар қандай ёрдамга ҳозирлигини, Ўзбекистон ваколатхонасига бемалол суюниш мумкинлигини айтиб, кўнглимизни янада кўтариб юборди. — Қани энди, дастурхонга марҳамат қилинглар, — деди у жилмайиб, — биз Сизларни меҳмонга чақирганмиз, озгина дам ҳам олиш керак. Худди Ўзбекистонда, ўз уйингларда ўтиргандай бемалол, ёзилиб ўтиринглар.

Биз чиндан ҳам ана шундай тасаввурда эдик.

Дастурхон жуда қуюқ эди: ҳозиргача биз кўриб келган Шарқ мамлакатларида кенг урф бўлган таом—жўжа гўшти, турли резаворлардан тайёрланган аччиқ салат, нон, печенье; мевалардан — олма, банан ва менга Лоҳўрда Саҳидодларникида жуда маъкул бўлиб қолган ажойиб бир лаззатбахш неъмат—манго... Шуниңдек, бизни ҳинд вискиси ва пивоси, пепси-кола, минерал сувлар билан сийладилар. Бу ернинг таомилига кўра ичимликларга муз солиб ичдик. Ўзиям ичингизга кириб қолган оловдай азойи-баданингизни қиздириб юборадиган Ҳиндистон иссиғининг шаштини муз, муздай ичимликлар қайтариб турмаса, бетоқат бўлиб, ўзингизни қўйтгани жой тополмай қоласиз экан.

Ош, яъни палов дамлашаётган экан, Сайфиддин ҳожи ака ташаббусни, яъни қапгирни ўз қўлига оди. Япон гуручининг хусусияти мураккаброқ экан. Йигирма икки кундан бери биринчи марта палов едик.

Зиёфатда бир ҳинд йигити ҳам қатнашди. Луқмонов билан ҳаммаслак, ҳамфир бўлиб, унга ёрдамлашиб тураркан. У Ўзбекистонда бўлган экан, ошни қошиқ билан еётганимизда, кулиб: ўзбеклар паловни қўлда ейишарди-ку,—дегандай ишора қилди қўлини оғзига олиб бориб (аслида-ку ҳиндаларнинг ўзи ҳам таомни асосан қўлда ейишади).

Меҳмонхонага қайтдик. Мен, одатдагидай кундузи кўрган-кечиргандаримни яна бир-бир хаёл кўзгусидан ўтказаман, хотирамнинг янги ва эски саҳифала-

рини титкилайман, дафтар-китобларни вараклайман... Ушалиши ғоят қийиндай туулган орзу—Ҳиндистонда, унинг пойтакти Дехли кўчаларида юрганим ва бу музаззам шаҳар оғушида тунаб хаёл суришларга мушарраф бўлганим учун беҳад қувонаман, қалбим ёқимли ҳисларга тўлади. Аввало, шундай кунларга етказгани учун тангрига минг қатла шукурлар келтираман ва бу имконни (яъни экспедицияни) мустақиллигимиз шарофати, Бобур руҳининг даъвати, юртимиз, вилоятимиз раҳнамоларининг инояти, деб биламан, экспедициянинг бош ташаббускори, ташкилотчиси ва ижро-чиси Зокиржон Машраб ўғлига нисбатан қалбимнинг туб-тубида миннатдорлик туйгулари мавжланади. Айнан ўша одам туфайли бугун Ҳиндистонда, ватаандошимиз, буюк мутафаккир, шоир, ҳар жиҳатдан ибратли инсон Бобур ҳинд тахтига ўтирган Дехли шахрида турибман.

Аслида мен ҳам, аксарият ўзбек ёшлари каби Ҳиндистонни бир кўрмак орзусини ўсмирилигимданоқ дилимга туккан эдим. 1960 йилларнинг ўрталарида «Янги Дехли» номли ҳинд бадиий фильмни Узбекистон телевидениесида қайта-қайта намойиш этилган. Унда соҳибжамол ҳинд қизлари, муҳаббат ва вафо, рақс санъати, Ҳиндистон табиати ниҳоятда жозибадор, мафтункор қилиб кўрсатилган эди. Мен кейинчалик машҳури жаҳон бўлиб кетган Вайжантемалани илк дафъа ўша фильmdа кўриб, унинг ҳусни-жамолига, мақсад ва фикрни, тасдик ё раддияни нигоҳлар билан ифодалаш санъатига, умуман актёрлик маҳоратига қойил қолиб, шу артистни бир кўрсам деб астойдил орзу қилганман (бу гапларга ҳам ўттиз йилдан ошди). Аҳмаджон орқали суриштириб кўрдим. Вайжантемала-нинг ёши ўтиб, деярли киноларда рол ўйнамай қўйгани, қайси бир штатдан Ҳиндистон парламентига депутатлигини эштириб, нимагадир яна анча ҳовримдан тушдим. Қалбимдаги эҳтирослар дарёси эндигина мавжурга бошлаган ҳаводор чоғимдаги нурафшон тасаввуримга соя тушиб колишидан чўчиридими, билмадим. Бунинг устига бизнинг йўлимиз Вайжантемала депутат бўлган штат томонга ҳам, ҳинд киноси ва киночиларининг асосий ватани бўлган Бомбейга ҳам тушмас эди... Мен санъатини ниҳоятда ҳурмат қиладиган яна бир фавқулодда талант соҳиби Раж Капур эса оламдан ўтиб кетган эди. Менимча, Раж Капур ва унинг фильмлари («Дайди», «Жаноб-420», «Сангам»

ва бошқалар) ўзбек кино мухлисларида Ҳиндистонга бўлган қизиқишининг ортишига, икки халқ орасидаги ҳамкорлик, ўзаро муносабатларнинг, меҳр-оқибатларнинг янада мустаҳкамлашишига жуда кўп хизмат қилган...

Ҳинд ва ўзбек халқларининг дўстлиги, бир-бирига меҳр-оқибати, қизиқиши халқ оғзаки ижодида, ривоятларда ҳам ўз ифодасини топган. Шулардан бирида Ҳиндистон Лайли-Мажнунлари—бухоролик Иззатбек билан панжоблик соҳибжамол қиз Сўхниларнинг соғ муҳаббати ҳақида ҳикоя қилинади. Мана шу ривоят асосида Ҳиндистонда «Сўхни ва Махивал» (Иззатбек маҳбубаси отасининг молбоқари бўлиб юргани учун уни «Махивал», яъни «молбоқар» дейишарди), Ўзбекистонда эса «Иззатбек ва Сўхна» номи билан машҳур афсоналар вужудга келган. Бу ривоятдаги севишгандарнинг фожеий тақдирлари асосида ҳинд киночилари бадиий фильм ҳам ишлашган.

Алқисса, кўпгина сўзлари, куйлари ўхшаш ва уйқаш икки халқ дўстлигига оид мисоллар юзлаб, балки минглаб саҳифалардан ортиб қолажак, аммо ҳар қанча бўлса, қалбларга бемалол жо бўлғусидир.

ҚИММАТГА ТУШГАН ҲАВАС

12 август, пайшанба.

Эрталаб Ҳиндистон сиёсий арбобларининг жасадлари куйдирилган муқаддас жойларни зиёрат қилмоқ мақсадида узоқ юриб бордик. Йўлларда, чорраҳаларда соқчилар, йўл назорати ходимлари жуда кўпайиб кетибди. Махатма Ганди кўчаси ниҳоятда узун ва кенг бўлиб, зиёратгоҳлар шаҳарга киришда ҷапда, йўл бўйлаб кетган боғ-хиёбонда эди. Махатма Ганди, Лаъл Баҳодир Шастри, Индра Ганди, Ражив Гандилар руҳи кўкка парвоз қилган жойлар... Худди табиийдек баланд-паст, чиройли, ям-яшил майсазорлар, хотира сифатида қўйилган ёдгорлик тошлари темир панжара орасидан кўриниб туради.

Афсуски, бу ерга ҳам ҳеч кимни қўйишишмаётган эди. Сабаби—таомилга кўра Озодлик байрамидан уч кун оддин, ҳукумат премьер министри мамлакат улуғлари гулхан аланглари билан бирга сўнгти йўлга кузатилган майдончаларни зиёрат қиларкан. (Қай бир

премьер министрға шу жойда, шундай кунда сүиқасд қилинган эди, ўша воқеадан кейин бу жойда эҳтиёткорлик чораларини, назоратни кучайтиришган бўлсалар керак).

Ҳафсаламиз пир бўлди. Ишимиз юришмаётганидан бир оз ўқинсак-да, бутунлай умидсизликка тушмадик. Чунки ҳали қайтишда яна бир имконимиз бор эди.

Қайтдик. Дехлининг чап ёнбошидаги айлана, ҳалқа йўлдан бораётган эдик, қаршимиздан келаётган иккита лорсиллаган, ниҳоятда улкан филга (устида филбонлар ҳам бор) кўзимиз тушиб, тўхтадик. Фарруҳ билан Тўлқин ака ўзларида йўқ суюнишиб, филларнинг савлат тўкиб, солланиб юришини видеога, кинога, фотосуратта олиш учун машинадан отилиб тушишди. Филбонларнинг бири — 16—17 ёшлардаги ўспирин биздек ҳавасманд хорижийларни кўп кўрган бўлса керак, имо-ишора билан филга минасизларми, деган маънони англатди. Экспедиция дастурида «филда шаҳар айланиш ва илмий иш билан шугулланиш» деган илова йўқ эди, албатта. Лекин экспедициямизнинг энг оқсоқол ва энг эрка аъзоси, тарихчи олим Сайфиддин ҳожи Жалилов Дехли шаҳрининг этнографик ҳаётини фил устида туриб кузатгиси келди шекилли, нима қиласиз деган маънода Зокиржон акага қаради. Бу орада қорамагиз филбон филининг қулоғига нималарнидир шивирлаб, йўғон бўйнига яланг оёғи билан ниқтаган эди, фил чўккалади. Бироқ чўккалаган ҳолатида ҳам унинг кажавасига қўл етмас эди. Қолаверса, синалмаган, баҳайбат жониворнинг баланд тогдек елкасида омонат тебраниб турган кажавага нозик ниҳол олимнинг бир ўзини чиқариб қўйишга раҳбарнинг кўнгли бўлмади шекилли, яна биронтанглар бирга чиқинглар, деб бизга юзланди. Бошқалардан садо бўлмагач, ҳожи домлага мен шерик бўлдим. Иккаламиз тунд чеҳраси бирдан ёришиб кетган филбон ёрдамида, филининг ерда бувланиб турган тиззаларига оёқ қўйиб, ўсмир ўтирган фарибина кажавага чиқдик. Кажавада яна икки-уч кишилик жой қолди. Фил аста тикланди: чиндан ҳам жуда баланд ва ваҳимали эди, боз устига кажава худди бир томонга оғиб кетаётгандай, чайқаллаётгандай туюларди. Теле ва кино тасвирчиларимиз яна ишга тушишди — улар учун ноёб кадрларбоп ҳолат юзага келган эди-да. Ўсмир филни ўн бешйигирма қадам юргазди-да, яна қайтариб келди. Тушдик. Аҳмаджон болага пул бериш керак, деб қолди.

Йўғ-е, шунгаям пул берадими, деб ажабландик. Лекин таржимонимиз филбон ҳиндлар табиатини яхши биларкан, ўсмир қора таёқдай қўлинни узатиб «рупий, рупий» деб талаб қила бошлади. Зокиржон ака майли, беш-ён рупий бериб қўяйлик, деди. Аммо Қоравой анойилардан эмас экан. 10 рупий узатсан бош тебратади, 25 рупий берсан, йўқ, дейди, 50... қисқаси, «савдолаша-савдолаша» 100 рупий бериб қутудик. Шундай қилиб, икки кишининг бир неча дақиқа фил устига чиқиб тушиши бизнинг ўша пайтдаги пулимизга 4 минг сўмга тушди!.. Вой, тавба-ей!.. Мен шундай ҳолатни ўзимизда хаёлан тасаввур қилиб кўрдим. Лекин «отингни бир минай-чи», деган меҳмондан ҳақ талаб қилинишини хеч ақлимга сифдиролмадим. Аксинча, от эгаси бўлган ўсмир шундай ишга асқотгани учун, меҳмонни озгина бўлса-да хурсанд қилолгани учун ўзида йўқ қувонади, боши осмонга етиб, яйрайди.

Бизни сайр қилдирган филнинг ёши 50 да бўлиб, исми Жанта эди. Бир қаватли томлардан юксак, баҳайбат бўлишига қарамай, ювош ва итоатгўй эди: эгаси чўқ деса чўқяпти, тур деса—туряпти. Иккинчи фил Чандри ҳам бунисидан қолишмасди. Менимча уларнинг ёши ҳам, баландлиги, семизлиги ҳам баробар — яъни эгизакка ўхшашарди. Улар йўл четидаги майсаларни харидек узун ва йўғон хартуми билан, ўргандек, бир тутам-бир тутам узид ейишарди. Иккала филнинг ҳам харсангдек улкан бошининг юз қисмига, кўзи остидан бошлаб пушти рангда катақ-катақ чизгилар билан зеб берилган эди.

Бу филлар мен ҳайвонот боғларида кўрганларимга қараганда анча катта катта эди. Уларнинг тепасидаги филбонлар узоқроқдан улкан чинор каллигида ўтирган қуш каби кичкина кўринарди. Мен филнинг қуруқликда яшайдиган энг улкан ҳайвон эканлигига амин бўлдим. Хартумининг йўғонлигини кўриб, унга нимжон майсалар қандай илашяптийкин, деб ўйлайсиз. Лекин фил ана шу хартуми билан кўкатлар ичидаги игнани ҳам олармиш. Ҳужжатли ва бадиий китобларда таърифланишича у энг қўпол ва бесўнақай жонивор бўлишига қарамай, жуда ҳушёр, зийрак, эпчи, эҳтиёткордир. Фил қалин чангальзорда ҳам баргларни шитирлатмай, шох-шаббаларни қисирлатмай, мутлақо шарпасини сездирмай юради. Шунингдек, фил жуда оқибатли, меҳрибон, раҳмдил ҳайвон. Ярадор ё касал

шеригини ташлаб кетмайди, аксинча атрофида парво-на бўлиб, хартуми билан турғизишга, юргизишга ҳар-кат қилади. Чуқурга тушиб кетган ҳамроҳини харту-ми билан чиқариб олади ёки чуқур четини кучли оёқлари билан депсаб, ўткир тишлари билан ўйиб, пастлатиб ҳандақдаги филнинг чиқиб олишига имкон яратади. Бу жиҳатдан у отдан ҳам, итдан ҳам, баъзи ҳолларда ҳатто одамдан ҳам олий ҳимматлироқ, оли-жаноброқ бўлиб кўринади...

Айлана йўл анча баланд бўлиб ўнг томонда қай-ноқ, гавжум ҳаёт уммонига фарқ бўлган шаҳарнинг катта бир қисми жуда аниқ кўринарди. Иттифоқо қандайдир обида-ёдгорликка кўзимиз тушиб қол-ди-ю, таваккал қилиб, «Тойота»миз жиловини ўша томонга бурдик. Тепада яқин кўрингани билан, анча ичкари экан. Ингичка, тор йўллардан қийинчилик билан бордик. (Бошқа яхшироқ йўл бор экану бил-мабмиз-да). Яқинлашганимизда бир неча катта-ки-чикдан анави томи кўриниб турган бино ҳанақа қалъя, ёдгорлик? деб сўраймиз. Ҳаммаси елка қиса-ди. Қарангки, шаҳарнинг шимоли-шарқ томонида, чеккарогида қолган бу иншоот Ҳумоюн Мирзо қаб-ри устига ўғли Акбар томонидан қурилган улкан мақбара эди.

Маълумки Бобур ниҳоятда меҳрибон ота бўлган. У айниқса валиаҳд ўғли Ҳумоюнни ортиқ даражада яхши кўрган, унга ўз жонини нисор этган. Ўлими олдидан эса Ҳумоюнга ҳам укаларингта меҳрибон бўл, мабодо улар сенга ёмонлик қилишса ҳам, уларни жазолашдан ўзингни сақла, дея васият қилади. Бо-бур Ҳумоюнга бежиз бундай насиҳат қилмаган, у отадан сўнг оға-инилар, хусусан ўгай ақа-укалар ўртасида тож-тахт талашиш можаролари бўлмоқлиги муқаррарлигини яхши билар эди. Шундай бўлади ҳам: бошқа онадан туғилган Комрон Мирзо билан Аска-рий акалари Ҳумоюн бошига анча мусибатлар соли-шади. Ҳумоюн улардан ғазабланган пайтларида та-баррук падари бузрукворининг васиятини эслаб, ўзи-ни тутади. Чунки у аслида, табиатан ҳам кўнгилчан, раҳмдил бўлган. Шунга қарамай, баъзи манбаларда Ҳумоюн укаларидан қайта-қайта хоинлик ва жафо-лар кўравергач, охири сабр косаси тўлиб, Комрон-нинг кўзларини ўйиб олишига буйриқ беради, лекин кейинчалик яна ўзи табиблар ёрдамида укасининг бир кўзини даволатишга эришгани айтилади.

Умуман олганда, Ҳумоюн отасини бафоят ҳурмат қилган қобил фарзанд эди. Унда пушти паноҳи Бобурнинг уддабуронлик, тадбиркорлик, олижаноблик каби бир қатор улуғ фазилатлари мужассам эди. Айтишиларича, у жуда хушрўй, хушфеъл, хушахлоқ бўлган. Балки, Бобур кўп орзулаган ва кечроқ ўғил кўргани боисми (Ҳумоюн 1506 йили — Бобур йигирма уч ёшга кирганида туғилган) ва ёким ўзи суюб олган хотини Моҳим бегимнинг яккаю-ёлғиз ўғли бўлгани учун ҳам Ҳумоюнга меҳри ортикроқмиди... Ҳумоюннинг туғилиши муносабати билан ўтказилган маросимни ҳам Бобур мамнуният, ички бир ифтихор билан шундай таърифлайди: «...Ҳумоюннинг валодатидан беш-олти кундин сўнг Чорбоққа чиқиб, Ҳумоюннинг валодатининг тўйи бўлди. Бек ва бегот улуғ-кичик сочиқ, келтурдилар, қалиноқ танга ўкулди, ондин бурун онча қалин оқ ёрмоқни бир ерда кўрулмайдур эди, хили яхши тўй бўлди». Яна шуни ҳам қўшимча қилиш керакки, «Бобурнома»да энг кўп тилга олинган исм ҳам «Ҳумоюн»дир. Шунингдек, Бобур ўзининг йирик асарларидан бири бўлган «Мубаййин»ни ҳам ўғли Ҳумоюнга бағишлаб ёзган эди. Бу далилларнинг барчаси шубҳасиз ота меҳридан, севгисидан нишона бўлиб, балки шунинг учун ҳам Бобур ўзи тириклигида ҳаётини, тожу тахтини ўғлига ўз ихтиёри билан, икки қўллаб топширгандир...

Ҳумоюн аввалида эсанкираб, мамлакатни, салтанатни бой бериб қўйган бўлса-да, ўн беш йилдан кейин ўзининг тарих олдидаги, Буюк темурийлар олдидаги хатосини тузатди, аks ҳолда, балки «Бобурийлар сулоласи» деган ибора тарих зарварақаларидан ўрин олмаган бўлур эди. У ўзи узган ҳалқани ўзи улади ва Ҳиндистонда бир неча аср яшаган бобурийларнинг буюк, мустаҳкам салтанатига замин яратди. Афсуски Ҳумоюн ҳам отаси Бобур каби оз яшади — атиги эллик бир йил умр кўрди, аммо шу қисқа ҳаёти мобайнида ўз салтанати ва Ҳиндистон учун, унинг ҳалқи учун кўп яхши ишлар қилишга улгурди, яъни мамлакатнинг иқтисодиёти, ободончилиги, меъморчилигига, ижтимоий, маданий ривожига жуда катта ҳисса қўщди. Ҳумоюн санъатни foят севар, илм аҳдини эъзозлар, форс ва туркий тилларда назм битган яхшигина шоир ҳам эди. У Ҳиндистонда миниатюра санъатининг юзага келиши ва шаклланишига шахсан раҳбарлик қилган, бош-қош бўлган.

Биз ана шундай улуг инсон мақбарасини тасоди-
фан кўриб қолмаганимизда, балки бу ҳам юрақда кет-
ган армонларимиздан бири бўлиб қолармиди...

Мақбара жуда катта, хоналари кўп бўлиб, унда
Хўмоюндан ташқари яна бир қанча бобурийларнинг
(хотинлари ва бошқа яқин кишилари) қабр, даҳмала-
ри ҳам бор эди. Афсуски сафана тошларидағи битик-
ларнинг кўпини ўқий олмадик, ўқиганларимизнинг ҳам
аксариятини англамадик, танимадик.

Дарвоҷе, тасвирга олувчи аппаратлар билан ки-
риш, тасвирга олиш мумкин эмас, дейишган эди, одат-
дагидай мақбара-музей ходимлари билан «келишдик»,
яъни, чой-чақа дегандай... Иш битиришнинг бу ом-
мавий усули жаҳоннинг ҳамма жойида бор шекил-
ли-да...

Мақбара зиёратидан сўнг яна Миллий музейга йўл
олдик. Сабаби кеча музейнинг қўлёзмалар бўлими му-
дири, шарқшунос олим, доктор Насим Ахтар адаби-
ётшунос, тарихнавис олимларни таклиф этиб, биз би-
лан мулоқот уюштиromoқчи эди. Дарҳақиқат, Насим
Ахтар хонасига беш-олти киши йифилган эди. Сух-
батни Насим Ахтарнинг ўзи бошлади ва кўпроқ ўзи
гапирди. У жиккаккина, хатти-ҳаракатлари тез, сер-
гайрат, жонкуяр одам бўлиб, ниҳоятда тез гапирарди.
У бизга музейда Ўзбекистон бўлимини очишга қарор
қилингани, ҳозир шунга тайёргарлик бораётганини су-
юнчилаб, бизнинг келиб қолганимиз айни муддао
бўлгани, уларга ёрдам беришимиз мумкинлигини таъ-
кидлади.

Насим Ахтар сўзга ҳам чечан эди. У Самарқанд,
Бухоро, Фарғона, Амир Темур, Навоий, Жомий каби
номларни тўғри талаффуз қиласарди. «Бобурнома» қўлёз-
масининг форс тилида кўчирилган иккита нусхасини
бизга мақтаниб кўрсатди.

Биз бирон янги гап чиқиб қолармикин, деган ни-
ятда Зебунисо ва унинг қабри, мақбарасидан сўз оч-
дик. Афсуски ҳинҷ дўйстларимиз, ҳамкасларимизнинг
ҳам бу борада биздан ортиқ нарса билмасликлари маъ-
лум бўлди. Каромат Алихон юқорида номи зикр этил-
ган китобида Зебунисо мақбараси ҳақида озгина тўхта-
либ ўтади: «Темурийлар аёллар учун икки қаватли
даҳма қурадилар ва жасад пастки қаватда сақланган
ҳолда, сафана юқори қаватда сақланади. Навон қот
(«қот» — пушту тилида «қалъа» дегани)даги бу мақ-
бара (Зебунисо мақбараси — К. К) Аврангзеб даврида

қурилган биноларга ўхшамайди, балки Шоҳ Жаҳон давридаги биноларга ўхшайди». «Тарихчиларнинг фикрича, — дейди олим яна, — у (Зебунисо — К. К.) Деклидаги Қизил қалъада вафот эттан бўлиб, Қобул дарвозаси ташқарисидаги «Теес хазори боғ»да дафн этилган. Мақбара 1885 йили темир йўл ўтказиш пайтида бузилган...»

Баъзи манбаларда эса Зебунисо Деклидаги Зарзарий қабристонига дафн этилган, дейилади.

— Бобурийлар авлоди ҳақида аниқ бир ишончли маълумот йўқ, — деди Насим Ахтар — Декли чеккароғида ғарибона ҳаёт кечирувчи бир одам мен Бобур авлодиданман, деб юради, деб эшитганман. Бироқ бу гапнинг ҳам қанчалик тўғри ё нотўрилиги тўғрисида бир нарса деёлмайман.

Биз Лоҳурда эшитганимиз Жалолиддин Акбарни эслатган эдик, Насим Ахтар: бунақалар учраб туради, ўзини шоҳлар авлодидан ҳисобланишини хоҳдайдиганлар кам дейсизми, деб хулоса ясади. Демак, Ҳиндистонда бу масалага унча қизиқиш йўқ экан. Лекин Бобур ва бобурийларнинг яхши ишларини эътироф этишади. Масалан Рифақат Алихон деган олимнинг мулоҳазалари шундай бўлди.

— Кўчалардаги чиройли хиёбонлар, фавворалар, мақбараю чиройли биноларни кўрсангиз, билингки, булар Бобур ва бобурийлардан қолган ёки ўшалардан ўрганиб, андоза олиб бунёд этилган. Ўзбекистон ва Ҳиндистон ўртасидаги маданий-маърифий-адабий алоқаларнинг янада мустаҳкамланиши, барқарорлашуви ва абадий давом этишига бобурийлар пухта замин яратиб қўйишган. Шунинг учун ҳам биз бобурийларни ҳурмат қиласиз...

Хуллас, мулоқотимиз жонли, қизиқарли ўтди. Насим Ахтар ва бошқалар таржимонимиз Аҳмаджоннинг урду ва ҳинд тилларини яхши билишига тан беришиб, унга оғаринлар айтишди.

Кўчага чиқсан, машинамиз ёнида баланд бўйли, басавлат бир йигит турибди.

— Машинадаги ёзувни кўриб қолиб, Сизлар билан икки оғиз сухбатлашиш илинжида кутиб турибман, — деди у ва ўзини Мирзо Муҳаммадшоҳ деб таништирди. Ҳозир у Нью-Йоркда яшаб, ишларкан. Техника соҳасида муҳандис-механикман, дейди. Айтишича, унинг отаси шу ерда, яъни Деклида бўлиб, Бобурнинг ашаддий муҳлиси эмиш. — Ўзим ҳам... — дейди йи-

гит. — Бобур юртини бобом юрти деб биламан, у ерларни бир кўриш энг катта орзуим...

Дарҳақиқат, Муҳаммадшоҳнинг қўлида муқовалири, ички безаклари рангли, ниҳоятда чиройли ишланган, ҳажман катта «Бобурнома» (инглиз тилида) китобальбоми бор эди. Бизга варақларини очиб кўрсатди, ўзича суратларга изоҳлар берди. Альбомнинг нархи 240 рупий эди. Альбомга биз ҳам қизиқиб қолдик ва уни қаердан сотиб олиш мумкинлигини сўраб олдик...

Насим Ахтар бошловчилигида Матхура кўчасидан юриб, Бедил қабр-мақбарасига бордик. Мирзо Абдуқодир Бедил...

Деҳли дорилфунунининг ридери доктор Қамар Раис «маданият тарихида неча минг йиллик ажойиб адабий саҳифаларин яратиб, жаҳон хазинасига арзигулик дурдоналар қўша олган кўхна Ҳиндистоннинг» тўрт буюк сиймосини санаб ўтар экан, буни қарангки, ана шу тўрт дурдонадан учтасининг ота-боболари бизнинг ватандошларимиздир. Ахир қувонмай, гуурланмай бўладими? Шу ўринда Ҳиндистоннинг сиёсий арбобларию (Ж. Неру), олимлари, адибларининг ҳалоллиги, холислиги, тантлилиги, бағри кенглиги, мардоналигига яна бир карра тасанинолар айтиш жоизки, улар ана шу улуғ алломаларнинг ота-боболари бизнинг заминимиздан эканлигини ошкора, баралла эътироф этадилар ва бу билан улар ўз маданияти тарихини камситган бўлмайдилар, аксинча, у буюк зотларнинг Ҳиндистон ҳавосидан нафас олиб, ана шу жозибали диёр бафрида униб-ўстанлиги, камолга етганлиги ва умумҳинд маданиятини юксак чўққига олиб чиқа олганликлари билан ҳақли равишда фахрланадилар ҳамда бизда ўзларига нисбатан самимий ҳурмат-эҳтиром уйғотадилар.

Ана шу уч буюк зотнинг биттаси нозик ҳаёл шоир, забардаст адиб, жамиятшунос ва табиатшунос, файласуф олим Мирзо Бедилдир. У Банголиянинг Азимобод шаҳрида, 1644 йили туғилади, бобурийлардан Шоҳ Жаҳон, Аврангзеблар ҳукмронлик қилган давларда яшади, ижод қилди. Бир қанча муддат Аврангзебнинг ўғли Муҳаммад Аъзамшоҳ саройида бўлган. Бироқ Аъзамшоҳнинг ўзи ҳақида мадҳ ёзиш таклифини рад этгач, саройдан четлаштирилди. Бедил рубойнавис сифатида жуда машҳур бўлиб, унинг бу борадаги ижодига хос энг муҳим фазилат кўп маъноликдир. Қатқат пардалар ичидағи келинчак мисолидаги рубоий-

лардан юз китобхон ё тадқиқотчи юз хил маъно топади, лекин юз биринчи, асил маънони Бедилнинг ўзигина айтиб бериши мумкин холос. Бу Бедил назм уммонининг фақат биргина жилосидир...

Қуйидаги рубоийларнинг мағзини ўзингизча бир чақиб кўринг-а:

*Она кўрганда ўзин бегубор,
Шодликдан минг ранга бўлур жилвакор.
Инсон мижозига гул очги билим,
Гулласин деб қоқ ер бағрида баҳор.*

* * *

*Бу бир денгиз, иши бизларни бўймоқ,
Тигу шамширингта ишонма ҳар чоқ,
Ҳар тўлқин интиқом камони бунда,
Ундаги ҳар балиқ ўқ тўла садоқ.*

* * *

*Дил нуқтасин қилдим ишқимга тумор,
Ўраб дедим: «Бўни ёримга юбор».
Шавқидан ғунчадек очилиб кетди,
Шодликдан қинига сиғмаги тақрор.*

* * *

*Жудо бўлган дўстлар топишиб тақрор,
Қонли кўз ёшларин тийса ҳам як бор,
Аммо сирли дўстлик, вафо мазмуни
Хижрон дамлари деб йиғлашади зор.*

* * *

*Ул бадмост санамнинг ишқига кўнгил,
Фамин кўтаролмай, бўлди-ку чил-чил.
Бир умр ўтиргик вафо базмида,
Унинг қўлига жом, бизникига дил...*

Ҳиндистонликларнинг ҳам Бедилга меҳри-муҳабати баландлиги сезилиб турибди. Унинг мақбарасига ажратилган алоҳида хиёбон анчагина кўркам сайдгоҳ-зиёраттоҳ эди. Мақбара хиёбоннинг ўртасида жойлашган бўлиб, анча яхши сақланган. Насим Ахтарнинг айтишича, Бедил мактабларда ўқитилади. Музейда сақлананаётган қўлёзмаси тилло суви билан ёзилган.

Мақбарани шоирнинг афғонистонлик дўстлари қуришган экан. Унинг пештоқига «Мирзо Абдуқодир

Бедил оромгоҳи» деб ёзиб қўйилган. Сайфиiddин ҳожи ака ватандошларимизнинг улут фарзанди ва катта файласуф шоир руҳига Куръон тиловат қилди, яъни Зокиржон ҳожи Машраб ўғли таъбири билан айтганда, ўз инсоний бурчимиznи адо этдик.

Шу ерда мен Зокиржон акадан яна бир карра хурсанд ва миннатдор бўлдим. Аввало у Андижонда сафар-йўналиш дастури, режалари тузилаётгандан менга сиз ҳам ўз таклифларингизни айтинг, деган ва мен бошқа фикр-мулоҳазаларим қатори ота-боболари асли ўзимизнинг Турон заминимиздан чиққан, лекин тақдир тақозоси билан Ҳиндистонда яшаб ижод этишган машхур аллома шоирлар Амир Хисрав Деҳлавий, Мирзо Абдуқодир Бедил ва Мирзо Голиблар қабрини зиёрат қилиш, уларга оид маълумотларни ўрганиш зарурлигини айтганимда Зокиржон ака бажонидил рози бўлган ва режамизга киритган эди. Мана бугун ўша ниятимиздан бири амалга ошганидан ўзимда йўқ мамнун эдим. Менинг бу буюк инсонларга эътиқодим, хурматим юксак эди.

Ўша кўчадан бир оз орқага қайтиб, айланиб яна ўнгга бурилдик-да, қўлтиқсимон бир кўчага кириб яна бир тарихий обида рўпарасидан чиқдик. «Пурана қалъа» яъни «Эски қалъа», дейиши. Икки қаватли, қуббадор бу бино Ҳумоюн даврида ва уйнинг амри билан қурилган, демак, «Дин паноҳ» масжиди ва у билан ёндош кутубхона шу экан. Ҳумоюн Деҳлини, Ҳиндистонни иккинчи марта, узил-кесил қўлга олгандан кейин узоқ яшамай, 1556 йили 24 январ куни шу кутубхона зинасидан тушиб келаётганида оёғи то-йилиб ийқилиб тушган ва табибларнинг қаттиқ уринишлари ҳам наф бермай, икки кундан кейин дунёдан кўз юмган эди. Тақдирни қарангки, шунча беомон жангу-жадаллардан, даҳшатли, ўткир тифли қиличлар зарбидан омон қолган бош, унча баланд бўлмаган зинадан ерга тушганда суяги синиб, ўлуф бир шоҳ, олижаноб, қалби кенг инсон умри жўнгина, осонгина поёнига етган. Ҳумоюн вафоти олдидан ўғли Акбарни таҳт вориси қилиб тайинлади.

Афсуски, қалъа берк экан, ичкарига киролмай, уни ташқаридан, узокроқдан девор оша томоша қилиб қайтидик.

Яngи Деҳли менимча Ҳиндистондаги энг мафтункор шаҳар. Унинг энг гўзал майдони эса, парламентлар саройи олдидағи парадлар хиёбонидир.

Консулимиз Аҳмаджон Луқмоновнинг ҳурмати ба-ландлигидан унинг бошчилигида, деярли «тўсиқлар»га учрамай Ҳиндистон ташқи ишлар вазирлигига кирдик. Бизни бўлим бошлиғи Варма жаноблари қабул қилди.

— Мен бунча улуғ меҳмонлар билан учрашаман, деб ўйламаган эдим, — деди биз билан самими жилмайиб кўришар экан. — Эшишишимизга қараганда бизга етиб келгунча анча азият чекибсизлар. Бобур ҳам Ҳиндистонга осонлик билан етиб келмаган. Бу табиий, албатта. Лекин Бобурнинг кейинги ишлари муваффақиятли бўлган ва ишонаманки, Сизларнинг бундан буёнги ишларингиз ҳам яхши бўлади. Ҳиндистонга хуш келибсизлар...

Варма жаноблари фойят маданиятли, хуштакаллуф, истарали йигит эди. Шунданми, биздаги ётсираш тезда фойиб бўлди ва биз ўзимизни эркин ҳис қилиб ўтиридик. Зокиржон ака Мустақил Ўзбекистон ва Бобур, экспедициянинг ташкил этилиши, Андижонда Бобурга бағишилаб қилинаётган ишлар, Ҳиндистонга сафаримиздан мақсад ва режаларимиз ҳақида анча батафсил гапириб берди. Бўлим бошлиғи уни дикқат билан тинглаб ўтириди.

— Шунча узоқ йўлдан чарчаб келиб, шунча жойни кўриб, шунча ишлар қилиб, яна ўзларингизни бардам, мамнун ҳис қилишларингиз мени ҳайрон қолдиряпти. Сизларга ҳавасим келяпти, — деди жаноб Варма.

Зокиржон ака асосий режаларимиздан бири — Агра ва Андижон шаҳарларини биродарлаштириш йўл-йўриқларини пишитиб қетиш эканлигини алоҳида таъкидлаб қўйди.

Мен сұҳбат жараёнида хона деворидаги дунё мамлакатлари харитасини кузатиб ўтиридим. Унда Ҳиндистон, Покистон, Афғонистоннинг, Шри Ланка, Лаос, Индонезия каби ихчамгина мамлакатларнинг номлари бор. Лекин «Ўзбекистон» деган сўз йўқ. Менга алам қилди ва лекин шу он қалбимдан бир нидо чиқди: «Ўзбекистон» номи жаҳон мамлакатларининг янги хариталарида албатта бўлажак!

— Айрим муаммоларингизнинг вақтида ҳал этидмаганига сабаб шуки, сафарингиз байрам кунларимизга тўғри келиб қолди. Иккинчидан, Сизларнинг келишингизни олдиндан билганимизда ҳам биз тайёргарлик кўриб, маълум, тегишли жойларни огоҳлантириб қўйган бўлардик, — деди жаноб Варма ҳамон хижолатлигини баён этиб.

Аҳмаджон Луқмонов инглиз, Аҳмаджон Қосимов ҳинд тилларида бемалол сўйлашишар, савол-жавоб қилишар, орада бизга таржима қилиб беришга ҳам улгуришарди.

Қайтиш ҳақида гап кетувди, жаноб Варма: ёрдам берамиз, Бобур неча йиллар яшаган, Сизлар бир оймас, икки ой яшасанглар нима қилиди, — дея ватъда бериб, кўнглимизни хотиржам қиди.

Вазирлиқдан чиққач, кино-телевидениечиларимиз бир-бирига тўғриланган, узоқдиги бир чақирим кела-диган парламентлар саройи ва Ҳинdiston рамзий дарвозасини, ўрталиқдаги кафтдай текис, кенг йўлни, икки томондаги ям-яшил хиёбонларни армонсиз тасвирга олишди. Бу майдон Тошкентдаги Мустақиллик майдонидан ҳийла катта эди.

Дарвоҷе, Дехдидаги ҳинд-мусулмон меъморчилигининг эътиборга молик ёдгорликларидан бири Қутб минорни сиртдан томоша қилдик. Уни Султон Қутбиддин Ойбок (айрим тарихий манбаларда «Ойбек» ёзилган) қурдирган мәсжид яқинида ўшлиқ дин арбоби Ҳожи Қутбиддин Баҳтиёр (у 1235 иили Дехлида вафот этган) шарафига бунёд этилган, дейилади манбаларда.

ҲИНД ДАСТУРХОНИ

Шу куни кечқурун соат саккизга яқин консулимиз Аҳмаджон Луқмонов меҳмонхонамизга келди. Бизни «Тапер» гуруҳининг президент ўринbosари жаноб Матхур меҳмонга таклиф этган бўлиб, Аҳмаджон Луқмонов бошлаб бориши керак эди.

Жаноб Матхур билан Зокиржон ака, у орқали мен ҳам таниш эдим. Биз у билан Андижонда, Бобурномидаги ип-газлама бирлашмасида учрашган эдик. Матхур ва унинг ҳамроҳи (таржимон) вилоятимизга тўқи-мачилик, терини қайта ишлаш соҳаларида ҳамкорлик қилишни йўлга қўйиш масаласида Ҳинdistonning Ўзбекистондаги элчиси Делип Мехта жаноблари тавсияси билан ташриф буюришган эди. Бирлашманинг умумий фаолияти, айрим бўлнимларида иш жараёни билан танишдилар. Сўнг чой устида маслаҳат давом этди. Бирлашма бош директори Абдуғаффор Аҳмадалиев таомилимизга кўра меҳмонларга андижонча тўн, дўпти кийдирди ва Матхур жанобларига қараб: «Мана,

ўзбекка ўхшадингиз-қолдингиз», деб кулди. Абдугаффорнинг ўринбосари Ҳайиталининг: «аслида ҳам шундай-ку, эҳтимол буларда Бобур бобомизнинг қони бордир» деган гапидан ҳатто меҳмонларимизнинг ўзлари ҳам завқландилар.

Бирлашмадан Бўзга жўнадик. Йўл-йўлакай Бобур ва Ҳиндистон мавзуида гаплашиб кетдик. Биз халқимизнинг Ҳиндистонга муҳаббати юксаклигини айтдик. Шунда жаноб Матхур: Ҳиндистонни яхши кўрасизлару лекин бормайсизлар, деди худди эски қадрдонлардай ўпкалаб ва бизни ўз мамлакатига таклиф этди. Зокиржон ака Бобур номидаги халқаро илмий экспедициянинг Ҳиндистонга қиласажак сафари ҳақида гап очувди, меҳмон: борсангизлар, албатта учрашайлик дея, дарҳол ўз исм-шарифи ва манзиллари битилган қофозчадан берди.

Бўзда туман ҳокими Ҳабибулло Янгибоев бошчилигида Ўрмондаги ресторанда, дастурхон устида терини қайта ишлаш бўйича ҳамкорлик қилиш ҳақида фикрлашилди.

— Биз учун асосий мақсад бизнес эмас, — деди жаноб Матхур хижолат бўлганда, — балки, тижорат воситасида андижонликлар билан дўстона алоқаларни йўлга қўйиш бош муддаоимиздир...

Биз ўшанда меҳмонлар билан вилоятимиз чегара-сигача бориб, уларни бағирлашиб, Фарғонага кузатиб қўйган эдик...

Бизни жаноб Матхур ёрдамчиси ва таржимон, рус тилини ўзига хос талаффузда яхши гапирадиган чуваккина йигит Даниел билан кутиб олишди ва атрофи (уч томони) ҳар хил ойнаванд, пастаккина бинолар билан қуршалган ям-яшил майдонга олиб киришди. Майдоннинг чироқлар ёритиб турган бир бурчагига узун стол ва сал нарига думалоқ стол, унинг атрофига ўнтача сават кресло қўйилган эди.

Матхур жаноблари ҳамма билан худди эски қадрдонлардай самимий сўрашар (унинг сўзларини шогирди, кўзлари доим кулиб турадиган Даниел эҳтирос билан таржима қилиб берарди), хусусан Зокиржон акани қайта-қайта бағрига босар, унинг меҳмонлар ташрифидан чин юрақдан суюнгани сезилиб турарди. Умуман, жаноб Матхур сухбати ширин ва маънили, хушчақчақ, киришимли одам эди.

Биз мезбонлар таклифи билан сават курсиларга ўтиридик. Бошданоқ салобатли жонон истиконларга нов-

вот бўлакларисимон муз солиб шароб қўйиб келишди. Пепси-кола ва бошқа хилдаги ичимликлар, минерал сувларни алоҳида истиконларга қўйиб беришди. Газакка кабоб («кабаб» дейишаркан) келтиришди: думалоқ, буғда пиширилган лўла кабоб. Кейинроқ, гарнири узун-узун қирқиб қовурилган картошкадан иборат енгил бифстрогон беришди. Ҳинд шаробидан, «Гулоби Жамнун»дан майдалаб ўтирибмиз. Икки хизматкор йигит бир ҳўплам-бир ҳўплам шароб қуюлган истиконларни, ичимлик, сувларни пешма-пеш янгилашиб туришибди.

Бу орада узун столга дастурхон ёзишиб, озиқ-овқат, ноз-неъматларни расамади билан, шошилмай қўя бошладилар. Биз Ҳиндистонликларнинг дастурхонини тўлароқ, росманароқ қўриш иштиёқида эдик. Сайфиддин Ҳожи ака «берадиганини тезроқ беришмасмикин», деб ҳолатни ҳазилга бурди.

Нихоят, катта столга таклиф этишди. Дастурхон «Аъло фурше» усулида овқатланишга мўлжалланган эди. «Аъло фурше» деган иборани мен биринчи марта Тошкентда, Ўзбекистон ёзувчилар уюшмасида ишлатётган пайтимда, Ўрта Осиё ва Африка ёзувчиларининг навбатдаги анжумани чофида Ўзбекистон Ёзувчилар уюшмасининг биринчи котиби Сарвар Азимов тилидан эшитган эдим. Мехмонлар шарафига «Ўзбекистон» меҳмонхонаси ресторанининг кенг ва ҳашаматли залида зиёфат берилган эди. Ўшанда узун столга дастурхон тузалган бўлиб, меҳмонлар дастурхондаги хоҳлаган таоми, салатидан ўз ликопчасига солиб оларди-да, жуфт-жуфт бўлиб ёки ҳар хил ҳолатда, кимдир тик туриб, кимлардир сал наридаги алоҳида-алоҳида столлар ёнига қўйилган стулларга ўтириб ебичишарди. Бугун асосий катта стол атрофига стуллар қўйилмаган, одатий батартиб ўтириб овқатланишдан бутунлай бўлакча таомилга иккинчи марта дуч келишим эди...

Озиқ-овқат, газак-салат турлари ғоят ранг-баранг ва ўзига хос эди. Лекин нимёруғ бўлгани учун таом ва бошқа ноз-неъматларнинг ранги, туси хирароқ қўринарди. Аммо нихоятда ҳафсала ва дид билан, астойдил тайёргарлик кўрилгани сезилиб турарди.

Жой Деҳли тайёрагоҳининг қандайдир клубига қарашли экан. Жаноб Матхур уйига таклиф этолмагани учун узр сўради. Фарғона водийсидай сўлим табиат қучоғидан келган азиз меҳмонлар билан иссиқ, дам

уйларидан кўра очиқ ҳавода, Ҳиндистон осмони остида (жаноб Матхурнинг гапларида бадий бўёқлар кучли эди) ёзилиб ўтиришни афзал кўрганини таъкидлади.

Жаноб Матхурнинг қадаҳ сўзлари хусусан менда ҳинд ҳалқининг бу маданиятли, одамохун вакилига нисбатан ҳурмат ва эҳтиром уйғотди. У анча кўп, лекин қизиқарли ва ёқимли гапирди. Жумладан унинг шундай деганлари ёдимда:

— Ўзбекистонда кўрсатилган даражадаги иззат-икром, меҳр-оқибатни биз ўзимизнинг юртимида ҳам кўрмаганмиз... Эҳтимол, бизнинг боболаримиз ҳам Бобур билан бирга Ўзбекистондан келиб қолишгандир. Ахир биз бир-биримизга ўхшаймиз-ку. Ўзбек ҳалқи жуда дилкаш, меҳмондўст экан. Мен сизларнинг ажойиб юртингизда уч марта бўлиб, қалбимни ўша ёқда қолдириб келганман. Қизимни ё неварамни ўзбек йигитига бажонидил берардим. (Шу ерда Сайфиддин ҳожи ака ўрнидан туриб: «мана, биз харидор-да», дея ҳазил билан куёв томон қудаларга хос таъзим бажо қилди. Самимий олқишилар бўлди).

— Сизлар Ўзбекистонга қайтганларингизда, — давом этди жаноб Матхур, — имоним комилки, ватанингизнинг бир бўлаги Ҳиндистонда қолиб кетганини чуқурроқ ҳис қиласизлар (менимча мезбон бу гапда Бобурийларни назарда тутаётган эди)... Сизларни мустақил бўлганингиз билан чин юрақдан қутлайман. Ўзбекистон — келажаги порлоқ ўлка. Ва мен шундай ўлканинг ажойиб кишилари билан танишганимдан ўзимда йўқ ҳурсандман. Айниқса, Бобур номли ҳалқаро жамғарма раиси, экспедициянгиз раҳбари Зокиржон Машрабовни жуда яхши кўриб қолдим. Мен Бирлашган Миллатлар Ташкилотида ўтгиз йил ишлаб ҳам бундай одамни кўрмаганман, десам бўлади. Зокиржон Машрабов — юраги тоза инсон...

Дарҳақиқат бугунги зиёфат ҳам, шубҳасиз, Зокиржон Машрабов ҳурматидан бўлаётган эди.

Илмли, маданиятли зиёли, дипломат, бизнесмен жаноб Матхур сўзи якунида Бешариқда очмоқчи бўлишашётган корхоналари номини «Фарғона» деб қўйишмоқчи эканини, агар лозим бўлса, «Тапер» компанияси ҳар йили икки-уч ўзбек талабасининг Ҳиндистонда ўқиши учун ҳомийлик қилиши мумкинлигини эслатиб ўтди.

Зокиржон Машрабов ҳам жавоб сўзида ўзбек ва ҳинд ҳалқларининг азалий дўстлиги, муштарак фазилатлари, бобурийларга ҳинд ҳалқининг муносабати-

дан мамнунлиги, Бобур номли халқаро илмий экспедиция дастуридаги асосий бандлардан бири халқ биродарлигини янада кучайтиришга хизмат қилишдан иборатлиги ҳақида гапириб, ҳаммамизнинг номимиздан, бутун андижонликклар — Бобур юртдошлариномидан Матхур жанобларининг юксак эътибори ва дастурхони учун миннатдорчилик билдириди. Мана шундай учрашувлар, мулоқотлар катта дўстликка дебоча бўлишигина таъкидлади. «Жаноб Матхурнинг бизга ёзган дастурхони — бутун ҳинд халқининг дастурхонидир» деди у.

Зиёфат охирида жаноб Матхур бизга чиройли гулдор қоғозга ўралган совға бераркан: «бунинг ичидагойлик йўқ, менинг қалбим бор», дея лутф қилди. Унинг қалби эсадалик ликопчага сурати туширилган, филбардош ҳинд халқининг рамзи бўлмиш ФИЛ эди.

Матхур жаноблари бошини Андижон дўпписи безаб турарди. Ҳарқалай шарқли киши, дид-фаросатли бўлгани учун у дўппини қоидаларини келиштирган ҳолда, ярашимли қилиб кийган эди (У Андижон ипгазлама бирлашмаси директори Абдугаффор совға қилган дўппи эди). Биз ҳам унга тўн, дўппи кийдирдик.

Зиёфатдан анча кеч ва фоят мамнун қайтдик. Умуман, Деҳлида кунларимиз чакки ўтмаяпти. Йўллардаги, чегаралардаги азиятларнинг газаги чиқяпти.

ШАДДОТ ҲИНД ҚИЗИ — ҚУРАЛАЙ КЎЗ МАНЖУ

13 август, жума.

Эрталаб бизни икки киши йўқлаб келишибди. Деҳлида чиқадиган «Овар Лендер» рўзномасидан Дайник Дин Риат ва Деҳли телекомпанияси билан ҳамкорликда ишловчи Гопал Мисра. Уларга биз ҳақимизда консулимиз хабар қилган экан. Меҳмонхонанинг мана шундай учрашувлар учун ажратилган алоҳида хонасида тор доирада суҳбат бўлди.

Журналистларнинг Бобур ҳақидаги тушунчалари чалкашроқ эди. Гопал Мисранинг фикри шундай бўлди:

— Бобур Фарғона водийсидан келиб, Ҳиндистонни Фарғонага қўшиб олган. Баъзилар Ҳиндистонни босиб олган деса, бирорлар мамлакатларни бирлаштирган, ҳинд халқининг маърифатини юксалтиришга хиз-

мат қилган, дейдилар. Биз учун шуниси аниқ ва муҳимки, улар бу ерда оила қуриб, иноқ, аҳил яшаганлар. Бобургина майда, тарқоқ рожаларни бирлаштириб, ягона давлатга айлантира олди. Турли миллатлардан иборат ҳалқларни бир-бирига яқинлаштириди. Сизлар ҳам мана шу дўстликни ривожлантириш учун келгансизлар, деб ўйлайман. Биз Бобур ва унинг авлодлари ҳақида, улар қолмаган албатта, (демак Ҳиндистоннинг ўзида ҳам, бобурийлар авлоди инглизлар томонидан батамом қириб юборилган, деган фикр бор экан), хужжатли кинофильм яратишни мўлжаллаяпмиз. Бобур сиймосини яратиш орзуимиз бор...

Сухбат якунида Гопал Мисра: биринчи ғавбатда сизлар билан ҳамкорликда Бобур ҳақида йигирма беш минутлик ҳужжатли, тарихий ва айни вақтда замонавий фильм яратсак, фильмнинг бир қисми Бобурнинг болалиги ўтган Андижонда, Фарғона водийсида суратга олиниши керак, шунга ёрдам берсангизлар деб фикрига аниқлик киритди. Табиийки, Зокиржон aka бажонидил рози бўлди.

Соат ўн иккиларда бизни бир ҳинд қизи йўқлаб келди. Қизнинг исми Манжу бўлиб, уни Аҳмаджон Луқмонов юборибди. Биз ҳиндча кийинмаган ана шу ҳинд қизи етакчилигига Жавоҳарлаъл Неру номидағи Дехли университетига жўнадик. Ўзимизнинг «Тойота»мизда таниш ва нотаниш йўллардан ўтиб борарканмиз, Манжуни гапга солиш учун дуч келган бино, ёдгорлик ҳақида унга биримиз қўйиб биримиз савол берардик. Собиқ Иттифоқда, аниқроғи Белоруссиянинг пойтахти Минске үқиган Манжу рус тилини ёқимли талаффузда гапиради. Шаддотгина, киришимли, ҳазилкаш қиз эди. Рус тилидаги айрим ибораларни тополмай қоляпти, лекин нозик қочиримларни дарҳол фаҳмлаб шунга яраша ҳазил билан жавоб қайтаряпти. У йигирма беш ёшга кирган бўлишига қарамай, ҳали ҳам турмушга чиқмаган экан. Ҳолбуки, бир оз ботиқ қўзлари қоп-қора, катта-катта, юзлари буғдой ранг, яъни аксарият ҳинд қизларидай қоп-қора эмас; истарали, мижжаларидаги сурма, манглайи ўртасидаги хол ўзига жуда ярашиб тураг, жуссаси нозиккина, хуллас чирой-чиммати жойида эди. Унинг айтишича, Ҳиндистоннинг энг чиройли қизлари Кашмир ва Панжобда экан. Манжу ҳам панжоблик экан. «Шунинг учун чиройли экансизда», деб ҳазиллашдик. Манжу бироз қизарди, лекин қуралай қўзлари янада ча-

рақлаб, яшнаб кетди. Аёл зоти тувакдаги гул бўлса, мақтов, хушомад унга қуийилувчи сувдир. Бу сув сўлин-қираб, нозик япроқлари шалвираб қолган гулни ҳам бир даҳзада гуркиратиб юборади. Ўрис адиби Иван Турғунов «Ҳар қандай мағрур аёлни ўн кун мақтасанг, ўн биринчи куни унинг ўзи сени истаб келади» деб бежиз айтмаган-да. Лекин шуниси қизиқки Турғуновнинг ўзи севимли маҳбубаси ортидан хорижга кетиб, узоқ йиллар яшаган. Яъни тоғ унинг олдига келавермагач, унинг ўзи тоғ ёнига борақолган.

Манжу ҳинд фильмларидағи аксарият қизлар каби соддадил, ишонувчан эди. «Бизга ёқиб қолдингиз, келин қилиб олиб кетсак нима дейсиз» қабилидаги ҳазилларимизга чиппа-чин ишониб хижолат чекди ва отоналарининг уни узоққа берищмаслигини айтиб узр сўради.

Мен яна беихтиёр Вайжантемала тақдири билан қизиқиб Манжудан уни суриштирдим. Манжу ҳам бу машҳур актриса ва раққосанинг ҳозир парламент аъзоси эканлиги, ёши оатмишдан ўтиб, анча қариб қолгани, кинода ўйнамай қўйганидан бошқа маълумотта эга эмас экан. Лекин менинг кўнглимдан, қани энди имкон топилсаю, нима бўлса ҳам бир кўриб қўйсам, деган хаёл, тўғрироғи ўқинч кечди. Чунки менда тасодифдан бошқа имкон йўқдиги аниқ эди. Шундоқ катта ҳудудда ва миллиардга яқинлашиб қолган ҳалқ ичида Вайжантемалани учратиб қолишга (шунда ҳам кимдир уни менга кўрсатиб, танитиб қўйиши керак) умид боғлашнинг ўзи ақлга сиғадиган мулоҳаза эмас эди... менинг бу армоним шубҳасиз ўзим билан яна Ўзбекистонга қайтиб кетади ва умримнинг сўнгигача кўнглимнинг энг яқин маҳрами бўлиб қолади шекилли... фақат, шу нарса менга ғалат туюлдики, мен ҳинди斯顿ликларнинг етти ёшидан етмиш ёшигача — ҳамма Вайжантемалани билади ва яхши кўради, сўрансангиз тўлқинланиб, мароқ билан, завқ-шавқ билан уни таъриф-тавсифлаб кетади, манзилини ҳам айтиб, кўрсатиб беради, деб ўйладим... Афсуски бундай эмас экан. Майсур штатидан чиққан бу раққоса, актрисанинг ҳуснига ва маҳоратига ортиқчароқ баҳо бериб юборганмикинман, деб ўйладим... Зоро муҳаббат санамлари сиймосини қойилмақом қилиб ижро этган Вайжантемала негадир мен ҳаётда ва кинода кўрган аёллар, актрисалар ичида энг соҳибжамоли, мафтункор-жозибадори сифатида (балки бу ҳинд кино санъ-

атининг кучи, қудратидандир) хаёлимда мухрланиб қолган эди. Назаримда унинг гул-гул чеҳраси, «Сангам» фильмидаги оғатижон нозу истиғнолари ҳеч қачон қаримайдигандай, мангу гўзаллик, севимли маъшуқа қалбининг ноёб тимсоли каби умрбод яшнаб қолиши керақдай туяларди.

Машинамиз тўхтаганидагина мен хаёл гирдобидан чиқдим. Университет қошидаги Тарихий фанлар марказига келган эдик. Бу ўқув ва илм даргоҳида магистрлик унвони бериларкан. Марказда Ҳиндистон тарихи тури босқичларга бўлиб ўрганилар, ҳар бир куллиётда бир неча бўлум бўлиб, улар мутахассислаштирилган экан. Биз куллиёт декани Чаттопадхайя ва Марказий Осиё бўйича мутахассис Музаффар Аълам (мана шундай исми-шаърифга дуч келганимда беихтиёр бобурийлардан эмасмикин, балки ўзи ҳам билмаган ҳолда аждоди ўшаларга бориб тақалар, деган ўй кечади менда) билан учрашиб сұхбатлашдик. Музаффар Аълам 1987 йили Ўзбекистонда бўлган, балки шу боисдан, бизга, экспедициямиз фаолиятига самимий қизиқаётгани сезилиб туарди.

Сұхбат поёнида мен Музаффар Аъламга шундай савол билан мурожаат қилдим:

— Бизнинг мактабларда бир қанча ҳинд классик адиллари ўқитилади. Жумладан Рабиндронат Токур... Унинг саккиз жилдлик, бошқа ўнлаб ҳинд шоир ва ёзувчиларнинг катта-катта китоблари ўзбек тилида чоп этилган. Сизларда ҳам ўзбек адабиёти намоёндалари ўқитиладими?

— Биз Навоийни ва шубҳасиз Бобурни биламиз — улар умумий дарсларимиздан қисқа бўлса ҳам ўрин олишган, лекин кейинги юз йил ичидаги ўзбек адабиётидан, тўғриси, бехабармиз, дея тан олди Музаффар Аълам.

Дарҳақиқат, ҳиндистонликлар Чўлпон, Абдулла Қодирий, Фитрат, Ойбекларни ҳам яхши билишмас экан. Мен анча ачиндим, ахир биз ҳинд оғзаки адабиёти намуналари, тарихий достонларини, жумладан «Калила ва Димна»ни, «Рамаяна»ни, «Махобхорат»ни қайта-қайта нашр қилиб ўқиймиз-ку.., Хисрав Дехлавий, Мирза Бедил, Мирза Голиб, Токурлардан ташқари Ҳўжа Аҳмад Аббосни, Кришн Чандрни, Мулк Раж Анандни, Иқболни, Премчандни, Яшпални, Амрита Притамни, Назрул Исломни, Али Сордор Жаъфарийни, Валлатхонни, Сажжод Зоҳирни, Қамар Раисни,

Ниролани ва яна бошқа ўнлаб ҳинд шоир ва ёзувчи-ларини биламиз-ку. Уларнинг асарлари асосидаги телеспектакл, радиопостановкаларни ҳар бир ўзбек хонадонида томоша қилиб, тинглайдилар-ку... Шу ерда яна иккиланиб қолдим — ҳиндларнинг адиллари бизнинг шоир-ёзувчиларимизни билишяпти-ку... Балки биздаги олийгоҳларда ҳам ҳинд ижодкорларини яхши билишмас...

Университетдан қайтгач, яна Миллий музейга кирдик. (Насим Ахтар билан жуда қадрдан бўлиб кетдик). У ердан чиққач, кўпчилик элчихонага кетишиди. Аҳмаджон иккаlamиз археология ва маданий ёдгорликлар бошқармасидан Ҳиндистондаги маданий ёдгорликлар ва осори-атиқалар, обидаларни кино, телетасвирга олиш учун рухсатномага пул (5 минг рупий) тўлагач, скутор (моторолёр-такси)да мәҳмонхонага келдик. Ўзимизнинг қадрдан ошхонада (у билан мәҳмонхонамиз ўртасида фақат катта кўча бор холос — ногуштада ҳам, кечқурун ҳам шу ерга кирамиз) овқатландик. Дарвоҷе, ошхонага киришингиз билан, девордаги шер сурати ва сурат остидаги ёзувга кўзингиз тушади ва беихтиёр ё сал ҳушёр тортасиз ё жилмайиб қўясиз. Ёзув қўйидагича: No politics please... Бунинг маъноси: тепангиздаги шерга қарангу, сиёсадан валақламай овқатингизни енг...

Тўғри маслаҳат, шундай эмасми?..

Мәҳмонхонамиздан олти-етти юз қадам нарида «Упхар» («Ҳадя») деган кинотеатр бор экан. Аҳмаджон билан ҳиндларнинг киносини ўз юртида ҳам бир кўриб қўяйлик, деб бордик. «Хал-наяқ» («Зўравон») деган фильм кетаётган экан. Болалигимда Ҳиндистонда кино кўргани тўшаклари билан, астойдил келишади, деган гаплар эшитувдим. Унчалик эмас-ку, ҳарқалай одам жуда кўп эди, киришга чилта йўқ, дейишиди.

— Энди бир иш қиласиз, — деди Аҳмаджон, — директорнинг олдига кирамиз. Сиз ўзбекчани ўрисчага аралаштириб гапирасиз, мен хориждан, Европадан келганман, Ҳинд киносини кўрмоқчиман, деяпти, деб таржима қиласман.

Кинотеатр директори қирқ беш-эллик ёшлардаги серсоқол, футии саллали, семиз одам экан, гап бошлишимиз билан, хўп, деб иккита билет берди (40 рупийга).

Кинотеатр дарҳақиқат катта бўлиб, зали уч қаватли эди. Биринчи қават арzonроқ, иккинчи қават—ложа— ўртacha, учинчи қават — ложа қимматроқ экан.

Биздагидай директор З-қават ложасига билет берибди. (Бизда ҳам илтимосларга махсус, яхши қатордан жой берилади-ку).

Одам фойеларда ҳам жуда кўп эди. Жуфт-жуфт жаноблар ва хонимлар... Асосан ёшлар, қизлар...

Фойеда кутиб ўтириб, иттифоқо бир ёш йигит билан танишиб қолдик. Рус тилини чалароқ биларкан, қўйполроқ талаффуз билан гапиряпти. Исми Моҳан, Палика бозоридаги 177-магазинда ишларкан. Бизни таклиф қилди (тери куртка билан савдо қилишаркан), пепси-кола билан сийлади.

Кино соат тўққиз яримда бошланди. Моҳан бизни бошлаб кириб жойларимизни топиб берди, ёнимиздаги йигитни турғазиб юбориб, ўзи ўтирди. Кийиниши, ўзини тутиши, гардиши кенг шляпаси мексикалик олифталарни эслатар, лекин очик, гаплашадиган йигит экан. Жой чиндан ҳам жуда яхши: бўйинни толдирмайдиган, тўғридан кўринадиган эди. Кинохона шифти чиройли, полга палос тўшалган, креслолари юмшоқ, лекин биздагидай титилмаган эди...

Залнинг бир неча жойига ўрнатилган катта вентиляторлар салқин ҳаво пуркаб турарди. Шунинг учун бўлса керак, уч ярим соат терлаб-пишмай, бетоқатланмай, хотиржам ўтирдик.

Фильм сюжети одатдаги ҳинд киноларидағи каби сентиментал-романтик воқеалар асосига қурилган бўлиб, ота-она-ўғил муносабатлари орқали ривожланниб боради. Ўғил отасининг бир тарсакисини еб, уйдан чиқиб кетади, тўда тўплаб тоғларда дайдиб юради, унинг хотинини ўлдириб кетишади, йигит полисменларга қасдашиб қолади, ниҳоят, англашилмовчиликлар жойига тушиб, ҳақ,adolat, эзгулик ғалабаси билан якун топади... Бош ролларда Санжай Да० (Наргисхонимнинг ўғли) ва Матхури Диксит ўйнаган эди. Моҳан (янги танишимиз) Матхурини гўзал ва ҳалқ севадиган актриса, деб изоҳ берди бизга. Дарҳақиқат, аслан шундайми, гримчилар, тасвирчиларнинг маҳорати туфайлими, қиз ниҳоятда гўзал эди. Кийими алмашган сари (гоҳ қизил, гоҳ зангори, гоҳ оқ...) ҳарир либосларда чиқарди) яшнаб, очилиб бораётгандай эди. Экран ниҳоятда катта, кенг бўлиб, қаҳрамонларнинг юз-кўзлари киприкларигача жуда аниқ кўринар, табиат манзаралари ниҳоятда жозибадор эди. Сингапур ва Кашмир томонларда суратгà олинган бўлса керак. Шу фильмда бир одамни ёш ва ёши ўтган қиёфада,

озғин ва семиз қилиб кўрсатиш санъати намоён қилинган эди...

Албатта, аксарият ҳинд фильмлари каби бу кинода ҳам ёш бола ҳам ишонмайдиган олди-қочди воқеалар, тасодифлар анчагина бор. Менимча ҳиндлар азалдан ишонувчан, содда халқ бўлгани учун (ахир улар худони кўп деб ўйлашади, бутга, молга, сувга ва бошқа нарсаларга сифинишади-ку) уларнинг киноларида ҳам эртак воқеалар, ақл бовар қилмас ҳодисалар кўп бўлади.

УЛУГЛАР МОЗОРИ

14 август, шанба.

Зиёрат учун Низомиддин даҳасига бордик. Низомиддин Авлиё (тасаввуфнинг иирик намоёндаси) ўтган жойда ҳар қандай ёмонлик даф бўлган, деган нақл юраркан ҳинд халқи орасида. Унинг мақбараси билан ёндош улуғ Амир Хисрав Дехлавий мақбараси бўлиб, уни Бобур қурдирган, Шоҳ Жаҳон таъмирлатган, дейишиди. Ниҳоятда гўзал, гулдор мармардан барпо қилинган эди мақbara. Дарвоҷе, бу ерда бошқа қабрлар ҳам бор эди. Шуниси қизиқки, бу ерга тор йўлаклардан айланиб ўтиб борилар ва кираверишга «Аёлларга кириш ман этилади» деб ёзиб қўйилган эди. Бу гапни ҳеч ким шарҳлаб беролмади. Бу албатта ўта мутаассиб диндорларнинг иши бўлса керак. Ҳаммасидан ҳам Хисрав Дехлавийнинг қабрини мана шундай тор, чекланган, кўримсиз мавзеда қолиб кетганлиги менга ғалати кўринди. Ахир Дехлавий оддий авлиё ё фақат диндор бўлган эмас-ку. У ҳар жиҳатдан етук, баркамол, жаҳоншумул шуҳрат эгаси бўлган буюк инсон-ку. У тиљшунос, адабиётшунос, тарихнавис олим, мусиқий асарлар ёзган. Бадиият соҳасидаги мероси эса жуда улкандири: у тўрт юз минг байтдан ортиқ шеър битган. У бадииятнинг барча турларида ижод қилган алломадир. Абдураҳмон Жомийнинг айтишича у 99 китоб муаллифи дири. Алишер Навоий Хисрав Дехлавийни оташин ишқ куйчилари Ҳофиз, Жомийлар қаторида санайди. Ўзининг устозларидан бири деб эътироф этади, уни «Ҳинд сеҳргари» («Соҳири ҳинд») деб атайди, «назм пешасининг фазонфари ва дарду ишқ оташкадасининг самандари» дея юксак таърифлайди. Дарҳақиқат:

*Гулюзинг кўрган кишилар ёд қилмас бўстон.
Шул гўзал юз ҳажрида гул-лолаларнинг бағри қон...*

Ёки:

*Кеча лаъли лабинг этди мени тонг отгунча меҳмон,
Тирилмишдир сенинг хушбўй ҳидингдин мурдаи
ҳижрон,—*

каби рамзий ташбеҳларни Деҳлавий Ҳофизу Жомий-лардан анча аввал, бундан етти юз ийлар муқаддам яратгандир. Не баҳтки, шеърият осмонининг чақноқ юлдузларидан бири бўлмиш ана шу буюк зотнинг отаси Ҳиндистонга бориб қолган шаҳрисабзлик ўзбек йигити эди, онаси эса ҳинд қизи бўлган. Қуйидаги машҳур ҳикматлар ҳам Амир Хисрав Деҳлавий ижодига мансубдир:

*Кимки билимсизлик зиндонига гум,
Гадодир, тиллоси бўлса ҳам юз хум.*

*Дўстларинг кўпаяр фаровонликда,
Уларни синаб кўр нотавонликда.*

*Тананг ҳам кетажак, бори-йўғинг ҳам,
Бахтилидир яхши ном қолдирган одам.*

*Шундай яшагинки жисми покингдан
Қайта яратсинлар сени ҳокингдан.*

*Кўздек бир-бирингга бўлма тескари,
Лаблардек имтифоқ бўлгил аксари...*

Юқорида санаалган ҳинд ҳалқининг тўрт буюк даҳо адилларидан учинчиси — Асадулло Мирзо Голибдир. Унинг ижодида ҳам ишқ дарди, муҳаббат шеваси алоҳида ўрин тутади. Мирзо Голиб лирикасини «ниҳоятда жозибадор, майн, тонг шамолидек беғубор, тоғ шалоласидек жўшқин, дарё сувидек мавжли, атиргуллар каби хўшбўй ва гўзалдир», дея таърифлашади ҳинд адабиётшунослари. Чиндан ҳам Голиб шеъриятининг оҳанги мутлақо ўзига хос бўлиб, ниҳоятда ўйноқи, мудроқ туйгуларингизни қитиқлаб уйғотиб юборадиган, кўнглиздаги дардларингизга малҳамдек ёқиб тушидиган шифобахш сатрларга бойдир. Шу ўринда Голибнинг лоақал бир шеърини мисолга келтирмасам, ҳеч ичим чиқмайдиганга ўхшайди:

Хусн ғамза гардидан топти шифо мендан сўнг,
Яшар энди завқ ила аҳли жафо мендан сўнг,
Ошиқлик мансабига муносаб шахс қолмади,
Бекор қолди муқоммлар, нозу адо мендан сўнг.
Агар ўчса шам, ундан пайдо бўлур қаро дуг,
Ишк шуъласи ёпинди қора ридо мендан сўнг.
Ер бағрида санамлар аҳволига дил куяр,
Тирноклари қон кўрмай, тилар ҳино мендан сўнг.
Ситамгарлик санъати қолди энди сўровдан,
Нозли нигоҳ сурмадан бўлур хафо мендан сўнг.
Тирнар юракни бир ғам: топилмас бир кимсаки,
Тумса аза, ўлди! — деб, меҳру вафо, мендан сўнг.
Борми севги жомини симирувчи бирор мард?
Такрорлаб соқий этур даъват — нидо мендан сўнг.
Ишкнинг гарид ҳолига келур Голиб хўрлигим
Борур кимнинг қошига гарду бало мендан сўнг?

Ҳинд ҳалқи, айниқса ижод аҳли бу буюк шоирни ниҳоятда ҳурматлаб эъзозлайдилар, у билан фахрланидилар. Голибнинг ҳаётига ва ижодига багишлаб бир неча пьесалар ёзилган, музикали тарихий кинофильм яратилган. «Ўзбек ҳалқи ҳам бу ғурур, бу қувончга шерик бўлишга тамоман ҳақли, — деб ёзади доктор Қамар Раис. — Бойси шуки, Мирзо Голибнинг Ўзбекистон билан узилмас қон-қардошлиқ алоқаси бор. Бўлажак шоирнинг катта бобоси Турсунбекхон Салжуқийлар хонадонига мансуб катта амир бўлганлиги тарихий тазкиралардан маълум».

Дарҳақиқат, Мирзо Голиб ўзининг асли Турон юртидан эканлигини ифтихор билан, қайта-қайта тилга олади:

Голиб, ўзим муқаддас Турон Тупроғиданман,
Билсангиз, таги-таҳтим, иқбол қучоғиданман.
Ота-бобом қасб-кори дехқончилик азалдан,
Самарқанд фуқароси-дехқон қароғиданман...

Қамар Раиснинг эътирофича ватандошимиз фарзанди, яъниким, ўзбек юрагининг бир парчаси бўлмиш Мирзо Голиб адабиёт ва шеъриятдан беҳад завқданадиган, гўзаллик ва латофат ошиғи, мағрур, ҳалол, дўстларга садоқати ва меҳру муҳаббати кучли, ватанини ниҳоятда суйгувчи, хуш查қчак, ҳалқпарвар, камтарин инсон бўлган.

Асадулло Голиб қабр-мақбараси ҳам Дехлининг эски қисмида экан. Унча баланд эмас, ихчамгина, лекин ўзига хос, тоза, оқиши-қаймоқ ранг мармардан

тикланган. Атрофи панжара, занжир билан ўралган, кириш эшиги қулфлоқдик, яъни, демакки, назоратда экан. Калит мақбарадан сал беридаги бозорча ёнидати кичик бир хонада тураркан. Илтимос қилувдик, очиб беришди. Мақбара ичини зиёрат қилиб, Қуръон тиловати била, шоир ҳаққига дуо айладик...

Шундай қилиб, Дехлида бир неча кун туриб қолдик. Бақт эса кетмоқда, ҳали олдинда борадиган шашарлар, кўрадиган жойлар, қилинадиган ишлар қўп эди. Бу ерга ётиб келган кунимиз Собиржон Шокаримовнинг мазаси қочиб, меҳмонхонада ётиб қолди. Уни кўнукмаган иқдим ва овқатлар илғади шекилли. Дарҳақиқат, овқатлари бизнинг таомларимиздан бутунлай бўлакча эди. (Буни биз чегара — Ваагадаёқ билган эдик). Қалампирсиз овқат пиширишмас экан. Ҳатто чевати (чепоти)га ҳам ҳом қалампир тўғраб юборишаркан. Лоақал шу чепотига қалампир солмай пишириб беринглар, деб илтимос қилиб ҳам уddaрай олмадик. Ошпазлари бу борада қасамёд қабул қилишади шекилли. Шу масалада боёқиши Фарруҳ ҳам анча қийналди. (Униям ошқозони чатокроқ). Лекин Собиржон аканинг бардоши, иродаси, матонатига қойил қолиш керак. Тўргт кун ичида бир марта «иҳ» деб ўнтаганини эшитмадик. Хона дим: кондиционерни ҳам, ел ҳайдатич пирракларни ҳам ўчиртириб қўйган, кирган одамнинг нафаси қайтиб кетади. Собиржон aka мана шу бардоши, сабр-тоқати билан дардни енгди. Бугун ўрнидан турди. Консулимиз Аҳмаджон Луқмонов уни поликлиникага олиб бориб келди. Докторлар унинг қонини, умумий ҳолатини текшириб, сафарни давом эттириши мумкин, дейишибди. Ҳамма, хусусан, Зокиржон aka қаттиқ хавотирланаётган эди. Ахир шериклардан бири бетоб бўлиб турса, сафар, хурсандчилик татидими? Айниқса, раҳбарга...

Кўнглимиз равшан бўлиб, йўлга тушдик. Эндиғи манзилимиз Бобурга севимли қароргоҳ бўлган тарихий шаҳар Агра эди.

Дарвоқе, эртага 15 август — Ҳиндистон мустақиллиги байрами эди. Аҳмаджон Луқмонов, қуралай кўз Манжу ва бошқалар байрам тантаналарини кўриб кетмайсизларми, дейишибди. Лекин бизнинг вақтимиз ниҳоятда тифиз, ҳар кун, ҳар соатимиз ҳисоб-китобли эди. Узр айтиб, улар билан вақтинча хайрлашдик.

Дехлидан чиқиб, катта йўлга тушиб олгач, олдимиздаги машиналарни бирин-кетин қувиб ўта бордик.

Машиналарнинг орқасидаги ёзувлар эътиборимни тортди. Бизда машиналар орқасига «Оҳиста юр, эй сарбон», «Кўзинг етмаса, қувиб ўтма», «Шоссе—фазо эмас» каби насиҳатлар кўпроқ ёзилади. Бу ерда бутунлай бошқача, маъноси бойроқ даъватномаларни ўқишингиз мумкин эди. Чунончи: «Ёмон назар билан қараган одамнинг ҳамби қорадир», «Биз иккита-миз, бизники ҳам иккита бўлиши керак», «Иккинчи-сига шошилманглар, учинчиси — ҳеч қачон...» Кейинги икки шиор, мазмунидан англашилиб турибдик, фарзандни кўпайтирмаслик ҳақида. Дарҳақиқат, шундек ҳам, одам исроф бўлиб кўчаларда юрибди нима иш қилишини билмай, пешайвонлар, дараҳтлар остида ётишибди. Расмий маълумотларга қараганда миллион-миллион одам кўчада туғилиб, кўчада вафот этаркан. Яхшиямки Ҳиндистонда деярли қиши бўлмайди, акс ҳолда... Балки ана шу қиши бўлмаслиги чатоқдир, одамларнинг, хусусан эркакларнинг ялқовроқ бўлишларига жазирама иссиқ бош сабабчиидир. Агар қаттиқроқ совуқ бўлса, балки улар ҳам астойдилроқ ҳаракат қилган бўлишармиди—лоақал ўзларининг жонларини сақлаш учун... Ҳолбуки, уруғ экиб, бир эмас, бир неча бор ҳосил олса бўладиган унумдор, пўрсилдоқ ерларнинг поёни йўқ экан.

Йўлда велосипедилар галасига дуч келиб жуда ҳайрон қолдим. Ҳиндистонда велосипед асосий уловлардан бири эканлигига Амритсардаёқ ишонч ҳосил қилувдим. Лекин велосипедга бунчалик ружу қўйган шаҳарчани кўраман, деб ўйламовдим. Катта кўча тўла, машинани оҳиста юргизишга тўғри келди. Кечки пайт эди, велосипедиларнинг кўпроқ биз томонга, яъни бир йўналишга келишаётганидан ишдан қайтишаётган бўлишса керак, дедик.

Оқшом тушганда йўлимиз қуюқ ўрмонзор орасига шўнғиб кириб кетди. Икки ёндаги дараҳтзорларнинг қалинлигини ифодалашга «чим-чатир»» деган ибора ҳам ожизлик қиласди. Ҳақиқий жунгли деб шундай жойларни айтишса керак-да. Афсуски қоронфида ўрмонзор манзараларини, ранго-ранг дараҳтларнинг яшил, осмоний барглари кўрки-латофатини яхши кўролмадик, мириқиб томоша қилолмадик, кундуздағидай завқ ололмадик.

Аграга ярим кечага яқин етиб бордик. Истаб-сўроқлаб юриб, бир муслим ёрдамида «Классик» деган меҳмонхонани топдик. Икки қаватли, янги ши-

нам бино экан. Хоналари ҳам анча озода. Кондиционерлар, шифтда парраклар ишлаб турибди. Тўлқин ака билан 202-хонага жойлашдик. Кечаси совуқ қотиб уйғониб кетдим. Тасаввур қилинг: Ҳиндистонда, жазира машина ёзда совуқдан уйғониб кетишни! Парракни ўчириб қўйдим.

МУҲАББАТ ВА САДОҚАТ КОШОНАСИ

15 август, якшанба.

Эрталаб, нонуштадан кейин Тож Маҳални излаб кетдик. Шоҳ Жаҳон (бу ернинг оғзаки диалектида «Сажахан», баъзан янада қисқароқ қилиб «Са-жан» дейиларкан. Дарвоқе, Бобур ҳам «Ҳиндустон эли «шин» (ш. — К. К.)-ни — «син» (с., — К. К.) талаф-фуз қилур» деб ёзган) боғи оралаб ўтган Шоҳ Жаҳон кўчасидан юриб, ниҳоят, Тож Маҳалга етдик. Бу обида ҳам катта кўчадан анча ичкарида жойлашган бўлиб, қатор дўкончалар ёнидан уч юз қадамча пиёда юриб бориларди. Йўлда шундок өрда ёнбошчасига ёттан отга дуч келдик. Ҳинд халқининг ўта раҳмдиллигини қарангки, ярадор, типирчилаб жон талашиб ётган ҳайвонни, сўйиб юбора қолмай, одига кўк ўт ташлаб кўйишибди. Бечора от хириллаб, оғзидағи ўтни ютолмай, мадорсиз кавшаняпти (эҳ, нафс!). Жониворнинг оёқлари тўрт томонга керилиб кетган, вақти-соати яқин эди.

Тож Маҳалнинг ташки ҳовлисига қадам қўйишининг биланоқ сизни ғалати ҳислар чулғаб оларкан, гўё гўзаллик, меҳру-вафо оламига кириб бораётгандай сезасиз ўзингизни... Ниҳоят, муazzзам обида эшигидан ичкарига — асосий ҳовлига кирасиз. Ҳайратланиб супада туриб қоласиз. Аввало сизни зиёратчиларнинг кўплиги, одамлар оқими таажжубга ва ҳаяжонга солади. Турли миллат, турли дин, турли мазҳабдаги, турлича кийинган, турли рангдаги кишилар-болалар, ёшлар, катталар... Балки уларнинг таассуротлари ҳар хил бўлар, лекин ҳаммасининг бу ерга киришидан мақсади бир, олаётган завқ-шавқи бир... Оппоқ кийимли, беҳол кекса отасини қўлларида кўтариб олган йигитни кўриб ҳаммамиз жуда таъсирандик ва қобил ўғилга ичимиизда раҳматлар айтдик... Саёҳатчи-зиёратчилар орасида Оврупадан, Америкадан, дунёнинг

ҳамма бурчакларидан келган ажнабийлар бор. Эсдалик учун суратга тушаёттганларнинг сон-саноғи йўқ. Сураткашларнинг қўли қўлига тегмайди.

Ҳа, таърифини эшитганки инсон бир кўрсайдим, деб орзу қиласидан мўъжизавор обида. Дарвоҷе, мўъжиза ёдгорликлар ҳақида. Олимлар, тадқиқотчи-лар, сайёҳлар қадимги юнонларнинг дунёдаги еттига машҳур обида ҳақидаги иборасини маҳкам тутиб олишади-да, тўтидай ўша гапни такрорлашаверади. Ҳолбуки, у даврдан бери неча минг йиллар ўтди, мўъжизага тенглаштириш мумкин бўлган юзлаб тарихий обидалар яратилди ва уларнинг қанчаси емирилиб, яна йўқ бўлиб ҳам кетди. Узоққа боришнинг ҳожати йўқ. Ўзимизнинг Ўзбекистон ҳудудида, Самарқанд, Бухоро, Хева шаҳарларидағи тарихий обидалар, айтайлик Паҳлавон Маҳмуд мақбараси, Улугбек расадхонаси қайси Миср эҳромию, қайси Галикарнас мақбарасидан кам? Хўп, масаланинг бу томонини қўйиб турайлик, аслида уларни мўъжиза деб баҳолашнинг ўзи тўғримикин? Мўъжиза нима ўзи? Менинг назаримда мўъжиза — инсон ҳайратланиб, моҳиятига, сири-асторига етолмайдиган, ақл билан, қўл билан яратиб бўлмайдиган нарсалар, ҳаракатлардир. Яъни, фикри ожизимча, аввало инсоннинг ўзи мўъжиза, коинот, ой, қуёшу юлдузлар мўъжиза, табиат, ҳайвонот оламию, ўсимликлар дунёси, мевалар, гуллар, майсалар мўъжиза. Ҳамма мўъжизани энг қудратли зот азалдан яратиб қўйган. Биз юқоридағидай гўзал, маҳобатли обидаларни кўрганимизда — уларни мароқ билан томоша қилиб, завқу эҳтирослар уммонига ғарқ бўлган ҳолда, уларнинг ижодкори, мўъжизакори, асил мўъжиза — инсонга, унинг қўлларига таъзим айлаб, инсонга ато этилган куч-қудрат, ақл-заковатнинг нималарга қодирилигини мушоҳада қилиб, асосий ҳамду санони инсоннинг яратувчиси — улуғ Тангри шаънига айтмоғимиз ва шукrona билдириғимиз жоиздир...

Тож Маҳал ҳақида гап кетганда эса, аввало унинг яралиш тарихи, сабабчилари ва ижодкорлари бўлмиш Мумтоз Маҳал ва Шоҳ Жаҳонларни ёдламасликнинг иложи йўқ.

Ҳинд тарихчиларининг қайд этишича Шоҳ Жаҳон бобурийлар ичида энг омадли подшо бўлиб, унинг қарийб ўттиз йиллик ҳукмдорлик даври Ҳиндистондаги бобурийлар, балки бутун темурийлар салтанатининг энг гуллаган, олтин давридир. У жуда кўп иншо-

отлар, санъат обидалари қурдирган. Дехлидаги «Лаъл қалъя», «Масжиди Жомъе», «Масжиди Луълу», «Тож Маҳал» шулар жумласидандир. Бу даврда юрт фаровонлиги ҳам яхши бўлган. Шунинг учун ҳам ҳалқ Шоҳ Жаҳонни ҳурмат қилган, ҳозир ҳам эъзоз билан тилга оладилар. Шоҳ Жаҳон эл-юрт учун, келажак авлод учун яна кўпроқ тарихий, маданий бойликлар қолдириши мумкин эди. Афсуски унинг ҳукмдорликка ниҳоятда ўч, бешафқат ўғли Аврангзеб aka-укалари билан олишиб, уларни ўлим ва қийноқлар билан йўлидан четлаштириб, падари бузрукворини ҳисбга олади ва қалъага қамаб қўяди...

Шоҳ Жаҳон йигирма бир ёшида Аржуманд бонуга уйланган эди. Аржуманд бону ота-онаси билан Эрондан келиб қолган, у Жаҳонгирнинг суюкли хотини Нур Жаҳон бегимнинг жияни эди. Шоҳ Жаҳоннинг отаси гўзаллиги, оқила, доно бўлгани учун келини Аржуманд бонуни Мумтоз Маҳал («саройнинг кўрки, ифтихори») деб атарди. Мумтоз Маҳал билимли, маданиятли, айни вақтда анча художўй, эрига ниҳоятда садоқатли, унга маслаҳатдош бўлган. Шунинг учун ҳам Шоҳ Жаҳон ўзининг деярли барча сафарлари ва юришларида суюкли хотинини ўзи билан олиб юрган. Мумтоз Маҳал ана шундай юришларнинг бирида, Бурхонпурда ўн тўртингчи фарзандини туғищда, ўттиз етти ёшида вафот этади. Қалбига энг яқин, азиз кишиси бўлган хотинининг умри поёнига етаётганини сезиб қолган Шоҳ Жаҳон сўнгги дақиқаларда дард, алам билан: тилагингизни айтинг, ҳар не истасангиз бажо келтиурман, дейди. Шунда Мумтоз бегим эрининг ёш қалқиб турган меҳрибон кўзларига сўнгсиз муҳаббат ва илтижо билан термилиб, уч нарсани — ундан кейин бошқа уйлан-масликни, фарзандларига меҳрибон бўлишни ва ўзининг, яъни, ҳаётдан барвақт кўз юмаётган хотинининг хотираасига муҳташам бир ёдгорлик барпо қилишини сўраб ўтинади.

Шоҳ Жаҳон Мумтоз Маҳалнинг барча васиятларини адо этади. Фарзандларидан биронтасига қаттиқроқ, жазо бергани маълум эмас, аксинча уларни доим ардоқлаган. Лекин ҳаётнинг ғалатлигини қарангки, ниҳоятда олижаноб, меҳрибон (фарзандларга нисбатан!) отадан туғилган ўғиллар бир-бирлари билан аёвсиз жанг қилиб, тож-тахт учун курашадилар. Айниқса, Аврангзебнинг жоҳиллиги, раҳм-шафқатсизлиги ҳам масиникидан ошиб тушади.

Тож Маҳал — Мумтоз Маҳал васияти, илтимоси-нинг ижросигина эмас, балки эрниң хотинга чексиз муҳаббати, садоқати рамзиdir. Шунинг учун ҳам уни «Севги достони», «Муҳаббат ва мусибат кошонаси», «Оқ мармар достони» каби номлар билан таърифлайдилар. Дарҳақиқат қарийб йигирма йил давомида 22 минг ишчи, қурувчи, хунармандалар кучи, санъати билан барпо бўлган бу муаззам мақбара учун Шоҳ Жаҳон умрининг катта бир қисмини, бутун дунёсини бағишлади. Мақбара тарҳини яратища Ҳиндистон, Эрон, Туркия, Ўрта Осиё, Арабистон, айрим оврупо давлатларининг меъморлари, уста-хунармандалари, рас-сомлари узоқ бош қотиришади. Дид-фаросати юксак, санъатни нозик ҳис этувчи Шоҳ Жаҳон тарҳларнинг ҳар бир чизигини синчилаб кўрар, кўнгли тўлмай, қайтарарди. У суюкли ва вафодор, ҳаётда ҳамиша ҳамдам ва ҳамдард бўлган соҳибжамол хотини хотирасига чиндан ҳам дунёда унинг ўзи каби тенги йўқ обида-ёдгорлик қурдиришни ният қилган эди. Шоҳ Жаҳон хотини барҳаётлигида ҳам уни беҳад қадрлар, ардоқлар эди. Шоҳ ва малика ақлу фаросатда, хусну малоҳатда ҳам бир-бирларига жуда мос эдилар; улар чинакам ошиқ-маъшуқлар каби бир-бирини севиб, соғиниб яшаган эдилар. Шунинг учун ҳам ҳинд тадқиқотчиси Б. Луния: «Тож Маҳал — Бобурийлар санъатининг гўзal гулдастаси, дунёда эр-хотин муҳаббати, аҳиллиги ва садоқати шаънига бунёд этилган энг гўзal, энг мумтоз обидадир» деб ёзган. Санъатшунос Бхаратха Ийер эса: «Бошқа зўр бинокорлар ҳам бўлган, лекин муҳаббат хотирасига ҳеч ким, ҳеч қачон Аградаги Тож Маҳалдай қимматли ва мўъжизавор обида яратмаган», дейди ишонч билан.

Тарих китобларида битилишича, Тож Маҳал учун дунёning қайси мамлакатидан бўлмасин, энг қиммат-баҳо қурилиш ва безак ашёлари топиб келтирилган. Масалан, зумрадни олис Россиядан, ҳақиқни Бағоддан, гранитни Нилдан, ёқутни Бадахшондан, ферузани Тибетдан, садафни Шри Ланкадан, марваридни Ҳинд океанидан олиб келишган. Бу ишларга 20 йил мобайнида кетган ишчи кучиу маблағни бир тасаввур қилиб кўринг. Лекин шуниси диққатга сазоворки, давлат ҳазинаси шу даврда бойликка тўлиб-тошган, бундай катта ва кенг кўламли қурилишларга ҳар қанча маблағ сарфланса ҳам халқ манфатига асло зиён етмаган. Зоро, Шоҳ Жаҳоннинг омади ҳам шунда эди...

Тож Маҳалнинг дастлаб кўзга ташланадиган хусусияти — унинг дунёдаги бирон-бир обида бўйлаша олмайдиган салобати, виқори эди. У узоқдан тинч уммонда сезилар-сезилмас чайқалиб турган улкан кемага ўхшаб кўринади. Лекин, табиийки, мақбара ҳар қандай баланд кемадан бир неча баробар юксак эди. Мен ташқи дарвозадаң кирищдаги супада туриб ўсмирлик орзуларимдан бирининг ушалганига шукроналар айтиб, енгил энтикканча Тож Маҳални томоша қиласр эканман, беихтиёр қадимга юноналар дунёдаги етги мўъжизанинг бири деб ҳисоблашган Вавилон Самовий боғларини эсладим ва ўзимча бу икки ёдгорлик таржимаи ҳолида қандайдир ўхшашлик, муштараклик топгандай бўлдим. Гап шундаки Самовий боғлар ҳам аёлга бўлган муҳаббат туфайли бунёд этилган дейилади. Ривоятларда нақл қилинишича бундан икки минг йилча аввал Месопотамия (икки дарё оралиғидаги мамлакат) подшоси Навуходоносор Каспий денгизи бўйидаги Мидия мамлакатининг маликасини севиб қолади ва унга уйланиб, ёш хотинини пойтахтга — Вавилонга олиб келади. Каспий бўйининг салқин ва намхуш ҳавосига ўрганган малиқа Вавилоннинг иссиқ иқдимиiga кўниколмай қийналади. Хотинини жони-дили билан яхши кўрадиган Навуходоносорнинг ниҳоятда боши қотади. Ўйлаб-ўйлаб самода ям-яшил боғ барпо этиш чорасини топади. Бошқа юртлардан қурувчи усталар, тошкесарлар, меъморларни маслаҳатта, ёрдамга чақиради. Тўрт қаватли тош миноралар тикланади-да уларни бир-бирига туташтириб, майдонлар ясалиб, унумдор тупроқ ташиб чиқилади ва малиқанинг ватани бўлган Каспий бўйидан чиройли гуллар, манзарали дараҳтлар келтирилиб экилади ва у ерда чиндан ҳам боғи Эрам вужудга келади, малика самовий боғ хиёбонларида сайр этиб юрадиган бўлади...

Аёл шаъни, иффати, номуси эркак зоти учун нақадар улуғ ва муқаддаслигини ифода этувчи яна бир тарихий нақл бор. Франклар қироли, каролинглар сулоласининг машҳур намоёндаси Буюк Карл (VIII-IX асрлар) веналиклардан кимдир хотинининг шаънига ножоиз сўз айтгани учун Венани етти йил қамалда тутиб турган, дейдилар. Балки, императорнинг мазкур қилмишини бутунлай оқлаб бўлмас, лекин масаланинг бир жиҳати муҳимки, юқоридаги нақл ўзини эркакман деб юрган, ислом ақидасига кўра улуғ қилиб яратилган жинс вакилларига абадул-абад сабоқ рамзи

бўлиши (ўз жуфти ҳалоли ё вафодор севиклиси шаъни, ор-номусини ҳимоя қилиш маъносида) мумкин ва лозим эди...

Булар, нима бўлганда ҳам муҳаббатнинг нақадар қудратли куч эканлигига, ўтмишда бу сарафroz туйғунинг нақадар азиз ва лазиз неъмат сифатида эъзозланганлигига ёрқин далиллардир. Ҳа, муҳаббат инсонни не чоғлиқ жасоратлар, олий ҳимматлар кўрсатишга ундаиди-я! У сабр-тоқатта, умидворликка ўргатади. Бунинг сири нимада экан?.. Шоҳ Жаҳон бешафқат ўғли Аврангзеб томонидан Жамна дарёсининг ўнг соҳилидаги Қалъа хоналаридан бирига қамаб қўйилади. (Аслида унинг бу қилмиши «Ал-қассос-ул минал ҳақ» дегани тарих ҳақиқатининг ёрқин мисолидир, чунки ўз даврида Шоҳ Жаҳон ҳам отаси Жаҳонгирга қарши бош кўтарган). Хона дарчасидан дарёning нариги қирғоғидаги Тож Маҳал яққол кўриниб турган. Балки, Мумтоз Маҳалга атаб, буржи мусамман усулида (саккиз қиррали) қурилган бу хонани Шоҳ Жаҳоннинг ўзи ўғлидан ўтиниб сўраб олгандир. Ҳамма нарсадан жудо бўлган, ҳамма имкониятдан маҳрум этилган Шоҳ Жаҳон ана шу дарчадан Тож Маҳалга — хотини Мумтоз бегим мақбарасига тикилиб кунларни аламли ўtkаза бошлади. (Бу вақтда Мумтоз Маҳалнинг вафот эттанига салкам ўттиз йил бўлган эди). Маълумки, Мумтоз Маҳал вафоти олдидан катта қизи Жаҳон Оро бегимга отаси ҳолидан ҳамиша хабардор бўлиб, унинг яхши-ёмон кунларида ёнида туришни васият қилган. Мехрибон, оқила қиз дарҳақиқат ҳибсдаги хаста отасининг умри охиригача ёлғиз ғамхўри ва ғамгузори бўлиб, сидқидидан хизмат қилади. Бизга айтиб беришларича, совуқ мармардан иборат хонада тик туравериц, асабийлашиш оқибатида Шоҳ Жаҳоннинг оёқлари шол бўлиб қолади. Жони-жаҳони — севикли хотини Мумтоз бегимнинг абадий оромгоҳига тикилиб таскин олиш имкони, толеидан маҳрум бўлгани учун қаттиқ қайгуради, изтироб чекади. Шунда Жаҳон Оро бегим хонага Тож Маҳалнинг акси тушиб турадиган қилиб катта ойналар қўйиб беради. Шоҳ Жаҳон энди ана шу ойналарга термилиб ўтиради. Шу тариқа, у саккиз йил хибсда ётиб, 1666 йили оламдан кўз юмади ва ўз васиятига кўра уни Тож Маҳалга — Мумтоз бегим ёнига дафн этадилар. (Илоҳи, ҳар иккаласини тангри ўз раҳматига олган бўлсин, бир-бининг дийдорига етишмоқликни насиб этсин). Дар-

ҳақиқат, меҳрибон ва садоқатли жуфтлик тимсоли бўлмиш шоҳ ва малиқани ёвуз ўлим бир-бираидан ажратган эди, ана шу ўлимнинг ўзи уларни яна топиштирса, бирлаштирса не ажаб...

Аслида, суюкли рафиқасига нисбатан кучли меҳрмуҳаббатли бўлиш, унинг иззат-ҳурматини жойига қўйиш каби олижаноб, чинакам эркагона фазилат бо бурийларга боболари Бобурдан, бобокалонлари Амир Темурдан қутлуғ мерос эди. Соҳибқироннинг Бибихонимга, Бобурнинг Моҳим бегимга бўлган оташин муҳаббатини тарихчилар мароқ ва ҳавас билан ҳикоя қиласидилар. Биргина мисол. Бобурнинг узоқ айрилиқдан сўнг Кобулдан келаётган суюкли хотини Моҳим бегимни Ҳинд заминида қанчалар зорлик ва интизорлик билан кутиб олганини эслаб, Гулбадан бегим шундай ёзди: «...Подшо ҳазратлари бизни Жалолий қўлида учратишни мўлжаллаган эканлар. Намозшом пайтида бир киши келиб, — «Ҳазратни икки курва нарида қолдириб келдим», — деди. Подшо дадам ҳазратлари то от келтургунларича сабр қилмай, пиёда йўлга тушиб, Нинча моҳим уйлари олдида биз билан учрашдилар. Онам отдан тушмоқчи бўлдилар, лекин подшо дадам қўймасдан, ўзлари онамнинг отлари жиловидан ушлаб, ўз уйларига етгунча пиёда кетдилар...» Бу, воқеа, дарҳақиқат, муҳаббатнинг, ишқ туйфусининг шоҳу гадога баробарлигидан, ҳар қандай ғозий саркарда ҳам оддий ошиқлар қатори суюкли ёрга жиловдорлик баҳтидан масрур бўлиши мумкинлигидан олий нишона эмасми?... Худди ана шу ҳолат, менинг назаримда эрнинг хотинга муҳаббати, соғинчини ифода этувчи рамзий ҳайкал қўйишга лойиқ гўзал ва бафоят таъсири манзарадир.

Қўйидаги шоҳона рубоий балки ана шу жиловдорлик лаҳзаларидағи соғинчу зорлик изтироблари ила васлу висол ҳаяжонлари Ганг тўлқинларидек мавжурниб, дил ҳавзасининг қирғоқларидан тошиб чиққан умрбоқий дақиқаларнинг гўзал суратидир?

Сен гулсену мен ҳақиқар булбулдурмен,
Сен шуъласену ул шуълаға мен қулдурмен.
Нисбат йўқдур деб ижтиюб айламаким,
Шаҳмен элга vale сенга қулдурмен...

Шу ўринда мен Покистон ва ҳинд кино ижодкорларининг муҳаббат, ошиқу-бекарорлик мавзуига иш-

тиёки ва эътиқоди зўрлигига Бобурий ошиқ-маъшиқлар Жаҳонгир ва Нур Жаҳон, Шоҳ Жаҳон ва Мумтоз бегимларнинг бетакрор ва таърифига қалам ожиз, келажак авлодлар учун вафо ва садоқат рамзи бўлмиш ишқий ҳаётлари ҳам сабабмасмикин, деб ўйлаб қолдим. Балки...

Тож Маҳални уч томондан ўраб турган боғ-хиёбон ҳам ниҳоятда гўзал эди. Ям-яшил майса билан қопланган, турли шакллар берилган йўлакларга оёқ босишга ийманасиз. Ўртадаги узун тошховузга тушиб турган миноралар, мақбара гумбазлари акси зангори тусда товланади. Ҳовузнинг икки томонидаги чиройли сарв дараҳтлари Аржуманд бонунинг «сарву-санобар» қадди-бастини эсга солиб тургандай... Мақбарага яқинлашганингиз сари, мармар деворнинг тиниқ ва силлиқлигидан қўзингиз қамаша бошлайди. Мақбара майдонининг тўрт бурчагидаги осмонга бўй чўзган тўрт минара гўё уйқудаги шоҳ ва малика оромини, осойиштагиagini қўриқлаб турган тўрт посбонга ўхшаб қўринади.

Қадим замонларда меъморчиликни юксак дид эгалари, билимдон кишилар «Санъатлар онаси» деб таърифлашган экан. Мен симметрия-мутаносиблик, мувозанат қонуниятларининг энг нозик тебранишлари нуқтаи назаридан ниҳоят даражада пухта, бенуқсон бу муazzам обидага қараб туриб юқоридаги таърифнинг нақадар ҳаққоний ва адолатли эканлигига амин бўлдим. Тож Маҳални ғоят мукаммал ва гўзал ишланган санъат асарининг олий намунаси деб баралла айтиш мумкин. Ичкарига қадам қўйишингиз билан сизни маҳзун ва ваҳимали ҳислар чулғаб олаётгандай бўлади. Йўлаклар шифти-баланд гумбазлар ости қозон шаклида, думалоқ. Деворларга Қуръони каримдан оятлар битилган. Мақбара, одатдаги мусулмон анъаналирига кўра икки қаватли қилиб қурилган. Биринчи, асосий қаватда, саккиз бурчакли катта ва кенг хонада шоҳ ва маликанинг сағаналари ёнма-ён қўйилган. Шоҳ Жаҳон сағана тошининг ёнларига худонинг 99 исми ўйиб ёзилган, Мумтоз бегим сағана тошининг ёнларига эса нилуфар гуллари, лола тасвиirlари ўйиб ишланган, уларга зумрад, ёқут, садаф каби қимматбаҳо тошлар қадалган. Хона деворларига айланасига турли гуллар тасвири шундай ишланганки, силаб кўрсангиз сип-силлиқ, қандай ўйиб битилганига ақдингиз бовар қилмайди. Худди ойна остидаги суратга ўхшайди. Бунисини ҳам қўйинг, мақбара хизматчилари қўл чи-

роқларни ёқиб, деворга яқинлаштирган эди, биз кўриб турган гуллар тагида, мармар ичида яна-бир қават ана шундай тасвир-чиройли гуллар намоён бўлди. Беихтиёр, санъатингга, ҳунарингга офарин, дейсиз, бу мўъжизавор обида ижодкорларини ўйлаб.

Шоҳ Жаҳон ва Мумтоз Маҳалнинг жасадлари мазкур хона остидаги лаҳадхонага дағн этилган. Бу жимжит, сокин ердаги ҳар қандай товуш атрофга таралиб, бир неча лаҳза акс-садо бериб туради.

Биз мақбара ичидан ғамгин таассуротлар билан қайтиб чиқдик. Бироқ кетгимиз келмай, хиёбонда яна бу боқий санъат тимсолини томоша қилиб юрдик. Секин-аста бояги ғамринлик кетиб қалбимиз ифтихор туйғулари билан тўла бошлади. Ахир буюк ватандошларимиз—бобурийлар ва уларнинг ўлмас обидалари ахли Ҳиндистон учун, олис-олис юртлардан келаётган сайёҳлар учун тавоф қилиб, номини ёдлаб кетадиган улуф инсонларга, муқаддас жойларга айланса, қувонмай бўладими?..

Мақбаранинг кундузи ярқираб товланадиган мармар-деворларидан кечаси, ойдин тунда оч яшил нур таралиб тураркан, Тож Маҳал узоқдан ҳавода парвоз қилиб кетаётган оппоқ ҳарир либосли келинчакка—Мумтоз бегимга ўхшаб кўринаркан...

Таниқли ҳинд ёзувчиси Кришан Чандр шундай таъриф беради: «Тож Маҳалдай гўзал мўъжизани табиатнинг ўзи яратса олармикин... Гўё бутун Ҳиндистон ҳалқининг меҳр-муҳаббати мужассам бўлган-у, ялтироқ оқ мармардан либос кийиб, мана шу заминда қад кўтарган. Назаримда Тож Маҳал бунёдга келгандан кейингина Ер юзининг ҳусни мукаммаллик касб этган...»

— Қани энди ҳозирги шоҳлар ҳам шунаقا обидалар қурдирса, — дея хитоб қилди Зокиржон aka ҳаяжонини босолмай.

Тож Маҳал кўркига мос бир ҳол эътиборимни жалб этди: сайрчилар, зиёратчилар орасида гўзал ҳинд қизлари, жувонлари ҳам кўп бўлиб, уларнинг ўзҳ кулгулари ҳам ғоят жозибали — юрагингиз торларига беихтиёр тегиб кетаётганга ўхшарди. Синчиклаб зеҳн солсангиз, у қора кўзларда, ишвали нигоҳларда таърифлаш қийин бўлган ғалат бир латофат, сеҳр борлигини пайқаш мумкин эди. Ана шундай жувонлардан бири хиёбоннинг йўлакка яқин жойида, сарв остида келишган эри, тўрт ёшлар чамасидаги қайсаргина ўғил-

часи билан ўтиради. Жувон ҳинд киноларидағи гўзаларсимон қўлидаги майса чўпини goҳ эри, goҳ ўғли-нинг бўйнига текизиб ҳазиллашарди. Ўз иши ўзига нашъя қилиб қаттиқроқ кулиб юборган эди, ўнг томонидаги иккита нотекис тиши кўриниб қолдию гўё гўзаллик маъбудининг тиниқ чеҳраси бирдан хира тортгандай бўлди. Бир кам дунё деганлари шу-да. Лекин бу камчиликни тузатса бўлади-ку...

Тож Маҳал боғ-хиёбонидаги шу кунги сайдимиз 40 рупийданга суратга тушиш билан ниҳояланди. Бундоқ қараганда қиммат — битта сурат ўша пайтдаги пулимизга 1600 сўм (купон сўмдан илгариги анча қадри бор пул)! АҚШ пулига чақадиган бўлсак, салкам 1,5 доллар эди. Хусусан саёҳатда юрган одамнинг чўнтагини анча енгиллаштириб қўядиган сумма, лекин биз ачинмадик албатта. Ҳинди斯顿га келиш осонмию, Тож Маҳал ёнида суратга тушиш ҳаммагаям насиб қилтими?.. Тўғриси, шундоқ деб ўзимизга таскин бердик-да.

БУГУН МЕНИНГ ТУФИЛГАН КУНИМ...

Бобур Деҳли, Аградан сўнг Фотехпур Секрини ҳам ўз давлати худудига қўшиб олган. Тушдан кейин Бобурийлар забт эттанлиги учун «Фолиблар шаҳри» деб аталган ана шу тарихий шаҳар сари жўнадик.

Бугун Ҳинди斯顿нинг озодлик байрами эди. 1857 йил инглизлар Бобурий шоҳларнинг сўнгтиси Баҳодиршоҳ II бошчилигидаги ҳинд миллий қўзғолонини шафқатсизларча бостиргандан кейин Баҳодиршоҳни Бирмага умрбод сургун қилиб, унинг авлодларини, яъни бобурийларни батамом қиришга киришадилар ва Ҳинди斯顿ни эгаллаб оладилар. Йигирманчи аср бошларида мустамлакачиларга қарши миллий-озодлик ҳаракатлари авж олади. Бу курашга бош бўлган Махатма Ганди сатъяграфа, яъни куч ишлатмасдан қаршилик кўрсатиш сиёсатини тарғиб қилиб чиқади. Бу сиёсат фақат Гандининггина эмас, ювош, беозор ҳинд халқининг табиатини, иродасини, дунёқарашини, юксак одамийлигини жуда яхши ифодалар эди. Айни вақтда, жасорат, жанговарлик ҳам бу халқдаги устивор фазилатлардан эди. Салкам бир асрлик мустамлака даврида ҳинд тупроғида жуда кўп қўзғолонлар бўлиб ўтади ва шу ҳаракатлар натижасида 1947 йили

августда озодлик, мустақиллик қўлга киритилади. Мустақил Ҳиндистоннинг биринчи бош министри Жавоҳарлаъл Неру бўлган.

Бугун ҳинҷа халқи ана шу қутлуғ, муборак санани, манглайида «озодлик» деган сўз толъе юлдузидай ча рақлаган кунни байрам қилмоқда эди. Биноларнинг пештоқларида байроқлар ҳилпирав, байрамни, мустақилликни олқишлиовчи шиорлар осилган эди.

Аградан чиққанимиздан кейин байроқлар, шиорлар деярли учрамай қолди. Қишлоқ аҳли ўз юмушлари, кундалик тирикчилик тавишлари билан банд эди.

«Голиблар шаҳри» — Фотехпур Секри Аградан ўн беш миля (1 миля тахминан 2 км) ғарбда эди. Аҳоли бу томонларда нисбатан сийрак бўлиб, икки ёндаги далалар, дараҳтзорда одамга нисбатан ҳайвону паррандалар кўпроқ учради. Гоҳо-гоҳо, сийрак дараҳтзорлар четида солланиб юрган эркак товусларга кўзимиз тушиб қоларди. Бир жойда қузғулар галасига дуч келдик. Йўл четида фуж бўлиб туришарди. Жўжалари ҳам бор эди. Биттаси йўлга чиқиб юбориб, машинамиз тепалаб кетишига сал қолди. Мен қузғунни фақат ҳайвонот боғларида кўрганман ва бу ўлаксахўрларни суймайман. (Улар ўлимтиқ бор жойда бўлишади). Валтер Скоттнинг шеъри менда қузғун ҳақида ноҳуш таассурот қолдирган:

*Қузғун учар қузғунга,
Қузғун сўзлар қузғунга:
Бугун нима егаймиз,
Ишни қандай бошлаймиз?*

*Қузғун дер жавобида:
Овқатимиз бор тайёр —
Қирда, оқ тол тагида
Ботир ўлиги ётар...*

Кўчанинг қоқ ўртасида айик ўйнатиб юрганлар ҳар қадамда учради.

Йўлнинг хоҳдаган жойида у бетдан бу бетга шошилмай ўтиб юрган, шундоқ йўл четларида ҳар қандай шовқин-суронга, машина сигналига пинагини бузмай кавиш қайтариб ётган бетаккаллуғ сигир, эчки ва бошқа ҳайвонларни кўрганимда хаёлимдан бир фикр кечади: ўзларига бўлган эътибор, эътиқодни ўта суиъистемол қиласиган бу жониворлар ўзларини ниҳоятда эркин ҳис қилишаркан...

Фотехпур Секрига қўрғон қолдиги бўлган девор-дарвозадан кириб бордик. Манзара бир вақтлар бу жой ниҳоятда хушманзара ўрмонлардан иборат бўлганлигини эслатиб турарди. Зеро, Секри Бобур диққат-эътиборини бежиз тортмаган. «Шанба куни жумодил-аввал ойининг ўн тўртида Огра навоҳисидин кўчуб, чохлар қозилғон юртқа келиб тушуди, — деб ёзди у «Бобурнома»да. — Эртасиға андин кўчтук. Хотирға кечтиким, бу навоҳида улуғ ўрдуға суйи вафо қилур ер Секридур». Бобур «Бобурнома»нинг бир қанча саҳифаларида Секрига боргани ва у ерда сайр қилиб қайтганини қайд этади. Яна бир саҳифада ушбу воқеани битган: «Бу рамазонни «Ҳашт биҳишт» боғида ўткарилди. Ҳар таровихни фусл била ўталди. Ўн бир ёшимдин бери икки рамазон ийдини паёпай бир ерда қилғон эмас эдим. Ўттан рамазон ийди Ограда бўлиб эди. Бу қоида ҳалал топмасун деб, якшанба салҳ оқшоми ийд қила Секрийға борилди. Секрийда солғон «Боғи фатҳ»нинг ғарб шимол тарафидағи тош супа тайёр бўлуб эди. Ул супа устида оқ уй тикиб, анда ийд қилилди». Шу воқедан бир йилча кейин Бобур Секрийда, кўл ичида ўзи буюрган мусамман сұфага кема билан борганини эслаб ўтади. Бобурнинг набираси Акбар ҳаётида эса Секри алоҳида ўрин тутган. Юқорида айтиб ўтилганидай, Акбар Секрида яшовчи Шайх Салим Чештийга ихлоси баландлиги туфайли, гўё унинг башорати ва дуолари ижобат бўлиб ўғил кўрганига ишонади. Шайхга эътиқоди янада ортиб кетади, ана шу пири ҳурматидан Секрида ажойиб бир шаҳар барпо этади. Ҳатто деярли 15 йил бу шаҳар бобурийлар салтанатининг пойтахти бўлиб хизмат қиласи. Кейин, Акбар марказни негадир Лоҳўрга кўчирган. Шундан сўнг Фотехпур Секри секин-аста ўз файзи-тароватини йўқота борган. Маҳаллий ҳалқ вакилларининг айтишича шаҳарга сув чиқариш қийин бўлгани учун ҳукмдорлар бу жойни ташлаб кетишган.

Дарҳақиқат, XVI аср охириларида Акбаршоҳ томонидан қурдирилган маҳобатли қалъа ердан жуда баландда бўлиб, тош зиналардан чиқиб боришга анчамунча одамнинг қуввати етмас эди. Қалъа олдидағи майдондан шаҳарнинг олди — кун юриш томондаги ям-яшил олам — олисдаги тоғларгача кафтдагидай кўриниб турари. Чиндан ҳам табиати оромгоҳ шаҳарларни эслатувчи, бир кўрган одамга сирли туюладиган бу ғаройиб масканда савдо-сотиқ билан шуғулла-

нувчи катта-кичик дўкон эгаларию майдада-чуйда со-тувчиларни ҳисобга олмагандан аҳоли деярли яшамас эди. Шунинг учун бу ерни ҳозир «Ўлик шаҳар» ҳам деб аташаркан. Лекин бу ердан биз каби сайёҳларнинг оёғи узилмаслиги кўриниб турибди. Салим Чештийнинг қалъа ичидаги мақбарасини зиёрат қилувчиларнинг сон-саноғи йўқ эди. Демак бу машҳур Шайхга ҳозир ҳам эътиқод қилувчилар кўп. Қалъанинг ўртаси тош ётқизилган катта майдон, кун чиқишидаги бир маҳаллар сарой мұлозимларию канизакларнинг хос жойлари бўлган хоналар энди тижорат дўконларига айлантирилган эди. Яъни, қалъа ичida ҳамон ҳаёт қайнамоқда. Қалъа ташқариси эса бутунлай бошқа дунёга ўхшайди. Ҳарқалай, бу афсонавор шаҳарни тарк этиш фақат сув чиқариш муаммоси билангина боғлиқ эмасдир, бошқа жиддийроқ сабаблар бўлиши мумкин, деган фикр кечди хаёлимдан.

* * *

Ортимизга қайтиб, ярим йўлдан Искандар мавзеи томонга бурилдик. Бу йўлда аҳоли зич яшар экан, тез-тез ҳинд киноларидағидай мис кўзаларини елкасида кўтариб кетаётган қизлар, жувонлар учарди.

Ҳиндистоннинг шимолида, Уттар Парадеш штатида, Жамна дарёсининг ўнг соҳилида жойлашган Агра шаҳри тарихий обидалар кўплиги жиҳатидан Самарқанд, Бухоро, Хива каби қадимий шаҳарларимизни эслатади. Бу ердаги ҳар бир обида ўз таржимаи ҳолига, тарихига эга, энг муҳими, уларнинг аксарияти бобуррийлар томонидан қурдирилган ва уларнинг умри, ҳаёти билан боғлиқ. Шу ўриндә «Бобурнома»дан бир далилни келтириш ғоят ўринли. Шарафиiddин Али Яздий ўзининг «Зафарнома» асарида Амир Темур томонидан барпо этилаётган «Масжиди сангин» иморати қурилишида ҳар куни Озарбайжон, Форс, Ҳиндистон ва бошқа мамлакатлардан келган икки юз сангтарош ишлашини маҳобат қилганига киноя билан Бобур шундай деб ёзади: «Бир Ограда ушбу Ограничинг сангтарошларидан менинг иморатларимда ҳар кунда олти юз саксон киши иш қилурлар эди. Яна Ограда ва Секрида ва Биёнада ва Дулпурда ва Гувалёрда ва Кўлда минг тўрт юз тўқсон бир сангтарош ҳар кунда менинг иморатимда иш қилурлар эди. Ҳар ҳирфагар ва ҳар коригардин ушбу қиёс била Ҳиндистонда беҳад

ва бениҳоятдур». Мана бу ўзига хос ҳисобот-ахбортдан кўриниб турибди, Бобур дастлабданоқ ҳинд элида жуда катта кўламдаги қурилиш ишларини бошлаб юборган ва улардаги ишнинг бориши, ҳунарманду мутахассислар саноғи ва иш фаолияти билан Бобурнинг ўзи бевосита шуғулланган.

Искандар мавзеидаги Акбаршоҳ дағн этилган гўзал мақбара ҳам бобурийлар меъморчилиги намуналаридан бири сифатида эътироф этилади.

Мақбара ҳовлисига киришимиз билан йўлакдан ўттиз-қирқ қадам ичкарида, ям-яшил майсазорда юрган чиройли кийикларга кўзимиз тушди. Улар одамларга ўрганиб кетишган чоғи, бизга бир ҳуркак назар ташлаб, яна ўтлашда давом этавердилар. Кийиклар одатдаги биз кўрганлардан сал кичикроқ ва бўлакчароққа ўхшаб туюлди. «Бобурнома»да Ҳинди斯顿 кийикларига мухтасар таърифлар берилган. Шулардан бири ҳақида шундай дейилган: «Яна бир жайраннинг эркаги ҳуна йўсунлук кийикдур. Орқаси қора, туки оқ...» назаримда ҳозир биз кўриб турган кийиклар мана шу таърифга мосроқ, яқинроқ эди. Қалъа ходимининг сўзларига қараганда боғ-хиёбонда илгари 400 кийик, 200 дан ортиқ маймун бўлган. Мақбара Акбар томонидан 1602 йилда қурила бошланган, бироқ 3 йилдан кейин Акбаршоҳ вафот эттач, иншоотни унинг ўғли Салим (яъни Жаҳонгир шоҳ) давом эттириб, 1613 йили ниҳоясига етказган. Акбарнинг мусулмон, ҳинд, хотинлари бўлиб, Салим ҳинд хотинидан туғилган.

Хиёбоннинг иккинчи томонида товуслар, лойхўраксимон оппоқ қушлар ўз ҳусни-латофатларидан мамнун ва мағрур бўлиб, назокат била битта-битта босиб сўнг яна атрофга викорли боқиб қўйишарди.

Акбаршоҳ мақбараси жуда салобатли кўринса-да, анчайин сода эди. Кираверишдаги нақшлар қўчиб кетибди. Қабр қўйилган хонада эса нақш умуман йўқ, шифти баланд, карнайсимон эди. Сайфиддин ҳожи aka қуръон тиловат қиласи экан, сўзлар акс-садоси шифтда анчагача жаранглаб турарди.

Ёндаги хоналарда Оромбону ва бошқа аёлларнинг қабрлари бор эди...

Акбаршоҳ ҳинд халқининг самимий ҳурмати ва муҳаббатини қозонган бобурийлардан бири эди. Унинг хизматлари, фаолияти, шахс сифатидаги хулқ-одобини ҳинд даҳолари, олимлар, адиллар юксак баҳолай-

дилар. Жумладан, Ҳиндистоннинг биринчи бош министри улуғ мутафаккир Жавоҳарлаъл Неру эрадан аввалги учинчи асрда яшаган Ашока ва Акбаршоҳни «Ҳиндистоннинг икки буюк фарзанди» дея таъриф этади. «Акбар жуда мард жангчи ва иқтидорли саркарда эди, — дея давом этади Ж. Неру. — Ашокадан фарқли ўлароқ, у ҳеч қачон уруш қилишдан воз кечмаган. Аммо, қилич билан қозонилган ғалабадан кўра, меҳр-муҳаббат билан қўлга киритилган ғалабани афзал кўрарди...» «...У ҳинд халқи фаровонлиги йўлида кўп куч-ғайрат сарфлади». Хорижлик миссионерлар ёзиб қолдирган мана бу хотира сўзларида Акбарнинг бутун ички дунёси яқдol тасвирлаб берилган: «Жўшқин ва ўтқир ақд-идрок соҳиби, соғлом фикрловчи, эҳтиёткор, бироқ, аввало муруватли, хушфеъл ва саҳий одам эди. Бу хислатлар унда буюк ишларни бошлиовчи ва ниҳоясига етказувчи кишиларга хос мардлик билан қўшилиб кетган. У билимга иштиёқманд киши бўлиб, жуда кўп нарсаларга қизиқарди, ҳарбий ишда ва сиёsat бобида чуқур билимдан бўлибгина қолмай, бир кўп касб-хунарлардан хабардор эди... Шоҳ ҳатто дилини оғритган кишиларга нисбатан ҳам мулоҳим ва марҳаматли эди. У камдан-кам ҳолларда ўзини йўқотиб қўяр эди. Бордию шундай бўлса, жуда қаттиқ ғазабланарди аммо ҳеч қачон ғазаби узоқ давом қиласди».

Ҳинд халқида қадимдан жуда бир мудҳиш урф яшаб келарди: бева қолган ҳинд аёллари эрларининг ортидан ўзларини гулханга ташлаб ҳалок бўлишлари лозим эди. Бу урф «сати маросими» деб аталарди. Акбаршоҳ, буйруғи билан ана шу ноодамий, ваҳшиёна урф қатъиян ман этиладики, биргина мана шу далил бобурий ҳукмдорнинг нақадар раҳмдил, адолатли, инсонпарвар бўлганлигидан катта далолатдир. Шунингдек Акбар ҳарбий асиirlарни қул қилишни таъқиқлади, халқни эзизиб абгор қилувчи айrim солиқларни бекор қилди. Балки шунинг учун ҳам ўрта аср Ҳиндистон ҳукмдорлари орасида фақат Акбргина «Улуғ Акбар» деган унвонга сазовор бўлгандир, балки шунинг учун ҳам Лейн Поул «Ҳиндистондаги мўғул шоҳлари ичида энг буюги Акбардир», деганди, балки шунинг учун ҳам доктор Ишвари Прасад: «Акбар Ҳиндистон тарихидагина эмас, бутун дунё тарихида энг буюк шоҳdir. Агар оврупалик ҳукмдорлар билан таққосланадиган бўлса, Акбар улуғворлиқда

ҳам, омадбарорлиқда ҳам улардан устун туради», деб баралла айтгандир.

Биз буюк ватандошимиз Бобур ва унинг авлоддариға берилган бундай юксак баҳолар билан ҳар қанча ифтихор қылсақ арзийди, ўзларининг асли андижонлик ҳукмдорлари түгрисида ҳалол ва холис фикр айтган, уларни бошига кўтарган ҳинҷ олиму фузалоларига ҳар қанча миннатдорчилик билдиrsак, кам.

Дарвоҷе, бутун менинг туғилган куним эди. Буюк ватандошларимиз билан фаҳрланиш туйфулари устивор келиб, Ҳиндистон мустақиллик байрами билан эгизак туғилган кунни нишонлаш тадориги ёддан ҳам чиқиб кетаёзибди. Меҳмонхонага кеч етиб келдик. Шунга қарамай, эрталабки аҳдимизда содиқ туриб, шўрвага уриндик. Сайфиддин ҳожи aka яна бош ошпазлик лавозимини эгалладилар. (Бу борада орамизда ундан хафсалалироқ, ундан-да шинавандароқ киши кам топиларди).

Айтгандай, туғилган кунни нишонлашнинг ўзига яраша расм-русми, қонун-қоидалари бор-ку... Қадаҳ, кўтариб сўз айтиш учун майми, шароб дегандай... Одамзот ҳам қизиқ-да, пиёла ё бошқа идишдаги суюқлик шароб бўлди нимаю, чой бўлди нима? Лекин тарки одат амри маҳол, дегандай, орамизда бунақа масалада ҳазил кетмайди, ёронлар, дегувчилар йўқ, эмасди. Шундай бўлсада, ишни жиiddийлаштириб юбормайлик, бир томони мусофиричилик, деб Ҳиндистоннинг қизиган тошга сувдай сингувчи, кам кўпикли пивоси билан чегараланмоқчи эдик, лекин бошқаларнинг баҳтига қаршими ё менинг баҳтимгами, пиво ердаям йўқ, кўқдаям йўқ. Агра асосан мусулмонлар шаҳри бўлгани учун маст қилувчи ичимликлар жуда кам сотиларкан. Бунинг устига бутун байрам бўлгани учун ароқ-пиво сотиладиган дўйонлар очмас экан (худди бизнинг шўро замонамиздагидай). Ёш болалардай бир-икки халта «Мринди» (фантасимон ичимлик) олишдан бошқа чора қолмади. Мен ҳам, бошқалар ҳам кўп таассуф билдириджик, лекин, кўнглимизнинг бир четида ишончли бир манбага илинж борлиги учун ортиқча қайфуришдан ўзимизни асрардик. Энди ҳамма гап раҳбарнинг дилини овлаб, меҳрини эритишда қолган эди. Гап шундаки... Ҳа, бу ёғи сал кейиноқ...

Хуллас, шўрвани «Классик» деб аталмиш икки қаватли муслимлар меҳмонхонасининг томидаги ошхонада пишириджик.. Тўлқин aka ташаббуси ва ташки-

лотчилигида томнинг ўзига, ошхона олдидаги текис майдонга адёл ва сафар-тўшакларимизни тўшагандик, бир шоҳона жой бўлдики, асти қўйинг — соф ҳаволи очиқ осмон остида, фужрон ўйнаётган юлдузларга яқин равоқда... Тўлқин aka бир илож қилиб ошхонадан электр чироғи улаб чиқди (Фаррух иккиси бу «тарихий» ҳодисани теле ва кинотасвирларга туширишмоқчи эдиларда).

Шўрва одатдагидай (гарчи қовурдоқ-гўштдан бўлса ҳам) ниҳоятда мазали бўлган эди. Бир хўпладик-да Сайфиддин ҳожи аканинг бу борадаги юксак малакаси ва маҳоратига офаринлар айтиб, таҳсинлар ўқиб, гапни раҳбар томонга, яъни асосий муддаога бурдик. Сафарга жўнаётган пайтимиизда Андижонда ваксина йўқлиги боис, врачлар тавсиясига биноан кичикроқ оқ канстратда тоза спирт олган эдик ва ундан кечқурунлари кундузги ҳар хил манзараларни нигоҳимиз ва онгимиздан йироқлаштириш учун озгина-озгинадан нўш этиб турардик. Бу муолажани «дезинфекция» деб атардик. Раҳбаримиз узоқ йиллар давомида турли лавозимларда ишлаш жараёнида аргзўйларнинг лаби қимирлаганига қараб нима демоқчи бўлаёттанини дарҳол пайқаб оладиган бўлиб кетган эмасми, бизнинг томоқ қиришларимиз маънисини ҳам дарров англади ва «дизенфекция ашёсининг омборчиси»га, яъни каминага фармони олий бердилар: тоза, совуқ сувдан меъёрида қўшилган ҳолда, ҳар кимнинг (яъни хоҳловчиларнинг) ихтиёри ва имконига қараб ҳамда бугунги алоҳида аҳамиятга молик воқеа муносабати билан икки ҳиссадан тайёрлансин...

Шу билан ишлар юришиб, тил иплари ечилиб кетди. Зокиржон aka, Катта ҳожи aka, яъни Сайфиддин Жалилов, Тўлқин aka, Фаррух менинг шаънимга ўз дил сўзларини баён этиб, эзгу тилакларини изҳор айладилар. Мен уларга ўз пайтида миннатдорчилик билдириб турдим.

— Қаранг, тасодифми, сабабиятми, менинг камтаргина туғилган куним (бўлиб ҳам 47 ёшим) шу бугунга — Ҳиндистон сафарига, яна Бобурийлар салтанатига узок йиллар пойтахт бўлган Агра шаҳрига ва қолаверса, Ҳиндистоннинг озодик байрамига тўғри келиб турибди. Тўғриси, мен жуда ҳаяжонга тушдим. Бобурнинг 47 йиллик умрида қилган ишлари, ёзган асарлари, қўрган обидалари, яратган боғларини, инсоний фазилатларини санаб поёнига етиш қийин. Ва у

ана шу асарлари, боғлари, обидалари билан беш юз йилдан бери олам аро яшамоқда, балки дунё тургунча яшар. Демак, 47 йил ҳам озгина вақт эмас экан-ку. Мен қаламкаш бўлганим учун эмас, ўзимни Химолайдан ҳам баланд ва пурвиқор Бобурнинг ватандоши ва авлоди, меросхўри ва оддий муҳлиси деб билганимдан фуурланаман, мана шундай туйфуни туюшга бир андижонлик сифатида маънавий ҳақим борлигидан баҳтиёрман. Бобур Мирзонинг муборак пойқадамлари теккан Аграда, мусулмонлар меҳмонхонаси томида дастурхон ёзиб, ўзбекона, Андижонча чордана қуриб ўтиришимизнинг ўзи биз учун катта шарафдир...

МАФТУНКОР ШАХС

Хонага киргач, яна улуғ Бобурнинг шарафли ва аччиқ қисмати, Ҳиндистон, хусусан Агра билан боғлиқ умргузаронлиги ҳақида ўйлаб кетдим. Тақдир деган нарсанинг мураккаб ва бешафқатлигини кўрингки, ҳали мурти чиқмаган, ўйин боласи бўлиб юрган шахзодани не-не синовларга гирифтор қилмади. Андижондан Самарқандга от суришга мажбур этди. Ўратепаю Тошкент атрофларида сарсон-саргардон кездирди, шоҳлик тожидан кечмак хоҳишини кўнглига солдию яна қайтариб олди. Сўнг Ҳисор орқали Афғонистонга олиб кетди.

Бу ишқ келтирган ранжу аламлар, дарду ситамлар эса Сизга маълум...

Бобур Понипатдаги тенгсиз жангда Иброҳим Лодийни мағлуб этиб, Дехлида ўзини шоҳ деб эълон қилдиргач, Аграга йўл олади. Лекин Агранинг ноқулай иқлими Бобур ва унинг лашкарларини анча саросимага солиб қўяди. Ҳиндистоннинг жазирама иссиғига чидай олмаган аскарлар халок бўла бошлайдилар. Шунинг учун Бобурнинг беклари ва йигитлари тезроқ Кобулга қайтиш истагини билдириб шоҳга арз қиладилар. Ҳатто Бобурнинг ишонган ва суянган дўсти, тажрибали жангчи ва моҳир лашкарбоши, шоҳнинг яқин ва оқил маслаҳатчиси Ҳўжа Калон ҳам шундай қарорга келган эди. Бобур қаттиқ ранжийди. Унинг узоқ юртга от суриб келишдан мақсади ҳинд эли бойликларини талон-тарож қилиб қайтиб кетиш эмас, балки бу бепоён худудда катта бир давлат тузиб, унга ҳукмронлик қилиш, ўз ота-она юритида рўёбга чиқаролмаган катта орзу-

армонларини шу ерда рўёбга чиқаришдан иборат эди. У беклар ва мулозимларни тўплаб кенгаш ўтказади. Катта нутқ сўзлайди, жангчи ва бекларнинг фурурию ориятига таъсир этадиган сўзлар билан уларга мурожат қиласи ва сўнгида: «Мен билан қолишни истамаганларга жавоб, қаёқса кетишса кетаверсин», дейди. Шундан кейин ҳамма Бобурга садоқат изҳор этишиб, у билан қолишга сўз беришади.

Ҳиндистон халқи ҳам аввалига Бобур ва унинг лашкарларидан, бекларидан кўрқиб, ўзларини олиб қочишиб ҳатто ўз уй-жойларини ташлаб кета бошлайдилар. Чунки улар ҳам Бобурни босқинчи бир сulton, бу ерни ҳам вайрон қилиб, одамларни қириб, ўз юртига қайтиб кетади, деб ўйлардилар. Лекин Бобурнинг Аграда ва бошқа шаҳарларда катта-катта қуришларни бошлаб, боғлар барпо қилишга қиришганини кўрган халқ ўз қишлоқларига қайтиб, янги шоҳ ва унинг ҳукуматига меҳр кўя бошлайдилар.

Зоро, Жавоҳирлаъ Неру таъкидлаганидай, «Бобур... умрининг кўп қисмини жангу жадалларга ва истанбуллик машҳур меъмор лойиҳаси бўйича тикланаётган пойтахт — Агра қурилишига бағищлади».

Бобур ниҳоятда тадбиркор ва дипломат инсон эди. Бу фазилатлар унга кўп ҳаётий, жиддий муаммоларни ҳал ётишда жуда асқотади.

У талончилик билан шуғулланган навқарларини қаттиқ жазолайди, жумладан, Берадаги урушдан кейин юқоридагидай Бобур обрўйи ва шаънига путур етказувчи ножӯя хатти-ҳаракатлар қилганларнинг айримларини қатл эттиради, баъзиларини эса бурунларини кесдириб, сазойи қилдиради.

Ёки, у яхшилик билан бўйсунган афтон бекларининг иззатини жойига қўйиб, уларни турли йўллар билан тақдирлайди. Масалан, Давлатхон Лодийнинг ўғли Диловархонга «Хони хонон» («Хонлар хони») унвонини бериб, унга каттагина ер ажратади. Шу тариқа, Бобур бошқа ғаниму дўстларни, ўз бекларини муносиб мансаб ва ер-мулк билан сийлаб, уларнинг ишончини, ҳурматини қозонади.

Бобурнинг ўзи мағлуб этган ҳинҷ рожаси Медини Раонинг иккита қизини ўғиллари Ҳумоюн ва Комронга олиб бериши маҳаллий ҳалқда жуда яхши таассус-рот қолдиради. Айни мана шу воқеа ҳинҷ ва мусулмон оиласида қуда-қудағайликнинг бошланшишига асос бўлиб хизмат қиласи.

Тадқиқотчилардан бири шундай хуросага келган: «Бобур инсонга яхшилик қилиш шиори билан яшаган.» Бобурнинг ўзи эса бу борада: навбат менга келганда у хоҳ туғишигандан қариндошимми, ёки хотинимнинг уруғлариданми — ҳаммасига қўлимдан келган яхшиликни қилиб илтифот кўрсатдим, дейди. Дарҳақиқат, Бобур ижодидаги энг яхши фазаллардан биридаги ушбу сатрлар бежиз битилмаган:

*Бори элга яхшилиғ қылғилки, мундин яхши йўқ,
Ким дегайлар даҳр аро қолди фалондин яхшилиқ...*

Бобурнинг ниҳоятда ғамхўр, раҳмдил, меҳрибон шахс эканлигидан шоҳидлик берувчи бир тафсилотни эсланг: Бобурнинг жияни, яъни холасининг ўғли, «Тарихи Рашидий» асарининг муаллифи Ҳайдар Мирзонинг отасини қатл эттирган Шайбонийхон унинг ёлиз ўғли Ҳайдар Мирзони Амударёга чўқтириб юбориши жияни, Бухоро ҳокими Убайдуллахонга топширади. Убайдуллахон жуда ноқулай вазиятга тушиб қолади. Чунки у Ҳайдар Мирзонинг опасига уйланган эди. Лекин хоннинг амрини бажо келтиришдан ҳам бош тортолмас эди. Унинг баҳтига, Ҳайдар Мирзонинг отаси ўлимидан хабар топган Ҳазрати Мавлоно (у обрўли уламолардан эди) шогирди Муҳаммад Мавлоно қозига Ҳайдар Мирзони бир илож қилиб сақлаб қолишни тайинлади. Муҳаммад Мавлоно Ҳайдар Мирзони олиб қочади ва кўп машаққатлар билан Бадаҳшонга, холасининг ўғли Хон Мирзога етказиб боради. Бунинг хабарини эшитган Бобур Мирзо Ҳайдар Мирзони Кобулга оддириб келади.

«... Мен унинг (Бобурнинг — К. К.) ҳузурига кирганимда, — деб ҳикоя қиласи Ҳайдар Мирзо, — ҳазрати олийларининг меҳр тўла кўзларидан, баҳт тўла юзларидан нур ёғилиб, менинг устимга сочиларди. У саҳоватли ва омадли қўлларини менга томон чўзди. Мен тиз чўкиб таъзим қилгач, қаддимни ростлаб, у томонга юрдим ва у мени оталарча меҳр билан қучоқлаб бағрига босди, ва шу тарзда мени йиқилиб тушишдан сақлаб, анчагача қучоқлаб турди. Сўнгра ёнига ўтқазиб, илгаригидай самимият ва ардоқ билан ҳол-аҳвол сўрай бошлади. Кўзларидан эса тинимсиз ёш қуюлиб келарди. «Аблаҳ бекларнинг, хон тоғаларнинг ва бошқа қариндошларнинг азобларидан қачондан бери азобдасан?... — деди у. — Ху-

дога шукурлар бўлсинким, ниҳоят ҳузуримга соғомон етиб келибсан. Улардан кўришинг мумкин бўлган мурувватни ортифи билан мана мен кўрсатамен». Ана шундай эҳтиросли сўзлар билан мени юпатиб, кўнглимни кўтарар эди. Шу билан кўнглимдаги ёлғизлик, ўқинч ва саргардонлик аламлари хотирамдан кўтарилид...» «...Мен ҳазрати олийларининг ҳузуридан чиққанимда менга кўрсатилган шоҳона марҳаматдан ҳалиям лаззатланардим...

Шундай қилиб, мен шоҳ ҳузурида вақтимни чоғқилиб, ҳузур-ҳаловатда яшай бошладим. У (Бобур) менинг тарбиям ҳақида ҳам ғамхўрлик қилиб турди. Мени билим олишга чорлар, бу соҳада бирон ютуққа эришсам, уни бошқаларга намуна қилиб кўрсатар ва мени олқишиларга кўмиб ташларди. Ўша пайтда у менга меҳрибон ота ўзининг суюкли ўғли ё меросхўрига қилгандек меҳр ва муҳаббат билан муносабатда бўлар эди...»

Бобур ҳаёти китобини безовчи бундай олижаноб туйғуларга тўла саҳифалар кўпdir...

Бизга, босқинчи деб, ҳаётини ўрганиш тавсия этилмаган, руҳи ўз юртига, ўз эли, миллати, авлоди қалбига яқинлаштирилмаган, номини абадийлаштириш, ҳайкаллар ўрнатишга йўл қўйилмаган, ижодига ҳам эҳтиёткорлик билан муносабатда бўлиш тез-тез таъкидлаб турилган Бобуримиз ҳақида дунё олимлари, тарихчилари, хусусан, биринчи навбатда ҳинд ҳалқининг даҳолари, таниқли арбоблари ва аллома адилбари, фузалоларининг айрим фикр-баҳоларини ян бир эслаб, мағзини чақсак, фойдадан ҳоли бўлмас, яъни, олижаноблик, мардона тантилик билан, айни вақтда катта масъулият билан баён этилган бу сўзлар, таъриф ва тавсифлар буюк ватандошимизнинг қандай зот бўлганлигини янада чуқурроқ англаб етишимизга, қалбимиздаги ифтихор тўлқинларининг янада баландроқ, жўшқинроқ мавжланишига ёрдам берар... Энг муҳими бунча ва бундай юксак фазилатларга эга бўлиш ҳар ким ва ҳамма учун ибратлидир...

«Бобур дилбар шахс, уйғониш даврининг ажойиб ҳукмдори, мард ва тадбиркор одам бўлган, у санъатни, адабиётни севарди, ҳаётдан ҳузур қилишни яхши кўрарди».

Жавоҳиралаъл НЕРУ.

* * *

«... Ҳиндистоннинг энг буюк императори, чехраси қуёшу ой қаби нурли, султонлар султони, бемисол Бобур ибн Умаршайх Мирзо ибн Абусаид Мирзо ибн Мироншоҳ ибн Темурга зудлик билан шу хусусда етказурманким, токи ул олий ҳазрат Европа босқинчиларининг талон-тарожига чек қўйсин».

ВОЛЬТЕР, буюк француз файласуфи.

* * *

« Ҳиндистон ва унинг 8 минг йиллик тарихи бами-соли бир товус бўлса, бобурийлар сулоласининг ўша кўп минг йиллик тарихдаги 332 йиллик даври ана шу товуснинг гултоҷидир».

Вальдеман ХАНСЕН, инглиз олими.

* * *

«1526 йилдан то 1707 йилгача (Бобурдан Баҳодиршоҳ, I гача) буюк сулоланинг тождорлари фақат бунёдкорлик билан машғул бўйдилар».

*Ж. ЛЕШКО, М. ЖОЗЕФ, С МАРКЕТ,
«Тож Маҳал қиссаси»
китобининг муаммифлари.*

* * *

«Бобур характерининг энг мислсиз белгиси унинг бошқа ҳукмдорларнига мос келмаслигиадар. Осиё тождорларида маҳобатли, сунъий характер ўрнига бизнинг кўз олдимизда Бобурнинг характери табиий, ҳаётий, севувчи, самимий бўлиб гавдаланади. Бобур таҳтда ўтирганига қарамай, оддий турмушнинг энг яхши туйгуларини ва иштиёқини ўзида сақлаб қолган. Биз Осиёдаги ҳукмдорлар ичидан Бобур сингари гениал ва талантли кишиларни камдан-кам учратамиз... Унинг ақлининг актив фаолияти, хушчақчак, совуқёнлик ва бевафо тақдирнинг найрангларига қарамай, руҳининг тетиклиги, подшоҳлар орасида камдан-кам учрайдиган сахийлиги, мардлиги, истеъдодлилиги, фанга, санъатга муҳаббати ва улар билан муваффақиятли шуғулланиши жи-

ҳатидан олиб қараганда, Осиёдаги подшоҳлар ичидан Бобурга тенг келадиган биронта ҳам подшоҳ тополмаймиз».

Вилям ЭРСКИН, инглиз олими,
«Бобурнома» таржимони.

* * *

«Бобур... олижаноблиқда қандай хосиятлар бор бўлса, уларнинг барчасини эгаллаган», «унинг манглайига юксак фазилатлар битиб қўйилган».

Эдуард ХОЛДЕН, (19-аср) инглиз олими.

* * *

«Айтиш мумкинкӣ, Бобур ботирлигининг чеки бўлмаган, унинг бутун ҳаёти жасорат намуналари билан тўлиб-тошиб ётибди».

Н. И. ВЕСЕЛОВСКИЙ, рус олими.

* * *

«Бобур исми «шер» маъносини англатиб, ўзи ҳам исми жисмига монаңд киши бўлган, келишган қаддикомати ва бениҳоя кучлилигидан ташқари, довюракликда, эпчилликда, чаққонликда унинг олдига тушадигани чопилмаган, унча-мунча қийинчиликларни писанд этмаган, айниқса, широбозлик бобида чинакам шер бўлиб кетган. У кўпинча икки давангидай одамни қўлтиқлаб олиб, Агра қалъяси деворлари устида машқ қилган. У яна ажойиб сузувчи ва favvos ҳам бўлган, буюк Гангдан ташқари йўлида учраган жамики дарёларни сузиб ўтган. Унинг ширали тил, оҳангдор вазн билан битилган таржимаи ҳолини («Бобурнома») ўқир экансиз, муаллиф бадиий дидининг нақадар назокатлилиги, ақлу заковати теранлиги, билими нақадар чексизлигиниг гувоҳи бўласиз. Бобур табиатни ва базми жамшиidlарни жонидан яхши кўрган. Айниқса, тоғларни, дарёларни, боғларни, яйловларни кўрганда завқшавқи түфён уриб, мисоли булбулигўё бўлиб кетган. У имони комил мусулмон бўлиб, Оллоҳни бир дам хотиридан фаромуш қилмаган, лекин мутаассиб дарајасига борищдан ўзини тия олган. Сўзамол нотиқ, истеъодди саркарда, ор-номуси кучли инсон бўлган»...

Г. Н. ПАНТ, Янги Дечлидаги
миллий музей мутасаддиси.

* * *

«Бобурнинг шахс сифатидаги характери мақтовга сазовордир. У жуда бақувват киши бўлиб, қалъа де-вори устида икки кишини қўлтиқлаб олиб, тўсиқлардан бемалол ўта олар эди. Ҳиндистонда дуч келган ҳар қандай дарёдан сузиб ўта олар, отда эса 80 миля (130 км. га яқин) масофани дам олмай, бир кунда босиб ўта оларди... Бобур садоқатли ўғил эди. Мех-рибон ота, содик дўст, вафодор эр ва яхши қариндош эди. У кекса қариндошларининг ҳурматини жойига қўяр ва ўз фарзандларининг ўқиш ва шахсиятларининг шаклланишига алоҳида эътибор билан қарап эди. У «дунё-интилганники», дер эди ўғли Ҳумоюнга. Ўлим тўшагида ётганда Ҳумоюнга: «укаларинг жазога сазовор бўлсалар ҳам уларга ёмонликни раво кўрмагин», деб васият қиласди... У сахий, олижаноб, мард, мафтункор, севимли ва жуда маданиятли киши эди... У киши қалбини ва вазиятни дарҳол англаб олар эди. Мусиқага ва боғ яратишга жуда ишқибоз эди. Ҳиндистонда жуда кўп иншоотларни барпо этган эди...»

Л. Р. ШАРМА, ҳинг олими.

* * *

«Бобур Шарқ тарихидаги энг мафтункор шахс эди».

Лейн ПАУЛ, инглиз шарқшуноси.

* * *

«Бобур ажойиб чавандоз, моҳир мерган, чаққон қиличбоз ва толмас овчи эди».

С. Р. ШАРМА, ҳинг олими.

* * *

«Бобурнома» бутун тарихда яратилган ёзма ёдгорликларининг энг бебаҳосидир».

БЕЙВАРИ хоним, «Бобурнома»ни инглиз тилига ўтирган таржимон.

* * *

Бобур қирқ саккиз ёшида вафот этди. У ҳамма нарсага жасорат ва ҳалоллик билан эришиди. Буюк мағлубиятлари устига буюк ғалабалари иморатини қура олди. Ёшлиқда кўрган омадсизликлари ўрнига кейинчалик улуғ омадлар унга ёр бўлди. Нихоят, у Ҳиндистон тарихида илгари ҳеч кўрилмаган буюк салтанаттага асос солди.

Бобурнинг буюклиги ана шу мезонлар ила ўлчанидади...»

Муни ЛАЪЛ, ҳинг олими.

* * *

Яна, ўша, ҳиндистонлик олимларининг таъкидлашларича, Бобур ўз фуқаросининг турмуш фаровонлигини яхшилашни ўзининг асосий бурчларидан бири деб билган, шунга эришишга ҳаракат қилган. У қўл остидаги ҳалқнинг мулки, шаъни-номусининг дахлсизлигини сақлашни ўзининг бек ва амалдорларига ҳам ҳар доим қаттиқ тайинлаб турган, ўзи ҳам шу эътиқодга амал қилиб, ҳалқни ҳар хил балолардан, жумладан йўлдаги қароқчилардан ҳимоя қилган, сарой аъёнлари, маҳаллий амалдорлардан фуқароларга шафқатли ва ғамхўр бўлишни талаб қилган, маъмурӣ ишларни ҳамиша ўзи назорат қилиб турган, бу борада ҳар қандай оғиш ва чегарадан чиқишиларга йўл кўймаган ва шу тариқа мамлакатда адолат ўрнатиш чора-тадбирларини кўрган, юртда осойишталикни сақлаш, хавфсизликни таъминлаш, адолатпарварлик каби улуғ шоҳона ишлари билан маҳаллий ҳалқ меҳрини қозонишга сазовор бўлган...

Шунча фазилатлар бир шахсга оғирлик қўлмаганимикин, деб ўйлайсан киши. Деярли ўн бир ёшидан жангу-жадалларга киришиб, умрбод тинчини йўқотган, бирон-бир мадраса ё бошқа жойда таълим, илм олиш имконига эга бўлмаган инсоннинг ҳаётдан таълим олиб, мустақил ўқиб-ўрганиб, буюк саркарда ва ҳар қандай фан докторидан ўтказиб таҳлил қиласидан илмли олим, донишманд даражасига этиб бориши, энг муҳими, жаҳон фозиллари тан оладиган бесаноқ инсоний хислатларни ўзида мужассам этиши чиндан ҳам ҳайратли ва ибратли эмасми?..

БОГИ ОРОМ — БОГИ БЕОРОМ

16 август, душанба.

Шундай қилиб, кеча мен Аграда қайта туғилдим. Ҳаяжоним эса бу тонг ҳам давом этмоқда эди.

Яна Тож Маҳалга бордик. Кече кино, теле-тасвирга яхши олишолмаган эди. Умуман, кино, телекамера билан дорвозахона ичкарисидаги майдон-супадан пастта тушиш мүмкин эмас экан. Бугун яна бир уриниб кўрайлик-чи, зора қалови топилиб қолса, деб қелган эдик, барибир рухсат олиш чораси топилмади. Сайёҳлар оқими кечагидай эди...

У ердан чиқиб «Агра форт» (уни ҳам «Лаъл қалъя» дейишишаркан) қасрига қараб кетдик. Акбаршоҳ (1565—73 йиллар) қурдирган бу қасрнинг айланаси 2 км экан. Ўз замонасида ниҳоятда маҳобатли, мустаҳкам кўрғон бўлғанлиги баланд ва қалин фишт деворлардан сезилиб турибди. Қаср дарвозасига кираверишда, шундоққина ерда сайёҳлар чипор бурундуқларга худди олмахон каби нон ушоқлари ташлаб, уларнинг ҳуркак ва чиройли хатти-ҳаракатларини завқ билан томоша қилишарди. («Бобурийлар изидан» фильмимизда худди ана шу ҳолат акс эттирилган).

Бинолар асосан гўзал меъморчилик услублари асосида барпо қилинган, пештоқлар, гумбазлар, айвонлардаги нақшлар ниҳоятда ранг-баранг ва чиройли эди. Кутубхона, ҳаммом бинолари дуруст сақланган, лекин, айтишларича ҳаммомнинг тилло, кумушли эшикларини Баҳодиршоҳдан ҳокимиятни тортиб олган инглизлар ўмаридек кетишган, ҳатто нақшларга ишлатилган тилло-зарларни ҳам арчиб олишган экан.

Қалъага асосан қизил мармар ишлатилган, лекин баъзи гумбазлар оқ мармардан эди. Бу жойларни қизил мармарни ёқтиргмаган Жаҳонгир қайта қурдирган экан.

Бир вақтлар тимсоҳлар макон тутган ҳовузлар энди ҳувиллаб ётарди.

Жамна дарёсининг ўнг соҳилида қад кўтарган бу қалъадаги Шоҳ Жаҳон уй қамоғида ўтирган, буржи мусамман (8 қирра) усулидаги хона ўзгариб кетган эди. Лекин чиндан ҳам қалъа дарчаларидан дарёning нариги қирғоғида, кун чиқиши томонроқда улкан оқ кемадек салобат тўкиб турган Тож Маҳал жуда аниқ кўринарди. Афсуски, асрлар шамоли Шоҳ Жаҳон оёқлари ва кўз ёшлиридан қолган изларни мармар

тошлардан супуриб, текислаб кетган эди. Лекин мен унинг: «Ёзугим не эди? Ўфиллар боқиб, ўстириб, уларга умримнинг ва мулкимнинг ярмини бахшида этиб, кўрган ҳузур-роҳатим шул бўлдиму?.. — дей тангрига қилган илтижоларини, азиз ёри вафодори ҳажри-фи-роқида тортган аламли оҳлари, бўғиқ инграшларини элас-элас эшитгандай бўлдим. Ана шундай фарёдларга дош беролмаган буржи мусамман хона шувоқлари, безаклари батамом кўчиб тушганлигидан энди ғарип, файзсиз оддий жойга айланиб қолган эди. Нурсизланган мармар тошлар янада совуқ хароб кўринарди. Қаранг, 300 йилдан зиёд одам ақлинни ҳайратга солиб келаётган Тож Маҳалдай обидани яратган бунёдкор инсон ўз фарзанди қўлида асир, бечора бўлиб торгина хонада 8 йил ўтиrsa-я! Ё, тавба! Огули тож-тахт орзузи шаҳзода учун бунчалар тотли, бунчалар сехрли бўлмаса — ўз жигарларини — на ака-укасини ва на отасини аяди-я!.. Балки ақл бовар қилмас бундай ёвсираш сир-асрори ота томонидан ҳақ-ноҳақ тўкилган қонлар билан ҳам боғлиқдир...

«Агранинг ясси, ҳамиша бир хил чанг-тўзонли паст-текисликлари, бу ўлканинг жозибасиз манзараси кишида ғамгин хис-тўйғулар пайдо қиласди», — дей эътироф этади ҳинд тадқиқотчиси М. Рандҳава. Бобур шунинг учун ҳам Аграга ўрнашибоқ табиатни жозибадор қилиб, иқлимни мўътадиллаштирадиган, шаҳарга ҳусн бағишлиб, чанг-тўзондан ихота қиласдиган боғлар яратишга киришиб кетади. Дастреб у Жамна дарёси бўйида, ҳозир ҳиндалар Ромбоғ деб атайдиган Оромбогни барпо этган эди. Мана, 470 йилдан бери боғ яшаб келмоқда..

Биз Оромбоқча етиб борғанимизда ҳаво айниб турвиди. Боғнинг шимол томондан кириладиган асосий панжарали дарвозаси берк экан. Ҳайрон бўлиб турувдик, қаёқдандир бир одам пайдо бўлиб, дарвозани очди. Ўрта бўй, ўрта яшар бу кимса шу боғнинг боғбони Мухаммад Юсуф экан. У бизнинг кимлигимиз, қаердан ва нима мақсадда келганимизни эшитиб чеҳраси ёришиб кетди ва бизни хуштавозе билан ичкарига бошлади. Дарвоза рўпарасида тикка кетган йўлак бўлиб, икки томон—айвойи гуллар, дараҳтлар билан яшнаб турган боғ анчагина катта майдонни ишғол қилган эди. Болалиқдан жони-дилим бўлган атиргулларни кўриб, ҳинд тадқиқотчиси Рандҳаванинг «Айтишларича, хушибўй атиргулни Ҳиндистонга биринчи

бўлиб Бобур келтирган экан» деган миннатдорона гапини эсладим ва ичимда яна бир бор фахрланиб қўйдим. Боғнинг деярли қоқ ўртасида, йўлакни иккига ёрган ҳовуз бўлиб унинг чеккаларидағи фавворалар шиғдатсизроқ, аммо бир неча хил рангда товланиб отилиб туради. Боғбон бизга мана шу ҳовузнинг чор атрофига Бобур сархил узумлар эктиргани, инглизлар жаннат меваси бўлган токларни ҳам қўпориб ташлашганини айтиб берди. Дарҳақиқат, бу ҳақда Бобурнинг ўзи «Бобурнома»да шундай деб ёзди: «Бир-икки бута ток «Хашт Беҳишт» боғида эктуруб эдим, анинг ҳам яхшигина узумлари бўлиб эди. Шайх Гўран ҳам бир сабад узум йибориб эди, ёмон эмас эди. Ҳиндустонда қовун, узумнинг мунча бўлуридин филжумла хурсандлиғе бўлди».

Атрофдаги менга ноташиб бўлган гиёҳу гулларнинг ҳам хушбўй ҳиди анқирди. Чиндан ҳам бу ердаги ўсимлик ва гулларнинг аксариятини мен аввал бошқа бирон жойда кўрмагандим. Муҳаммад Юсуфдан сўрагандим, жасмин, шарон, тигар, кунди, пам, чандон амрут, коннир, ялов флавер... каби номларни айтди, лекин бу номларнинг эгаларини кўрсатиб, изоҳлаб беришига имкон бўлмади, яъни шерикларнинг тоқати етмади. (Кейинчалик бу номларни «Бобурнома»да таъриф-таснифи берилган гулларга қиёслаб, фақат «жосун» ва «қанир» деганини топдим. Жумладан канир чиндан ҳам шафтолигулисимон, фақат тўп-тўп очидалиган қизил гул эди).

Ўшанда фақат ҳовуз ёнида жуда катта майдонга кўланка солиб турган сершох улкан дараҳтларнинг номи Имли эканини, уларнинг ёши 100 дан ошганини билиб олдим. Боғбон ўнг томонда, тахминан юз қадамча нарида, боғнинг чекка деворига ёнбошлаб қолган бир туп имлини кўрсатиб: «Бобур замонида экилган», деди. Дараҳт қариган лекин барглари ҳали ҳам ям-яшил, демак, унинг илдизлари яшамоқда эди. Бу ҳолат қандайдир рамзий маънога эга бўлиб туюлди менга. Чиндан ҳам бобурийлар ўтиб кетгани билан, улар қолдирган маданий, илмий, бадиий мёрослари, санъат ва меъморчилик соҳасидаги ёдгорликлари, тарихий қалъя ва обидалари назардан ва тилдан тушмай келмоқда-ку.

Муҳаммад Юсуф бизни тўғри дарё бўйига бошлаб борди. Бу ерда шундоққина дарё лабида, бир-бирига рўпарама-рўпара солинган, шийпонсимон пастакроқ

иккита бино бўлиб, ҳар иккисининг айвони орқали ичкари хоналарга кириларди. Деворлар, наволар, шифтларда соҳибжамол қизлар, гуллар, қушлар тасвири ва бошқа гўзал манзаралар акс этган нақшларнинг кўп қисми кўчиб кетган, лекин яхшигина сақланиб қолган жойлари ҳам бор эди. Миниатюра санъати намуналарини эслатувчи бу ажойиб безаклар Бобурнинг чиндан-да юксак бўлган дидидан унинг ўз атрофига, саройига қўли гул наққош усталар, ҳунармандларни тўплаганидан далолат бериб туради.

Бу жой Бобурнинг Агра шаҳридаги, умуман Ҳиндистондаги дастлабки оромгоҳи бўлган эди. Мазкур оромгоҳ — боғнинг яратилиш тарихи ҳақида Бобурнинг ўзи шундай ёзган:

«Доим хотирға етар эдиким, Ҳиндустоннинг бир улуғ айби будурким, оқар суви йўқтур. Ҳар ерда ўлтурушшуқ бўлса, чархлар ясаб оқар сувлар қилиб, тарҳлиқ ва сиёқ ерлар ясаса бўлур. Ограга келгандин бир неча кундин сўнг ушбу маслаҳатқа Жўн сувидин ўтуб, боғ ерларини мулоҳаза қилдук. Андоқ бесафо ва ҳароб ерлар эдиким, юз кароҳат ва ноҳушшуқ била андин убур эттук. Бу ернинг макруҳлуги ва ноҳушшуғидин чорбог хаёли хотирдин чиқти. Мундин ўзга мундоқ ёвуқ ер Ограда чун йўқ эди, неча кундин сўнг зарур бўлиб, бу ерга-ўқ илик қўюлди. Ўл улуғ ҷоҳким, ҳаммом суви андиндуру, бунёд бўлди. Яна бу парча ерким, амбули дараҳтлари ва мусамман ҳавз андадур, булардин сўнг улуғ ҳавз ва саҳне бўлди. Андин сўнг тош иморат олидағи ҳавз ва толор бўлди. Андин сўнг «Хилватхона» боғчаси ва уйлари бўлди. Андин сўнг ҳаммом бўлди. Мундоқ бе-сафо ва бесиёқ Ҳинда тавр тарроҳлиқлар ва сиёқлик, боғчалар пайдо бўлди. Ҳар гўшада мақбул чаманлар, ҳар чаманда муважжаҳ, гул ва настаранлар мураттаб ва мукаммал бўлди».

Мана шу бунёдкорликлардан ҳам кўриниб турибдики, Бобур ҳар бир ишга узоқни кўзлаб қўл урган. Борган юртини талаб кетишни эмас, уни обод этишни, ўзидан яхши ном қолдиришни, ҳар ергаки қадам етса гуллар ва яхшилик уруғларини экишни ният қилган. Бу эзгулик, яхшилик уруғлари авлодлари — Акбар, Жаҳонгир, Шоҳ Жаҳон ва бошқа сultonлар қалбida ҳам ҳар хил мевалар тукканлиги маълум ва бу мевалардан миллион-миллион ҳинд ҳалқи ҳали-ҳамон баҳраманд бўлиб келмоқда...

Мұхаммад Юсуфнинг айтишича, чап томондаги бинода Бобур ўз оиласи билан, ўнг томонда эса бошқалар яшаган.

— Бобур эрта туриб ҳовуз ўртасидаги супада Жамнага термилиб ўтириши хуш кўрган экан, — дейди яна Бобур боғининг 470 йил кейинги боғбони.

Балки кун ботишга, хаёлан Андижон томонларга тикилгандир. Балки, шу ерда ўтириб, Фарғона водий-сининг жаннат мисол табиатини, сўлим, оромбахш шабадасини туйгандай бўлгандир. Ўз диёри, юртига соғинчи, саломини ана шу беозор дарё орқали йўлла-гандир. Балки, «ариқ бўйида ўлтириб, умр ўтганга сол назар», деганлариdek, Бобур ҳам сарсону саргар-донлиқда, «юзи қаро»лиқда кечаётган ўттиз-ўттиз беш йиллик ҳаётини сарҳисоб қилиб, яхши-ёмон ишлари-ни саралаб, суюниб, куюниб ўтиргандир. Балки, умри поёнига етиб бораёттанини ҳис қилган палладарда бо-лалиги ўтган азиз Андижонни, қадрдан чорбоғни, бу-виси Эсон Давлат бегимнинг меҳр тўла нигоҳдарини, иссиқ оғушини, қайта кўришмоқ насиб этмаган тенг-қур жўраларинио ота-онаси, навкар-мулозимлар, Бек аткасию кўкаaldoшлари ғамхўрлигига кечган беташвиш, ўйин-кулгидан, чавандозлик, камон отиш машқ-ларидан, Ҳофиз, Саъдий, Фирдавсий, Навоий достонлари мутолаасию fazal ёзиш майли-машғулотидан иборат онларини қайта-қайта эслаган, қалбини зириллатган орзиқиши билан қўмсагандир. Балки, Эски шаҳар, Андижон арки деворларини тавоб қилгиси, тупроқли тор ва эгри-буғри кўчаларнинг чанги-губорини кўзла-рига суртгиси келгандир. Ҳаётида йўл кўйган оғир хатоларини, ушалмай қолган орзу-армонларини, қалб тубидаги энг нозик ҳасратларини дарёга тўкиб сол-гандир. Кучли ёғий қаршисида ожиз қолиб номус ўтида ёнган аччиқ аламли вазиятларни, Хонзода бегимдай оқила, доно ва соҳибжамол, дилдош опасини уни хонавайрон этган ашаддий ғаними илкига ташлаб чи-кишга мажбур бўлган фоят ноҳуш воқеани ёдга олиб, ўзини ўзи кечиролмай, қаттиқ ўкингандир, виждени қийналгандир... Еки, нечун Ҳиндда бунёд этган кўркам боғ-роғлару муazzзам иншоотларни ўз юртимда қилиш насиб этмади, деб афсус-надоматлар тортгандир, қани энди, шундоқ қарофимни юмсаму мана шу Оромбоғ, унинг бағрида ўзум, Андижон адирлари бағрида бўлиб қолсак, дея хаёл сургандир. Балки бешафқат тақдир тақозоси, салтанат, тож-тахт ҳимояси деб олис Кобул

ва бошқа жойларда қолиб, тирқираб кетган гўзал Монҳим бегим ва бошқа қўнгил яқинлари, ўғил-қизларининг дийдорига муштоқу зор бўлиб, фироқ ўтида күйиб-ёниб, юраклари эзилиб-эзилиб оққандур... Балки Жамна сувининг илиқ эпкини уфуриб турган соҳида ўтириб, қисматини шунчалар чигал ва беором, бекўним ва беҳаловат қилиб яратгандан умри охирида илашган қаттиқ дардига шифо, нажот тилаб, илтижоу таваллолар айлаб зорлангандир. Балки, салтанат, подшоҳдлик ишқи кўзини кўр ва бағрини тош этиб худабеҳуда тўккан қонларини эслаб, азоблангандир... Ўзидан кейин, уни деб, у сабабли Ҳинд ерида қолиб, қони ҳинду ва бошқа миллатлар билан қоришиб, уйқашиб кетадиган хотинлари, фарзандлари, хешу акраболари қисматининг қайғусини чеккандир, шахзодалар аро тож-тахт талашишлар оқибатида юз бериши мумкин бўлган қўнгилсиз ҳодисалар, фожеаларни таҳлил қилиб, кўз олдига келтириб таҳликага, даҳшатта тушгандир ва «Эй, фалак...» дея фарёд уриб ўрнидан даст туриб кетгандир ва дилига ушбу янглиф байтлар қуюлгандир:

Бу нечук зулмки, ниҳояти йўқ,
Бу на янглиф ситамки, юяти йўқ?..
Ки эй фалони, бу не разолаттур,
Не жаҳолаттуру не ҳолаттур...

Балки, Бобурга ўша дамларда дарёдан яқинроқ, маҳрамроқ сирдош, дарёдош дўст-ёр бўлмагандир... Ҳарқалай, унинг ўз ватанига бўлган чексиз ва сўнмас меҳр-муҳаббатини, ҳижрону фурбат аламларини, соғинч изтироблари, ўқинч ва озурдаликларинию фамфуссаларини ифодаловчи ғазал, рубоий, қитъаларининг аксарияти ана шу жойда, Жамна билан тиллашиб, диллашиб ўтирган бетакрор онларда туғилган бўлса ажаб эмас...

Чунончи:

Толеъ ўйқи жонимға балолиқ бўлди,
Ҳар ишники айладим, хатолиқ бўлди.
Ўз ерни қўйиб, Ҳинг сори юзландим,
Ё, раб нетай, не юз қаролиқ бўлди.

* * *

Ёд этмас эмиш кишини ўрбатда киши,
Шод этмас эмиш кўнгулни меҳнатда киши,

*Кўнглум бу ғарибликда шод ўлмади, оҳ.
Fурбатда севинмас эмиш, албатта киши.*

* * *

*Кўпгин бериким ёру гиёром йўқтур,
Бир лаҳзау бир нафас қарорим йўқтур.
Келдим бу сари ўз ихтиёrim бирла,
Лекин боруримда ихтиёrim йўқтур.*

* * *

*Не ёр вафо қилгуси охир, не ҳариф,
Не сайду шито қолгуси боқи, не ҳариф.
Из ҳайфки, зоъе ўтагур умри азиз,
Афсуски, ботил борадур умри шариф.*

* * *

*Борми экин ҳеч нима оламда ҳижрондин ямон,
Ҳар некум андин ямондур, будур андин ямон.*

* * *

*Қовун бирла узумнинг ҳажрига кўнглимда ғам ҳар сў,
Оқар сувнинг фироқидин кўзимдин ҳар ғам оқар сув...*

Муҳаммад Юсуфнинг Бобурга бўлган ихлоси, муҳаббати жаҳонгир шоҳ ҳақида билган-эшитган ривоят ва ҳикоятларини завқ-шавқ билан сўзлашидан сезилиб турарди. Унинг айтишича, Бобур худди мана шу оромгоҳида жонини ўз ихтиёри билан яратганга топширган, тўғрироғи, бу ёруғ дунёда Бобурдан аввал ҳам, кейин ҳам бўлмаган, ақл бовар қилмас ҳол — Бобур тангри таолодан ўз жони эвазига ўғли Ҳумоюнга соғлиқ ва омонлик тилаб, бу сўнгги ниятига эришган эди...

Бобурнинг вафоти ҳақида турлича мулоҳазалар мавжуд. Аксарият манбаларда Бобур ўвли Ҳумоюн учун жонини қурбон қилган, деган фикрга дуч келамиз. Лекин доктор С. Р. Шарма бу борада бутунлай бошқача хулоса чиқаради: Ҳумоюннинг соғайиши билан бу воқеадан 6 ой ўтгач касалланган Бобурнинг бетоблиги орасида ҳеч қандай боғлиқлик йўқ, дейди у. Доктор Р. П. Трипатхи, Л. П. Шармалар ҳам С. Р. Шарма фикрини кувватлашади. «Бобурнинг касалланиши ва вафотига сабабчи бўлган асосий нарсалар — унинг босиб ўтган мاشаққатли ҳаёти йўли, ичклик ва нашъага ружу қўйиши ва қолаверса Ҳиндистоннинг ортиқча иссиқ иқлимидир...» дейишади улар. Асил манбалар, ишончли далиллар асосида ёзилган «Бобур» эссе-романининг муаллифи Муни Лаъл Бобур вафоти бораси-

да гарчи Гулбаданбегим хотираларига суюнса-да, лекин бу ўлимга олиб келувчи омиллар олдинроқдан бошланган эди, деган мулоҳазани шаъма қиласи. У «Бобурнинг Бангола ҳукмдори Султон Нусратшоҳни сулх тузишга қандай мажбур қилганини баён этаркан, шундай деб ёзди: «Бу Бобурнинг сўнгги юриши эди. У ҳам руҳий ҳам жисмоний жиҳатдан толиққанди. Ўн бир ёшидан бери бошига тушган меҳнат-машаққатлар, йиллар, замонлар оша кечган узлуксиз ҳарбу зарб унинг тинкасини куритганди. Оғир синовлар иззиз кечмаган, иссиқ Ҳинд иқдими, айниқса, иситма-безак унга ўз асоратини кўрсата бошлаганди. У шароб ичмай қўйган. Унинг ўрнига маъжун ер, нашъя чекарди. Бу нарсалар эса унинг соғлиғига баттар футур етказарди.

Бобур 1529 йили Аграга қайтаркан, ичбуруғ қасали уни ҳолдан тойдирганди. Ҳазин, маъюс хаёллар уни қуршаб олган, у тарки дунё қилиб, тожу тахтни Ҳумоюнга топширишни ўйларди...»

Қўйидаги байт балки айни ана шу даврда оппоқ қофоз юзини сиёҳ айлаб варақ четларини жингалак қилиб кўйдиргандир:

*Нечча даврон гуссаси бўлгай менинг жонимга хос,
Кошки ўлсам доги бу гуссагин бўлсам халос...*

Р. Трипатхи ва Л. Шармаларнинг айниқса, «ичкиликка... ружу қўйиши» деган луқмаларини асосли деб бўлмайди. Чунки Бобурнинг Ҳинди斯顿га келган йилиёқ (яъни вафотидан 4 йил муқаддам) ичкиликни таъзиқлаш ҳақида фармон чиқаргани маълум.

Яъна, баъзи манбаларда (аксар бадиий асарларда) Бобур Султон Лодийнинг онаси овқатга қўшиб берган заҳардан ўлган деган қараш ҳам бор. Ҳолбуки бу ҳам тўрт йил аввалги воқеа бўлиб, Бобурнинг ёзишича уч-тўрт кундан кейиноқ унда заҳарланиш асорати тамом барҳам топган.

Хуллас, менинг назаримда, Муни Латъл ва Гулбаданбегимнинг фикрлари асослироқ ва ҳақиқатга яқинроқ кўринади. Дарҳақиқат тинимсиз жанг-жадал, саргардонлик, иқдим ўзгаришлари Бобурнинг умумий соғлиғига жиiddий таъсир этган, шунинг учун сўнгги йилларда анча озиб, илгариги шаҳдларидан қайтган, балки ҳаёт унга ўта ортиқча ташвиш бўлиб туюла бошлаган, хаста, беҳуш ётган Ҳумоюн атрофидан айланиб, Оллоҳдан унинг дардига шифо тилаб, керак бўлса ўз жонини нисор этмакка тайёрлигини сидқидилдан из-

ҳор қилар экан, ўша вазмин дамлардаги ҳолат — ўз жисми-жонидаги толиқишиш ва оғирлашиш, асаб торларининг таранглашуви, кўнглидаги ғулгула, атрофда лолу карахт турган мулозимлару кўнгил яқинларнинг кўзла-ридаги қўркув, саросима чиндан-да Бобурнинг руҳи-ятига бирдан қаттиқ таъсир қилиб, аҳволи кескин ёмонлашган бўлиши мумкин...

Яна Бобурнинг вафот этган ёши, дағн этилган жойи ҳақидаги фикрлар ҳам ранг-баранг: кимдир 48 ёшида вафот этди деса, бошқаси 47 рақамини таъқидлайди, кимдир Аградаги Оромбоқча дағн этилган деб ёзса, бошқа бир тадқиқотчи Бобурнинг жасади боғи Гулафшонга қўйилган деган далини келтиради. Бир муаррих-татқиқотчи Бобурнинг хоки 9 йилдан кейин Кобулга кўчирилганидан хабар берса, бошқа манбада бу оралиқ 10—14 йил қилиб қўрсатилади. Муин Лаъл бу воқеани шарҳлаб, Бобурнинг Биби Муборика номли хотини Кобулдан келиб эрининг қабрини кўчириб олиб кетган, дея ўзича аниқлик киритади. (Шахсан мен Бобурнинг Биби Муборика деган хотини борлиги ҳақида-ги маълумотни учратмагандим. В. Эрскин Раика деган исмни келтиради).

Афсуски бу каби анчайин чалкаш, авлодларни иштибога солиб қўядиган хилма-хилликларни илмий-та-рихий жиҳатдан бир нуқтага олиб қелишга камина ҳам ожиздир...

Муҳаммад Юсуфдан эшитган баъзи далилларимиз эса ҳеч бир манбада йўқ, ғалат-ку, аммо ўзини Бобурнинг ашаддий ихлосманди сифатида у буюк инсоннинг хизматлари ва боғи-роғлари таърифини оғиз тўлдириб гапириб бераётган бир муслим кимсанинг фикрларини эътибордан бутунлай четда қолдириш ҳам ўринли бўлмас, деб ўйлайман. Алқисса, оғиздан-оғизга ўтиб ва ниҳоят Муҳаммад Юсуфнинг қулогига етиб келган гапларга қараганда, икки сабабга кўра: яъни мамлакатдаги вазият анча танг бўлиб турган ўша паллада салтанатдагилар бу машъум хабардан фойдаланиб, файр ҳаракатлар бошлаб юбормасин деб, қолаверса, дағн этишга ҳеч қандай ҳозирлик бўлмаганлиги, яъни дурустроқ қабр-мақбара тайёрлаш учун маълум муддат ўтишини хисобга олишиб, Бобур жасадини мана шу боғдаги ўзи яшаб турган уйларнинг зах ертўласида, сарсон ёғи ичида уч ой сақлашган ва бу ердан бир-икки чақирим наридаги Чобуржи (Чорбог) деган жойда тикланган мақбараға қўйилган экан...

Боғнинг чап томонидан айланиб келадиган йўлақда сайд-томуша қилиб юрганимизда ёмғир савалай бошлади. Биздан сал нарида тарқоқ ҳолда, ингичка, узун тумшуқлари билан майса-гиёҳлар қатини титкилаб емиш топиб юрган чағалайсизмон оппоқ қушлар (уни Муҳаммад Юсуф «бавла» деб атади) бир жойга тўпланиб, қунушиб олишиди.

Биз тезладик, лекин ёмғир биздан ҳам тезлаб қу́йиб юборди. Фаррух кўйлагини ечиб, телекамерасини ўраб олди. Ютурганча бориб, дастлаб кўрган ҳовуз-фаввора ёнидаги улкан Имли ёнига тизилиб олдик-да ёмғир тинишини кута бошладик.

— Ҳозир пашкол—ёмғир кўп ёғадиган мавсум, — деди боғбон...

Чобуржи боғини топишдан кўра, у ердаги эски мақбара олдига ўтиш қийинроқ бўлди. Мақбара яқинидаги маҳалла-жойлар ниҳоятда хароб, ивирсиқ, тор ва қинғир-қийишиқ, кўчалар балчиқ эди. Мўйсафиidlар ёрдамида, бир тўп болалар қуршовида димоғларимизни берқитиб, шимимиз почаларини кўтариб, оёқ учida ерни танлаб-танлаб босиб ўтиб бордик. Деворлари йиқилиб вайронага айланиб бораётган мақбаранинг кўриниши ниҳоятда ғарип ва аянчли эди. Кун ботишига қараган бу иморат мақбарадан кўра оддий уйга ўхшарди: бир неча хонага бўлинган, олди айвонли, лекин ясси томининг икки томонида унча баланд бўлмаган миноралар бор эди. Ҳарқалай, бинонинг ўзи, унинг ёнидаги ҳандақ ва ёввойи бута, ўсимликлар қоплаган баланд-паст ерлар унтилган, қаровсиз қабристонни эслатарди.

Дарвоқе, «Оромбоғ»да ёмғир тўхтаб, ҳаво очила бошлаган эди, бу ерга етиб келганимизда осмон яна қорайиб, маҳзун бўлиб олди. Гўё табиат бизни азадор бир алфозда кутиб олаётгандай...

Зокиржон аканинг топшириғига кўра мен ҳозир мана шу сатрларни ёзаётган қўлларим билан мақбара деворлари остидан тупроқ олиб сувхалтага солдим.

— Андижондаги Бобур рамзий қабрига, Кобулдаги мақбарасидан олиб келинган тупроқ ёнига қўямиз, — деди раҳбаримиз.

Бизнинг ҳатти-ҳаракатларимиз ва ғамгин ҳолатларимизни ҳайрат билан кузатиб турган мўйсафиidlардан бири ажойиб бир гап айтиб қолди:

— Бобур дафн этилган вақтларда унинг қабридан атрофга хушбўй бир ҳид таралиб тураркан, унинг

жасади кўчириб олиб кетилгач, ҳид ҳам йўқолган экан,— дейди у одам.

Бу гап бизни foят мутаассир этса-да, дилларимиз мақбара харобалари каби вайрон эди, инчунин, ҳар биримиз ўз хаёлларимиз дарёсига фарқ бўлиб, қайтдик.

Кўчада Хитой киноларидағи камбағаллар судраб юрадиган рикшаларни кўриб, фикрим сал чалиди.

ОЛТИН БЕНГАЛИЯНИ ИЗЛАБ

Шу куни соат тўртларда Аградан чиқиб, Калькутта томон (1225 км.) йўл олдик.

Бугун тушлигимизнинг мазаси бўлмади. Бояги кайфиятдан кейин овқат ўтармиди. Иккитадан чепоти (чевати), уч-тўрт қошиқ нўхат, ярим бош пиёз билан тамадди қилган бўлдик.

Баққоллар растаси тугаб-тугамай, шаҳардан чиқиб-чиқмай, яна тўда-тўда бўлиб юрган сигирларга дуч келдик. Тавба, дейман, ҳайвон еру-кўкка сифмай-диию овқатларида гўшт йўқ. Қассобхона деган нарса умуман кўринмайди...

Беш чақиридан кейиноқ ўрмонзор бошланиб, манзара кескин ўзгарди. Яна бутунлай бошқача, мен танимайдиган дараҳту ўсимликлар ранг-баранг, кўркам, чиройли эди. Лекин йўл четларида уюлиб ётган ахлатлар билан ўрмонзорларнинг дил тортар манзараси сира хил келмас эди. Шу йўлда менда бир хулоса пайдо бўлди. Одамлар гавжум яшайдиган жойлардаги сердараҳт кўчалар ҳам ивирсиқ, табиатингизни ноҳуш қиласди. Одам кам ё умуман аҳоли яшамайдиган жойларда дараҳтзорлар ичи, йўллар ҳам тоза, ҳаво мусаффо эди. Демак, табиат ўзини ўзи тозалай олади — худди оқин сув каби, одамзот эса...

Ҳиндистон кўчаларида моллардан кейин кўп учрайдиган нарса — муз тайёрлайдиган пана-пастқам дастгоҳлар эди. Музчилик бу иссик ўлқада кўпчиликни боқувчи асосий касб-ҳунарлардан бири экан.

Ферузобод шаҳарчасидан ўтаётганимизда тумонат велосипедчиларга дуч келдик. Улар худди ниначилар кўчкинидай бутун кўчани эгаллаб келишарди. Аввалига марафончилармикин, деб ўйлаб эдим, суриштирасак, ишдан қайтаётгандар экан.

Йўл бўйларидағи бозорчаларда сопол хум, кўзалар уюлиб ётарди. Ҳинд қизларининг қадди-қомати

шунинг учун тик, келишган, чумоли бел бўлишадики, улар ўша хум-кўзаларни мудом елкаси, бошида кўтаришиб, сув ё бошқа нарса ташийдилар (бу юртда ҳатто эркаклар ҳам бошда юк кўтариб юришарди). Ҳинд эркакларининг аксарияти юмшоқ табиатли, беозор, юввош, содда бўлишаркан, секин, аммо пухта иш қилишаркан. Хивичдай озгин, бизнинг иборамиз билан айтганда «қангил»лари кўп экан.

Йўл жунгли (Бобур «жангаль» деб атаган, бизда «чангальзор» дейилади) орасидан ўта бошлади. Таърифларга сифмайдиган (тўғриси таърифга илм ожиз, қалам ожиз) гўзал дараҳтлар, манзаралар одамни беихтиёр энтиқтириб юборади... Хушқомат қизлар қадди-бастига нисбат бериладиган сарв, ар-ар, шамшод дараҳтларининг табиати, хосиятлари хусусида сўз кетди. Ҳамма билганини, кўрганини, эшитганини ўртага ташлади, ўз қарашлари ва мулоҳазаларини баён этди. Бироқ бу дараҳтлар ҳинд заминида кам кўринарди.

— Ҳиндистонда сандал дараҳти кўп, — деди Аҳмаджон жангальдан ўтгач, узоқдан шохлари фужум бўлиб турган дараҳтларга ишора қилиб, — ҳиди ниҳоятда кучли бўлади. Ҳатто беш юз — минг қадам нариберисидаги дараҳтларга ҳам ҳиди уриб кетади.

— Ҳа, ундан кўплаб совғабоп буюмлар тайёрланади, — маъқуллади Сайфиддин ҳожи ака.

— Илон уни ниҳоятда хуш кўради, — фикрини давом эттириди Аҳмаджон. — Илонлар уя қилмаган сандал дараҳтини топиш қийин.

Шуниси диққатга сазоворки, Покистонда ҳам, шундай бепоён Ҳиндистонда ҳам дов-дараҳт ниҳоятда эҳтиёт қилиниб, эъзозланар экан. Экинзорнинг ўртасидаги бирон туп дараҳтни ҳам кесиб ташлашмас экан. Бизда 60-йилларда экин майдонларини катталаштириш, фўзани машинабоп қилиш шиори остида қанча-қанча дараҳтзору мевазор боғлар «қириб» ташланганини эсладим. Шунинг учун ҳам Ўзбекистон дараҳтзор майдонлар ҳажми жиҳатдан чўл бўлиб кўринадиган Туркменистандан ҳам кейинга тушиб қолган эди.

Лоласимон, чўғдай гулли дараҳт мени ғоят ҳайратга солди. Япроқлари майнин, оч мош ранг бу дараҳт шохлари бетартиб эмас, худди пашшахонадай ихчам ва тепалари ҳам деярли бир текис, яъни шохлар маълум жойгача тик ўсгач, кейин яна шохлаб ёнбошга — бирбирларига қараб ўстган эди. Унинг тепаси ва қатларига

гўё қизил гул барглар сочиб юборилганга ўхшарди. Лола дарахти шумикин, ё? Бу ҳақда шериклардан ҳам аниқ тушунча ололмадим ва яна ўзимни койидим...

Ёмғир шаррос қуйиб юборган маҳал, табиат манзаралари янада чирой очиб, майса-тиёхлар яшнаб кетди.

Ҳайдовчиларнинг ўта бетартиб ва сурбетлик билан машина ҳайдашларини ҳисобга олмаганды йўлимиз, сафаримиз кўнгилли давом этмоқда эди.

Аҳён-аҳёнда қишлоқ уйлари орасида готик усуlda қурилган черков ибодатхоналарнинг учли гумбазлари кўзга ташланиб қоларди.

Алқисса, Аградан 280 км. йўл босиб, кечаси алла-маҳалда Канпурга кириб бордик. Шаҳар аҳолисининг аксарияти осойишта уйқуда эди. Ҳиндистоннинг йирик шаҳарларидан, мамлакатнинг асосий саноат марказларидан бири бўлмиш Канпур Уттар-Прадеш штатида, Ганг дарёси соҳилида жойлашган. Канпур 18-асрда бунёдга келган, лекин шунга қарамай, 1857—59 йиллардаги ҳинд миллий озодлик ҳаракатларининг асосий марказларидан бўлган. Шунингдек, бу шаҳардаги портдан Ганг дарёси орқали Ҳиндистоннинг бошқа алоқа йўлларига чиқилади. Афсуски, биз шаҳарга тунда етиб келганимиз ва яна тонг саҳарлаб жўнаб кетганимиз учун шаҳарни ҳам, у билан туташ Гангни ҳам томоша қилолмадик.

Биз шаҳардаги энг зўр («класс» деб баҳоланувчи) мусофирихоналардан бири «Блісс» («Bliss»), меҳмонхонасига жойлашдик. Дарҳақиқат хоналар кенг, шинам, анжомлар янги, чойшаблар охорли эди. Рангли телевизор ниҳоятда тиник кўрсатарди. Чарчаган бўлишимизга қарамай, ҳинд «детектив» (тўғрироғи «урди-қочди») фильмини (бош ролда одатдагидай Митхун Чакроборти эди) томоша қилдим. Сўнг душга тушиб, жисми-жонимни роса роҳатлантиргач, соат тунги 2 дан ҳам ошганда ётдим.

17 август, сесанба.

Соат 6 яримда уйғондим. Шунча кеч ётган бўлишимга қарамай, мириқиб ухлабман. Бунинг сабаблари—хонанинг саришта ва гўзаллиги, муздай сувнинг оромбахш хосияти ва кайфиятнинг созлигида бўлса керак.

Нонушта олдидан бир-биримизни янада эъзозлаш, асабларимизни эҳтиёт қилиш мавзууда «беш дақиқалик» йифилиш бўлди.

Соат тўққизларда Лакнов (бу ерда «Лакнау» дейишаркан) сари жўнаб кетдик. Ўн беш чақиримча юргач, йўлимизни кесиб ўтган буюк Ганг дарёси ёнидан чиқдик. Узун, катта кўприқдан ўтипмиз. Биздан чапда, дарёнинг ўнг қирғоғида Ганг дарёсига сифинувчилар учун маҳсус жой бор экан. Тумонат одам—эркагу аёл, каттаю-кичик яланғоч, ярим яланғоч бўлиб, сувга кўкракларигача тушиб олиб, бошларидан, бўйинларидан, елкаларидан сув қуишишарди. Оналар болаларини, ҳатто митти чақалоқдарини ҳам чўмилишишарди. Гангнинг суви шу ерда нисбатан тиник, тозароқ экан. Ажаб, Ҳиндистонда одамлар нималарга сифинищмайди дейсиз: сигирга, ўтга, сувга... Лекин тарихда сувга тавоғ қилувчилар учраб туради. Масалан юонон муаррихи Максим Тирский массагетлар (Каспий орти ва Орол денгизи яқинида, Амударё ва Сирдарёнинг қуи оқимида милоддан аввал VIII—IV-асрларда яшаган жангари қабила)нинг Танакс, (яъни Амударё) дарёсими мұқаддас деб, маълум кунда бу дарёда чўмилиш одатлари борлиги ҳақида ёзган.

Йўл бўйидаги кичкинагина бозорча ниҳоятда гавжум ва бесарамжон эди. Гўё бу ер сайлгоҳу бу кун байрамга ўхшар эди. Бозорча ортида, дарё билан ёндош каттагина кўл ҳам бўлиб, оралиқ жой мўъжазгина оролни эслатарди.

Қатор-қатор автобус, юк машиналарида келишаркан сифиниш маросимига (худди бизда Арслонбобу Шоҳимардонга ё Балиқли мозорга боришгандай).

Ҳинд фильмларини кўрганда ҳиндлар иш пайтида ҳам, бошқа вақтда ҳам нуқул ашула айтиб юришади, шекилли, деган таассурот қолади. Мана, шунча кундан бери кўчада ё далада қўшиқ айтиб юрган одамни кўрмаяпмиз. Дарёдагилар ҳам жимгина чўмилиб-сифинишияпти.

Баъзан, аксар, кайфият соз бўлса беихтиёр хиргойи қилгиси келади ҳар кимнинг. Кўпчиликда бор бу одат. Лекин масалан, бизда бор овоз билан ашула айтиб иш қилаётган одам ҳақида «бунга бир гап бўлти» шекилли деб ўйлашади.

Хуллас, Ҳиндистонда гувоҳ бўлганимиз ҳар бир воқеа, ҳодиса ҳинд эли ва диёри ҳақида тасаввуримни бойитиб бормоқда. Йўл баъзи жойларда шундай қалин ўрмонлар орасидан ўтардики, дараҳтларнинг уни бир-бирига тегай-тегай деб турар, гўё туннелдан ўтаеттандай бўлардик. Ҳиндлар фақат ҳайвонлар, дараҳт-

ларгагина эмас, балки майса-гиёҳларга ҳам зиён етказицдан ҳазир бўлишаркан. Наздимда улар табиатдаги ҳар бир нарсани муқаддас мўъжиза деб билишарди.

Аслида экспедициянинг дастур-йўналиши бўйича Омлоҳободга боришимиз лозим эди. Канпурдаги эрталабки машваратда мусулмонлар кўплиги, Ҳиндиштон—Ўзбекистон дўстлик жамиятининг бўлимига киришини ўйлаб Лакновни танлаган эдик. Лекин...

Лакновга куппа-кундузи кириб бордик. Мирза Расво деган адабнинг «Бир хоним саргузашти» номли романи воқеалари мана шу шаҳар билан ҳам боғлиқ эди. Саргузаштчи хоним яхши хонимлар тоифасидан бўлмагани учун Лакнов ҳақидаги таассуротим ҳам шунга яраша, мундайроқ эди. Аммо, шаҳарга кираверишдаги «Лакнов батартиб меҳмонни шарафлайди» деган маънодаги шиорни кўриб, шаҳар раҳбарлари анча маънили, маданиятли кишиларга ўхшайди-ку, деган фикр кечди хаёлимдан. Лекин афсуски кейинроқ аввалги «лекин»...га қайтишга мажбур бўлдик.

Умуман олганда Уттар-Пратеш штатидаги Лакнов ҳам шаҳарчиликнинг асосий шартларидан бирига амал қилинган ҳолда, дарё ёқасига жойлашган, мўъжазгина, яшилликка бой шаҳарча экан. Мевазор боғлар унча назаримизга илашмади-ку, лола гулли дарахт, акас кўп эди.

Кўнгилсизлик машинамиз ёнбошини қириб олишимиздан бошланди. «Ўзбекистон — Ҳиндиштон дўстлик жамияти» Лакнов бўлимини излаб (уни топломадик ҳам) юриб, бир ёқлама қатновли торроқ кўчага кириб қолибмиз, Обиджон ака машинани орқага тисараётган эди, (эскироқ виллиссимон машина турган экан, ёнбошига қадалиб қолди. Яхшики «виллис» ҳайдовчиси ҳам, йўл назоратчиси ҳам (биздагидай бир зумда қаёқдан пайдо бўлиб қолди, билломадик) таъбимизни хира қиласидиган гап айтишмади.

Лакнов университетига бордик. Қабул имтиҳонлари кетаётган пайт экан. Менинг эътиборимни иккинчи қаватга кўтариладиган зина ортида турган велосипед ўзига тортди. Назаримда у камида эллик йилдан бери шу ерда қимирламай турганга ўхшарди — чанг ва занг босиб кетган эди.

Биз учрашмоқчи бўлган доктор, олимлар таътилда экан. Ҳафсаламиз пир бўлди. Бунинг устига бирон кимсадан «сизлар кимсизлар, қани, бу ёққа...» деган

сухан ҳам чиқмади. Хуллас, кунимиз бекор ўтди. Бугун умуман ишимиз юришмади ўзи.

Қайтишда ҳайвонот боғи ва ундаги тарих музейига кирдик. Боғ чиройли, бироқ ҳайвонларнинг турлари кам, музей ҳам унча бой эмас эди. Каттакон фил устида қисқа масофали сайд қилаётган болалар, ўсмирларни ҳисобга олмаганды, боғда бошқа овунчоқ-ўйинларнинг ҳам тайини йўқ эди. Аҳмаджон, Тўлқин ака, Фаррухлар билан бироз томоша қилиб турдик. Фил эркак эди. Бир ҳол бизни ғоят таажжублантириди: хартуми орқали елкасига қиз болалар чиқаётганда филнинг безовтлангани, «ҳаяжонлангани» сезилиб қолмоқда эди. Мен «Кинг-Конг» деган АҚШ фильмини эсладим. Ҳайвонотнинг ҳар қандай турида, ҳар қандай махлук, жониворда ҳам эркаклик эҳтирослари қарама-қарши жинсни кўрганда кўзғолади шекилли-да...

Банкни излаб топдик. Ниҳоятда кўп хонали катта бино экан. Зокиржон ака билан Аҳмаджон пул алмаштириш учун кириб кетишли. Атрофда кутиб турган, мўъжазгина хиёбонда давра қуриб ўтирганлар кўп, афтидан бу жойда банқдан бошқа идоралар ҳам бор эди. Бино ҳовлисига бир-биридан янги ва чиройли хилма-хил енгил машиналар тўхтовсиз кириб-чиқарди. Аммо рикшалар кучаниб тортиб келаётган файтуннизвошлар ҳам бор эди. Ана шундай файтунларнинг бирини оппоқ соқоли кўкрагини қоплаган, тахминан етмишни уриб қўйган (менинг наздимда, аслида эҳтимол ёшроқдир, ўскин ва тартибсиз соқол кўпинча одамни алдайди) мўйсафид тортиб келди. Файтунда эса ўн саккиз-йигирма ўшлардаги Фотима-Зухролардай бир-бирига жуда ўхшаш ва деярли бир хил кийингган иккита оқ бадан жонон ўтиради. Уларнинг ўзларини суқди боқдан назарларни гўё кўзга имагандай, парво қилмагандай, фақат ўзаро ва қизиқарли сұхбатга машғулдай тутишлари, бир-бирига нимтабассум ила боқишлиари ўтган аср Оврупо хонимларининг киброна навозишлирини эслатарди. Ё, алҳазар!.. Мумкин, қарияни тириклик шунчак мажбур қилгандир. Лекин оппоқ томоқлали ости ва киндигини очиб солланиб ўтирган навниҳол бегойимлар оталари, балки боболари тенгги чолни қирчанги ҳачир ўрнида инқиллатиб юргутириб юришдан хижолат бўлишмасмикин? Бу манзара менда жуда ноҳуш, ҳатто аянчли таассурот қолдирди.

Бу ерда мен яна шунга ўхшашрок, жаҳон эркаклари учун муштарак бўлган бир манзаранинг гувоҳи бўлдим.

Бекорчига ҳамма нарса ғалати туюлаверади. Чунки у нима қилишини билмай, кўрган-билгандарини ҳар хил тарози, мезон ва ўлчовларга солиб, ўзича турли мушоҳадалар юритиб вақт ўтказади-да. Бир замон денг, ичкаридан этаги тиззадан баланд, тўқ олуча ранги кўйлак кийган занжи қиз узун пошиали туфлисини асфалт йўлда тақиллатиб чиқиб келди. Менинча у йигирма беш ёшлардаги жувон эди (унинг қиз болалигига гувоҳ ҳам, далил ҳам йўқ-ку). Жувоннинг ҳам юқоридаги оқ баданли бегойимларникдай томоги остидаги каттагина қорамағиз майдон очик, ёноқлари иргиб чиқкан қиррасимон юzlари ҳам ўта қора эмас (шунинг учун ҳам у ўзини занжи аёлларининг энг опроғи, келишгани дея хаёл қилса ажаб эмас), қора кўпиксимон тўзиган соchlари бошидан камида икки баробар катта; елкалари, болдиrlари, кўкраклари жуда баракали, шунга қарамай чиккабел эди — қаттиқ тортиб боғланган қора тасмаси жувоннинг бутун жуссасини гўё нақ, иккига бўлиб турарди. Жувон пошиаси остидан чиқаётган товшунинг атрофга жаранглаб таралаётгани учун хижолат тортибми, ё кийими ва бичими ҳамманинг эътиборини тортаётганини сезиб ўнғайсизланганиданми ёки ўзини ниҳоятда ҳаёли ва иболи тутибми, ҳар нечук қоп-қора узун-узун ясама киприклари остидаги кўзларини ерга қадаганича йўлни ўрталаб ўтиб кетаркан, деярли ҳамма (атрофда асосан эркаклар эди) то у, кўздан фойиб бўлгунча нигоҳ, узмай туришди. Жувоннинг рўпарасидан келаётганлар ҳам то ёнма-ён бўлиб, ўтиб кетишгунча фақат унга тикилиб келишарди.

Негр маликаси кўп ўтмай қайтди ва бир неча дақиқадан кейин яна бир бора ташқарига чиқиб келди ва ҳар ўтганида айнан юқоридаги ҳолат тақрорланарди. Эркакларнинг ёши ҳам, чоли ҳам унга кўзларининг бор қуввати билан тикилишдан ўзларини тиёлмаётганлиги аён билиниб турарди. Негр соҳибжамоли эса гўё мутлақо бепарво эди...

Хуллас, Лакновдан кўнглимиз тўлмай, йўлда давом этдик. Асли Оллоҳободга бораверсак бўлар экан, Бобур ҳам Лакновни бор-йўғи З марта тилга олган холос, деб муҳокама қилиб кетдик. Дарҳақиқат, Оллоҳободда (уни Илоҳобод ҳам дейишади) мусулмон ва ҳинд археологик ёдгорликлари, бобурийлар номи билан боғлиқ обидалар анчагина бор эди-ку. Жумладан подшо Ашока (милоддан аввалги учинчи юз йиллик) давридан қолган тош устунлар, «Хисрав» (Шоҳ Жаҳон) боғи ва

мақбараси, Акбаршоҳ қурдирган Илоҳобод қалъаси (шаҳарнинг ҳозирги номи ана шу қалъадан олинган) ва бошқа тарихий обидаларни кўриш, ўрганиш мумкин эди-я... Афсуски энди бу армон бефойда, елдак кетаётган вақтларнинг ҳар дақиқаси саноқли, ғанимат эди...

Қаршимизда яна ажиг манзарали далалар, ям-яшил сайхонликлар, хурмо кўчатзорлари пайдо бўлиб қалбимиздаги анча-мунча ғашлигу губорларни тарқатиб юборди. Огаҳий ғазали билан айтиладиган машҳур қўшиқни хиргойи қилиб бораётган Сайфиддин ҳожи aka «...пайванди шамшод устинса...» деган жойда тўхтаб, ўзбек классик назмига ажойиб рамзлар бўлиб сингиб кетган «шамшод», «сунбул», «мушк», «санбар» каби хуш бўйли ўсимлик ва моддалардан гап очди. Шу суҳбат асносида кенжамиз ва эркатойимиз Фаррухнинг бекорга маҳмадона эмаслиги, анча нарса ўқиганлиги бир қадар аён бўлди. Унинг андак бетта чопарлиги ҳам бор эмасми (Сайфиддин ҳожи aka баъзан уни «ҳа, беадаб...» деб бекорга «эркалатмайди-да»), Собиржон Шокаримовнинг, ҳатто Сайфиддин Жалиловнинг фикрларини ҳам тап тортмай рад қилаверарди. Балки, табиатан серҳаракат, шошқалоқроқ бўлгани учун унда мунозара, мусоҳабани оҳиста, мулоимлик билан давом эттиришга сабр-тоқат, андиша андак камроқдир. Масалан катта ҳожи aka: «сунбул» — «хушбўй ҳидди» деган маънода қўлланади, деб «сунбул соchlар...» иборасини мисол келтирди. Фаррух эса дарҳол: «йўқ, домла, «сунбул» — узун-узун майн толали ўсимлик, шунинг учун сочни унга ўхшатилади», деб ўз тушунчасини баён этди. Эҳтимол, домла ҳам ҳақдир, сунбулнинг у айтган маъноси ҳам бордир, лекин бу борада мен ҳам Фаррух билан ҳамфир эканлигимни билдиридим.

Фаррух «мушк»ка: у китнинг жигаридан, яна икки хил ҳайвон шохидан олинади, деб изоҳ берди. Унинг бу фикри баҳсталаброқ эди. Чунки мушк ҳақида қомусларда батафсил маълумотлар берилгану аммо асосий моҳияти «ўсимлик ва ҳайвонлардан ажралиб чиқадиган ўткир ҳидди модда», деган бир жумла билан ифодаланган.

Фаррух иккимиз Аҳмад Яссавийнинг «тупроқ ўлгин, олам сени босиб ўтсин...» деган сатрининг мазмуни бобида Собиржон aka Шокаримов билан унча хил келишолмадик. Яъни Собиржон aka юқоридаги мисрага «тупроқдек табаррук бўл» деган мазмун берди. Биз

шоир: «тупроқдек хокисор, камтар бўл» демоқчи бўлса керак, деган мулоҳазани айтдик...

Ҳар ким ўз фикрида қолди. (Аслида иккала фикр бир-бирини тўлдиради).

Биз Патнага томон интилиб борардик.

Йўлдаги бир хонадонда тўйга тайёргарлик бўлаётган экан. Унинг олдидағи саҳннинг атрофи ўралиб, у ёқдан бу ёқса йигирма-ўттиз қатор пахта илаштирилган ип тортиб қўйилиди. Тўзиб турган пахта бўлаклари оппоқ юлдузларга ўхшарди. Менда қани энди ҳинд ҳалқининг турли урф-одатларини, марака-маросимларини, лоақал биронта тўйни кўрсак, деган орзу туғилди, лекин афсуски экспедиция дастурида бунақа банд ҳам йўқ эди.

Бепоён далаларни, кенг сайхонликларни, йўл бўйларидаги қалин сийрак дараҳтзорларни томоша қилиб кетавериш энг суюкли машғулотимиз эди. Йўл бўйида биронта эски тўнка учрамасди. Бир жойда эртаклардагидек жуда улкан, баҳайбат дараҳт ағдарилиб ётиди. Назаримда ўзи қариб бир табиий оғат туфайли йиқилмагунча биронта дараҳтга арра ё болта солишмайди шекилли. Деҳлида ҳам, йўлларда ҳам дараҳтларнинг қуриган шоҳ-новдаларини бутаб, кесиб олишаётганини кўп кўрдик. Агар шунча иссиққа довдараҳт шунча кўп бўлмаса, билмадим, одамларнинг ҳоли нима кечарди. (Балки шунинг учун ҳам дараҳтларни асрраб-авайлашар...)

Кечқурун Султонлур шаҳрига етиб бориб, «Вижадилекс» деган меҳмонхонада тўхтадик.

Шаҳарда ёзув асосан тамил тилида ва алифбосида эди. Инглизча ёзувни кўрмадик.

БИР ПИЁЛА СУВГА АЛМАШМАМ

18 август, чоршанба.

Соат олтиларда туриб Банорас (бу ерда ҳали ҳам қадимги номи билан Баранаси дейиларкан) сари йўл оддик.

Маълумки, Банорас Ҳиндистаннинг тарихий шаҳарларидан бири бўлиб, у ҳам Уттар-Прадеш штатига қарайди. Шаҳар VII асрдаёқ илму фан марказларидан бирига айланган. Бу ерда ҳозир қанд, шойи кўплаб ишлаб чиқарилади. Банорас жаҳонда тилла ва кумуш

иблардан тайёрланадиган зарбоф-кимхоб матолари, заргарлик буюмлари билан ном қозонган. Ўрта Осиё халқлари ўртасида, жумладан бизнинг ўзбекларда машҳур бўлган «банорас» газламасининг асл ватани ҳам Банорас шаҳридир.

Машриқ томон кетяпмиз. Шаҳардан чиқишимиз биланоқ икки тарафимизда ям-яшил сайхонликлар бошланган. Ҳимолай тизмалари ортидан кўтарилиб келлаётган қуёш нурлари майсалар қатидаги, хурмо барглари четида исирғадай осилиб турган шудрингларни жилодантиради. Табиатнинг ҳозирги кўриниши ёмғирдан кейинги манзарасимон сўлим ва чиройли эди.

Йўлдан сал ичкарироқда, пастак буталар орасида гала-гала товуслар bemalol юришарди — худди Гуркиров (менинг она қишлоғим) ўрмонидаги тустовуқлар каби... Дарвоке, бу кеча тушимга қишлоқдаги тенгқуржўрам Муҳиддин кирибди. У «Ҳиндистон қалай экан?»— деб сўрайлти. Мен «яхши, лекин Гуркировимизнинг бир пиёла сувига алмаштирумайман», деб жавоб беряпман... Дарҳақиқат, Ҳиндистон табиати ниҳоятда бой, ниҳоятда гўзал-ку, Бобур айтганидай оқар суви тоза эмас, қудуқ сувлари bemaza, ноиложликдан ичасиз. Роса чанқаб бораёттанингизда «тўхтанглар, анави сувдан ичиб олай» деб югуриб борадиган булоқ ё чашма йўқ. Борлари ҳам азбаройи семизлигидан ларzon-ларzon бўлиб аранг юрадиган қора, симобранг сигирлардан ортмайди. Ҳатто битта мол жойлашгулик кўлмакка ҳам бир нечтаси тиқилиб ётиб олишган бўлади. Ҳиндистоннинг одамларига қараганда ҳайвонлари иссиқقا чидамсизроқ шекилли. Асли, сувларнинг тозамаслиги мана шу жониворларнинг ўта кўплиги ва бошвоқсизлигидан ҳам бўлса керак. (Айтишларича, сигирни соғиб олиб, яна ҳайдаб юборишавераркан). Менимча одамдан кўп бу молларнинг тайинли эгаси ҳам бўлмаса керак. Онда-сонда мексикаликларнинг катта тогорадай келадиган похол шляпаларидан кийиб, таёқ кўтариб юрган битта-яримта ҳинди эркакни ҳисобга олмагандা мол боқаётган бола, ўсмир умуман кўринмайди.

Пили деган дарёдан, тўғрироғи собиқ дарё кўпригидан ўтдик. Ҳиндар кичкина каналга ҳам, ҳатто ариқсиз, чуқурроқ ҳандақлар устига ҳам катта ва мустаҳкам кўприк қуришаркан. Шунингдек, ҳар қадамда кичик-кичик қўлбола қизил фишт заводлари учаради. Ҳиндистонда энг кўп ишлатиладиган ва истеъмол қилинадиган нарсалар — қизил фишт, муз, совуқ сув бўлса

керак. (Ошхонага кирсангиз энг аввал истиконда сув олиб келиб столга тақ этказиб қўйиб кетишида). Лекин, тан олиш керак, фиштни ниҳоятда ҳафсала ва усталик билан текис, бежирим уришаркан (аксар бинолар фиштли эди).

Бепоён толзорлар, маккажўхоризор ёнидан ўтиб борарканмиз, қаршимиздан аридай тўзиб юрган сатриқ сўзанаклар галаси чиқди. Ҳаддан ташқари кўп эди, сўзанаклар юрти бўлса керак.

Банорасда тўхтамадик. «Тойота»миз дастурда белгиланган йўналиш бўйича шиддат билан олға интиларди. Иттифоқо, шаҳардан чиқиб, бошқа йўлга кетиб қолибмиз. Йигирма беш чақиримча юрган эканмиз, Тўлқин ака сезиб қолди. У харитани яхши биларди. Дунё кезган одам-да.

Мана, Ҳиндистонда анча кундан бери юрибмиз (ўзимиз ҳам йўл қоидаларини неча бор бузиб ўтган бўлсак керак), лекин бирон жойда йўл назорати ходимининг ҳайдовчи билан можаро қилиб турганини учратмадик. Чап қўл ҳаракатидан бўлак қоида ҳам йўқقا ўхшайди ўзи. Балки шунинг учун ҳам ҳар қадамда машиналар сузишиб, тўқнашиб, ағанаб ётарди.

Ниҳоятда ўлқан ва узун темир кўприкка дуч келдик. Кўприк остидан Ганг дарёси айқириб ўтарди. Ганг Жамна дарёси билан Оллоҳобод яқинида қўшилади-ку, гёё у ана шу учрашувга, бирлашувга ошиқиб бораради...

Капа бўлиб ўсган, эртаксимон дараҳтзорлардан чиққандан кейин, очиқ далада тўп бўлиб турган қузғулар галасига кўзимиз тушди. Сал нарида улардан ортган, фақат скелети қолган бир жоноворни энди қарғалар чўқилашарди.

Йўлимизда яна рикшалар учрай бошлади. Уларнинг айримларига Лакновдагидай кекса одамлар ёшёш йигитлар, қизларни (гёё болаларни ўйнатишаётгандай), ё аксинча пўрим кийинган катта жаноб ва хоним афандиларни ўсмирлар олиб юришарди.

Ҳиндистонда қўлидан келадиганки одам чакана савдо билан шуғулланиб, тирикчилик ўтказишларини кўча бўйларида майда-чўйда эски-туски дўкончаларнинг кўплигидан билиб олса бўларди. (Ўша пайтда бирор менга: «ҳадемай сизларда ҳам шундай бўлади», деса ишонмасдим. Тўғри, бизда ҳам хусусий мулкчилик, якка савдонинг бундай аломатлари бошланган эди, ҳар қалай, мен кўрган Шарқ мамлакатларидағи даражага бориб етмас, деб ўйлардим).

Ҳинд диёрида, бу йўлларда табиат манзараларидан завқ олиб, баҳслашиб, ҳазиллашиб бораверишдан яхшиси йўқ менимча. Ажойиб кўлларни кўриб ўтганимиз, улардаги нибуфарлар ҳали унча очилмаган бўлса-да, бизнинг кўнглимизни очиб юборарди.

— Денгизга яқинлашяпмиз, чап томонга қаранглар-а, сув мавжлари кўринаётганга ўхшаяпти, — дейди Собиржон ака.

— Э, ҳали яна 600 километр бор. денгизга, — деярад этади Тўлқин ака жиддийлик билан.

— Мен ҳам яқинлашяпмиз деяпман, холос, ҳазилниям тушунмас экансизлар, — кулади Собиржон ака.

Ҳиндистон ҳудуди яшил рангга бурканганилиги билан эътиборни тортарди. Покистон бунаقا эмас эди. У юрт далалари Туркманистон чўлларига ўхшаб кетарди. Шаҳарсимон қишлоқ (ё қишлоқсимон шаҳардир)-лардан ўтаётганимизда шундоқ кўча бўйларига экилган дараҳт кўчатлари атрофига фиштдан тўр ясаб, омонат териб, ихота қилиб қўйишибди. Сал туртилса, ҳаммаси қулайди, лекин турибди. Ҳиндларнинг ҳафсаласига ва болаларининг беозор-ювошлигига қойил қолиш керак. Фақат, афсуски, онда-сонда учрайдиган хурмо, бананини ҳисобга олмагандা мевали дараҳт деярли кўринмасди. (Ўрик, шафтоли-ку мутлақо йўқ...)

Йўлимизда манзарали дараҳт, хусусан пальма, улкан пипал, баргар дараҳтлари кўп эди. «О, сеҳрли ҳинд диёри» деган китобларда мана шу каби палмазорлар, жангалзорлар назарда тутилармидийкин, деб ўйлаб қолдим.

«Сеҳрли ҳинд диёри»да одамларнинг тирикчилик ташвишлари билан бандлари ҳам кўп, зеро тирикчилик йўллари ҳам бисёр эди. Шулардан бири балиқчилик эди. Кичик-кичик кўллар, ҳовузларда тўр билан балиқ овләётган болалар ҳавасимизни келтиришса, аёлларнинг дарёга қармоқ ташлаб ўтириши бизга ғалат кўринарди.

Йўлимизни яна кенг қулоч ёйган, қирғоги бепоён сариқ қумлик билан кўмилиб кетган сарғимтир сувли Ганг кесиб ўтди. Кўприк баланд ва жуда узун (таксиман 2 чақиримча) эди. Сув кўпайганда шу бепоён ўзан тўлиб оқса керак.

Кўш ҳўқизли омочда баттар жизғанаги чиқиб ер ҳайдоётган кекса дехқонларни кўриб (улар менимча, шоли экишга жой ҳозирлашарди), яқин ўтмишимиз эсимга тушиб кетди. Болалигимда (1960 йилларнинг

боши) паҳта эгатлари от ёрдамида култивация қилинарди. Мен от миниб культиваторни тортганларим (уни орқада каттароқ бир одам бошқаарди) шундоққина кўз олдимда. Алишер Навоийнинг чор девонини ва бошқа ўзбек классик шоирларининг газалларини ўқиб, уларнинг таъсирида, ўшаларга эргашиб бир нималар қорайтириб юрардим. Бир куни кечки пайт от устида ботаётган қуёш ҳақида гапириб, шундоқ қуёш ҳам ботади-я, одамнинг умри ҳам шунаقا-да, ана шу ҳақда бир шеър ёзмоқчиман, дебман, ўзимча Африка кашф қилиб. Шунда культиваторни бошқариб бораётган Нуъмонжон амакиваччам (отамнинг учинчи акасининг ўғли — у мендан ўн тўрт-үн беш ёш катта эди): «кеч қопсан, жиян, бу ҳақда сендан анча илгари ёзиб қўйишган, «Қуёшдан ибрат олгин, охир бир кун ботар бордир», деган ашулавани эшитмаганмисан, Таваккал Қодиров айтади», деб қолди. Жуда изза бўлдим ва шу-шу ёзган ва ёзмоқчи бўлган шеърим ҳақида бирорвга мақтанмайдиган бўлдим. Ҳали-ҳозиргача шеър ўқишига ийманишимга ана шу воқеа сабаб бўлган бўлиши ҳам мумкин...

Биз Бенгалия сари яқинлашиб бормоқда эдик. Экспедиция аъзолари етти киши (ҳайдовчидан ташқари) — жуда меъёрида эканмиз. Бундан оз бўлсақ зерикиб қолишимиз, кўп бўлсақ, ҳар томонга тортиб, «майдалашиб» кетишимиз мўмкин эди. Энг муҳими, орамизда Сайфиддин Жалилов, Собиржон Шокаримов каби кенг кўламли олимлар, Тўлқин Рўзиевдек дунё кўрган санъаткор ва латифачимиз бор эди. Зокиржон аканинг эса суяги турли геологик экспедицияларда қотгани учун, сайёҳликда ва ҳамсафарлиқда ибрат олишга арзигулик фазилатлари кўп. Айни дамларда унда раҳбарлик масъулияти ва сиёсати устиворроқ эди.

Хуллас, ҳазил-хузул, асқия, латифалар билан вақтларимиз янада тез ўтар, баъзан эса, табиийки, ҳамма мудраб қоларди ё ҳар ким ўз хаёллари дарёси тубига шўнғиб кетар, ёхуд бир жуфт-бир жуфт бўлиб секин сұҳбатга берилардик. Сайфиддин ҳожи aka юқорида айтганимдай гарчи тарихчи бўлса-да, адабиётни яхши билар, бадииятга иштиёқи ва қизиқиши баланд эди. Биз у билан Бенгал адабиётининг классиклари Назрул Ислом, Рабиндронат Тагор (ҳозир уни бизда Токур дейишмоқда) ижоди ҳақида гаплашиб кетяпмиз. Мен бенгал адабиётига янгича рух олиб кирган исёнкор шоир Назрул Исломнинг «Инсон» достони ва бир қанча шеърларини таржима қилган эдим. Бу асарлар

Faafur Fuolom nomidagi adabiёт va sanъat nashriёtiда чоп этилган «Ҳинд шоирлари» kitobiда (1974 йил) босилган. Mаъlумки, Nazrul Islom қирқ ёшларида хотирасидан aйрилган (шоирнинг бундай мусибатли қисмати Эркин Воҳидовнинг «Руҳлар исёни» достонида ҳам акс эттирилган) va umrinning oxirigacha (қарийб қирқ йил) хотирасиз, карахт бўлиб яшаган!

Tokur esa, daҳo sanъatkor. U umuminsoniy mavzular adibi, shuning учун уни кўп элларда, жумладан бизда ҳам севиб ўқийдилар. Tokurning sakkiz жилдли танланган асарлари ўзбек kitobxonining ҳам бебаҳо мулки бўлиб қолди. Men uning rўmonlariдан kўra ҳам rўmonga tatiгулик ҳикояларини яхши kўraman. Жумладан «Tашна тошлар» ҳикоясини мусиқий оҳангдаги гўзал шеър каби қайta-қайta ўқийман. (Bu ҳикояга кейинроқ яна қайtамиз...)

Mашинамиз ballooni dam қўyib yobordi. Bir ustahona oldida tўxtab, kamera yamatdirik — 25 rupiyiga! Ozgina yuriб эдик, avtomobil xalokatiga dut keledik. Ikkiti юк машинаси bир-biri bilan қattiq tўqناшиб, biри afanab ketgan, ikkinchisi йўлдан pastdagi sholipoяga tumshuғi bilan sanчiliб қолgan edi.

Kun botish arafasi edi. Atrof niҳоятда gўzal. Uzoқda Ҳимолай («Дунё томи» deя taъriflanadi) toғinining boшlaniishi — pastroq tizmalar kўzga tashla-nađi. Palmalar orasidagi pайкалларда kўp aёllar қator engashiб olib sholi ўtashardи — bizga mana shu manzara қизиқарli va lekin fayri ҳol edi.

«Bari Kati» degan қишлоқda tўxtagik. Bu erda ҳinD aёllari aсосан қizil va ҳavorang sorij kiyisharkan. Ҳindiston xududiда shu narсani kuzatilmizki, ҳар bir shaҳar va қiшлоқ aёllarinинг ўз sevgan va urf қilgan ranglari bўlarkan.

Шу қишлоқning osmon ostidagi очиқ mайдon — «meҳmonxona»сида tunadik. Ўзга musofigrlar ҳam an-chagina bor edi. Яна ўша ip kalaвot... Atrofda яna ўsha «fўnfir-fўnfir»... Boшқаларга ҳalal beriypmiz-mikin, degan andishanining йўқлиги bu kўcha kўnoқho-nasinining aсосий kamchiliklariдан biри edi...

НАРГИС ВАТАНИ

19 август, пайшанба.

Одатдагидай олти яримда туриб, ионушта қилмай, сал дурустроқ, таъб тортадиганроқ жой учраб қолар, деган умидда, кун чикишнинг ўнг томонига қараб кетган йўлдан жўнадик. Ҳадемай, яна ям-яшил қуюқ дарахтзорлар (улар ортида тоғлар) бошланди. Кечаги кўрганларимиз гиёҳсиз, Бобур таъбири билан айтганда «паст-паст ва дурушт ва тошлиқ, ва жангалиқ» тоғлар эди.

Шаҳарсифат қишлоқ (бу юртда шаҳар билан қишлоқни фарқлаш чиндан-да мушкулроқ эди) бошланди. Майсазорда болалар давра қуриб ўтиришибди. Муаллим ўртада тик туриб дарс ўтапти. Мактаб экан-да. Мен «Жаноб-420» фильмидағи шундай манзарани эсладим, унда ҳарқалай болалар партасимон бир нарса-да ўтиришганди...

Бугун уйдан чиққанимизга 28 кун — тўрт ҳафта бўлган эди. Сайфиддин ҳожи ака бизни синамоқчи бўлдими, жиiddий туриб, икки ҳафта 15 кун, тўрт ҳафта— бир ой бўлади, деб, анча бошимизни қотирди.

Йўл қирғофида тўп-тўп бўлиб ўсиб ётган гулбарглари оч сафсар (биздаги гулхайрига ўхшаш) гулларнинг бизни ўзига жалб этиб, баҳсдан чалғитгани яхши бўлди. Лекин яна чапда энг баланд қоясигача ям-яшил дарахтзор бўлган тоғлар кўриниши билан Зоқиржон ака Бобурнинг энг зўр табиатшунос олимларни ҳам лол қолдирган илми, қувваи ҳофизасининг кенглиги, синчков ва пухталиги, батафсиллилиги ҳақида гап очди. Дарҳақиқат, Бобур Ҳиндистон табиати ҳақида ҳеч эринмай, атрофлича ва қизиқарли маълумот берар экан, жумладан шундай деб ёзади:

«ҲИНДУСТОН аввалги иқлимдин ва иккинчи иқлимдин ва учинчи иқлимдиндир. Тўртинчи иқдимдин Ҳиндистонда йўқдур. Гариб мамлакате воқиъ бўлубтур. Бизнинг вилоятларға боқа ўзга оламедур. Тоғ ва дарёси ва жантал ва саҳроси мавозиъ ва вилоёти ва ҳайвонот ва набототи, эли ва тили ва ёмғури ва ели борча ўзгача воқе бўлубтур», дейди ва сана-ганларининг ҳар бирини муфассал шарҳлаб, таъсирлаб, тушунтириб, шундоққина кўз олдингизга келтириб, онгингизга қўрошиндай қуийб қўяди...

Горхар деган қишлоққа яқин жойда тұхтадик. Манзара бенихоя жозибадор зди. Қизғиши барглари улкан танасига нисбатан майда, тарвақайлаб үсадиган даражатни пиер дейищаркан. Үзиям тагиданоқ шохлаб кетавераркан. Күчанинг ярмини эгаллаб ётибди. Тұлқин ака пиер остида, табиат манзаралари фонида үзимизни тасвирга олди, суратта тушдик.

Яна у ёқдан-бу ёқдан гаплашиб кетяпмиз. Мавзуни күпинча Сайфиддин ҳожи ака танлайди ё бирдан гап бошлаб юборади. У Сирдарёning қадимги номи грек тарихий манбаларида Яксорт, Амударёning Окус деб тилга олиниши, Аҳмад Яссавий Сирдарё бўйидаги Ясси қишлоғида (аслида шаҳар) туғилганлиги, Ҳорун ар-Рашид давридан Бағдод шарқ мамлакатлари аро илмий марказ бўлиб қолгани ва бу тарихий воқеа-ҳодисаларнинг тафсилотлари тўғрисида гапириб кетди.

— Бизнинг заминимизда буюк одамлар кўп туғилган, — деди Зокиржон ака катта ҳожи акани қувватларкан, куюниб, — лекин бари тумтарқай бўлиб, ўзга юртларда қолиб кетишган.

Аҳоли яшайдиган ҳудуддан чиқишимиз билан ям-яшил водий бошланарди. Атроф тоза, ҳаво мусаффо, нафас олиш енгил. Эрталабда шундай, сал кун исигач, нам ва ёқимсиз ҳарорат кучаяди. Лекин бизнинг «Той-ота»миз ичи ҳамиша бирдай салқин. Мулоқот ва мунозаралардан гоҳо-гоҳо нохушроқ тутун иси келиб қоладио, аммо ҳайтовур тез тарқаб кетади...

Ажабо, дейман мен, манзарали, чиройли дараҳтларга завқим келиб, мевали боғ-роғлар кўринмайдио, бозорларда мева сероб. Бошқа юртлардан келтирилармикин?

Бепоён далалар табиий ҳолича турар, ҳеч ким дахл қилас, яъни бу ерларга экин экиладиганга ўхшамасди. Фақат, бу томонларда сув масаласи умуман чатоқ экан. Шарқираб оқаётган ариқлар кўринмасди. Ер бети эса ям-яшил. Чунки ер ости сизот сувлари яқин, чуқурроқ сайхонликларда ҳовуз-ҳовуз бўлиб турар, шиддат билан ёғадиган ёмғирлар қаёққа оқишни, ўзини қаерга уришни билмай қоларди.

Сизот сувлари ер бетига тепчиб туришига қарамай, ичимлик сувини водопровод, қудуклар ёрдамида 45 метр чуқурлиқдан олишаркан.

Калькуттага яқинлашганимиз сари бўй чўзиб бораётган тоғлар олди манзараси Арслонбобни эсга туширади.

Чапдаги тоғлар кўзга яққолроқ ташланиб қолган жойда майда ҳунармандлар қишлоғига тўғри келдик. Қўлда ясаган ҳасса, ших, шунингдек, қилич, ханжар, пичоқ каби эсдалик буюмларини шундоққина уйлари олдига олиб чиқишиб маҳсус тахтакачларга териб қўйишибди.

Йўл давомида мен бир нарсага амин бўлдим: қишлоқларда ҳамма нима биландир машгул эди. Дехлидаги дараҳтзорлар остида, кўприклар тагида чалмасиб ётганиларни ўйлаб, ҳамма бекорчи-ишёқмаслар тила-ниб бўлса ҳам кун ўтказармиз, деган мақсадда пойтахтга, катта шаҳарларга тўпланиб олишармикин, деган фикр туғилди.

Шу куни соат ўн бир яримларда Шимолий Бенгалия ҳудудига ўтдик. Бенгалча ёзувлар бошланди. О, Токур жаҳоншумул асарларини ёзган улуғ ёзув, тил!

Бенгалияни Бангол, бенгал тилида Бангла ҳам дейишаркан. Ганг ва Брахмапутра дарёларининг қуий оқимида жойлашган бу юрт Ҳиндистоннинг тарихий вилоятларидан бири. Ёши ҳам анча қадимий, фақат илгари бошқа номларда бўлиб, 10—12-асрлардан Бенгалия деб атала бошлаган. Унинг тарихи ва тақдирини анча қизиқ: 13-аср бошларида Дехли сultonligiga қараган. 14-аср ўрталарида мустақил давлатга айланган. 16-аср охирларида эса уни бобурийлар (Ақбаршоҳ) забт этиб, ўз салтанатига қўшиб олган. 18-аср бошларида Бенгалия ҳудудида яна мустақил давлат вужудга келган бўлса, орадан кўп ўтмай, Англия уни ўзига тобе қилган. 1947 йили Ҳиндистон иккига бўлинганда, Бенгалия ҳам иккига бўлинади. Ҳинду бенгаллар кўп бўлган Фарбий Бенгалия (маркази Калькутта) Ҳиндистонга, мусулмон бенгаллар яшайдиган шарқий Бенгалия Покистонга ўтган.

Қадимги санскрит ёзуви бир қадар ўзгарган шаклда бенгал алифбосида сақданиб қолган.

Бенгалия тараққиётга эришган вилоят сифатида эътироф этилади. Бунинг аломатлари йўлимизда ҳам сезилиб турибди. Қишлоқларда сариқ, қора тутун бурқ-саб чиқаётган мўрилар (қандайдир майда хусусий заводлар бўлса керак) тез-тез кўрина бошлади. Мўрилар шу қадар пастки, тутун шундоқ ер бағирлаб атрофга тараляпти. Одамларга, ям-яшил табиатга ачиндим, ҳайфим келди. Лекин, шунга қарамай сен учун экзотика, афсонавий бўлиб туюлган нарсаларни, жойларни ўз кўзинг билан кўрмоқ нақадар гаштли...

Мацинада ёзиб кетаётганимни қўрган Зокиржон ака:

— Яхши қиляпсиз. Ижодкорнинг қалами доим шай ва ҳаракатда бўлиши керак... Худо хоҳласа, Қашқарга қарвон билан борганимиз-да, түяning устида ҳам ёзиб кетасиз, деди ва яна келажақда от, туялардан қарвон ташкил қилиб, Буюк илак йўли бўйлаб Қашқарга ўтиш борасида ўйлаб юрган режаларини гапириб берди.

Кичикроқ қишлоқ гузари олдида тўхтадик. Кокос ёнғоғи сотишаётган экан, бир тилигини 1 рупийдан олиб ёдик. Чиндан ҳам ёнғоқ таъми бор эди. Олманинг килосини йигирма рупий дейди — 800 сўм-а? Пиёланинг оғзидаи чепоти 1 рупий!..

Муссон ёмғирлари ёғиб ўтди. Озгина юргач, машинага саларка қўйдираётганимизда ёмғир шунаقا шиддат билан ёғдики, ваҳима бўлиб кетди. Хайриятки қанча шитоб бошланса, шунча тез тинарди. Мен ҳинд фильмарида қуёш чиқиб туриб, бирдан ёмғир қўйиб юборса, тезгина тиниб қолса, ҳайрон бўлардим. Узим гувоҳ бўлиб, ишондим.

Далалардаги, ҳатто шолипоялар ўртасидан ўсиб чиқаётган ёввойи дараҳт кўчкатларининг атрофини ҳам фицит-тўр билан иҳота қилинганини қўриб, оғзим очилиб қолди ва беихтиёр «отангта балли-ей», деб юбордим.

Атроф-манзара ҳамон яхши-ку, йўл ёмонлашиб борарди... Бунинг устига машиналар қатнови бирдан тифизланиб кетди. Аксарият катта юқ машиналарининг пешонасига «PERMIT» («Пермит») деб ёзиб олишганди. Бу—шахсий, яъни хусусий дегани экан. Ҳайдовчилар пастда, ерда жуда мулоим, беозор кўринишади, бир нарса десанг бошини тебратишиб, кулиб туришаверади. Бирок, рулга ўтирганда шер бўлиб кетишаркан. Шунаقا қўпол, бесарамжон юришадики, ҳўдди бир-бирларига ўчакишиб, ғазаб билан ҳайдашаётганга ўхшайди. На тартиб ва на қонун-қоидага амал қилишади. Аслида тартиб-қоиданинг ўзи йўқ шекилли... Темир йўлдан ўтадиган жой ҳам ниҳоятда кўп экан. Ҳадеганда йўлимизни тўсиб темир йўл чиқаверади. Поезднинг қораси кўринмай йўлни тўсиб қўйишаркан, машиналар турна-қатор бўлиб кетади. Бошқа жойларда ҳам кўча тор бўлгани учун биронта машина бузилиб, беш-ўн дақиқа тўхтаб қолса, яна машиналар тизилиб, ҳайдовчилар қийқириша бошлади. Баъзан энсизроқ кўприклар устида шундай ҳолат юз беради. Йўлларни

шиддат билан ёғадиган ёмғирлар ўйиб юборса керак, ўнқир-чўнқири кўп, гоҳо пастидан — дала томондан айланиб ўтадиган жойлар чиқиб қоларди. Шу боис, йўлимиз унмай, ҳаммамиз хуноб бўла бошладик. Ахир, тўртинчи кунга кетяпти. Калькутта, қайдасан, деб, ҳануз етолмаймиз. Бобурийлар отда, пиёда ойлаб-ойлаб юришган бўлса керак, деб ўзимизга таскин берамиз.

Калькуттага яқинлашган сари ахвол баттарлаша борди. Йўл тобора торайиб, қатнов тобора қалинлашарди. Яхшиямки табиат жозибали, йўлнинг икки томонидаги дараҳт шохларининг учлари бир-бирига киришиб, капа бўлиб қолган — бундай жойлардан ўтиш жуда завқли ва гаштли эди.

Тушлик учун тўхтаганимизда соат икки, Калькуттагача яна 200 чақирим қолган эди. Соатига эллик чақиримдан юрсак ҳам кечки олтиларда етиб борамиз, деган умидда эдик. Шаҳар яқинига, остонасига келганда юриш шу қадар секинлашиб, қийинлашдики, пиёда юрган минг марта афзал эди! Қолаверса, машиналар бир-бирларини олға ундан қисташ мақсадида тинмай чинқирап, орага сурбетларча сукилиб кираради.

Хулласи қалом, кеч соат тўққизларда Ганг дарёсининг тармоқларидан бири — Хугли дарёси кўпригидан ўтиб (шу темир кўприкни кўриб оламда, айниқса Ҳиндистонда металл дегани беҳисоб нарса экан, деган хуносага келдим), ниҳоят, Калькуттага кириб бордик. Дарвоҷе, ҳиндистонликлар «Калкатта» дейишаркан, чунки, таржимонимиз Аҳмаджоннинг айтишича, «куттга» қўшимчаси «кучук» деган маънони англатаркан. Лекин, на чора, бутун адабиётлардаю оммавий ахборот воситаларида «Калькутта» шакли қўлланилгани учун биз ҳам шу атамага кўникиб кетганмиз.

Калькутта... Одатда, катта шаҳарлар номини эшитган заҳотингиз, ўша жойнинг ўзига хос мұхим белгиси, фазилати ёки у ердан чиққан машҳур зотлар хаёлингиздан ўтади. Калькутта номини шарафга буркаган исмлардан бири Наргис хонимдир. Беқиёс латофат эгаси, XX аср ҳинд кино санъати осмонида чарақлаган ёрқин юлдузлардан бири бўлмиш Наргис хонимнинг асл исми Фотима Рашиддир. Унинг «Дайди», «Жаноб-420», «Уч дengiz osha saёchat» қаби бадиий фильмларда яратган образлари, айниқса, «Она Ҳиндистон» фильмидаги Радҳа сиймоси менимча ҳар бир ўзбек кино мухлиси қорачиқларида муҳрланиб қолган. Наргис 1972 или Тошкентда бўлиб ўтган Осиё ва Африка мамла-

катлари кино фестивалида қатнашиш учун Ўзбекистонга көлган ва у қатнашган фильмларни пойтахтимиз аҳди ва меҳмонлари алоҳида эъзоз, муҳаббат билан томоша қилишган. Ана шу воқеадан кейин Ўзбекистонда бирдан Наргис, Наргиза исмли қизалоқлар кўпайиб кетди. Жумладан биз ҳам ўша йилнинг кеч кузидаги түфилган (у вақтда биз Тошкентда яшардик) тўнгич қизимишга шахси ва кинода яратган қаҳрамонлари ниҳоятда жозибали, оқила, самимий бўлган гўзал ҳинд актрисасига эътиқодимиз ва меҳру ҳурматимиз рамзи сифатида «Наргиза» исмини қўйганмиз...

Калькутта ҳам эски ва янги шаҳарлардан иборат экан. Етти-саккиз чақиримча масофани ярим соатлар чамасида босиб, тўққиз яримларда Эски шаҳарга етдик. Янги шаҳарни сўраган эдик, таксида ярим соатлик йўл, дейишди. Қатнов шу даражада тиғиз эдики, у ёққа тўрт, бу ёққа ҳам тўрт қатор юраётган машиналар тошбақадан ҳам секин имиллаб ҳаракат қиласарди. Уйдай-уйдай юқ машиналари, автобуслар қадам-бақадам жилишарди. Бир неча бор машинамиз орқасига тумшуғи билан туртишди ҳам, лекин ҳаракат сустлиги учун деярли шикаст топмади. Хуллас, ўттиз дақиқалик йўлни бир соату 45 минутда босиб, соат кечаси ўн бирдан 15 дақиқа ўтганда «AKASH GANGA» («Акаш Ганга») меҳмонхонаси олдида тўхтаб, чуқур нафас олдик.

Меҳмонхона қўнгилдагидай эди: шинам, озода, ҳамма нарса жойида, рангли телевизорлар...

АВРАНГЗЕБ ҚИЛИЧИ, ОЛТИН СОПЛИ ПИЧОҚ

20 август, жума.

Кечқурун кино кўриб, душга тушиб, соат бирларда ётган эдим. Одатдагидай олти яримларда уйқуга қониқиб уйғондим. Ярим соатлардан кейин хонага қандли қаҳва, печенье, сўнгроқ ниҳоятда оби-тобида, иштаҳани очадиган қилиб қовурилган қўймоқ, икки бўлак пардай юмшоқ булка-нон, кичкина қофоз ўрәмларида сарёғ, мураббо, помидор шарбати ва яна қандли чой олиб киришди. Ҳамхонам Аҳмаджон иккаламиз мана буни меҳмонхона деса, мана буни нонушта деса бўлади, деб, иштиёқ билан тамадди қилдик.

Меҳмонхонамиз рўпарасида, кўчанинг у бетида мўъжазгина истироҳат боғи (хиёбон) бўлиб, ундаги

катта-катта хурмо дараҳтлари бу ернинг ҳам Ҳиндистон ҳудуди эканлигини эслатиб турарди. Ана шу хурмолардан бирининг остида ярим-яланғоч ётган маст бир кимса ошга тушган пашишадай одамни ижирғантиради.

Боғда юрган қарғалар эса пўчоқ, чиқинди кўп бўлсада, негадир ҳинд одамлари каби озғин, ихчам эди.

Калькуттада ҳаёт эрталабданоқ қайнай бошлаган эди. Бу ерда кокос ёнғори кўп экан: бамбуқдан ясалган обкашга илиб олиб бозорга олиб кетишаётгандар тез-тез учраб туради.

Калькутталиклар (бу ерда асосанベンгаллар — аҳолининг учдан икки қисми, ҳиндистонийлар, орийлар, рожастонликлар, телугу, панжоблик ва бошқа миллат вакиллари яшайди) Ҳиндистоннинг бошқа вилоятларидагиларга қараганда буғдойранг, яъни окроқ бўлишаркан.

Калькутта ҳақида яна шуларни айтиш мумкинки, аввало у Ҳиндистоннинг энг катта ва дунёга машҳур шаҳарларидан, мамлакатнинг энг йирик иқтисодий ва маданий марказларидан бири.

Калькутта нисбатан жуда ёш ва шунинг учун ҳам навқирон шаҳар. Унга 17-аср охирида Англиянинг «Ост-Индия» компанияси томонидан асос солинган. Шунинг учун ҳам меъморчилиги (кўчаларнинг тор, кўп қаватли биноларнинг кўплиги, деворларнинг қизғишлиги ва бошқа жиҳатлардан) оврупа шаҳарларини эслатади. Инглизларга қарши, Ҳиндистон мустақиллиги учун курашда калькутталикларнинг ҳам ҳиссаси катта бўлган.

Бу ердаги денгиз порти чет элларга юк чиқариш жиҳатидан мамлакатда биринчи ўринда, олиб келиш борасида эса Бомбейдан кейин, иккинчи ўринда туради. Калькуттада жут (ўсимлик толаси) ишлаб чиқариш саноатнинг асосий тармоғи ҳисобланади. Юзлаб жут корхоналари мавжуд. Шунингдек, металлсозлик, машинасозлик (саноат ускуналари, электр асбоблари), кемасозлик, автомобилсозлик, дастгоҳсозлик корхоналари бор. Бўёқлар, пластмасса ва резина буюмлари, кимё-дори-дармончилик, ип газлами, трикотаж, ойна, кўн, пойабзал ва куртка ишлаб чиқариш, полиграфия, озиқ-овқат саноатлари ривожланган.

Калькуттада илмий тадқиқот муассасалари, олий ўқув юртлари ҳам кўп. Шулардан бири 1857 йилдан бери фаолият кўрсатиб келаётган Калькутта университетидир.

Биз университетнинг санскрит, инглиз, бенгал тили ва адабиёти куллиётига бордик. Куллиёт биноси олди-даги кўчада узундан-узоқ ноёб китоблар растаси бор экан. Зокиржон aka «Ҳиндистон Бобурийлар даврида», «Акбаршоҳ», «Аврангзеб» деган (инглиз тилида) китобларни сотиб олди.

Бу куллиётдан биз ўзимизга керакли одамларни тополмадиқда, ҳинд дўстларимиз маслаҳатига кўра тарих куллиётига борадиган бўлдик. Шу ерда ўқийдиган бир талаба бизни бошлаб боришга ваъда бериб, машинализга чиқди. Кулиб турадиган, сергапгина йигит экан...

Ўзбекистонда, масалан Тошкент Давлат университетида, ҳатто вилоятлардаги олийгоҳларда ҳинд тили куллиётлари бор, жуда кўп ўрта мактабларда ҳинд тили ўқитилади, бинобарин, бизда ҳинд тилини билувчилар кўп. (Мана, ҳамсафаримиз, таржимонимиз Аҳмаджоннинг ҳинд тилини яхши билишига ҳинд зиёлиларининг ўзи ҳам қойил қолиб, тан беришяпти-ку). Ҳинд қўшиқларини мароқ билан тингламайдиган, кино фильмларини суюб томоша қилмайдиган ўзбек кам.... Ҳиндистонда эса ўзбек тили тутгул «ўзбек», «Ўзбекистон» деган сўзларни эшитгани ҳам жуда кам экан. Ажаб, нима учун Ҳиндистон ўзбекистонда машҳуру, ўзбекистонни Ҳиндистонда яхши билишмайди? Ҳиндистоннинг бизда машҳурлиги сабабларидан бири, асосийси, ҳеч шубҳасиз, бизнинг халқимиз таъби ва руҳиятига негадир ёкиб тушадиган фильмлари ва қўшиқлари. Хўш, ўзбек ва ҳинд халқлари руҳиятининг муштарак жиҳатлари кўп, дер эканмиз, нега бизнинг кино фильмларимизни ҳиндлар қизиқиб кўришмайди?.. Менинча, гап шундаки, бизнинг киночиларимиз фильм савияси мезонини сиёсий-ижтимоий муаммоларнинг талқини билан ўлчаб, бу оммавий санъатга шу жиҳатдан ёндошадилар. Ҳинд фильмларининг етакчи мавзуи эса асосан оиласиб-маиший муаммолардан иборат. Ижтимоий масалалар онг билан, майший масалалар эса қалб билан боғлиқ ва ҳамоҳангдир. Бадиий фильмни севиб, қувиб кўрадиган омма — ёшлар учун эса онг муаммоларидан кўра қалб муаммолари яқинроқ ва қизиқарлироқдир... Албатта, бу — менинг хуносам. Қолаверса, менда яна шундай бир фикр туғилдики, бошқаларникини ибрат қилиб, кўз-кўзлайвермай, ўзингнигини бошқаларга кўрсатишни ҳам ўйлаш, билиш керак шекилли...

Тарих қуллиёти йўлида майда-майда гумбазчалари бор ажойиб бино кўрдик — атрофида темир ҳавозалар турибди. Маңдир экан. Ростми, ёлғонми, талаба йигитнинг айтишича у 1960 йилдан бери қурилмоқда экан.

Куллиётни топдик. Ислом тарихи ва маданияти бўлимида бўлдик. Бўлим бошлиғи (биздаги кафедра мудирига тўғри келади), профессор Банелжи, муаллим Анирут Харай ва бошқалар билан сухбат қурдик. Ҳарқалай, улар бобурийларни билишаркан. Улар Ҳиндистондаги олийгоҳларда, жумладан Калькутта университетида бобурийлар тарихига катта эътибор берилмаслиги, йўл-йўлакай маълумот бериб ўтилишини айтиб таассуф билдиришди. Мана шуниси энди бизга анча малол келди. 330 йиллик тарихни ҳаккалаб, ҳатлаб ўтиб кетиш қандоқ бўларкин... Ахир инглиз олимлари ҳинд тарихининг бобурийлар даврини товуснинг тожига ўхшатишган-ку. Жавоҳирлаъ Неру бобурийларга хайриҳоҳик билан қараган, уларнинг Ҳиндистон тарихи тараққиётига катта ҳисса қўшганликларини эътироф этган-ку.

Шу жиҳатдан, мезбон-профессорнинг «Сизларни экспедиция ташкил этишга нима мажбур қилди?» деган саволига (саволнинг ўзи илмоқдироқ, оҳанги ноҳушроқ туюлди шахсан менга) раҳбаримиз қойилмақом қилиб жавоб берди:

— Биринчидан, — деди у, — демак, Ҳиндистонда шунча ҳукмронлик қилиб, ажойиб обидалар қолдирган ва ҳинд тарихида зўр ижобий ишлар қилган бобурийларнинг асли-насли андижонлик эканлиги, демак, Бобур бизнинг бобомиз эканлигини бошқа ҳалқларга, шу жумладан ҳиндистонликларга маълум қилиш, иккинчидан, билмаганларга бобурийларнинг мӯғул эмас, ўзбеклигини уқдириб қўйиш, демак, учинчидан, мустақил Ўзбекистон давлатини дунёга танитишга баҳоли қудрат, ўз йўлнимиз ва касбимиз билан ҳисса қўшиш, мамлакатимиз истиқлолини дўсту нодўстларга суюнчилаш каби эзгу мақсадларда ташкил этилди бизнинг экспедициямиз...

Шаҳар айландик. Катта бир бино олдидаги хиёбонда митингга ўхшашиб маросим бўлмоқда эди. Қизиқсан, Хутпал Дағ деган артист вафот этган экан. Анча таниқли ва севикили санъаткор бўлган чамаси, ёки бекорчиларнинг кўплигиданми, видолашувга келаётганларнинг охирни кўринмайди. Бир вақтлар Москвадаги мавзолейга кирувчилар сафи шундай узун бўларди.

Виктория музейи олдидағи каттакон яланглиқ ўрта-сида «Ҳиндистон отаси» Махатма Гандининг ҳайқали турарди. Бу камтарин даҳо бутун Ҳиндистонни пиёда кезиб чиққан, деган гаплар бор. Ҳайкалда мана шу фидоийлик ва ҳокисорлик акс этган: қўлида асо — таёқ туттган, қади ихчамгина М. Ганди юпун ва яланг-оёқ, пиёда юравериб толиққанидан бир оз букчайиб келаётган маҳали эди.

Музей олдидағи хиёбонлар ям-яшил, ҳовузлар зан-гори, хуллас, кўзни яшнатадиган, дилни ёшартирадиган манзарәли жойлар эди. Шу ерда биз гарблик деб ўйла-ган дарозгина, оппоқ баданли, соchlари олтинранг бир аёл жилмайиб келиб биз билан рус тилида сўрашиб қолди. У москвалик бўлиб, ёнидаги ҳамроҳи америка-лик хоним, ёшроқ йигит эса ўғли экан. У бизни учратиб қолганидан суюниб кеттанини изҳор этди. Чиндан ҳам бу самимий аёлнинг чехраси нурафшон, мовий кўзла-ри чаракларди. У бизнинг кимлигимиз, қандай мақсад-ларда келганимиз билан қизиқди. Ўз тилида ўғлидан бошқа гаплашадиган одам йўқлигидаң унинг юраги анча қисилган экан. Эҳ мусофиричлил!

Оқ мармардан гумбаз қилиб тикланган музей ни-ҳоятда маҳобатли эди. Айтишларича, бу мармарлар бобурийлар томонидан қурилган обидалар, хиёбон-лар, жумладан, Дехлидаги Лаъл қалъа айвонлари по-лига ва йўлакларига тўшалган мармарлар экан. Улар-ни инглизлар қўпориб олиб келишган.

Кираверишдаги катта залнинг ўнг томон деворла-рини инглиз саркардалари, зобитлари ва Англия қиро-личаси Виктория, унинг яқинлари сиймоси акс этти-рилган улкан суратлар безаб турарди.

Чапдаги залга қўйилган узун, катта ойнали витри-налар ичида эски араб алифбосидаги ноёб қўлёзма-лар — Мирзо Ҳайдарнинг «Тарихи Рашидия», Абу Фазлнинг «Ақбарнома»си шунингдек, Шайх Саъдий, Амир Хисрав Дехлавий ва бошқа улуғ алломалар асар-ларининг қўлёзмалари мавжуд эди. Йигирма тўрт ки-шидан иборат бир сурат шарҳида «мўғул император-лари» дейилган эди, энг юқорида Бобур Мирзо ту-риби. Бу бебаҳо сурат 1904 йили Б. С. Махтоб исмли рассом томонидан чизилган экан.

Ўтмишда ҳам қилич, милтиқ ва бошқа қурол-ас-лаҳа турларининг шу қадар кўп бўлганлигини мана шу музейда кўрдим. Улар орасида Аврангзебнинг Бенгалия навобига совға қилган қиличи ҳам бор эди.

Бу совуқ ва ваҳимали қурол қанчаларга даҳшат со-
лган-а? Ҳатто, соҳибининг энг яқин жигарларига
ўқталган. Шу қилични кўриш учун уч ярим кун йўл
босиб келдикми?

Инглизлар томонидан бобурийларнинг ўлмас оби-
даларига таассуб қилиб қурилган (менинг наздимда) бу
улкан иншоот — мозийгоҳнинг ўн бешта зали бор экан.
Уларнинг ҳаммаси катта, кенг хоналар бўлиб, Ҳиндис-
тоннинг олис ва яқин ўтмиши, тарихини, табиатини
гавдалантирувчи ашёлар, суратлар билан тўла эди.

Виктория музейи билан «Ҳиндистон музейи»нинг
ораси унча узоқ эмас эди. Буни соф тарих ва табиат
мозийгоҳи, дейиш мумкин эди. Бир бўлимнинг энг
катта бойлиги бобурийлар — Жаҳонгир, Шоҳ, Жаҳон,
Аврангзеб, Шоҳ Аълам II, Баҳодиршоҳлар даврида зарб
этилган тангалар, пуллар эди. Яна бир бўлимдаги қоти-
рилган паррандалар, қушларнинг саноғига етиб
бўлмайди. Ҳайвонот бўлими ҳам ундан қолишмайди.
Эрамиздан аввалги ва эрамизнинг турли даврларига
оид минерал тошлар... Хуллас, музей мулкининг мав-
зуи торроғу мазмуни бой эди.

Мен Тошкентнинг Эски жўва даҳасидаги зоология
мозийгоҳи, Андижондаги ўлкашунослик музейининг
ёниб кетганини эслаб ниҳоятда ачиндим. Ҳарқалай,
йўқдан кўра бор эди-да.

Музейдан чиққач, бир нарсага ҳайрон бўлдим.
Калькутта университети профессоридан: мозийгоҳлар-
дан бираIDA Бобур қиличи бор, деб эшитувдик, қай
бираIDA бўларкин, дея ўсмоқчилаб сўраганимизда, улар
ҳеч иккilanмай, Ҳиндистон музейида, Виктория муз-
еида аҳамиятли нарса йўқ, уни кўрмасанглар ҳам
бўлаверади, дегандай шаъма қилишувди. Ҳолбуки,
ҳамма қурол-яроғ Виктория музейида, Ҳиндистон муз-
еида битта пичоқ ҳам йўқ экан. Наҳотки жаноб
профессорлар музейларга киришмаган бўлса? Ё, Вик-
тория мозийгоҳини инглизлар қургани, унинг сало-
батли ва ниҳоятда бой бўлгани учун бизга тавсия
қилишни лозим кўришмадимикин?

Музей яқинида ресторан бор экан, раҳбаримизнинг
ҳиммати ва саховати жўшиб, юринглар йигитлар, туш-
лик бўлиб қолди, бир маза қилиб овқатланайлик, деб
ўша томонга бошлади. Ресторанлар ҳамма юргларда
ҳам бир-бирига ўхшайди. Фақат овқатларида фарқ
бўлади. Калькутта ресторани ҳам жуда гавжум, озода
эди. Бундай жойда табиатинг равшан, иштаҳанг баланд

бўлади. Маставасимон суюқ овқат, қайласи ва хамири алоҳида лағмон (агар шундай аташ мумкин бўлса) ма-зали боз устига тўйимли эди... Ҳаммасидан ҳам пиво зўр бўлди: яҳдай, татимли... Бу пиво одида чехларники ҳам ўтаверсин экан. Ҳатто Чехословакияда ҳам пивони бунақа суюб ичганимни эслай олмайман.

Тушлиқдан кейин бир бозор-мозорларини кўриб қўйишга ижозат бўлди. Нарсалар бисёр ва ҳаммаси чиройли кўринади, қараб кўзинг тинади. Лекин, ҳам-маси яхшига ўҳшайдио, биронта нарсани дадил тан-лай олмайсан (бичими ё бошқа жиҳати ғалатироқ ту-юлаверади) ва ниҳоятда қиммат. Масалан битта кўйлак 250—280 рупий!.. Бунинг устига атиги бир соат вақт ажратилган. Энгазоби нархини келишиш... «Рупий?...» деб сўрайсиз. Сотувчи айтади. Турган гапки, тушун-майсиз. Бир зум караҳт бўлиб турасиз ва «қофозга ёзib кўрсат», дегандай имо-ишора қиласиз. У ёзади: 300 рупий деб. Энди савдёлашиш керак. Сиз бош-бош қилиб, қофозга 200 рақамини қайд этасиз. Со-тувчи мулоим табассум билан бошини сарак-сарак қиласди ва 280 ни битади, сиз — 220 ни, ва «ғалат ўйин» иккала томон ўзаро битимга келгунча давом этади. «Таржимон қани, таржимон?» дерсиз. Ахир унинг ҳам ўз савдоси бўлади-ку, қолаверса етти ки-шига тилмошлик, воситачилик қилиб улгурмайди-ку.

Алқисса, югуриб юриб, совға учун бир неча электроника соат (эркак ва аёлларники) ва ўзимга 1300 рупийга жигарранг чарм куртка олдим. Ўзиям, харидорга ёпи-шиб олишаркан. «Сқолқо?» (қанча берасан» деган маъ-нода) ва яна бир нечта русча сўзни ўрганиб олишибди, сал сўраб қўйсангиз, тамом, бикинингизга кириб олиб, ҳоли-жонингизга қўйишмайди. Охири, эҳ шуни олсам қутуламанми бу хира пашшадан, деб юборасиз.

Шу ерда қизиқроқ бир иш бўлди. Бояғи бизни кузатиб келган талаба автобусда қолувди — Обиджон ака билан, бозордан чиқсан, йўқ. Бирдан Сайфиддин ҳожи ака «пичноим, пичноим...»лаб қолди.

— Қанақа пичноқ эди? — сўрадик.
— Яхши пичноқ эди,— деди ҳожи ака ачиниш билан.
— Сопи қанақа эди? — ўсмоқчилади кимдир ҳазил-лашиб...

Толиби илм пичноқни қўриб жуда қизиқкан ва менга сотмайсизми, деб анча тихирлик қилган экан. Ҳожи ака: «Э, эсинг жойидами бу совға пичноқ, сотилмайди», деб жойига солиб қўйган экан.

Ана шу «музокара»дан келиб чиқиб, бояқишининг чиндан ҳам ҳожи аканинг пичоfiga ишқи қаттиқ тушиб қолган экану, бошқа чора тополмабди, деган хуносага келдик ва Сайфиддин акага, бўпти энди, бошкўзингиздан садақа, иккинчи бирорга пичоfiginzни кўрсатиб мақтамайдиган бўпсиз, деб таскин беришга ҳаракат қилдик.

Қоронги тушганда меҳмонхонага қайтаётган эдик, катта бир чорраҳада митингта дуч келдик. Тумонат одам йифилган. Нима гап, десак, бугун Ражив Ганди (Индира Гандининг ўғли, Ҳиндистоннинг Нарасимха Раодан олдинги бош министри) туғилган куни, шу муносабат билан бу кун дўстлик ва биродарлик куни, деб эълон қилинган экан.

ҲИНД СУВ ПАРИЛАРИ

21 август, шанба.

Соат саккизларда «Ҳайдаробод, қайдасан?» деб жўнадик. Гўзал хиёбонлар, истироҳат боғлари, узун ва ўйғон соchlарини битта қилиб орқасига ташлаб олган бенгал қизлари ва жувонлари орқада қола бошлиди.

Биз энди камон ўқидай ўткир бурчак ясаб (Агра-Калкутта-Ҳайдаробод) Ҳиндистоннинг жануби-ғарб бурчаги томон кетмоқда эдик.

Шаҳардан чиқаверишдаги «Бомбей-Руд» кўприги ниҳоятда ўзига хос, кўп тармоқли эди. Лабиринтсимон. Шакли-шамойили жиҳатидан бунга ўҳшайдиган кўприк дунёда бошқа бўлмаса қерак. Бу кўприкка кетган маблағга кичикроқ бир шаҳарча қуриш мумкин эди, деб ўйладим. Адашиб, ярим соатча шу кўприқдан чиқиб кетолмай юрдик.

Менинг кўз олдимга йўллардаги кўприк курилишларида бошида бетон ташиётган аёллар келди. Наҳотки мана бу поёни йўқ кўприкка кетган ҳисоби йўқ бетон-қоришма ҳам ҳинд аёлларининг заҳматкаш бошидаги товораларда ташиб чиқилган бўлса?

Кўприқдан ўтиб, ҳеч қанча юрмай бир қишлоқقا етдик. Йўлимизда ёнилғи ташувчи машиналар қаторлашиб тўхтаб турарди. Митинг бўляпти. Ҳайдовчилар иш ташлашибди... Аста юриб ўтиб кетдик.

Беш-олти чақиридан кейин кокосчиларга дуч келдик. Бу қанғил ярим яланғоч одамлар (белида фақат

лунгиси бор холос) кокосни машинадан тушириб, йўлдан пастроқдаги эски бино олдига ташишарди. Ат-рофда кокос чиқиндилари (маккажӯхори соқолига ўҳшаган) хирмон-хирмон бўлиб уюлиб ётибди. Шу жойдá тўхтадик. Сабаби олдимизда яна машиналар турна қатор бўлиб турарди. Анча кутдик. Машиналар силжийвермагач, Аҳмаджон олдинга бориб хабар топиб келди: кечаси Бугли деган жойда миллий конгресс партиясининг уч раҳбарига сунқасд уюштирилибди. Иккитаси ўлибди, биттаси ярадор бўлибди. Қотиллар қидирилмоқда экан. Шунинг учун йўлни тўсиб қўйишибди. Кўчанинг ўнг қирғоғидан қийинчилик билан ўтиб бордик. Аҳмаджон бақириб-чақириб юрган полисменлар бошлиғига: Мен Деҳлиданман, булар чет элликлар, визалари муддати тугаяпти, кеч қолиша ҳукуматимиз катта жаримага тушади, деган эди, соддадил ва ишонувчан одамлар-да, бизни ўтказиб юборишиди. Йўлда пиёдалар, велосипедлilar, рикшачилар кўп эди (рўпарамиздан келадиган машиналар ҳам тўхтатилган, қолган йўл ниҳоятда тор эди), имиллаб юравериб, нафасларимиз қайтиб кетай деди.

Кеча Калькуттада ҳам учта қотиллик юз берган экан. Тавба, воқеа содир бўлган жойда ҳеч гап йўқ, бари ваҳимаси, акс-садоси бу ёқда бўляпти.

Ниҳоят, эркинликка чиқиб кетдик. Яна шолизор, бамбузор, бананзорлар бошланди. Бундай гўзал манзаралардан кўз юмиб, мудраб кетмоқлик гумроҳлиқидир.

Ҳаво бирдан айнидию ёмғир шаррос қуйиб юборди. Ипақдай майин ва лекин ўқдай шиддатли. Бу ёмғирдан қочиб улгуриб, қутулиб бўлмас эди. Балки шунинг учундир, шоли ўтаётганлар парво қилмай (улар қочадиган пана жой ҳам йўқ), ўз ишларида хотиржам давом этишарди. Ўзиям кун тикини еб, жизғанак бўлиб, терлаб турган орқаларига ёмғир тушганида қозондаги сув аралаш ёғдай чисирлаб кетса керак.

Харакпур шаҳрига яқинлашяпмиз. Аҳён-аҳёнда нибуфарли кўллар учраб қолмоқда. Бир каръерда шағал машиналарга қўл билан, белқурақда юкланяпти. Во, азаматлар-ей... Юқ ортувчи техника йўқмикин ётанқисмикин?

Бу ёндаги қишлоқ аёллари ҳам биздаги каби ўзларига унча қараашмас экан. Бунга бечораларнинг вақти ҳам, имкониятлари ҳам йўқ-да. Шолизорда ҳам, қурилишларда ҳам аксарият аёллар, қизлар бўлса.

Бир жойда, ёмғирда шамсия тутиб шоли ўтаётгандарни кўриб, роса ҳайратландик ва қойил қолдик. Мана буни чинакам фидойилик, заҳматкашлик деса арзиди.

Катта мамлакатнинг юки ҳам катта, оғир бўлади-да. Йўлда юк машиналарининг шунаقا тиқин «қопқоғи»га тўғри келдикки, битта йўлдан шунча машина юришини тасаввур қилиш қийин. У томонга ҳам, бу томонга ҳам шунаقا тизилганки, орага битта одам сифмайди. Камида икки чақирим йўл шунаقا. Рулда Зокиржон aka эди. Унинг таваккалчилиги, дадиллиги билан ярим соатларда «қопқоғ»дан чиқиб кетдик. Ҳайдовчиларнинг (улар божхонага бож тўлаш учун навбатда турганлар эди) айтишича, эрталаб соат олтида келганлар бор экан...

Катта Биатри кўпригидан тунда, юлдузлар дарё сатҳида мавжланиб ўйнаётган маҳалда ўтдик. Соат тунги ўн икки яримда Буху Банишвар шахрига етиб бориб, «Натраж» меҳмонхонасида тунадик.

Денгиз яқинлашаётгани учун ҳаво анча салқин эди. Дарвоқе, бугун бир палов қилиб ейлик, деб, йўл бўйи сабзи («гажир» дейишаркан) қидирдик, йўқ. Бир шаҳарчада Каттақўрғон (қирим) навига ўхшаш, лекин кўкишроқ ва қизил думалоқ узумлар кўрдик. «Ангур» дейишаркан, демак, форсийдан ўтган.

22 август, якшанба.

Мана, йўлга чиққанимизга бир ойдан ошди. Ҳамманинг дилида ватанга тезроқ қайтсан, деган ният фимиirlab қолган...

Эрталаб Бенгал кўрфази томондан шабада эсаётган эди, танамиз бирам яйрамоқда.

Йўлга чиқиб, озгина юргач, йўл бўйидаги бозорчадан гажир топдик. Килоси 12 рупий!

Денгиз яқинлиги бу ердаги балиқ бозоридан, ҳаммаёқни тутиб кетган балиқ ҳидидан ҳам билиниб турарди. Оқиши зогора балиқлар. Майда кивиретка («пиво билан жа кетади» дейди Тўлқин aka) қофоздай юпқа камбала, ундан сал қалинроқ — шапалоқдай балиқлар. Кап-катта кишилар фақат бир шортик-калта иштонда, астойдил чордона қуриб ўтирганча, балиқ савдоси илиа машғул эдилар. Уларнинг қорни, кўкраги, елкалари, ҳатто ножойиз жойларигача балиқ тангала-ри ёпишиб йилтиллаб турарди.

Анча жойгача балиқ ҳиди димомимиздан кетмади.

Бир манзараға кўз энди кўникканда яна бирдан бошқача бир гўзал манзара намоён бўлади. Киприк қоқмай томоша қилгинг келади. Дафтар қоралаш билан бирпас андармон бўлсам, шериклардан бири: э, зўр нарса ўтиб кетди-да, кўрмай қолдингиз, деб чал-ғитади. Қишлоқ ўртасидаги атрофи палма ва бошқа ҳинд диёрига хос чиройли дараҳатлар билан ўралган ложувард сувли кўл бўйида тўхтадик (Пури йўлида). Кўлнинг ҳар жой-ҳар жойида гўё доналаб экилгандай оралиқлари бир хилда, чиройли очилиб турган пушти гуллар одамнинг завқини келтиради. Мен аввалига уларни Виктория-региямикин, деб ўйладим. Яқинроқдан кузатсам, оддий сув нилуфарлари экан.

Кўлда яна бошқа ажойиб «нилуфарлар» ҳам бор эди—улар қирғоққа яқин жойда чўмилаётган олти нафар бенгал аёллари эди. Уларнинг эгнида яшил, қизил, пушти рангли, шаффоф сарийлар бўлиб, нақ энг зўр ўрис шоирларидан бирининг шеърига ишланган суратдаги сув париларини эслатишарди. Юзлари одатдагидай қорамагиз бўлса-да, қуёш нурида, зангори сув ва сарийлардан қайтаётган ранглар шуъласида жуда ҳам ёқимли тус олган эди. Бир-иккита оқ баданлилари ҳам бор эди. Кино ва телетасвирчиларимиз бундай гўзал лавҳага дуч келиб қолганларидан ўзида йўқ, камераларини тўғрилаб оҳиста-оҳиста яқинлашиб боришаарди. Сув парилари ҳинд аёлларига хос навозиш билан, уялгансимон жилмайшиб, айни вақтда ҳайронлик билан бизга қарашаркан, сарийларининг узун бари сувини сиқишиб, яланғоч елкасига ўрашиб, томоқлари остини тўсишиб, ҳовучларида сув олишардида, бўйниларидан, елкаларидан қуишиб ўнашар ва сассизгина кулишарди. Уларнинг ҳолатида аёл зотига хос қизиқиш, (фото, кинога), виқор ва ўзини кўз-кўзлаш маъноси ҳам йўқ эмас эди.

Бир зумда қаёқдандир пайдо бўлган болалар бизни ўраб олиициди.

Биз ҳамон бир-бир босиб, хавотир ва қизиқиш билан олға қараб талпинмоқда эдик. Таржимонимиз: аёлларга яқин борманглар, одобдан эмас, маҳаллий эркаклар билан фижиллашиб юрмайлик, дея огоҳдан-тиргач, тўхтадик.

— Ҳа, боридан ҳам маҳрум бўлиб қолмайлик, деди кимдир ҳазиллашиб...

Болалар сафига каттароқ ўспириинлар ҳам келиб қўшила бошлагач, томошани уларга бериб, қайтдик...

Шундан кейин, табиат манзаралари янада гўзаллашиб, кокос ёнгоқзори, палмазорлар қуюқлашиб кетди.

Аёллар кўримсиз жойда эҳтирос ҳам сусайиб кетади. Албатта, ҳар кимниги ўзига, ой кўринар кўзига. Чунки кўз ҳам, дид ҳам кўриб юрилганига ўрганади, мослашади. Ахир, инсон ҳамма нарсага кўнигади, кўнишишга мажбур — бу ҳаётнинг энг даҳшатли, бешафқат қонуни, энг аччиқ ва аламли ҳақиқатлар... Эҳтимол қорамағиз одамларга оқ юзли аёллар ғалати, рангиз туюлар, лекин биз бу ерда оқ баданли аёлларни учратсақ, худди ўзимизнинг аёлларни кўргандек бўлардик.

Дарё irmoқлari, kanallar, kўllar, очиқ сув ҳавзали, сув босган жойларга тез-тез йўлиқа бошладик. Намлиknинг оргаётгани ҳам денгиз яқинлашаётганидан дарак берарди.

Хурмо ва кокос ёнғоги, банан ва ананас дарахтлари (меваси эмас, албатта) бир-бирига ғоят ўхшаш бўлиб, кўз ўргангандагина уларни аниқ фарқлаш мумкин экан.

Пастаккина томи хашак қамиш билан ёпилган уйлар аввалги асрларни эслатади. Бостирмасимон, уч тарафи хашак билан ўралган, олди томони очиқ чайлалар менга ниҳоятда эриш туюларди. Чайла атрофларида анча катта бўлиб қолган болалар қип-яланғоч югуриб юришади. Аммо шуниси ғалатки, ана шу қамиш уйнинг ёнида икки қаватли, маҳобатли уйлар бўлиб, уларнинг балкон-айвонларида пўрим жаноблар, хонимлар ўтиришарди. Ҳиндистонда умуман бойлар билан қашшоқлар ажралиб туришар, улар орасидаги зидма-зидлик манаман деб бўртиб кўринарди. Ўрта ҳоллар эса умумий оломонга сингиб кетган ва кўпчиликни ташкил этгани учун кўзга үнча ташланмас эдилар.

Хонадонлар, маҳаллалардан ўтилгач, яна ўрмонзор, тўқайзор, сув кўлмак бўлиб ётган ерлар бошланади. Зах ҳиди анқийди. Ўрмонлардан ўтин ташиётган қанғил эркаклар, чандир аёллар беихтиёр ҳалқ эртакларини эслатиб юборади.

Ҳиндларнинг сигирларни ниҳоятда ҳафсала билан ювиб-тозалашларини кўриб, бу ҳам ана шу жониворни муқаддас ҳисоблашганидан, деган хулосага келдик.

Ниҳоят денгиз, бешик-бешик тўлқинлар кўрина бошлади. Шундоқ ўнг ёнимизда Бенгал кўрфазининг нафаси уфурмоқда. Чап тарафимизда денгизга қуолаёттан, қуолишга шай дарё irmoқлari.

БУ МУҲАББАТ ҚАСРИ ЭМАС...

Пури шаҳридан яна ўткир бурчак ясаб, орқага шарқи-жануб томонга қайтдик. Озгина юрганимиздан кейин маҳалла тугаб, йўлнинг икки томонида дараҳтлари сийракроқ ўрмон-тўқайзор бошланди. Қуруқликдан кўра сув босиб кўллаб ётган ерлар кўп — бу дengiz яқинлигининг аломати эди. 20 чақиримча юриб Канарка деган жойга бордик — «Муҳаббат эхроми» («Храм любви»)ни кўриш учун. Эхром каттагин қўргон ичидағи яшил хиёбон ўртасида қад кўтарган эди. Буни иншоот дейиладими, ёдгорликми, обидами — нима бало дейишга ҳам ҳайронман. Ҳарқалай, тарғиб ва ташвиқ қилиш, завқ билан гапириш ва тасвирлаш ноқулай ва ножойиз бўлган бир томоша-жой экан. Эҳтимол, бу буддистлар назарида («эхром»ни эрамиздан анча аввал, буддистлар томонидан «ижод этилган», дейиши) санъат тимсолидир, лекин у менга ахлоқсизлик, ҳаёсизлик тимсоли бўлиб кўринди. Аммо ниҳоятда катта, дўзахи меҳнат кетганилиги аён. Бир неча юз йил давомида тиклангандир бу «обида»!

Беҳисоб, катта-кичик тош ҳайкаллар, ҳайкалчалар ва уларда ифодаланган мавзуни, тилга олиш ҳам даҳшатли бўлган «секс» ҳолатларни буддистлар муҳаббат деб аташган, мен эсам «муҳаббат» сўзини ҳайф билдим. Йўқ, бу муҳаббат эмас...

Билмадим, камида тўрт қаватли бино баландлигидағи (энию бўйи бунақа бинонинг бир нечасига тенг келади) бу «қаср» тоши яхлитми, аввалдан шу ерда бўлганми (ундай десак, бу яқин-атрофда бунақа тош, умуман тоғ ҳам йўқ, ахир битта катта тош ё қоянинг ўзи бўлмайди-ку) ё бошқа жойдан келтирилганмикин? Улкан қоядай бунча катта тошни қандай олиб келинган бўлиши мумкин? Ҳайкаллар мана шу қоя тошнинг ўзига ўйлаб ишланганмикин? Ё бўлак-бўлак, плитасимон қилиб тарашланган тошларга ҳайкаллар ишлангач, тиклаб бирластирилган, чокланганмикин?.. Мен бундан беш минг йиллар муқаддам Ливия саҳроларида, юмшоқ ва қайноқ қум барҳанлари узра қад кўтарган Миср эхромларини эсладим. Геродот ва бошқа тарихчиларнинг ёзишича Хеопс пирамидасини тиклашга кетган ҳар бири икки тонналик икки миллион уч юз мингта тош плитани Нил дарёси соҳилидан оқ ганчдан қурилган йўл орқали маҳсус ёғоч қурилмалар ёрдамида жилдириб-жилдириб олиб келишган. Баландлиги

тўйқиз метр бўлган бу плиталар пирамиданинг юқори қисмига тупроқ-тепалар ясалиб олиб чиқилган. (Одам-зотнинг қўлидан нима ишлар келмайди-я!) Балки манави «эҳром» ҳам шу тариқа тиклангандир... Хўп, буку масаланинг бир томони, масаланинг энг муҳими ва жумбоқди томони бор-да. Миср эҳромларини-ку мингминглаб қуллар бунёд этишган, дейлик, ахир, бу тош ҳайкал ва ҳайкалчаларни, улар нечоғлик ҳаёсиз, бешарм бўлмасин, қуллар, оддий одамлар яратолмайди-ку. Уларни фақат уста ҳайкалтарош, сангтарошларгина ижод қилиши мумкин-ку. Наҳотки бир даврда шунча кўп ҳайкалтарош (ахир у бир неча юзлаб тош усталарини қаритган бўлиши керак) яшаган бўлса?.. Ҳаммасидан ҳам бундай ҳаёсиз санъат асари кимларга, нима учун керак бўлувдийкин? Миср фиръавнлари ўз кучқудратини, беҳисоб бойлиги ва нималарга қодирлигини намойиш этмоқ учун улкан иншоотлар қурдиришган. Хўш, манави «обида»чи?.. Унинг ҳомийлари, «ижодкорлари» қандай инсонлар бўлган?..

Эҳромга кираверишдаги узун йўлақда ўспирин болалар ушбу тош обида кўриницлари рангли суратларда берилган маълумотнома-китобчалар сотиб юришувди. Ана шу китобчаларда эҳром тарихи битилган бўлиши мумкин эди, лекин биз уларни сотиб олишни ўзимизга эп кўрмадик. Қомусларда шу қаби эҳромлар, кўп минг йиллик тош обидалар тўғрисидаги манбалар, катта-катта китобларда эса бу «қаср» ҳақида маълумот учратмадим. Тош «асар»лар тўғрисидаги баъзи тадқиқотларда, саёҳатномаларда Ганг водийсининг қадимий обидалари — Ажанта ва Эллора, Хулабиддаги минглаб филлар ҳайкаллари ишланган эҳром борасида сўз юритиладио, Ҳиндистоннинг олис бир бурчидаги «Муҳаббат эҳроми» зътибордан четда қолади чофи...

Албатта, тош қаср ёnlарида суворийлар, будда маъбудаларининг ҳайкаллари ҳам бор, лекин кам. Мен «Тошдаги достон» деган ҳинҷ бадиий фильмининг айрим лавҳалари шу ерда суратга олингандикин, деган хаёлга ҳам бордим, лекин дарҳол фикримдан қайтдим. Ахир, ошиқ лабини маҳбуба юзига теккизишини номусизлик деб билган ҳинҷ киночилари гўзал актрисаларини шу ерга олиб келиб, ғайри ибо манзараларни томоша қилдириб қўйишни лозим кўрмасалар керак. Лекин, афсуски, жаҳон халқлари, киночилари, артистлари учун юксак ахлоқ-одоб, маданият ибрати бўлмиш у муқаддас анъана кейинги пайтларда бузилиб кетди...

Эҳтимол, бу эҳромни яратишга фармон ва маблағ берганлар, унинг ижодкорлари ичи йўқ тош қасрга, ундаги ҳайкалчаларга ўзларининг фалсафий хуносаларини, эътиқодларини сингдиришгандир. Эҳтимол, бу— ҳаёт, одамроҳатланадиган ва наслни, инсониятни давом эттирадиган табиий эҳтиёж, зарурат, бош омил шу, демоқчи бўлишгандир.

Дарвоҷе, дикқат билан қарасангиз эҳром улкан арава тарзида тикланган эди: икки ёнда катта фидираклар акс эттирилган, олдинда эса бир жуфт фил ва уларнинг устида... яна бир жуфт фиддан ҳам зўрроқ маҳлуқ гўё аравани (ҳаёт, муҳаббат аравасини) тортиб кетмоқда. Асосий «қаср»нинг олди ва орқа томонларида, ёнбоб тарафларида хиёбон четроқларида яна бошқа кичикроқ тош обидалар, ҳайкаллар ҳам бор бди.

Эҳромнинг таг-асоси, яхлит туриши чор қиррали бўлиб, юқорига поғонасимон кўтарилган сари кичрайиб, торайиб борадиган тўғри бурчакли пирамида шаклида эди. Энг тепа—минор атрофидағи маъбудаларнинг ҳайкаллари янада ҳафсала ва меҳр билан ишланган эди.

Шиддат билан ёғадиган муссон ёмрилари, кўп асрлик шамоллару жазирама иссиқлар таъсирида тош емирилиб, нураб чатнаган, баъзи ҳайкалларнинг қўли ё оёғи синиб тушган, айримларининг боши ё танасининг ярми йўқ эди.

Бизга ахлоқийликка зид суратлар, видео фарбдан кириб келди деб, оврупадан ўпкараб, ёзғириб юриб эдик. Мана бу қасрни кўргач, ҳайрон бўлиб, иккиланиб қолдим. Демак, Шарқ... бу босқичлардан аллақачонлар ўтган экан-да... «Ўрта асрларда жозибадорлик, нозу карашма санъати бобида ҳинд аёллари фаранг аёлларига сабоқ беришган», деган гапни шу ерда эшитдим. Дарҳақиқат, ҳинд бадиий фильмларида бош ролларда ўйнайдиган гўзал актрисаларнинг ўз ошиқларига қилган истиғноларию нозу фироқлари, бармоқлари, лаблари, қошу киприкларининг кўп маъноли, илкис ҳаракатларини кўз олдингизга бир келтиринг-а.

Ҳиндистоннинг марказий шаҳарларидан жуда узоқ бўлишига қарамай, бу ерга сайёҳлар кўп келишаркан. Автобусларда, енгил машиналарда келишяпти. Эркагу аёл, ўспириналар, йигитлар, бўйига етган қизлар, болалар... Оила-оила бўлиб юришибди (эр-хотин, ўғил-қизлари билан), улар эҳром атрофини оҳиста айланниб, бир-бирига тушунтиришяпти, изоҳ беришяпти.

Ҳарқалай бу жой менда яхши таассурот қолдирмади. Мұхаббатнинг оби ҳаёти вафодир. Вафо — ҳаё билан әзизак. Ҳаё йўқ жойда муҳаббат ҳам, вафо ҳам бўлиши даргумон... Йўқ, бу — муҳаббат қасри эмас. Муҳаббат қасри деб Тож Маҳални айтса арзиди...

Томошада чўллаган эдик, кокос сотиги юришган болалар олдига келдик. Қовуннинг ҳамагисимон кокоснинг тепасини кесиб олишибди. Унинг ичи ғовак бўлиб, оқиш суви ярим бўлиб турарди. У кокос сути экан. Найча билан ичиб кўрдик. Менинг табиатим сал нохуслигигами, кокос сути bemaza туюлди.

Қасрнинг жануб томонида — бир чақиримча нарида кўриниб турган денгиз бўйига бордик. Бу — Бенгал кўрфази эди, лекин мен уни денгиз деб атадим. Чунки, ҳаётимда илк бор мана шундай «зўр қудратли», асов ғалаёнли тўлқинлар билан юзма-юз туришим эди. Мен Айвазовскийнинг «Тўққизинчи вал» картинасини эсладим (У ҳақида «Пўртана» деган шеър ёзганман). Ҳозир мен кўраётган долғалар ўша суратдаги тўлқинлардан қолишмасди.

Соҳилга тушаверишдаги ялангликнинг икки томонида қандолат дўконлари бўлиб, денгиз қирғоғи сўйри, сап-сариқ қўмлик эди. Биз билан дима-дим келган бир автобус ҳинд сайёҳдари қирғоқقا ёйилиб кетишиди. Бешик-бешик тўлқинлар ёпирилиб келганда эркаклар шимларининг почаларини, аёллар сарийсинг этакларини шоша-пиша кўтаришиб, қий-чув қилишиб орқага қочишар, лекин тўлқинлар уларни қувиб етиб, тиззаларигача шалаббо қиласди-да, қирғоқда оппоқ кўпиклар қолдириб, яна денгизга қайтарди. Ҳовучга ҳам илашмайдиган кўпиклар живир-живир қилиб, бир зумда қумга сингиб кетарди. Одамлар яна денгизга яқинроқ боришар, кейинги тўлқин ўчакишгандай шер каби пишиқириб, ваҳима билан бостириб келарди-да, томошабинларни янада орқароққа қувалаб юборарди — худди эртакдаги девлар олов пуркаб оломонга ҳамла қилгандай...

Яқин-атрофдаги лойқа дарё, кўллар қуйилаётгани учунми, сувнинг тузи мовиймас, носранг эди.

Денгиз бепоён бўлиб, этаклари осмон билан туташиб кетган, оралиқ кул ранг туманга ўхшарди. Узоқда, қайқларда қайсар тўлқинлар билан олишиб балиқ тутаётган ним яланғоч одамлар кўринарди. Уларнинг машакқатини жуда яхши ҳис қилиш мумкин эди. Жангари долғаларга бас келиб, тирикчилик ғамидами,

ишибозлиқданми — хавф-хатарни писаңд қилмай юрганлар Чингиз Айтматовнинг «Соҳил ёқалаб чопаёттган олапар» асарини, унинг ажойиб, мард қаҳрамонларини ёдимга туширди. Ҳа, балиқчилик ҳам осон касб эмас. Улар ўз ризқ-насибаларини бўронлар гирдобидан, асов тўлқинлар қаъридан куч билан, матонат билан тортиб оладилар...

Мен шу ерда бобуршунос Ҳасановнинг Ҳиндистонда Бобур борган энг жанубий шаҳар ҳақидаги мулоҳазаларини эсладим. Тадқиқотчи Бобурнинг Ганг дарёсининг водийсий бўйлаб анча жанубга, тахминан Ганг дарёси билан Брахмапутра дарёсининг кўшилган жойларигача борган бўлиши мумкин деб тахмин қиласди, лекин Бангола қўлтигини, Ҳинд уммонини ўз кўзи билан кўрган-кўрмаганлиги ҳақида аниқ маълумот йўқлигига таассуф билдиради. Афсуски Ҳ. Ҳасановнинг бу мулоҳазасига бошқа олимлар ҳам аниқлик киритишолмаяпти...

Орқага қайтар эканмиз, яна маҳалла бошланганда «шу жойларда ош қилиб есак...» деган ниятимизни амалта оширмоқ пайида тўхтадик. Анча маданийроқ кўрининган бир уй ҳовлисига таваккал қилиб кирдик. Атрофи пастроқ панжараю девор билан тўсилган ҳовли қаровсиз эди. Уйдан чиққан бир йигит (унинг эгнида фақат лунги бор эди холос) бизни кўриб ҳайрон бўлди ва бирдан авзои ўзгариб кетди. Аҳмаджон унга мақсадимизни бир амаллаб англаттагач, йигитнинг чеҳраси ёришида ва маъқул дегандай ишора қилди. Бу жой бой бир кимсаларга қарашли дала ҳовли бўлиб, эгалари узокда туришаркан. Лакхан хизматкор ва қоровул ўрнида экан.

Зокиржон aka катта раҳбарлик даврларидан қолган шиҷоати ва дангаллиги, экспедицияда кўп юрганлиги боис киришимлилиги билан бир зумда Лакханини ва унинг бизни кўриб девор ошиб ўтаёттган қўшниларини ҳам ишга солиб юборди. Улар маҳаллани ахтаришиб, биз айтган қозон-капгирни топиб беришиди, атрофимиизда дасёрлик қилиб юришиди. Фиштдан ўчоқ ясадик. Оқсоқол ва раҳбарларимиз — Зокиржон ҳожи aka билан Сайфиддин ҳожи aka бири бош, бири муовин ошпазлар бўлиб, енг шимариб ишга тушиб кетишиди. Биз ҳам манави ҳинду дўстларимиздай ним яланғоч бўлиб, баданларимизни бир яйратайлик дея, кўйлак-майкаларни ечиб ташладик (Атрофда аёллар кўринмасди). Хуллас, озгина қуюшқондан чиқиб эркинлик ихтиёр қилдик.

Лакхан истарали ва анча одамохун чиқиб қолди. Бояқиши ўтин, сувларни ҳозирлаб турди. Унинг ёнида юрган бир ўсмирни биз «қоравой» деб атаётган эдик, Лакхан ва бошқалар ҳам «қорабай» деб ўзаро ҳазиллаша бошлиларди. Яна Жумабойни эслашдик. Ҳинд қишлоқ йигитлари, ўсмирлари ниҳоятда содда, очик-кўнгил, самимий эди, уларнинг бу самимийлиги даврамизга янада файз киритиб турарди.

Ош ниҳоятда зўр бўлди. Шундоққина Ҳинд уммони билан туташ Бенгал кўрфази, денгиз тўлқинларининг ёқимли шовқини эшитилиб турган жойда Андижонча паловхўрлик қилиб, кўп роҳатландик, мириқиб дам олдик.

— «Дизенфекция»ниям улфатчиликка айлантириб юбординглар — деди Сайфиддин Жалилов ўзига хос жиddийлик билан (катта ҳожи ака яйраб кулиш олдидан бир сония жиddийлашиб оларди)...

Хуллас, бу кун Ҳиндистон сафаридағина эмас, менинг бутун ҳаётимдаги ҳофизамга муҳрланиб қолажак кунлардан бири бўлди.

Ошхўрлиқдан кейин яна Пурига қайтиб келдик-да, Бомбай йўлига чиқиб олиб, Ҳайдаробод сари жўнадик. Дам олишлар ҳисобини чиқариш учун туни билан ийл юрдик. Биз Тўлқин ака билан бир қатор ўриндиқни (уч ўринли) эгаллагандик. У кўпинча чекиши баҳона қилиб ўнг томондаги эшик билан ёнмаён бир кишилик ўринда ўтириб борарди. Мен ўтирган икки кишилик ўринда навбатлашиб мизгиб кетдик. Бечора ниҳоятда кўнгилчан, сабр-бардошли (фақат чекиши масаласида сабр чегарасидан чиқарди холос), сергак, хушёр эди. У мени аяб жуда кам ухларди. Баъзан бир-биrimизни ёнбошлишга-ухлашга қис-таб-ундаб, иккаламиз ҳам мудраб ўтираверардик. Тўлқин аканинг хатти-ҳаракатида умуман ножӯялик йўқ, деса бўларди, бехудага оғзидан бирон оғиз но-жоиз сўз чиқмасди. Қисқаси, ҳамроҳликка, ҳамсафарликка жуда мос, ҳаммабоп, олижаноб инсон эди.

23 август, душанба.

Соат бешларда тонг ёриша бошлади. Орисса штатига қарашли Ҳапатном деган шаҳарга кириб бордик. Тоғ ёнбағрида жойлашган, сўлим шаҳар экан. Лекин, кўркам, пастаккина уйлар ёнида томи икки томонга суйри қилиб (учлари ерга тегай-тегай деб турибди)

шакарқамиш пояси ёпилган хунуқдан-хунук чайлалар бўлиб; уларнинг остида қўй, эчки, товуқ боқиларкан, баъзиларида одамлар ҳам яшашигти.

Шаҳардан чиқа бошладик. Яна икки томонда ям-яшил водий ва ям-яшил тоғлар...

Бугун кир ювиш куни эканми, қайда анҳор, дарёнинг ясси соҳиллари, кам сувли ўзанлар бўлса аёллар (ҳатто эркаклар ҳам — бевалар бўлса керак) кир ювиги ўтиришарди. Улар ювган кирларини шундоқ ерга — майсазорлар, тошлар устига олабайроқ қилиб ёйиб ташлашарди. Ёйилган кирлар ҳаддан ташқари кўп, ҳаддан ташқари ранг баранг ва ғалат эди...

Йўлда апелсинхўрлик қилдик. Ахир бу ҳам биз учун тансиқ мева-да.

Гулчилик билан шуғулланадиган бир ердан ўтятпиз. Чапда канал суви лим-лим бўлиб оқмоқда эди. Ана шу каналнинг нариги қирғоғи бўйлаб кетган гулзор (асосан кўчкат эди)нинг поёни кўринмас, гуллар ниҳоятда хилма-хил ва бир-биридан чиройли, қараб кўз тўймасди. Мана шу гулларни тўйиб кўриш учунгина шунча узоқ йўлни босиб яна бир бор келишга рози эдим. Шу гулларни кўриб, оламда мен кўрмаган ва билмаган гуллар тури беҳисоб эканлигини ўйладим. Қани энди шу гулларнинг ҳар бирини ҳидлаб чиқсан ва номини сўраб билсан...

Яна бир узундан-узун кўприқдан (Ходавари дарёси) ўтганимизда ҳаво айний бошлади.

Кир юувучилар армияси борган сари кўпайиб, катта-катта сайхонликлар, дараларни ишғол қилиб борарди.

Икки ён энди шифил мевали кокосзор, бананзор ва палмазордан иборат гўзал боғлар эди.

Ҳудудда шаҳрига етганимизда яна ёмғир шаррос қўйиб юборди. (Ҳиндистонда ёмғир томчилаб, оҳиста ёғмайди шекилли).

Ҳайдарободга 250 чақирим қолганда (соат кеч тўққизлар эди) яна бир шаҳар четроғидан ўта бошладик. Кўзимга меъморчилиги ўзига хос, кўркам ва файзли бўлиб кўринди, лекин биз бу шаҳарда тўхтамадик. Бу ҳақда раҳбариятга шаъма қилиб кўрган эдим, гап сифмади. Вақтимиз тифиз, муддатимиз оз қолаётган эди.

Тонгга яқин, соат учларда Ҳайдарободга кириб бордик ва Претий (Preethi) меҳмонхонасига жойлашдик. Хоналар кенг, ёруғ эди. Кирдигу таппа-таппа ташладик.

БОБУР АВЛОДЛАРИ БОР ЭКАН!

24 август, сешанба.

Кечаси отам тушимга кириб қолибди. Эрталаб туриб, Қуръон тиловат қилиб, унинг руҳига бағишлиб қўйдим. Узоқ ва мусоғир жойларда юрганимга бевзотва бўлдимикин...

Муси дарёси бўйида жойлашган Ҳайдаробод шаҳри Андхра-Прадеш штатига қарайди, жанубий Ҳиндистоннинг саноат маркази ҳисобланади. Қомусий маълумотларга кўра бу кўхна шаҳарда ҳозир тўқимачилик, кўн, озиқ-овқат, дори-дармон, ойна, тамаки, қофоз, машинасозлик саноат корхоналари мавжуд. Майда ҳунармандчилик ривожланган, бадиий ва уй-рўзгор буюмлари тайёрланади, газлама тўқилади. Дарё порти бор.

Ҳайдаробод Ҳиндистондаги мусулмонлар кўп яшайдиган шаҳарлардан бири. Чор минор, масжидлар ҳам шундан далолат бериб турибди.

Шаҳар кўчалари тор ва одамлар (асосан савдо-сотиқ билан шуғулланувчилар) билан гавжум эди. Излаб-излаб, Салор Жанг музейини топиб бордик. Музей посбонлари — носранг маҳсус хизмат кийимидағи, елкасидаги погонида иккитадан кумушранг юлдуз ярқираб турган йигит бизни илиқ табассум ва майнинг билан кутиб олиши. Бироқ, ҳамма жойда бўлгани каби, бу ерда ҳам телекино камералар билан кириш муаммоси кўндаланг бўлди. Деҳлида фақат кинотелетасвирга олиш учун тўланган 5 минг рупий бож ҳам асқотмасдан, бенаф кетмоқда эди. Тож Маҳалда ҳатто зинадан тушишга ҳам ижозат беришмади.

Музейга 1963 йили Ҳиндистон бош министри Жавоҳирлаъ Неру томонидан асос солинган экан.

Музей остонасидан ўтиб, фойега киришингиз билан бир-биридан чиройли бешта улкан қандил эътиборингизни жалб этади. Менинг назаримда улар бутун музей биносига ўзига хос салобат ва кўрк баҳш этган эди. Айниқса, ўртадаги энг каттасининг (мен бошқа бирон жойда бу даражадаги қандилни учратмагандим) шакли ранг-баранг ва туслари рангин товланувчи-оппоқ, зангори, қизгиш шокилалари тебраниб бир-бирига оҳиста урилиб, жонон пиёла овозидек нафис жаранг таратиб турарди. Бино уч қаватали, фойе усти учинчи қават шифтигача очиқ бўлиб, қан-

диллар ана шу шифтдан биринчи қаватгача осилиб тушган эди (тасаввур қилаверинг!).

Мозийгоҳнинг бўлимлари ниҳоятда кўп бўлиб, улардан бири бобурийлар ҳёти ва фаолиятига бағишланган эди. «Бобурнинг «Бобурнома»ни ёзаётган чоғлари» дея изоҳланган сурат, Акбаршоҳ ҳётидан лавҳалар, Шоҳ Жаҳон, Аврангзеб, Акбар-II, Баҳодиршоҳ расмларини мусаввирилик санъатининг намуналари дейиш мумкин эди. Миниатюра суратларида эса Ҳиндистон табиати, ўсимлик ва ҳайвонот дунёси, ошиқ-маъшуқлар, васлу висол, жанглар, машваратлар, дилкаш сухбатлар фойят назокатли акс эттирилган эди.

Кашмир бўлимида ҳам яна бобурийлар — Акбаршоҳ, Жаҳонгир, Шоҳ Жаҳон, Нуржоҳон, Мумтоз Махалларнинг анча катта, кўркам суратларини кўрдик. Бу бежиз эмас, чунки Кашмир бобурийлар тарихида алоҳида ўрин тутади. Юксак дидли, нозиктаъб бобурийлар гўзал табиатли Кашмир водийсини ниҳоятда яхши кўришган. Айниқса, Жаҳонгир (унинг Кашмирдан қайтаётib вафот этганини эсланг)...

Киноларда аксарият ҳиндаларнинг ўта содда ювош образларини кўриб жуда ҳайратланар, унча ишонгим келмас, ҳатто, шу даражадаим бўладими, деб ғашим келарди. Уларни ҳётда ўз кўзим билан кўриб, ишондим ва шунинг учун ҳам тарихда аҳолиси кўп ва ҳудуди бепоён бу мамлакатни осонгина босиб олаверишган экан-да, деган хуносага келдим. Лекин, Кашмир ҳалқи нисбатан анча жангари бўлган. Чунки 7—11 асрларда Ҳиндистоннинг энг йирик давлатларидан бири бўлган Кашмир ҳукмдорлари қўшни давлатларга ҳужум ҳам қилиб туришган. Кашмир мана шу жиҳати билан ҳам бобурийларга маъқул келган бўлса ажаб эмас. Хуллас, 1586 йилда Кашмир Акбаршоҳ томонидан бобурийлар давлатига қўшиб олинади. Акбар, Жаҳонгир, Шоҳ Жаҳон, Аврангзеблар даврида Кашмир янада гўзаллашади, шуҳрати янада ортади. Бобурийлар фактат Дал кўли атрофида 777 та боғ барпо қилишади, иморатлар қурдиришади, янги йўллар очтиришади. Демак, Кашмир ҳалқи бобурийлардан жуда миннатдор бўлишган.

Дарвоқе, Кашмир ҳалқи бобурийларнинг асил ватани Ўзбекистондан, унинг пойтахти Тошкентдан ҳам миннатдор бўлишлари керак. Маълумки, Кашмир Ҳиндистон билан Покистон ўртасида узоқ йиллар талаш бўлиб юрган. Бу масала ҳатто Бирлашган Миллатлар

Ташкилотида уюштирилган махсус музокараларда ҳам (1955, 1960, 1962, 1963 йиллар) ҳал бўлмаган. 1964 йили 4—10 январ кунлари Ҳиндистон ва Покистон раҳбарлари (Лаъл Баҳодир Шастри, Муҳаммад Айюбхон) нинг Тошкентда ўтказилган учрашувида икки давлат ўртасидаги дўстлик алоқаларини тиклаш борасидаги тарихий битим имзоланган.

Тўғри, ундан кейин ҳам Кашмир можароси яна қўзғалди ва ҳозиргача бутунлай ҳал бўлгани йўқ, лекин ҳарқалай ўшанда Тошкентда икки катта мамлакат ҳалқлари ўртасида юз бериши мумкин бўлган катта фожиаларнинг олди олинган эди...

Бўлимдаги ашёлар, кийим-кечаклар ўз даври одамларининг ҳаёти, урф-одатларидан, тутумларидан ҳикоя қиласарди. Баъзи эркаклар кўйлакларига арабча сўзлар битилган эди. Маълумки, бир замонлар жангчилар жиҳодга отланишганида ирим-эътиқод билан тангридан омад, мадад тилаб, уст-бошларига Қуръон оятларини ёздириб олиш уруф бўлган...

Шарқ қўлёзмалари бўлимида бизни калта соқолининг оқи сочиникидан кўпроқ, ўрта бўйли, эллик беш — олтмиш ёшлардаги профессор Раҳматулла Алихон кутиб олди. У салом-алиқдан кейиноқ, навоийшунос, бобуршунос олимларимиздан Ҳамид Сулаймонни эслади, Сабоҳат Азимжоновани сўради... Шунда мен ўзбек намунавий классик адабиётининг атоқли вакилларидан бири, забардаст шоир Ҳофиз Хоразмий қўлёзма-девонининг топилиши тарихини эсладим... Адабиётимизнинг асл жонкуяри, тарғиботчи ва тадқиқотчи, фидойи инсон, профессор Ҳамид Сулаймон бошчилигида Алишер Навоий номли Давлат мозийгоҳининг навбатдаги археографик экспедицияси 1975 йили баҳорда Ҳиндистонга сафар қилган ва роппароса икки ой давомида (26 марта 26 майгача) кўхна ва бепоён ҳинд диёрида Бобур ва бошқа қатор шоирларимиз қўлёзмаларини излаш юзасидан кенг миқёсда илмий-қидирув ишлари олиб борилган эди. Ўшанда Ҳамид Сулаймон шогирди Сайдбек Ҳасан ва бошқа олимлар билан Ҳиндистоннинг йирик шаҳарларидаги дорилфунун, кутубхона, мозийгоҳ ва давлат архивларида бўлишган ва ҳозир биз қадам ранжида қилиб турган мозийгоҳнинг айнан мана шу шарқ қўлёзмалари хазинасида (18-май, якшанба куни) мутлақо кутилмаганда «қўлёзмалар оламида жуда кам топиладиган ноёб жавоҳир»ни қўлга киритишган эди.

Бу — намунавий адабиётимиз тарихида Навоийга қадар ҷумкаммал девон тартиб этган, XIV—XV асрларда яшаган хоразмлик шоир Абдураҳим Ҳофизнинг ҳажман ниҳоятда катта ва эски ўзбек тилда битилган девони эди.

Ҳамид Сулаймоннинг гувоҳлик беришича, тарихимиизда Ҳофиз номи ё тахаллуси билан 156 киши ўтган. Ҳофиз Хоразмий форсий Ҳофиз Шерозий билан деярли замондош, ижодда ҳам у билан беллаша оладиган шоиримиздир. Дарҳақиқат, бугун ана шу «ноёб жавоҳир» асосида нашр қилинган икки жилдан иборат гўзал девон китоб жовонларимизнинг тўрисини безаб турибди.

Салом-алиқдан, танишувдан сўнг Раҳмат Алихон нодир қўлёзмалар сақланадиган махсус ҳонага кириб, катта бир китобатни худди «Қуръон» каби муқаддас нарсани ушлагандек, икки қўллаб кўтариб чиқди.

— Бобур девонининг эски ўзбек тилига кўчирилган иккита қўлёзма нусхаси бор холос, бири Британия музейида, иккинчиси бизнинг музейимизда сақланадиган мана шу нусха, — деди у фахрлангандай.— Низомиддин Мағрибий деган одам 1902 йили Лондондан, Бевереж ҳоним кутубхонасидан олиб келган.

Раҳмат Алихон бизга Бобурнома қўлёзмасини ҳам кўрсатди. Шунингдек, профессор бизнинг саволларимизга қисқа ва лўнда жавоб бериб, Салор Жангнинг тарихда ўтган катта саркардалиги, Ҳайдаробод Ҳазрат Али давридаги одамлардан бирининг исми эканлиги, бир вақтлар Ҳайдаробод университетида Ўрта Осиё тарихининг озми-кўлми ўқитилгани, мутахассис-профессор Низомиддин Мағрибий вафотидан кейин бу соҳанинг ҳам барҳам топганлиги, ҳозир фақат араб, форс тиллари ўқитилиши ва бошқа мавзуу ва масалаларга анча аниқлик киритди. Суҳбатлашмоқ учун олимларни тўплаб беролмайсизми, деган ўтинчимизга у: уларни йигиш қийин, яхшиси ӯйларига борганларингиз маъқул деб, бир-иккитасининг манзилини айтиб берди. Лекин бўлим мудири бир илтимосимизни бажонидил бажо айлади — бизни Мозийгоҳ директори хонасига бошлиб кириб, у билан таништириди. Ди-ректор — Дири Гехлот ёш, қотмагина, хушмуомала йигит бўлиб, сочи, мўйлови қоп-қора, силлиқ, ўзи бурдойранг, олифтагина кийинган эди. Биз ундан бу Мозийгоҳ ҳақида кенгроқ гапириб беришни сўраган эдик, у ўзининг бу ерга яқинда раҳбар бўлиб ўтганлигини

айтиб, агар биз хоҳласак у узоқ йиллар мудирлик қилган Голконда қалъасини мамнуният билан кўрса-тишга ҳозирлигини изҳор этди.

Мулоқот сўнггида директор билан совғалар алма-шилди. Бобур Мирзога бўлган юксак эътиқоди, унинг нодир қўлёзмаларини кўз қорачиғидек эҳтиётлаб ке-лаёттани учун профессор Раҳмат Алихонга экспеди-ция аъзоларининг, андижонликларнинг, бутун ўзбек ҳалқининг миннатдорчилиги рамзи сифатида тўн, дўппи кийдиридик.

Бўлимга кўрк бўлиб турган темурийлар ва бобу-рийлар суратлари ҳинд рассомлари томонидан ниҳо-ятда гўзал қилиб, меҳр-муҳаббат билан ишланган эди. Биз илтимос қилиб, уларни фотога олдик. Қўлёзма-лардан ксеронусха кўчириш учун юқори идоралардан рухсат бўлиши лозим экан, музей директори ва Раҳ-мат Алихон йўл-йўриқларини тушунтиришиб, бу бо-рада бизга ёрдам беришга тайёрлигини айтишди.

Шундан кейин биз яна ички меъморчилиги ўзига хос мозийгоҳнинг бошқа бўлимлари — турли даврлар, ҳалқлар тарихи бўйлаб сайру томошада давом этдик. Хитой, японларга бағищланган лабиринтсимон хона-лардаги ашёлар янада ўзига хос бўлиб, ҳар бир зиё-ратчини ўтмиш қаърига чуқурроқ боқишига, фикр қилишига ундарди. Ҳа, бу фусункор ва сеҳрли зиёрат-гоҳни фақат Ҳайдаробод ё фақат ҳинд ҳалқининггина эмас, балки бутун Шарқ мамлакатларининг мозийгоҳи, деса арзиди. Ҳар бир бўлимга, ҳар бир хонага кир-гандан беихтиёр «ёпирай!» деб юборасиз. Менимча, Ҳиндистондаги энг бой, энг жозибали музей шу бўлса керак. Кенг қамровли, биноларнинг қурилиши, бўлимларнинг тузилиши ва жойлашуви, ашёларнинг ўз ўрнига, ўта ҳафсала ва дид билан қўйилиши, худди кечагидек чекилмасдан, сарғаймасдан туриши — ҳамма ҳаммаси ҳайратомуз ва ибраторомуз эди. Бу музейни бафуржга, муфассал синчиклаб кўриб чиқиш, ашёлар мағзини чақиши, завқу шавқ олиш, даврлар фалсафаси-нинг нозик қирраларини тушуниш, ҳалқлар эътиқод-ларини англаш учун кун эмас, ҳафталар камлик қили-ши аниқ эди.

Музейнинг кенг ва баланд кўргазма заллари бўйлаб юаркансиз, кўз олдингизда беихтиёр ўтмиш жонла-нади ва Сиз тарихий воқеалар гирдобига кириб ке-таёттанингизни ҳам сезмай қоласиз... Ҳар бир ашё (экспонат) ўз тарихи, шаклу шамойили, мазмуни, ғояси-

га эга... Балки шунинг учун ҳам музей томошабинлар билан гавжумдир... Мен Санкт-Петербург шаҳридаги Эрмитажни ҳисобга олмагандаги бошқа жойда бу дара-жадаги бой мозийгоҳни кўрмовдим. Шу топда хаё-лимда «музей, бу ҳалқнинг тарихи, миллий фурури-дир», деган сўзлар айланарди. Ўзбекистонда, хусусан Бобур ватани Андижонда ҳозирча бундай мозийгоҳ-лар йўқлигидан ўкиндим, борларини кўз олдимга кел-тиридим. Улардаги нарса, буюмлар, жиҳозлар, яъни экспонатлар асосан суратлар, плакатлар, диаграммалар, ер-сув ҳариталарию эски кийим-кечаклар, омоч, болта, кетмон...дан иборат. Ҳалқнинг, юртнинг тарихи, табиати, илму фани, маданияти, урф-одати, эътиқод-ларини ифодаловчи ашёлар кам.

Музейдан қайтиб, меҳмонхонамизга келганимизда соат олти яримлар эди. Остонадан қаторлашиб кириб бораётганимизда фойедаги телефон жиринглаб қолди. Эшик оғаси-максус кийимдаги ҳинд йигити қўнфироқ дастасини кўтариб, «Сизларни сўраяпти» деб қолди бизга қараб. Ҳаммамиз тўхтаб қолдик ва ҳайрон бўлдик. Ҳиндистоннинг олис бир шаҳарида бизни ким йўқлаши мумкин? Дехдидан консулимиз Аҳмаджон Луқмонов қўнфироқ қиляптимикин, у қаердан билди-кин бу меҳмонхонадалигимизни? Ё, Салор Жанг музейидагилармикин?

Аҳмаджон Қосимов ҳам ҳайрон бўлиб, дастани қўлга олди. Биз ҳаммамиз қизиқсиниб таржимонимизга тикилиб туриб қолдик.

Аҳмаджон номаълум йўқловчилар билан ҳинд ти-лида гаплашаркан, юз-кўзларига ҳайрат ва қувонч бал-қиб: «Зокиржон ака, «биз Бобур авлодларимиз, сизлар билан кўришмоқчимиз», деяпти, нима жавоб қиласай», деб сўради.

Ҳаммамиз Аҳмаджонни ўраб олдик.

— Келишсин, айтинг, ё манзилини айтишсин, бор-рамиз, — деди раҳбаримиз шоша-пиша.

Хуллас, янги бобурийлар бир ярим соатдан ке-йин — саккизларда келишадиган бўлди. Биз бебаҳо бойлик топиб олгандай ўзимизда йўқ, эдик. Ҳа, агар улар ҳақиқий бобурийлар бўлишса, биз учун чиндан ҳам баҳоси йўқ, беназир бойлик эмасми? Ахир, са-фардан кўзда тутилган асосий мақсадларимиздан бири ҳам Бобур авлодларини излаш эди-ку. Шу пайтгача бу буюк сулоланинг ҳозирда барҳаёт вакиллари ҳақида тайнинли бир гап, маълумот йўқ, эди-да.

Раҳбаримиз соат саккизгача шаҳар айланиб келишга ижозат берди. Лекин биз шаҳар айлангандек ҳам бўлмадик. Бошқалар ҳам, мен ҳам Бобур авлодлари билан тезроқ учрашишга, уларнинг ким ва қандай эканлигини кўришга ошиқардик.

Биз меҳмонхона фойесига, кутиш хонасига пастак, хонсимон стол ва курсилардан жой ҳозирлаб, Бобур авлодларининг ранги, қиёфасини ўзимизча тасаввур қилиб, уларнинг ташрифини сабрсизлик билан кута бошлидик.

Фойе деворидаги рақс тушаётган ним яланғоч гўзал ҳинд қизларининг катта сурати шу қадар моҳирона ишланган эдики, ўзингизни озгина чалфитсангиз раққосалар чиндан ҳам ёнингизда хиром айлаётгандай ва сизни ҳам ўз давраларига чорлаётгандай туюлар, кўзингизни юмсангиз, қулоғингизга қизларнинг тақинчоқлари — балдоқларию оёғидаги шингил-шингили кумуш занжирларининг шўх жаранг эшитилаётгандай бўларди.

Келишилган вақтдан сал кечроқ ўрта ёшлардаги икки киши кириб келди. Бири қотма ва новчароқ, иккинчиси бақалоқроқ ва сал оқсар эди. Улар бизни дарров танишиди, лекин шунчаки омонат қўл бериб кўришишди холос. Келувчилар ака-ука бўлиб, новчароги акаси Зиёвуддин ва Масихуддин Тусийлар экан.

Давра қуриб, сухбатга кирищдик. Мулоқот саволжавоб тарзида бошланди. Ака-укалар бобокалонлари — бобурийларнинг асил ота юрти Ўзбекистон ва хусусан Бобур туғилиб ўстган Андижон тўғрисида, мамлакатимизнинг мустақилликка эришиш тарихи ва жараёнлари тўғрисида кўп нарсаларни билгилари келар, лекин кўпроқ биз савол бериб, уларнинг ўзлари, бобурийларга алоқасию, шажараси хусусида сўзлаб беришга ундардик. Бечора Аҳмаджон савол-жавобларни таржима қилишга аранг улгуради.

Зиёвуддин Тусий анчагина сўзамол киши эди. Унинг эҳтирос билан ҳикоя қилишича, (бу гапларнинг кўп қисми манбаларда бор) Бобурий подшоларнинг сўнгтиси Баҳодиршоҳ II—Зафар ҳалқни инглизларга қарши курашга даъват этади, лекин кўпчилик бу ҳаракатларга қўшилмайди ва шунинг учун ҳам инглизлар ғолиб келиб, Дехлинини эгъллашгач, 1857 йили 20 сентябр куни Баҳодир шоҳни қамоқча олишади. Тергов Калькуттада олиб борилади ва у Рангунга (Бирма) умрбод сургун қилиб юборилади. Исёнчи-курашчилар раҳнамоси

бўлган шоҳнинг сарой аҳлию авлод-аждодларини (яъни бобурийларни) батамом қириб ташлашга киришадилар. Баҳодиршоҳнинг тириклигидан ваҳимага тушишиб, бобурийларнинг сўнгги ҳукмдорини Рангунда 1862 йили 7 ноябр, жума куни номози аср пайтида, 72 ёшида қатл этишади. Баҳодиршоҳ билан унинг Зийнат Маҳал исмли хотини ва ундан туғилган Жавон Баҳт деган ўғли ҳам Бирмага бирга кетишган, бироқ, уларнинг тақдири номаълум. Роҳат Маҳал деган хотини ва ундан туғилган Мирзо Абдулло, Мирзо Абубакр исмли ўғиллари Дехлида қолишган ва инглизлар томонидан қатл этилган. Шоҳнинг тўнгич хотини Ишрат Маҳалдан туғилган катта ўғли Мирзо Қуёшни (у кейинчалик Қурейш бўлиб ўзгариб кетган) қариндошлиари яшириб қолишган. Тусийлар ана шу Мирзо Қуёшга бориб тақалишар экан. Яъни, Мирзо Қуёшдан Мирзо Абдулло, ундан Мирзо Faфур, Мирзо Faфурдан эса Мирзо Юсуф деган ўғил, Ҳусни Жаҳонаро бегим ва Лайло Уммахонининг тўнгич фарзанди экан. Оиласда булардан ташқари яна иккита ўғил бўлиб, Орифуддин 1986 йили Машҳадда автомобил ҳалокатига учраб вафот этган, Шажауддин эса савдо-тижорат ишлари билан Арабистонда экан.

— Инглизлар ҳукмронлигининг дастлабки йилларидаёқ (1857—58 йиллар) ҳинд халқи уларга қарши кураш бошлаган, лекин орадан қарийб 90 йил ўтгач қарамлиқдан чиқилиб, озодликка эришилди, — дея ҳикоясини давом эттирди Зиёвуддин Тусий. — Бу ғалабада бизнинг ҳам ҳиссамиз бор деб биламиз ва бу билан фаҳрланамиз. Инглизлар Баҳодиршоҳга жуда катта лавозим ва маош ваъда қилишган, лекин у халқнинг инон-ихтиёрини, эркини мустамлакачидар кўлига, ихтиёрига топширишдан қатъиян бош тортган. Шундан кейин инглизлар мўғулларни¹ қатл қилиш ҳақида буйруқ беришган. Ҳатто Херсон деган генералнинг бир мўғул қонини ичганлиги ҳақида маълумотлар бор. Баҳодиршоҳнинг саройиу ҳамма бойликлари таланганд...

Биз ана шу Озодлик кунлари, яъни 1947 йилгача Бобурий — Баҳодиршоҳ авлодидан эканлигимизни

¹ Тусийлар ҳам бобурийларни «мўғуллар» деб атапдек хато фикр исказидан қутилишомаган экан (муаллиф изохи).

яшириб келдик, акс ҳолда бизни ҳам омон қўйишмасди. 1962 йили Баҳодиршоҳ II вафотининг 100 йиллигига бағишлиланган маросимлардагина мен ҳам ўзимиздан хабар бердим. Шундан кейин, Усмонийлар университетида ўқиб юрганимда (1962—64 йиллар) ҳукумат менга молиявий ёрдам кўрсатиб турди. Биз ҳаммасидан ҳам Бобур бобомизнинг Ҳиндистонда обрў-эътиборга, маҳаллий халқларнинг меҳру-муҳаббатига сазовор улуғ инсон, адолатли ҳукмдор бўлганинидан суюнамиз, гууруланамиз. Бобур бундай юксак эҳтиромга ўзининг ажойиб фазилатлари билан эришган. У ҳинд халқининг урф-одатларини ҳурмат қилган, уларга риоя этган. Масалан, бу юртда сигирнинг муқаддас саналишини ҳисобга олиб, ўз одамларига мол сўйиш, гўштини ейишни таъкиқлаган. Афғонистондан хотини Мөҳим бегим келаётганида тўрт чақирим ерга мулозимлари билан пиёда бориб иззат-икром билан кутиб олган, шу воқеадан кейин бобомизга нисбатан маҳаллий халқнинг ҳурмати яна ҳам ошиб кетган. бобур ўғли Ҳумоюнга ҳам: агар сен бирон юртга ҳукмдор бўла-ман десанг, асосинг пухта бўлсин, ўша юрт халқининг урф-одатларини, анъаналарини қадрла, деб васият қилган. Биз ана шу анъаналарни давом эттириб, Бобурийлар ва ҳинд халқи ўртасидаги дўстликни сақлашга интилдик, ҳаракат қилдик. Лекин иқтисодий аҳволимиз мақтанадиган даражада, яъни шоҳдар сулоласига хос эмас. Яширишнинг ҳожати йўқ. Ҳозир ҳам ижарада турамиз, ўз уйимиз йўқ, аммо, ўз ватанимизда яшаётганимиздан, бобурийлар авлодига мансуб бўлганимиздан беҳад баҳтиёрмиз.

Баҳодиршоҳ чеварасининг ўғли бобурийлар ҳақида анча кўп нарса биларди. Тарихий манбаларни санаркан, афсуски, бобурийлар ҳақида бадиий асарлар кам ёзилган, деди у.

Дунё воқеаларида анча боҳабар Зиёвуддин Тусий хусусан Ўзбекистондаги янгиликлар билан астойдил қизиқиб туришини, олис бобо юртининг мустақилликка эришганидан боши осмонда бўлиб суюнганини таъкидлади. У айниқса, Бобур таваллудининг 510 йиллигига қизрин тайёргарлик кетаётганини эшишиб ниҳоятда қувонгани, ҳаяжонлангани, ана шу юбилей тантаналарида иштирок этиш истагини билдириб, республикамиз Президенти Ислом Каримовга мактуб ёзганини ва уни Дехдидағи элчихонамизга юборгани, консул Аҳмаджон Луқмонов билан тел-

фонда гаплашганини айтаётганида юз-кўзларига яна ҳаяжон мавжлари тошиб чиққанини сездик. Дарвоҷе, у бугун Аҳмаджон Луқмоновга қўнгироқ қилиб, ана шу мактуби тақдири билан қизиқиши асносида бизнинг ташрифимиздан хабар топган, консулимингнинг тахминларига асосланиб, бизни Салор Жанг музеидан қидирган, манзилимизни (музейда бўлганимизда қайси меҳмонхонага тушганимизни айтган эдик) аниқлаган эди.

Мулоқот икки соатдан ортиқ давом этди. Бир-бirimizga айтадиган гапларимиз ҳали кўп эди. Лекин вақт алламаҳал бўлиб қолди.

— Бобур номи билан боғлаб, қадриятлар университети очсангизлар ажойиб иш бўлади, — деди Тусий сұхбат охирида қалбидаги энг қутлуғ истагини изҳор этиб, менимча, бу, сизларнинг ҳозирги миллий мағкура яратиш борасидаги ҳаракатларингизга жуда мос келади... Мен бугун жуда мамнунман. Бобокалонимиз юртдошлари бўлган Сиздек улуғ инсонлар билан мириқиб сұхбатлашишни қачонлардан бери орзу қилардим. Шундай кунга мұяссар эттани учун Оллоҳга минг бора шукурлар айтаман. Бизга қолса, тонгача ўтиришга ҳам розимиз, лекин Сизлар чарчагансизлар. Умид қиласанки, мулоқотимиз эртага давом этади. Бизнинг кулбага ҳам бош қукиб ўтсангизлар бошилиз осмонга этади.

Бугунги кунимиздан биз ҳам ғоят хурсанд ва рози бўлдик. Экспедициямиз фаолиятининг гултожи мана шу кун, бобурийлар авлоди билан учрашув бўлиб қолиши турган гап.

Албатта, қорамағиз таішқи қиёфалари ҳиндлардан фарқ қилмайдиган одамларнинг дабдурустдан «Бобурийлар авлодимиз» дейиши гумонли ва қизиқ туюлиши мумкин (шунингдек, улар эронийлар билан ҳам аралашиб кетишган экан), аммо бир асоси бўлмаса, бундоқ даъво қилиб чиқишимас ахир.

Мароқли сұхбатимиз дарҳақиқат поёнига етмади, эртага давом эттириш иштиёқи ва тасаллиси билан хайрлашдик.

Менимча, шу кеча экспедициянинг ҳамма аъзолари хуш кайфият билан уйқуга кетишган бўлса керак. Шахсан менинг руҳиятим янада баланд, янада жўшқинроқ эди. Бобурийлар билан кутилмаганда лекин кутилгандан зиёда бўлган учрашув мен учун фавқулодда ҳодиса эди. Демак, Ҳиндистондай улкан, буюк мамлакатда

андижонлик бобурийлар авлоди ҳали-ҳануз яшамоқда. Буюк соҳибқирон темурийлар сулоласи давом этади...

Биз Деҳли миллий музейида учрашган профессор-дардан бири Бобур авлоди қолмаган, аммо даъвогарлар бор, деганидан кейин бизнинг анча ҳафсаламиз пир бўлиб, тарвузимиз қўлтиғимиздан тушган эди. Лоҳурлик Жалолиддин Акбар деган кимса ҳақида ҳам ўйламай қўйган эдик. Худо омадимизни бериб, бу ёқда Бобур авлодларининг нақди, улгуржаси рўпарамиздан чиқиб турибди...

МАЪШУҚА ИСМИ БИЛАН АТАЛГАН ШАҲАР

25 август, чоршанба.

Бу тунги роҳат уйқусини таърифлашга хожат йўқ.

Эрталаб ташқарига чиқсак, салқин шабада эсяпти. Ҳудди Андижондагидай, Умуман Ҳайдаробод мамлакат жанубида бўлса ҳам иқдими Ҳиндистоннинг бошқа жойларига қараганда бир қадар майин, ҳарорати Ўзбекистонникига анча яқин экан, тўғрироғи, водий ҳавосининг нафаси келяпти. Бизга айтишларига қараганда, хусусан ҳозирги даврда бу жойлар жуда иссиқ бўлиши керак эди. Ҳозиргача кўрган-билгандаримга асосланиб, Ҳиндистонда умуман шабада бўлмайди шекилли, деган тасаввурга келиб қолай дегандим.

Кечаги ваъдага биноан Салор Жанг музейининг директори Дипи Гехлот билан мозийгоҳ биноси олдида учрашиб, унинг ҳамроҳлигида шаҳардан ўттиз чақиримча четдаги Голконда қалъасини томоша қилгани жўнадик.

Ҳиндистоннинг жануби шарқида Муҳаммад Қулий-Қутб шоҳ асос соглан феодал давлат маркази дастлаб ана шу Голконда қалъаси эди. 1589 йили Бхагнагар (ҳозирги Ҳайдаробод)га кўчирилган. 1687 йили бобурий Аврангзеб-Оlamgir Голконда ерларини ўз давлати ҳудудига қўшиб олган.

Қалъа-қўргон эндилиқда тарихий, очиқ мозийгоҳга айлантирилган эди. Киравериш дарвоза пештоқига чиройли товуслар сурати ишланган, йўлакнинг икки томонида мана шу қалъага даҳлдор ва унинг ҳудудидан топилган ашёлар қўйилган хоналар бор эди. Шунингдек бу музейчада ҳиндувизм ва брахманизмга оид нарсалар, динга эътиқодни, тарихий маданиятни кўрсатувчи анжомлар сақланарди. Қалъа ҳудудига кири-

шингиз билан кўзингиз ўнг томонга кетган йўл бўйида виқор билан кўкка бўй чўзган улкан ҳимтри дарахтига тушади. Айтишларича 200—220 йиллардан бери яшаб келаётган бу дарахтнинг пастга осилиб тушган шохларидағи гўза шонасисимон пушти гуллари жуда чиройли бўлиб очилган эди.

Дипи Гехлотнинг айтишича, қўргон Голконда форт деб ҳам аталган. Гол—думалоқ, форт—қалъа, демак, думалоқ қалъа дегани. Дарҳақиқат, қўргон чегаралари доирасимон шаклдадир. Унинг банжера, маккан, фотех — номли... хуллас, саккизта дарвозаси бўлган. Аврангзеб фотех дарвозасидан кириб келган ва ўша даврда Голкондага ҳукмронлик қилган Султон Қулийни енгиб, қалъани забт этган. Қалъа қўшинининг охирги саркардаси генерал Абдураззоқ. Ларий Аврангзебга қаттиқ қаршилик қўрсатиб, шу ерда ҳалок бўлган.

Эндилиқда тарихий ёдгорликка айланган ва зиёратчилар билан гавжум бу қадимий қалъанинг айласи етти чақирим бўлиб, тоғлиқ жойда қад кўтарган эди. Шунинг учун бинолар қурилишида қатъий тартиб ва уйғунликка асосланмагани равшан. Энг балаңда девони хос, таҳт, назорат жойлари (у ерларга айлана тош зиналардан чиқиб борилган) акустика ҳодисалари ва қонуниятлари асосида шу қадар усталик билан қурилганки, ана шу тепалиқда бирон ишорат маъносида қарсак урйлса, пастдаги дарвозабонларга, 87 гумбаз остидаги ҳужраларга бемалол эшитилган, дарвозалар ёпилиб, жавоб қарсакларининг овози ҳам ана шу осмон ўпар тахтиравонга етиб борган.

Қалъанинг баъзи қисмлари манзарали қилиб қурилган, девор-қўргонлари тараашлаб фишт шаклига келтирилган тошлардан тикланган хоналар фақат шу жойдагина учрайдиган нақшлар билан безалган.

Атроф пастак тоғлар билан ўралган бўлиб, улар қалъа қолдиқларига ўхшаб кўринади.

Бизни, айниқса, хоналараро шамол уфуриб (хос хонани салқинлатиш учун) турган маҳсус оралиқлар ҳайратга солди.

Йўлбошчимиз Дипи Гехлот айлана зиналар, кенгтор йўлаклар билан чиқиладиган шоҳ қароргоҳи, девони хос ва бошқа 480 метр балаңдикдаги барча хоналарга ҳам сув чиқарилгани, умуман қалъанинг ниҳоятда мураккаб усулларда бунёд этилгани, ота-боболарнинг ўтқир-зеҳн ва идрок эгалари бўлишганини завқ билан гапириб ўтди.

— Бу ерга ҳатто италиялик машхур сайёх, Марко Поло ҳам келган¹, — деди у фахрлангандаи. — Энг қизифи, ҳозиргача ер юзида энг қимматбаҳо ва нодир бойлик сифатида эътироф этиладиган Кўҳинур ҳам худди шу жойдан топилган², — деб қўшимча қилди.— Қутб шоҳдан илгари бу ер Нагина боғ деб юритилган. Қутб шоҳ Бхагмати деган аёлни яхши кўриб қолиб, уни суюклиси шанига Бхагнагар деб аташ ҳакида фармон берган. Кейинчалик «Ҳайдар маҳал»га айланган. («Маҳал» — қаср, қалъа демакдир).

Дили Гехлотнинг бизга ярим кун вақтини ажратиб, бу тарихий қадам жойларга шахсан ўзининг бошлаб келиши, қалъа-қўрғон ҳакида мороқ ва ифтихор билан ҳикоя қилишларининг боиси — у Салор Жанг музейи директорлигига атиги бир неча ой олдин худди шу қалъа-музей мутасаддиллигидан кўтарилиган экан. Шунинг учун ҳам шошиб турган бўлишига қарамай, кираверишдаги ҳаммом (мехмон ва элчилар ҳаммом қилишгандан кейин шоҳ қабулига олиб кирилган), асллаҳаона (қурол-аслаҳа сақланган), лангархона (ошхона), хилватхона (жиждий масалалар тор доирада муҳокама қилинадиган маҳсус хона)ни, аёллар учун мўлжалланган алоҳида сайргоҳларни, тошховузларни бир четдан томоша қилдириб, эринмай таърифлаб, изоҳлаб борарди...

Аёллар сайргоҳлари, тошховузларни, саҳна ўринларини кўриб (албатта энди улар тарихий, тош ёдгорликларга айланган), ҳинд классик адаби Робиндратх, Токурнинг (биз уни Рабинранат Тагор деб атаб келган эдик) машхур «Ташна тошлар» ҳикоясини эслаб кетдим.

Назаримда ҳикоя айнан шу жойда, мана шу тош қасрларда кечган ҳаёт ҳакида ёзилгандай тутолди. Асар қаҳрамони ҳавоси димиққан маҳфий ҳужралардан, тош устунлар орасидан ўтиб, тошховузлар бўйида хаёлан аллақандай сирли товушлар: қизлар-канизакларнинг дам шўх қийқириқлари, дам оҳу нолалари, сетор садоларию зеб-зийнатлар, қимматбаҳо тақинchoқларнинг нафис жарангини эшитгандай бўлаверади. Мен ҳам ҳозир гўё ана шу ҳолатта тушиб қолгандай, кўз олдимдан бу ерларда кечирилган шоҳона ҳаёт, кайфу

¹ Тарихий манбаларда Марко Полонинг айнан Голконда қалъасида бўлганлиги ҳақидаги маълумотни учрагмадим (муаллиф изоҳи).

² Манбаларда бу фикрни исботловчи далиллар ҳам йўқ.

сафолар, раққосаларнинг минг муқом билан йўрга-лашлари ўта бошлади. Чиндан ҳам агар манави муаззам тош устунларга тил битганида не-не воқеа-ҳоди-саларни сўзлаб, қанчадан-қанча ғаройиб сиру-асрорларни ошкор қилиб берган бўларди...

Қалъя зиёратчилари кўп ва ҳар турли миллатга, мазҳабга мансуб эдилар. Сочлари тақир қириб олинган яйдоқ бошлар ҳақида сўраганимда «уларнинг ўз худолари, эътиқодлари бўлиб, сифиниш учун бораёт-ганларида соchlарини шундай олдириб ташлайдилар», дейишиди. Ҳиндистонда, ҳиндларнинг ўзида ҳам эътиқодлар турлича-ку. Ҳатто бир неча динга эътиқод қиласиганлар ёки фил, маймун, илон каби жониворларга сифинадиган тоифалар бор. (Қошлари ўртасига қизил хол қўйтан эркаклар Ҳайдарободда, нисбатан кўпроқ учради.)

Қайтиб чиққанимизда қалъя идорасида бизни Дили Гехлот шарофати билан мўъжазгина чинни финжонларда ширчой билан меҳмон қилишиди.

БОБУРИЙЛАР ХОНАДОНИДА БАЙРАМ

Кўчага чиққанимизда соат ўн икки дан ошиб қолган эди. Меҳмонхонага ошиқиб жўнадик. Масихуддин Тусий кечқурун келишган вақтимиздан анча кечроқ келди-да, бизни дўкон расталарига тўла, тор, икки ёндаги уйлар, биноларнинг деворлари, пештоқлари янги ҳинд фильмларидан лавҳалар, турли эски эълонлар, тарғибот-ташвиқот суратлари билан безаб тўлдириб ташланган қўчалардан бошлаб кетди.

Ҳиндистоннинг барча шаҳарларида бўлгани каби, Ҳайдаробода ҳам бадиий фильмларнинг девордай-девордай рангдор реклама-расмларида елкалари, беллари, киндиклари очиқ актриса ва раққосалар (ҳинд кино юлдузлари)нинг баданларини ҳарир сарийларда, тор, таранг енгил либосларда ниҳоятда бўлуф, ўта сийнадор қилиб кўрсатиш одат экан. Аслида, киноларида ҳам шундай ифодаланади. Ҳолбуки биз ҳаётда буни унча сезмадик. Аксарият ҳинд қизлари, жувонларининг жуссалари ихчам, нозик эди.

Биз Аҳмаджон билан Дехлида кўрганимиз «Халнаяк» филмида ўйнаган соҳибжамол актриса ҳам ана шундай қоматдор бўлиб кўринади. Ваҳолонки унинг бўйи 152 сантиметр экан.

Мозийгоҳлардаги маъбудалар, оддий аёлларнинг яланғоч, шир яланғоч, сийнадор ҳайкаллари ҳам ҳаётга зид эди. Қадимда бундай тасвир менимча оналик, ризқ-рўз рамзи сифатида қабул қилинган, тушунилган. Лекин афсуски ҳозирга келиб бу ҳолат, жумладан ҳинд фильмларида ҳам, оналиқдан ҳам, рамзликдан ҳам бутунлай чиқиб кетди. Ҳинд аёлларининг калта нимча кийиб, белларини очиб юришидан мақсад эса, аслида қўлтиқ ва бошқа жойларини иссиқда терлаб кетишидан саклаш бўлган...

Анча юргач, шаҳардан четлаб, Андижоннинг Боғишинамолидаги янги маҳаллаларга ўхшаш тепаликка кўтарила бошладик. Бу жойни Осмонгар — баландлиқдаги уйлар дейишаркан. Асосан коттежсимон уйлар экан. Тусийлар хонадони тепаликнинг шундоққина қиршовида қад кўтарган, пастда -- ғарбу шимолда Ҳайдаробод шаҳри, ҳатто Чор минор ёдгорлиги ҳам яққол кўриниб турарди.

Эшик тепасига «Ҳиндишондаги мӯгуллар хонадони» деган инглизча ёзув илингган эди. Дарвоҷе, Тусийлар Ҳайдарободда «Буюк мӯгуллар сулоласи» деган жамият тузишган бўлиб, Лайло Уммахони жамият раисаси, Зиёвиддин Тусий — бош котиб экан.

Зиёвиддин Тусий, унинг ўғиллари Шоҳнур, Минҳожиддин, жиянлари Муиниддин ва бошқалар бизни шоду хуррамлик билан кутиб олишиб, меҳмонхонага олиб киришли. Уйдаги жиҳозлар, тутумларга қараб, Тусийларнинг ўрта ҳол оиласидан эканлигини пайқаш мумкин эди. Бу ерда кўп ўтирмафик. Овқат совиб қолади, дейишиб, емакхонага бошлаши. Шу ерда биз Тусийларнинг муҳтарама онаси, бобурийларнинг табаррук қизи, «Буюк муғуллар жамияти» раисаси Лайло Уммахони билан кўришидик. Она ўғилларининг акси ўлароқ оқ юзли бўлиб, истараси иссиқ, жуда нуроний, барвастагина, ёшлигида сарвқад, соҳибжамол аёл бўлганлиги сезилиб турибди. Юзларida ажин кам. Сўзлари дона-дона. Етмиш ўнда экан, лекин ҳали анча бардам. Икки қоши ўртасидаги ҳоли бўлмаса уни ўзбек оналаридан фарқлаш қийин.

— Ўзбекистонни, Андижонни бир кўришни орзу қилардим, — деди у аёлларга хос меҳр ва илинж билан. Овози сал титраб чиқди. Назаримда Она ҳам бугунгида учрашувни узоқ йиллар кутган, умид қилган ва ҳозир ҳаяжонини кексаларга хос вазминлик билан босиб турарди.

Зиёвуддин Тусийнинг холаси Ҳусни Жаҳонаробегим оиласи Аврангобод шаҳрида туришаркан. Лайло Уммахони ушбу ажойиб кунда опаси ва ўғли Шажауддин қатнашмаётганига кўп таассуф билдири.

Овқатланишга даҳлизнинг ҳинд хоналарига хос сўрисимон супасига жой қилишган экан.

Супа деворларига Тусийларнинг отаси, боболари суратлари осилган экан. Улар ҳақида маълумот берар экан, Зиёвуддин Тусий, яна Баҳодиршоҳни эслади.

— У Бирмада, ўлимидан ўн кун аввал «агар мен шу ерда ҳалок бўлсам, қабримни қачон бўлса ҳам Ҳиндистонга кўчириб кетинглар», деб васият қилған. Афсуски бу васият шу вақтгача амалга ошмади. Бизнинг қўнимиз қисқалик қилиб, имконимиз бўлмаяпти,— деди у афсус билан бош чайқаб.

Ош келтиришди. Ҳиндистон таомлари рўйхатидан жой олган бу овқат — «палов» деб ҳам аталар, унинг пишириш усуллари бир хил бўлса-да, тури, мазаси ҳар хил бўларди. Лекин Тусийларнинг қизлари, келинлари пиширган ошнинг ранги-рўйи ҳам, сабзи тўғрашлари, таъми ҳам ўзимизнинг Андижонча павловга анча яқин эди.

Ҳиндистоннинг қора чойи дунёга машҳур бўлса-да, ўzlари чойни жуда кам истеъмол қилишаркан. Ошхоналарда чой десангиз финжонда сут аралаш қаҳва беришади. Тусийлар бизни ҳақиқий қора чой билан меҳмон қилишди. Уни «чойи Сулаймоний» дейишаркан.

Тамадди қилиб бўлишимизга ичкари хонадан қизлар, келинлар бирин-кетин ҳинҷча салом билан таъзим айлаб чиқа бошлишади. Булар — Зиёвуддин Тусийнинг сингиллари Моҳруҳ, Гулруҳ, Лаълируҳ, қизи Малиҳо Фазола ва бошқалар эди. Айниқса, етти ёшлар чамасидаги Маймуна ва айниқса уч ярим яшар Афринанинг (иккиси ҳам Масихуддиннинг қизлари) жуссасини хиёл олдинга этганча митти бармоқчаларини жуфтлаб, манглайига тегар-тегмас қилиб тебратиб туриши ниҳоятда ёқимли ва биз учун фоят завқди эди. Унинг меҳмонлар келишига чиройли қилиб кийинтириб қўйилгани ва салом беришни хийла машқ қилдиргани сезилиб турарди.

Ташқарига чиқдик. Уй ёнидаги мўъжазгина майдончада мезбонларга совға-саломларимизни топширдик. Кинотасвирчимиз Тўлқин aka билан телетасвирчимиз Фаррухнинг қўли-қўлига тегмай суратта олишар, Ўзбекистонга дадил, ёруғ юз билан олиб бориш-

га арзирли лавҳалар лентага тушаётганидан мамнун ва масрур эдилар. Эсдалик учун суратларга тушдик. Лайло Уммахонига пахта гулли чойнак-пиёла ҳадя этдик. Зиёвуддин Тусийга ўзбекона қилиб тўн, аёлларга, қизларга Андижон ироқи дўпписидан кийдирдик. Мен Тусийга мустақил Ўзбекистонимиз рамзи бўлган байроқча совға қилдим. (Насибни қарангки шу шаҳарга етиб келгунча байроқни бир неча бор унга-бунга беришни мўлжаллаб, яна қайтариб, саклаб келаётган эдим).

Хуллас, хонадонда қувончли ҳодиса юз бераётганини четдан кузаттан одам аниқ сезиши мумкин эди. Бизнинг кайфиятимиз, руҳиятимиз мезбонларнидан ҳам юқори даражада эди. Бобурийлар авлодини излаш, топиш ниятимиз, умидимиз бор эди. Лекин бундай баҳтли тасодифни, тарихий учрашувни, тўғриси, кутмаган эдик.

Қизлар, келинлар ва бошқа қариндошларнинг юз-кўзларида тушуниксиз ифодалар зоҳир: улар суюниш-яптими, ажабланишяптими — дабдурустдан пайқаш қийинроқ эди. Менимча бу ерда энг хурсанд бўлаётгандар Зиёвуддин Тусий ва жажжи Африна эди. Қопқора, чиройли кўзлари порпираб қулиб турган бу қизалоқ жуда ёқимтой эди. Бир зумда унга ҳаммамизнинг меҳримиз тушиб қолди. Орамиздаги қизи, набирасини соғинганлар уни қайта-қайта бағрига босиб эркалашар, Африна ҳам тортинмай, ётсирамай келаверарди.

Мен Тусийларнинг ўғиллари Шоҳнур, Минҳожиддиннинг, Муиниддин ва хусусан жажжи қизалоқлар Маймуна, Африналарнинг қуралай кўзларида Бобур ва бобурийларнинг эзгу орзулари, армонлари учқунларини кўргандай бўлдим. Имоним комилки, бу учқунлар ҳозирги ва бундан кейинги ўзбек ҳамда ҳинд авлодлари томонидан яна аланга олдирилади, икки улуғ ҳалқ ўртасидаги дўстлик, оқибат ришталари янада мустаҳкамланади.

Хайрлашув олдидан биз «муғуллар...» деган иборанинг хатолигини аста тушунтириб, жамиятларининг номланишини ва эшик тепасидаги ёзувни ўйлаб кўришларини маслаҳат бердик.

Биз Тусийларнинг самимий муносабатларидан мамнун бўлдик. Бобур, бобурийлар тарбиясини олганлар улардан меҳр-муҳаббатни, садоқатни, ошиқликни, оқибатни, эътиқодни ҳам ўрганганлар. 1607 йили Кобулдаги Бобур мақбарасининг чевара Жаҳонгир томо-

нидан бунёд этилиши, мақбарадан қуйироқда эвара Шоҳ Жаҳон оқ мармардан қурдирган масжиդ ана шу оқибат мевалари эмасми?.. Тусийлар вужудида ҳам ҳарқалай қай бир микдорда бобурийлар қони бор-да...

Осмонгардан қайтиб, Ҳайдарободга тушдик-да, Масихуддин Тусий етакчилигига шаҳар марказини, Чор минор атрофларини бир оз айланиб томоша қилдик. Масихуддин Ҳиндистоннинг энг зўр марваридлари шу ерда — бизда бўладӣ, қизларингизга, аёлларингизга олиб кетинглар, деб ташвиқот қилди. Дарҳақиқат, фақат марварид сотадиган алоҳида дўконлар растаси бор экан. Яхшиямки орамизда аёллар йўқ эди...

Шу ерда кўпчилигимиз, яширишнинг хожати йўқ, совға-салом ташвиши билан юрибмизу Зокиржон ака нуқул китоб дўконларини изларди. Унинг ана шу ҳаракатлари натижасида бир жойдан Бобур ва унинг сulo-ласи вакилларининг моҳир ҳинҷ рассомлари (машҳур «Комде ва Мудан» асари асосида Шароф Рашидов ва Виктор Витковичлар яратишган «Икки дил достони»да образи жуда яхши тасвирланган) томонидан ниҳоятда гўзал ишланган суратлари жамланган плакатни топдик. Улар орасида Мумтоз Маҳал, Нуржаҳон бегимларнинг бир-бирига ўхшаш дилбар сиймолари ҳам бор эди...

Мен Ҳиндистон заминига оёқ қўйган чоғимизданоқ ҳинҷ қизлари, аёллари қиёфаларидан Мумтоз Маҳал сиймосини излай бошлагандим. Амритсар шаҳрида из-вошда навозиши билан ўтирган оқ юзли, олифта қиз-жуонларни кўриб унча эътибор бермадим. Деҳлида, Аграда, Калькуттада улардан-да гўзалроқ, Аржуманд бонуга ўхшаган соҳибжамолларни учратаман, деб ўйлагандим. Лекин бизнинг вақтимиз зиқ, дастуримиз тифиз бўлганидан кўчадаги ҳар бир қиз, аёлни кузатиб юришга имкон ҳам йўқ эди. Энг гўзал қизлар қашмирда, Бомбейда, дейищи. Афсуски, биз Фурқат «қамар сиймо»га йўлиққан Қашмирга ҳам, кино юлдузларининг макони бўлмиш Бомбейга ҳам ўтмадик. Ҳатто Вайжантемалани бир кўришдек орзуим ҳам мустажоб бўлмади.Faқат, Ҳайдарободда топганимиз туркум суратлар ичидаги Нуржаҳон ва Мумтоз Маҳалларнинг моҳи чеҳраларини кўриб кўнглим анча таскин топди ва ҳинҷ мусаввирларининг аёл зотининг ҳусни латофати борасидаги тасаввурларига, тўғрироғи орзу ва идеалларига, дидлари, заковатларига қойил қолдим...

Дарвоқе, мен Қашмирни фақат чиройли қизларга бойлиги учунгина кўришни орзу қилмагандим. Балки,

Ҳиндистон билан Покистон ўртасида Кашмир водий-сининг шунчалар талаш бўлиш сабаблари, сирларини англамоқ, билмоқ, «Кашмирдаги муҳаббат» филмида акс эттирилган ҳайратомуз гўзал табиат манзараларини ўз кўзим билан кўрмоқ, мириқиб томоша қилмоқ, завқу шавқقا чулғанмоқ умидларим бор эди. Мен бобурийлар — Акбаршоҳни, Жаҳонгир шоҳни, Шоҳ Жаҳонни, Аврангзебни ўзига мафтун этган ва улар даврида 777 та боғ барпо қилинган жозибали Кашмирни бир кўрмоқчи эдим. Агар мен Кашмирни ҳеч қачон кўролмасам, бу — ҳаётимдаги энг улкан армонларимдан бири бўлиши мумкин. Шу боисдан мен уни қачондир албатта кўришим керак. Оллоҳ насиб этса, албатта...

Шу куни оқшом Аврангбодга қараб жўнаб кетдик. 185 чақирим юргач, йўлда, одатдаги, дала шийпонларисимон «меҳмонхона»да омонат тунадик — ярмимиз ташқарида, ярмимиз машина ичидан...

ИККИНЧИ ТОЖ МАҲАЛ

26 август, пайшанба.

Эрталаб беш яримда яна йўлга тушдик. Ҳўқизларининг шохини қизилга бўйайдиганлар қишлоғидан, маймун, қўнғир мангуста, каклик, қарғалар уймалашиб юрган дараҳтзорлардан ўтдик.

Осмонобод деган жойда нонушта қилдик. Ҳамма жойда энг сероб нарса тухум қўймоқ эди, бу ерда тухум ейишмас экан. Баъзи эрқаклар ҳиндулар каби пешонасига қизил, кумушранг чизиклар, аллақандай шакллар чизиб олишибди.

Гўзал водий... Далалар бепоён: маккажўхори, кунгабоқар, қизилча, мош экилган... Шоли кўринмайди. Чунки бу томонларда сув кам экан. Баъзи экинларнинг нималигини билмадик. Ҳеч нарса экилмаган кенг далалар ҳам кўп эди — гўё ям-яшил чўл... Техниканинг тайини йўқ. Ҳар замонда битта-яримта тўрт фиддиракли кичкина трактор учраб қолади. Кўп жойларда ерни омочда ҳайдаб, культивация қилишяпти. Сигирларга сифиниб, ҳўқизларини аёвсиз ишлатишаркан, деган гап ўтди кўнглимдан.

Биз бораётган навбатдаги шаҳар бобурийларнинг олтинчи хукмдори, Шоҳ Жаҳоннинг учинчи ўғли Аврангзеб номига қўйилган Аврангбод эди.

Аврангзеб феъл-атвори ниҳоятда турфа, зиддиятли шахс бўлган. Мен илгари ўзим билган баъзи маълумотларга асосланиб, уни ўта жоҳил ва бешафқат подшо бўлган, деган тасавурда эдим... Акаси Доро Шукухнинг юзига қора суртиб, хароб бир филга ўтқазиб Деҳли кўчаларида сазойи қилдириши, кейин уни зиндинга ташлатиб, маҳсус ҳакамлар уни хоинликда айблашгач, бошини танасидан жудо эттириб, жасадининг ҳам кўчаларда сазойи қилдириши (кейин Хумоюн мақбарасига қўйилади), қолган ака-укаларига, отасига етказган озору мусибатлари ва бошқа, одамни даҳшатга соладиган ишлари кўп бўлган. Айни вақтда, баъзи ғалат тадбирлари сизни ўйлантириб, иккилантириб қўяди. Масалан, марҳум акаси Доро Шукухнинг иккинчи ўғлини тирик сақлаб, ўн йиллик ҳибсдан кейин озодликка чиқариб, ўзининг учинчи қизини унга хотинликка бериши, укаси Мурод Бахшнинг (Аврангзеб уни девонбеги Али Натсийни ўлдиришда айблаб, қатл эттирган) ўғли Иззат Бахшга ўзининг бешинчи қизини никоҳлаб берганлигини қандай изоҳлаш мумкин? Бу шунчаки одамгарчиликми ё қариндошлар ўртасидаги зиддиятларни, оғир вазиятларни юмшатиш учунми? Ё, бобурийлар сулоласининг тирқираб, йўқ бўлиб кетишидан хавотирга тушиб шу йўлни танлаганмикин?..

Бу учинчи ўғилнинг исми аслида Муҳиуддин Мұҳаммад бўлган. Отаси Шоҳ Жаҳон уни келажакда салтанатим вориси, таҳтимнинг безаги бўлсин, деган маънода эркалаб Аврангзеб деб атаган. Кейинчалик бу исм ёнига яна «Оламгир» (Оламни забт этувчи) деган сўз-исм ҳам қўшилган.

Аврангзеб 1618 йили 3 ноябр куни (баъзи маълумотларда 23 октябр) Ужжайн яқинидаги Дўҳад деган жойда туғилган. Отаси унинг тарбиясига алоҳида эътибор берган. Аврангзеб ёшлигиданоқ ҳарбий ишларга қизиққанидан жанг қилиши, қурол ишлатиш маҳоратини эгаллаб олган. Араб, форс ва ҳинд тилларини пухта ўрганган. Аврангзеб 1658 йили ака-укаларини мағлуб ва ғорат қилиб, отаси Шоҳ Жаҳонни Аградаги Қизил қалъага қамаб, ўзини шоҳ деб, номини эса «Абдул Музаффар Муҳиуддин Мұҳаммад Аврангзеб Баҳодир Оламгир подшоҳи ғозий» деб эълон қиласи.

Аврангзеб ниҳоятда тиришқоқ, серғайрат, шу билан бирга ўта қайсар, жангари одам бўлган. Шоҳ шахсиятидаги мураккабликлар унинг бутун ҳаёти, фаолиятида акс этиб турган. Айтишларича Шоҳ Жаҳон ҳибс-

далигида ота-бола (Аврангзеб) бир-бирига хат орқали мурожаат қилиб туришган, бироқ юз кўришмаган. Ана шундай алоқа номаларида ва бошқа ёзишма, маъруза, ўтиларида Аврангзебнинг дунёқараси, фалсафаси, эътиқоди, умуман бутун номаи аъмоли ўз ифодасини топган. Жумладан, «Мен парвардигор томонидан яшаши ва меҳнат қилиш учун яратилганман, фақат ўзимнигина эмас, балки энг аввало бошқаларнинг ҳузурини ўйлаш менинг шоҳлик бурчимдир. Халқимнинг баҳти—менинг баҳтим», — дейди бир жойда.

Дарҳақиқат, Аврангзеб эрта тонгда уйқудан уйро-ниб ярим кечагача давлат ишлари билан шуғулланган.

Мен учун қизиги яна шуки, Аврангзебни адолатли шоҳ сифатида таърифлайдилар. Масалан инглиз та-рихчиси Овингтон: «Бу улуғ мўғул адолатнинг асосий манбаи экан», деб ёзади. Ашаддий таҳт ишқибози, шоҳ бўлиш, салтанатни талашдек худбин мақсади кўзи-ни кўр, ақдини паришон қилган кимса, ниятини амал-га ошириш йўлида падари бузрукворини саккиз йил ҳибсда сақлаган, ака-укаларию ўз ўғлига ўлимнираво кўрган,раво кўргангина эмас, ўзи қатл эттирган ин-сон қандай қилиб, адолат манбаи бўлиши мумкин?

Аврангзеб сиёсати катта бобоси Акбаршоҳ сиёса-тига мутлақо қарши ўлароқ, ўз назариясига кўра, «Дорул ҳарб» («Кофиirlар мамлакати») бўлмиш Ҳиндис-тонни «Дорул ислом» («Мусулмонлар мамлакати»)га айлантиришни асосий шиор қилиб олган эди. Маж-бурий исломлаштириш ҳаракати ҳалқда қаттиқ нори-золиклар туғилишига, исёнлар юз беришига сабаб бўлди. Бобурийлар давлатининг мустаҳкам қалъаси дарз кетиб, чок-чокидан сўқила бошлади.

Аврангзеб зарб қилинган танга пулларга Оллоҳнинг каломи — «Қуръони карим»дан оятлар битишини, Наврӯз байрамини нишонлашни ман қилди. Саройда хонандалар, созандалар сақлаб, ўйин-кулги қилишларга чек қўйди, наша чекиши, қимор ўйнаш каби қабиҳ одатларни таъкидади, бузук аёлларга эрга тегиш ё мамлакат худудидан чиқиб кетишини қатъий шарт қилиб қўйди.

Аврангзеб нисбатан кўп яшади (88 йил) ва узоқ — эллик йил ҳукмдорлик қилди. Ҳаёти жангу жадаллар, исёнларни бостириш ва бошқа ташвишлар билан, но-тинч, бесарамжон кечди. Айниқса, умри охирларида унга қарши бош кўтаришлар (жумладан ҳиндларнинг «маратха» деб аталган мазҳабидагилар) кўп бўлди. Шоҳнинг таҳти ҳам, умри ҳам, хонадони ҳам таназул-

га қараб кетди. 1702 йили тўнгич қизи, ажойиб шоира Зебунисо вафот этди. Шундан кейин Аврангзеб бошига мусибатлар қаторлашиб келаверди. Икки-уч йил ичида у бир қанча жигаргўшаларидан — исёнкор ўғли (ахир нима бўлса ҳам фарзанд-ку) Акбардан, суюкли келини Жаҳонзебдан, синглиси Гавҳар Ородан, қизи Мехринисо ва унинг эри Иззат Бахш (Мурод Бахшнинг ўғли)дан, набираси Буланд Акбардан, кейинроқ яна икки набирасидан жудо бўлди.

Руҳан заифлашиб, курашлардан толиқдан Аврангзеб, иқтисодий жиҳатдан емирила бошлаган, фалаёнлар авж олган мамлакатни бошқаролмай қолади ва 1707 йили март ойида дорулбақога рихлат қилиб, бу ёруғ дунё ташвишларидан озод бўлади.

«Аврангзеб солиҳ инсон бўлишига қарамай, унга болаларидан буормади», деб ёзади бир олим. Афсуски, қисматнинг бундай бешафқат панжаси аксарият шоҳдарни четлаб ўтмаган. Чунки уларнинг ўзлари ҳам оталарига вафо, садоқат кўрсатиш, ёрдам бериш ўрнита, таҳт ишқида хиёнат қилганлар. Аврангзебнинг ўзий ҳам бундан мустасно эмас-ку. Лекин унинг ўғли Аъзам шоҳнинг онасига кўрсатган муруввати ибратлидир. Аврангободда Аъзам шоҳ томонидан онаси Робия Дурроний бегим хотирасига бунёд этилган мақбарани Ҳиндистонда «Иккинчи Тож Маҳал» дейишаркан. Дарҳақиқат, бу муаззам ва муҳташам обиданинг хусусан ташқи шакли-шамойили, ҳатто кираверишдаги ҳовузларгача гўё Тож Маҳалдан кўчирилган нусха эди. Биз бу иншоотни ўғилнинг онага бўлган садоқати, меҳри-муҳаббати, фарзандлик бурчининг мукаммал ижроси сифатида баҳоладик. Аврангободликларнинг бобурийлар руҳи-покига ҳурмати, қимматли бойлик ҳисобланмиш пурвиқор мақбара ва умуман тарихий ёдгорликка бўлган сидқидил муносабатларига, уни асраб-эъзозлашларига таҳсин айтиш жоиз. Аврангзебнинг суюкли хотини Дурроний бегим, яъни Она қабри устига ёпилган яшил рангли мато-мовут янгида, зарҳал жилолари товланиб турибди. Қабрданми, дахмаданми, атрофга қандайдир ҳушбўй ҳид таралади.

Айтишларича Аврангзебни Фотехгарга (Аврангободнинг аввалги номи) икки муҳим нарса умр бўйи боғлаб турган: биринчидан у умуман бу жойни ҳуш кўрган, иккинчидан шу жойга яқин Култободда унинг пири бўлган ва шу икки сабаб бирлан Аврангзеб Фотехгарга тез-тез ташриф буориб турган. Балки шу-

нинг учун ҳам бу шаҳар кейинчалик Аврангобод деб атала бошланган. Аврангзеб асли Аҳмад Нагар деган жойда вафот этган, лекин ўзининг васиятига биноан унинг жасади Сатвари тепалигидаги Хўжа Зайниддин Чештий (Салим Чештийлар авлодидан), яъни пири қабри ёнига дафн қилинган.

Дурроний begim мақбарасидан чиққанимизда қеч кириб қолган эди, шунга қарамай, шаҳар гарби-шимолидаги Сатвари тепаликлариға қараб жўнадик. Тўлқин ака билан Фаррух етиб боргунимизча қоронги тушиб қолади, тасвирга ололмаймиз, эртага эрталаб борсак яхши бўларди, дейишган эди, Зокиржон ака унамади. У раҳбар сифатида ҳам, шахс сифатида ҳам туттганини қўймас, гапидан, йўлидан қайтмас эди.

— Йўқ, — деди у қатъий, — ҳозир борамиз.

Дарвоҷе, боя доктор излаб юрганимизда, иттифоқо, худо ишимизни ўнглаб, бизга Шекхар исмли ҳинд йигитини дучор қилган эди. У туризм коллежи талабаси бўлиб, Ўзбекистон ҳақида анча маълумотга эга, бобурийларга ихлоси баланд экан. Шекхарнинг қалбидаги олижаноб орзулари ҳам бор эди. У Ўзбекистон билан Аврангобод ўртасида ўзаро саёҳатни йўлга қўйиш истагида ёниб юрганини айтади. Ўзбекистонга меҳр-муҳаббати сезилиб турарди. Сизларни менга худо етказди, «Сизлар билан учрашганимдан жудаям хурсандман, қўлимдан келган хизматимни аямайман» деб, бизга иккинчи Тож Маҳал ва бошқа обидаларни қўрсатган, ҳозир ҳам биз билан эди. У Аврангобод тарихи, Аврангзебнинг бу жойларни қандай забт этгани, чештийлар сулоласи ва бошқа тарихий воқеалар ҳақида завқ-шавқ билан гапириб борарди.

Шекхар Ўзбекистоннинг Ҳиндистондаги консулхонаси (Аҳмаджон Луқмонов) томонидан тарқатилган сўровнома (Ўзбекистон ҳақида)га қониқарли жавоб бериб, тегишли мукофотга сазовор бўлган эди. У гапни айлантириб яна саёҳатни ривожлантириш борасидаги ниятлари билан боғлар ва «Туризм-халқларни яқинлаштиради», дерди донолардек.

У Аврангобод иқлимининг Ҳиндистоннинг бошқа минтақалариға нисбатан юмшоқроқлигини айтиб, Сатвари тепаликларини таърифлай кетди.

Ботиб бораётган қуёшнинг алвон нурлари гўё бутун Аврангободга парча-парча бўлиб сочилиб кетгандай, қайси томонга қарасак, кўзларимизга шуълалар уриларди. Айниқса биз бораётган йўлнинг икки томо-

ни ям-яшил дала, дара, адирликлар бўлиб, атрофи унча баланд бўлмаган тоғлар билан ўралган, қуёш нурлари ана шу тоғлар кўксига урилиб чил-чил синарди-да, орқага қайтиб, майдаланган шиша синикларидай майсалар қатида живирлаб кўринарди.

Майда кўз гуллари тўқ қизил, паст бўйли, бутасимон ўсимлик-дараҳт сийрак дарага ўзгача файз бағишлаганди. Гулмухор — «ўрмон олови» дейишаркан. Чиндан ҳам у тундаги чўғдай милт-милт қилиб, товланиб турарди.

Ўнгдаги тепаликлар устида бир кўхна қалъа кўринди. Давлатобод деган у жой бир вақтлар пойтахт бўлган экан.

Ёнбағирлари ғоят баҳаво, сўлим адирлар аро ўтган айлана йўллардан баландга ўрлаб, кўзланган манзилга етканимизда, дарҳақиқат қоронғи тушиб бўлган эди. Бу ер тепалиқда жойлашгани ва сайёҳлар билан гавжумлиги жиҳатидан менга Арслонбонни эслатиб юборди. Сайлчиларнинг кўплигига сабаб бугун Зайниддин Чештий туғилган куни муносабати билан анъанавий хотира байрами бўлаётган экан. Ҳаммаёқ одам, машина, чироқлар, шиорлар, безаклар... Ҳар ер-ҳар ерда айиқ ўйнатувчилар, кўзбойлағичлар атрофига тумонат одамни йиғиб олиб, ҳар хил томошалар кўрсатишарди. Бир жойда дўмбирачи ноғорасини зарб билан уриб, ўртага-ерга ташланган пул атрофида айланиб-айланниб, сўнг ноғорага қорни билан ётган ҳолда, оёқларини осмонга кўтарганча бошини ерга эгиб, пулларни қўл ишлатмасдан у чаккасига, бу чаккасига ёпишириб олиб ўрнидан туриб кетяпти. «Ҳа, пул-а, пул...» дегинг келади беихтиёр.

Зайниддин Чештий қабрини, сўнг Аврангзеб мақбарасини зиёрат қилмоққа кирдик. Аврангзеб ғоят қаттиқ қўл шоҳ бўлган эса-да, қабр мақбарасиңинг содалиги бизни таажжубга солди. Кичкинагина, усти очиқ... Мақбарага «Мўғул империясининг шаҳаншоҳи Аврангзеб қабри» деб ёзилган эди. Дарвоҷе, ҳинд тарихчиси Жоду Нат Саркор ҳам Аврангзебни «Буюк мўғулларнинг энг буюғи» деб таърифлаган...

Зиёратдан қайтиб, шаҳар марказидаги тўрг қаватли, энг катта ва шинам «Равираж» меҳмонхонасига жойлашдик. Ички жиҳозларига ҳам гап йўқ, зўр. Умуман, Ҳиндистанда халқ ва сайёҳлар кўп бўлишига қарамай, меҳмонхона масаласи бутунлай ҳал бўлган экан. Биронта меҳмонхонада чакка томирингизга гу-

пиллаб уриладиган «жой йўқ» деган калимани эшитмайсиз. (Деҳлида биз арzonроғини излаб анча юрганмиз холос). Ўртачаларида ҳам сув, душ ва бошқа шартшароитлар жойида эди. Ресторанга кирдик. Тўла бир лиёла чой ҳажмида суюқ овқат-«чекан суп», қўғирма лағмонсимон қуюқ овқат (саккиз кишилик), тўртта пиво (0,7), олтига музқаймоқ ва чойи сулаймоний — 1463 рупий бўлди. Калькуттада 1300 рупийга чарм қуртка сотиб олганимни ёзган эдим, овқат нарх-навосини шундан чиқариб олаверинг... Лекин бу кун энг мазмунли кун, файзли, гўзал оқшомлардан бири бўлди... Аслида Аврангободда тунамай жўнамоқчи эдик. Тасвирчиларимизнинг Аврангзеб мақбарасини суратга олишолмагани боис, Зокиржон aka: «бўлди, бу кеча қоламиз, деди шартта ва чин юракдан. — Бобурийларга алоқаси бор қандай иш бўлса, қиламиз, кўрамиз. Керак бўлса, бир ҳафта ётамиз...»

ИЛҲОМ ПАРИСИ

27 август, жума.

Нонуштага биринчи қаватдаги қаҳвахонага тушдик. Деразадан меҳмонхонанинг ғарб томон ёнбошидаги мўъжазгина ҳовли-хиёбонча кўзга ташланиб турарди. Унинг ҳусни-жамолини бир ҳайкал жуда очиб юборган эди. Мен нонуштадан кейинроқ ўша ёқса ошиқдим ва эртаксимон ажойиб бир манзара-лавҳа қошида лол бўлиб қолдим. Тошлардан ясалган, тоғлар қуршови билан туташ соҳил манзараси шу қадар жонлики, гўё дарё бўйининг бир қисми шартта кўчириб олиб келиб қўйилгандай... Тошлар қуршовидаги каттароқ тошда қадди-қомати келишган соҳибжамол қиз ўтириби, бир қўлида кўза, бежирим оёқдари панжаларини дарё тўлқинларининг шўрттанг чанқоқ лаблари ялаб ўтмоқда. Яланг сёёқчалар шунчалар оппоқ, беғуборки, гўё, шоир таъбири билан айттанда, сув ана шу жонон оёқчаларга суркалиб, ўзини тозалаб, покизаланиб олмоқда.

Шу ўринда, яна Отойининг қуийидаги машҳур байти ёдимга тушди.

Ул санамки, сув яқосинда паридек ўлтуур,
Фояти нозиклигидин сув била ютса бўлур...

Ҳайкал шу қадар нафис ва жозибалики, нигоҳинизни узгингиз келмайди — чинакам санъат асари

дайсиз. Қиз сиймоси ва умумий ҳолати ҳам, менинг наздимда, ниҳоятдан ҳаётай эди: ним яланғоч... Бармоқларида қўша-қўша узук, билагида, тирсагидан тепада — елка пастида ҳам қатор-қатор билак узук, бўйнида шода-шода тақинчоқлар... Бу жиҳатдан бойвучча хоним, аслизода бегойимларга ўхшайди. Қалин соchlарининг бир қисми орқасига чигилинг қилиб турмакланган, қолгани елкаларида тўлқин уриб турибди. Белидан пастига ўралган гулдор сарийсининг этакларини гўё дарёдан эсаётган шабада оҳиста тортқилаб— ўйнамоқда. Қош-кўzlари, лаблари ҳам жуда латиф. Гўзал ҳинд раққосаларининг умумлашган тимсолимикин, деб ўйлайсиз, лекин кўзлари зангоридай туюлади ва фарбда гўзал аёл, она рамзи сифатида талқин этиладиган «Мадонна»ни ҳам эслатиб юборади. Хуллас, оқ ганчдан ишланган бу ҳайкал ҳатто қофозга мойли бўёқ билан чизилган расмдан ҳам силликрок, майнироқ, жонлироқ эди. Йўқ, у ракқоса ҳам, «Мадонна» ҳам эмас, бойвучча хоним ҳам эмас, у — илҳом париси, дейди ички бир нидо... Қизнинг ўнг қўлига тўти қўниб турибди. Соҳибжамол гўё ана шу дилқаш жонивор — ҳамдам, ҳамдард дугонаси билан тиляшмоқда, сирлашмоқда эди. Балки қиз сув баҳона, дийдор фанимат деб, висол учун кёлгандир соҳилга — ошиқ-маъшуқ паккасига. Балки хушторининг кечикаётганидан хавотирланиб, тўтини хабар олишга юбормоқчи бўлиб унга гап тайинаётгандир. Ёки, аразлашиб қолишган бўлса, тушларини сувга, дардларини қушга тўкиб solaётгандир...

Афсуски Илҳом париси билан хайрлашишга тўғри келди. Шериллар мени кутишмоқда эди. Мен ҳали бу ерга яна қайтиб келамиз-ку, деган юпанч билан машинага чиқдим. Яна кечаги жойга — Сатвари тепаликларига жўнадик. Шаҳардан чиққандан кейин йўл анчагача икки томондаги улкан, кекса баниян дарахтлари орасидан ўтиб борарди. Бу менимча Ҳиндистон табиатидаги энг ўзига хос мўъжиза ўсимликлардан бири, бўлса керак. Унинг бесаноқ шохлари чачала-чачала, шокила-шокила бўлиб ергача осилиб тушаркан-да, яна илдиз отиб кетаркан Табиатшунос бўлмасам-да, менинг ҳинд табиатига чандон қизиқишим, гул-даражатларининг номларини сўрайверишим, таржимонимизга эришроқ туюларди чамаси, баъзан эринмай изоҳлаб тушунтирса, гоҳо саволимга қисқагина жавоб қайтарар, айрим вақтларда ўзини эшитмаганга

солиб, индамай қўя қоларди. Зеро, Ҳиндистонда бир неча йил яшаб, ишлагани боис, унинг бунақа майдачуда масалаларга рағбати қолмаган бўлса керак. Гарчи, юракда табиатта қизиқиш кучли бўлсада, ботаника фанидан йироқлигим гўзал ҳинд заминининг гўзал манзараларини кўнглимдагидай тасвирлашга панд бераётганидан ўкинардим.

Шохи бир қулочли сигирларга дуч келдик. Бу ерда мол шохини ҳаворангга бўяш расм экан.

Сатвари тепаликларида яна одам кўп—кечаги сайл давом этаётган эди. Мақбаралар олдидағи кенг майдонда, баланд бўйли, шохлари тарвақайлаган дараҳтлар остида созандалар ҳинд классик куйини чалишиб, ўйин қилишмоқда эди. Бизнинг «Чўли ироқ» «Чоргоҳ»симон маҳзун оҳангли бу куйининг номи «Бейн бажа» экан. Сайлчилар орасида ҳинду ҳам, мусулмон ҳам, бошқа дин ва мазҳабдагилар ҳам бор эди.

Бугун ёруғда Зайниддин Чештийнинг пири Бурхониддин Чештий қабри, шунингдек, ёнма-ён қўйилган Аврангзебнинг ўғли Аъзам шоҳ, унинг хотини, пирининг қизи қабрларини зиёрат қилдик. Яна Аврангзеб мақбарасига кирдик. Қабр тепасидағи бир туп сершоҳ садарайҳон қариб, барглари тўкила бошлаган эди. Райхоннинг нега фақат бир туплигини сўраганимизда, бу ҳам Оламгир шоҳ истаги эканлигини айтишиди. Аврангзеб «мақбарам содда, усти очиқ бўлсин, осмонни кўриб ётай (дунёга тўймаган бўлса керак-да); қабрим тепасида бир туп райҳон ўсиб турса бас», деб васият қилган экан.

Мақбара аввал бундан ҳам содда бўлган, яъни ёғочдан қилинган, 1921 йили маҳаллий ҳукумат қарори билан пол ва деворлари мармардан қайта тикланган экан.

Зиёратдан қайтгаҳ, Шекхар бизни яна шаҳар бўйлаб олиб юрди. Биз ҳар қадамда, кўча бўйлари, йўлакларда сим панжара билан ихота қилиб қўйилган кўчатларга дуч келарканмиз, Ҳиндистонда дов-дараҳт нима учун кўплиги сирини англаб борардик.

Идоралар ва бошқа бинолар киравериши, йўлакларига зеб бериб турган бир дараҳт бор эди, уни ашока дейишаркан. У жуда ажойиб эди: узун-узун, ялтироқ барглардан гулчамбар ясаб, ўраб қўйилган баланд ва йўпон устунга ўхшарди.

— Бу дараҳт фақат бизда бўлади, Америкадаям, Сизлардаям ўсмайди, — дея изоҳ берди Шекхар билағонлик ва ўзича ишонч билан (у ботаник ҳам экан).

Аврангобод унча катта шаҳарга ўхшаб кўринмасада, сафкам бир миллион аҳолига эга эди.

Шекхар Жайсавалнинг кеча берган ваъдасига биноан (у анча ташкилотчи ҳам чиқиб қолди), тушга яқин журналистлар, маҳаллий газеталарнинг вакиллари биз билан мулоқотга келишиди. Улар орасида ҳиндий, урду, маратха тилларида бир юз йигирма минг нусхада чиқадиган «Локмат» газетасидан Саттиш Судами, йигирма тўрт минг газетхонга эга «Аврангобод-таймс» рўзномаси мухбири Аҳмадхон (унга «тақсир» деб мурожаат қилишарди ҳамкаслари), «Локмат-таймс» газетидан Имтиёз Жалил ва бошқалар бор эди.

Одатдагидай аввал мезбонлар бизга саволлар беришиди. Зокиржон ака Ўзбекистон ва экспедиция ҳақида гапирди. Савол бериш навбати бизга етганда мен уларга шундай деб мурожаат қилдим:

— Биз ўнлаб, йигирмалаб ҳинд шоир-ёзувчиларини ўқиймиз. Токурнинг ўнлаб катта-катта китоблари ўзбек тилида қайта-қайта нашр этилган. Сизлар ўзбек адиларидан кимларни биласизлар? Масалан, Навоий, Бобур асарларини ўқийсизларми?

Журналистлар елка қисишиб, бир-бирларига қарашди, ва... ўзбек адабиётини, Навоий, Бобурларни яхши билмасликларини эътироф этишиди. Улар Баҳодир шоҳ II нинг яхшигина шоир бўлгани, «Зафар» тахаллуси билан шеърлар ёзганини билишаркану, лекин Зафарнинг бобокалони бўлган Бобурнинг «Бобурнома»сидан ҳам, бошқа асарларидан ҳам, ғазалиётидан ҳам деярли бехабар эдилар. Бобурни фақат шоҳ сифатида эшлишган ёкан.

Шекхар Жайсавал ҳамкасларининг биз учун ноҳуш жавобларидан хижолат чекиб, Навоий асарлари бизга энди етиб кела бошлади, ўқияпмиз, деб қўйди.

Биз Бобурнинг ўзбеклиги, Андижон шаҳрида туғилганини айтганимизда аврангободлик журналистлар ҳатто ҳайратта тушишиди. Бу ҳол менга уларнинг Бобур ва бобурийлар ҳаёти, демакки ўз тарихларига ҳам жиiddий қизиқмаганликлари оқибатидай туюлди.

— Бу гап биз учун янгилик бўлди,— деди Имтиёз Жалил. — Газетага ёзажак мақоламга «Бобур мўғул эмас, ўзбек», деб сарлавҳа қўяман.

Мен Пушкиннинг бир шеърини эсладим:

*Ватаним одатин бегона элда
Мен муқаддас билиб бажармоқдаман:*

*Баҳор байрамида — гўзал сайилда
Күшчага эрк бериб учирмоқдаман.*

*Кўнглим шундан топар тасалли — ором;
Худодан нолишим ўринли эмас,
Ахир, мен озодлик этолдим инъом
Ақалли биргина жонга бу нафас!..*

Биз ҳам ҳозир тарихий аҳамияти буюк бир ҳақиқатни бир неча журналист онгига етказолганимиздан мамнун эдик...

Шу ерда мен яна Ўзбекистонга, Бобурга меҳри ба-ланд ва уларни ниҳоятда яхши биладиган бошқа ҳинди-стонлик ижодкорларни эсладим. Ўзбек халқини, унинг тарихи, адабиётини, маданиятини ўзининг ҳинд халқига танишириш мақсадида ўзбек диёрида бир неча йиллаб яшаган ажойиб фидои ҳиндларни биз ҳам яхши биламиз ва юксак қадрлаймиз. Бу борада сўз кетганда лакновлик Манзар Салим албатта хаёлмидан ўтади. Фидои инсоннинг жасоратига, матонатига, тантлигига, ҳалоллигига қойил қолмасликнинг сира иложи йўқ. Тошкентда бир ўғил уч қиз билан (рафиқаси Муштар Жаҳон ўрганилмаган иқлимига мослашолмай, Ҳинди-стонга қайтиб кетади) қарийб ўн беш йил яшаган ва ўзбек адабиётидаги жуда кўп нодир асарларни меҳр-муҳаббат билан, катта ихлос билан урду тилига ўтирган. Манзар Салим таржимасида чол этилган китобларимиз ўттиздан ортиқ. Булар орасида Ҳамза, Зулфия шеърлари, Faafur Гуломнинг «Шум бола»си, Ойбекнинг «Қутлуғ қон», Асқад Мухторнинг «Опа-сингиллар», Одил Ёкубовнинг «Улугбек хазинаси», Пиримқул Қодировнинг «Бобур» романлари, ўзбек ёзувчиларининг «Ҳикоялар»и ва бошқа йирик ҳажмдаги асарлар бор.

Манзар Салимнинг «Алломиши» достонимиз ҳақида айтган фикрлари, ўзбек маданий меросига берган баҳосини бир ўқинг-а («Алломиши»ни таржима қилиш тавсия этилганда таржимон шундай андиша билан қайтарган): «Ўқувчиларни ҳам, ўзбек халқини ҳам алдаш ниятим йўқ. Бундай қийин жанрга умримда дуч келмаганман. «Алломиши» билан жиiddий танишиб, ўзбек халқининг ижодий мероси бу қадар бойлигидан яна бир карра ҳайратта тушдим. Хусусан бу меросингизни пул ёки бойлик эвазига таржима қилдираман, деб уринмангиз (муҳарририят томонидан «Алломиши» таржимаси учун ортиқроқ қалам ҳақи ваъда қилинганига

ишора — К. К.). Бунинг учун мутаржим онадан ўзбек бўлиб туғилмоғи лозим...»¹

Ўзбек маданиятини шу қадар чуқур ҳис этадиган ҳинд дўйстларимиз ҳаққи-хўрмати, аврангободлик айрим журналистларнинг Бобур ижодини яхши билмаганидан ортиқча ўқинмасак ҳам бўлади.

Дарҳақиқат, шу куннинг эртасигаёқ (1993 йил, 28 август) «Аврангобод таймс» кундалик газетида «Шаҳаншоҳ Бобур Ўзбекистоннинг Андижон шаҳридан экан. Тарихий кашфиёт» сарлавҳали мақола босилиб чиққан бўлиб, унда ватандошимиз Заҳиридин Муҳаммад Бобурнинг кимлиги, Ҳиндистондаги бобурийлар салтанатига қандай асос солингани, «мӯғуллар» атамасининг католиги, Ўзбекистон, Бобур номли халқаро илмий экспедиция фаолияти ва бошқа масалалар шарҳига анча кенг ўрин берилган эди.

Давра сухбатидан кейин Шекхар бизни Жайпур йўлигача кузатиб қўйди. Шаҳардан чиқишимиз билан ҳайвонлар галасига дуч кела бошладик. Сигирлар, ҳўқизлар, бузоқлар йўлнинг қоқ ўртасида бемалол юришар ё хотиржам кавш қайтариб ётишар, умуман ҳаракатга, транспорт қатновига жуда ҳалал беришарди. Гўё жониворларни безовта қилишга ҳеч кимса ботинмасди (балки бу ҳақда умуман ўлашмас). Назаримда ҳиндларининг истеъмол сўзлари луғатида «хўш!», «кет!» «кишт» деган калималар йўқ эди... Ҳатто кўчанинг ўртасида машина уриб, ўлиб ётган ит, мушукни ҳам четроққа олиб қўйицмас экан.

Шимолга қараб боряпмиз. Қўёш орқамизда, чапроғимизда (Ўзбекистон ҳам ана шу тарафда) қолмоқда. Бу ёқларда палма кам, шоли ҳам кўринмайди, пахтазор кўп, лекин эндиғина шоналаган фўзалар ола, сийрак, баланд-паст эди.

Кечки томоқдан кейин, соат тунги ўн, бирларда машина рулига Зокиржон aka ўтириб, Обиджон акага дам берди. Мен «штурман» — бу сўзнинг асли луғавий маъноси бошқача бўлса ҳам,.. биз ҳайдовчини зериктирмай, уйқудан чалғитиб борувчи шерик деган мазмунда ишлатардик. Анча юрганимиздан кейин тасир-тусир бўлиб қолди. Тушиб қарасак, орқадаги балонлардан бири йиртилиб кетибди. Секинроқ юравердик. Кеч бўлгани учун қатнов сийрак эди. Баъзан анчагача ҳам йилт этган чироқ кўринмасди — на йўл

¹ «Халқ сўзи» рўзномаси, 1991 йил, 30 июл.

ва на атрофда. Икки ён қуюқ дарахтзор. Ваҳимали туюлади. Балон «тарс», «тарс» қилиб келяпти. Кичикроқ бир довондан ўтяпмиз. Ойнани қия очсан, чийиллаб шамол киради. Энг баландда тўхтадик. Ҳавоси бирам тоза. Осмон яқин. Норасида ой кучсизгина нур сепмоқда. Лекин анча-мунча булат ҳам бор. Мен анчадан бери йўқотиб юрган қадрдон «Етти оғайним»ни бу жойларда ҳам тополмадим. Умуман Ҳиндистон осмонида юлдуз камроқдай туюларди менга. (Чанг, губорнинг кўплигидан бўлса керак).

Тез юриб бўлмайди. Яхшигина йўл тезда-тезда «айниб» туради. Баллон тарсиллаши охир асабларни ҳоритди. Тунги соат иккilarда тўхтадик. Улкан баниан остидаги чойхонанинг йўловчилар учун мўлжалланган тўқима каравотларида Зокиржон ака, Тўлқин ака — учаламиз ётдик. Бошқалар машинада, ўтирган жойларида ухлаб қолишганди.

Банияннинг арқонсимон новдалари учи ерда судралиб ётар, улар тун қоронфисида илонга ўхшаб вахимали кўринарди. (Қаердадир бу «илдиз» — халинчакларга маймунлар осилиб ўйнаётганини кўриб эдик).

Оромбахш шабада фирм- фирм эсиб турибди. Фақат, дарахт шохларига макон қуриб олган шанғи қарғалар қағиллашиб безор қиласарди. Чарчоқ, уйқу истаги барабибир устун келди. Аммо, барабибир муттаҳам қарғалар шанғиллашидан уйғониб кетдим. Бунинг устига, таажжубки, совқотиб қолибман (устимга юпқа чойшаб ёпинган эдим).

Соат беш ярим бўлган экан. Бошқалар ҳам уйғонишиди. Жўнадик.

ҚУРОЛИМИЗ ПИЧОҚ ЭДИ...

28 август, шанба.

Тонг росмана отганда баллон алмаштиридик. Икки соатлардан кейин яна довон бошланди. Қуюқ дарахтзорли довон патирдай-патирдай япроқди, ёнгоқсимон дарахтлар... бироқ, меваси кўринмайди. Умуман, Ҳиндистон ҳудудида дарахт турлари тез-тез ўзгариб тураркан (бизда, Фарғона водийсида юрсангиз ҳам, Сурхондарёга борсангиз ҳам йўлнинг икки томонида асосан тутқатор, қора толу мирза теракни кўрасиз)...

Бобур авлодлари билан бўлган учрашувимиз, хусусан, жажжи, ёқимтой қизалоқ Африна хаёлимдан кетмаяпти. Айниқса, унинг жилмайиб, салгина уялиб туриши, жажжи кафтчаларини ияги остига олиб бориб, миттигина жуссасини хиёл олдинга эгиг, таъзим билан ҳиндча салом бериши нигоҳимга муҳрланиб қолган эди...

Сигир соғаётган ўспирин болалар, катта ёшдаги эркаклар хаёлимни чалғитиб (аёл кишининг сигир соғаётганини кўрмадим), велосипид минганд қизлар, мотоциклни шиддат билан ҳайдаб бораётган аёллар ҳайратимни ошириларди. Қизлар, жувонлар эркакларга нисбатан шўхроқ, шаддотроққа ўхшайдилар. Ҳиндларнинг гапириш, муомала усуллари ҳам бошқачароқ эди, яъни улар сўзлаётганда хатти-ҳаракатлар билан ҳам тингловчига мақсадини яхшироқ англатиш пайидан бўлишарди. Баъзан фақат имо-ишоралар билан ҳам чекланиб қўя қолишаркан. Эркагу аёл, каттаю кичик ўртасида энг кўп урф бўлган имо-ишора оҳиста бош чайқаш, тўғрироғи, ияк чайқаш бўлиб, бу «хўп бўлади», «маъқул», «яхши», деган маъноларни англатарди. Бундай имога дастлаб дуч келган одам «йўқ, бўлмайди», деялти деб ўйлаши турган гап.

Йўл-йўлакай кўнгил тортадиган озодароқ ошхона истаб, соат ўн бирларда нонушта қилдик. Озгина юриб, Индёр деган шаҳарчада баллон камирларини яматдик. Сал хотиржам бўлиб, соат бир яримларда яна йўлга тушдик. Шу ердан шу вақтдан яна ҳарорат кўтарилиб, бетоқатлана бошладик. «Тойота»миз кондиционери ҳам ташқаридағи иссиқ ҳавони «таржима» қилиб беришга улгурмаяпти...

Икки соатлардан кейин ёмғир шундай қўйдики, машинанинг ичи ҳам ваҳима бўлиб қетди. Нима ҳам дердик—ҳинҷ табиати, иқдимининг шундоқ нафмалари, ўйинлари бор экан...

Биора шаҳри оstonасида йўл иккига айрилди: ўнгга Аграга, чапга — Жайпурга кетиларди. Биз яна 480 чақирим юришимиз лозим эди. Яшил чўл (яъни дарахтсиз ерлар)дан ўта бошладик. Йўл гоҳ, яхши, гоҳ-ёмон...

Қоронги тушди. Ўн беш чақирим юрилгач, чорраҳа ва автомобил назорати пости келди: «Йўл хатарли, қароқчилар бўлиши мумкин, уч-тўртта машина йифилса, қўшилиб кетасизлар», деб тўхтатиб қўйишиди. Биздан ташқари битта юқ машинаси ҳам бор эди. Қаҳва ичиб, кута бошладик. Машина кам бўлсаям, одам кўп: у ер-бу ерда тўп-тўп бўлиб туришарди. Ваҳимали миш-

мишлар.... Аҳмад Сингх дегани бормиши... Жуда ашаддий эмиши... Кеча кечаси тўртта машинани тунашибди...

Ростдан ҳам йўл хавфли шекилли, биздан кейин анчагача ҳам биронта машина ўрмалаб келавермади. Бир вақт юк машинасининг ҳайдовчиси ёнимизга келди. Унинг соч-соқоллари ўстан, ўнг чаккаси ва кўзининг ёнидан яраланганми, қўшув қилиб лейкопластир ёпиштириб олган, қисқаси шубҳали фикр уйғотарди. «Важоҳати қароқчиникидан ҳам баттар-ку, Аҳмад Сингх дегани шу эмасмикин иш қилиб...» деган ўй келади хаёлингизга.

— Йўлда бир кўприк келади — паст, машиналарнинг ости тегиб қолиши мумкин, бир оз айланиб ўтадиган бошқа йўл бор, ўша томонга юриш керак, деб тушунтира бошлади бизга. Унинг ўзига ўхшаган шериги сал нарида айланиб юрибди. Кўзлари, қарашлари бежога ўхшайди.

Юк машина ҳайдовчиси оддимиздан кетди. Биз ўзимизча муҳокама қилиб, ҳар хил тахминлар айтдик. Бир оздан сўнг у шериги билан келди.

— Кеч қолиб кетяпмиз, бир-биримизга ҳамроҳ бўлиб жўнаверайлик. Қароқчилар қечча тунашган бўлса, бутун йўлга чиқишга қўрқишиди, — деб бизни ташвиқ қила бошлади. Кейин у: постдагилар атай ваҳима қилиб туришиди, уларниям нафси бор, озгина «йўлини» қиласак, ўтказиб юришиди, — деди аста шивирлаб.

Лекин бизнинг иккиланганимизни кўриб, булардан шерик чиқадигангага ўхшамайди, деб ўйлашди шекилли, шартта орқасига бурилишиб, постга кириб кетишиди ва у ердан тезгина қайтиб чиқишиди, машинани юргизиб, шиддат билан жўнаб юборишиди. Биз ҳам таваккал қилиб юк машина орқасидан йўлга тушдик. Қароқчилар Бобурни тушунмасаям, мусоғир-меҳмонни тушунар, аяшар...

Одатдагидай, икки ён дараҳтзор, чироқ кам, кўп жойлар умуман қоп-қоронфу. Ҳадемай, юк машинасига етиб оддик. У боягидек шиддат билан эмас, оҳиста борарди. Йўлга бир машина сифади холос. Бизда шубҳа ва ҳадик уйғонди. (Киноларда бундай маҳалларда сирли, ваҳимали мусиқа бошланади). Олти чақиримча юрганимизда йўлда тўхтаб турган бир юк машинасига рўпара келдик. Оддимизда кетаётган машина ҳам тўхтади. Ҳайрон бўлдик: ахир биздан аввал постдан бошқа машина ўтмаганди-ку... Ҳар кимнинг кўнглига не хаёллар келди-ўзларига маълум. Ҳарқалай, ҳамманинг юра-

гига ваҳима ўрмалагани аниқ эди. Бу ҳолатни ошкора муҳокама қилишга тушдик. Иккала юқ машинасининг ҳайдовчилари олдиндан маслаҳатлашиб олишган бўлсанчи?.. Ҳаммамиз беихтиёр ҳушёр тортдик ва «мудофаа» ҳақида бош қотира бошладик. Албатта бу гаплар ҳозир менинг ўзимга ҳам кулгили туюляпти, лекин ўша пайтдаги аҳволимиз сирам кулгили эмас эди. Нотаниш жой, атроф жангл-ўрмон. Бунинг устига постдаги огоҳлантириш ва «миш-миш» лар...

Бизда ҳатто белкурак ҳам йўқ, фақат совға учун олган Қорасув ва Шахрихон пичоқларидан бор эди холос, бунинг ҳам биттасини Калькуттада «урдириб» юборганимиз... Анча-мунча пулларимизни ўриндиқ филофлари орасига ва бошқа жойларга беркитдик, ойна пардаларини жипс тортиб пичоқларни яланғочлаб ушлаб олдик.

— Сигнални босинг! — деб буюрди Зокиржон ака ҳайдовчимизга. — Босинг! Қаттиқроқ!.. Босинг яна!..

Обиджон ака машина сигналини жон-жаҳди билан кетма-кет босиб берган эди, юқ машиналари бирдан силжиб юборди. Машина рулига Зокиржон ака ўтиреди-да, шиддат билан газни босди. У бирдан юқ машиналарини қувиб ўтишни мўлжаллаб қолди. Ўнг томондан-ку ўтишнинг иложи йўқ, чап тараф ҳам ўт-ўлан билан қопланиб ётгани учун кўкатлар тагида нима борлигини (қаттиқ ерми, ариқчами?) билиб бўлмасди. Зокиржон ака нима бўлса, бўлди, деб чап ёнга (аслида чап томондан қувиб ўтиш мумкин эмас) солдириб юборди. «Тойота»миз тарақа-туруқ қилиб, чанг-тўзонни осмони фалакка кўтариб юқ машиналари бортига теккудай бўлиб, ёнбағирликка ағанай-ағанай деб олдинга ўтиб олди. Менимча иккала ҳайдовчининг ҳам эсхонаси чиқиб кетди-ёв...

Орқамизга қарай-қарай кетяпмиз. Зокиржон ака тезликни пасайтиришни ҳам ўйламасди. «Штурман» Аҳмаджон бурилишларни олдиндан огоҳлантириб—чап, ўнг, босдик!.. деб борарди. Зокиржон ака йўлга қараб эмас, гўё «штурман»нинг даъватига қараб тезликни ё оширад ё пасайтиради. Юқ машиналари анча ортда қолиб кетган бўлса-да, ҳамон кўнгиллар батамом тинчигани йўқ эди. Йўл ҳам яхши эмас, назаримизда йўлимиз ҳеч унмаётганга ўхшарди. Кўпригини сув босиб ётган дарёга етибгина тўхтадик ва бу ердан ўтиб бўлиш-бўлмаслигини аниқлаш учун ерга тушдик. Сувни кечиб кўрдик: ости, яъни кўприк бетондан, мус-

таҳкам эди. «Отатой»ни; яъни «Тойотани «чу» деб олға босдик. Кўприк тор лекин анча узун эди. Сувни «торпедо»каби икки томонга ёриб бораётган машинамиз бирдан юмшоқ жойга санчилиб, тўхтаб қолди. Обиджон ака бир-икки орқа-оддига юргизиб кўрган эди, баттар ботиб кетди. Кейин ҳаммамиз ечиндик-да машинадан тушдик. Сув илиқ ва қуюқ, ёпишқоқ эди. Болдиrimиздан келадиган сувнинг ости кўприк эмас, шағалли қирғоқ эди. Экспедицияга тайёргарлик қўриш жараёнида белкурак ҳақида кўп гапирудигу лекин олиш эсдан чиқсан эди. Шунаقا қадри ўтдики, асти қўйинг. Фидираклар остидаги шағални тирноқларимиз билан ковлаб, ҳовучларимизда ола бошладик. Собиржон ака «Ҳа, азаматлар...» деб турибди. Фарруҳ бўлса ушбу ҳолатни телетасвирга олиш билан овора. Уям ўз ишини битиряпти-да. «Эчкига жон қайфу, қассобга ёғ, дегани шу-да», дея ҳазиллашдик...

Биз олиб ташлаган шағал ўрнини шитоб оқин яна бир зумда тўлдириб қўяр ё машина озгина олдинга жилиб, яна тиқиларди. Тошда юришга ўрганмаган оёқларимиз безиллаб, тирноқларимиз остига қум кириб, ачишà бошлади. Фақат олди томонимизда, анча узоқда биргина чироқ милтиллаб кўринади. У жойнинг нималигини тахмин ҳам қилолмадик. Чунки теваракда йилт этган бошқа нур кўзга чалинмасди. Вакт эса тобора тун қаърига кириб борарди. Ҳар замонда боягилар келишмаяптими, деб орқага ҳам қараб-қараб, қароқчи сифат ҳайдовчининг йўл ҳақидаги огоҳлантиришларини эсладик. Демак, у мана шу жойни назарда тутган экан. Демак, улар ўzlари айтган иккинчи йўлдан кетишган...

Хуллас, узоқ, тахминан икки соатча (соатга қараб қўйиш бирорвнинг хаёлига ҳам келмаган экан) асов сув ва қайсар тош-шағаллар билан олишдик ва ниҳоят соат тунги ўн бирларда худо омад бериб, қуруқликка чиқиб одик.

Жуда толиққан бўлишимизга қарамай, йўлга тушдик. Бу ердан тезроқ узоқлашиб кетишимиз керак эди. Йўлда тунайдиган жой-дала меҳмонхоналари ҳам учрамади. Мен кучли уйқу элтаёттанини сезиб борардим. Бир вақт кўзимни очсам, машина йўл четида тўхтаб турибди. Ҳамма ўтирганча ё ёнбошлаб уйқуга кетган эди. Соат тунги уч эди. Рулга Зокиржон ака ўтириди. Лекин у ҳам чарчаган эди, кўп юрмай, машинани четга олиб, тўхтатди ва рул чамбарагига бошини қўйганча мизфий бошлади.

Соат олтиларда яна йўлга тушдик. Бахаш (Bahas) дарёсидан ўтётганимизда Жайпурга 80 км қолган эди. Кўприк узун ва маҳобатли эди, бироқ ўзанда сув оз — Қорадарёга ўхшаб ёйилиб, шилдираб оқарди. Кўприк тепасидан тортилган электр симларида бир жуфт эркин, озод зангори тўти ўтиради. (Мен авваллари тўтилар фақат қафасда боқлади, деб ўйлардим).

Кўприқдан ўтиб бир қишлоққа кирдик ва нонушта қилдик. Бу ерда асосий улов воситаларидан бири — тую экан. Катта-кичик чўчқалар одамларга аралашиб, кўчанинг у бетидан бу бетига ўтиб, тимирскиланиб, ахлат титиб юришибди. Таажжубки одатда семиз қуртдай думаланиб юрадиган бу жониворлар жуда ориқ эди.

Хиндистон қишлоқдарининг бирида капитар, иккинчисида эшак, яна бошқасида ит ё бошқа ҳайвон кўп, аммо сигир, эчки ҳамма жойда сероб эди.

Дарвоқе, бу кечада яна қишлоғимиз тушимга кирибди. Сафардан қайтиб борган эмишман. Турсуной (оилас), акам, келинойимлар юришибди. Отам янги сабзи тўн кийиб, белини боғлаб олибди. Мендан сал узоқроқда экан, нимагадир у билан ҳаммадан кейин кўришибман ва бундан ўзим хижолат бўляпман. Кечаги баҳималаримизда руҳи безовта бўлди чоги...

Жайпурга эллик чақирим қолганда қақсов, шўрхок ерлар бошланди: денгиздан анча баланд, ер ости сувлари чуқурроқда шекилли...

Иккинчи-учинчи қаватлари ҳам кўркам, чиройли, фақат пойдевори паст ва кўримсиз бинолар шаҳарга яқинлашиб қолганимиздан далолат берарди. Соат ўн яримларда Жайпурга худди Андижондан Намангандаги киргандаи кириб бордик. Айни вақтда бу кўча ўртадаги бетон тўсиқ, ундаги устунлар ва рекламалари билан Дехлидаги биз турган кўчани ҳам эслатиб юборарди.

«Абифуя» (Aditya) деган меҳмонхонага жойлашгач, тушлик қилдик. Ресторанда. Дастурхон бой ва нознеъматлар ранг-баранг бўлди. Тайинлаганимиз учунми, овқатлар учча аччиқ эмас эди. Қатиқ, ҳар турли салатлар... Хуллас, кўнгилдагидай. 850 рупий бўлди. Икки-уч кундан бўён ётиш-туриш, емоқ-ичмоқнинг тайини бўлмаётган эди, душ, яхши тушлиқдан кейин анча ўзимизга кедик. Раҳбаримиз бутун ҳуррият эълон қилди. Бир оз дам олгач, Тўлқин ака иккимиз кўчага чиқдик. Такси (скутор) ёллаб, шаҳар марказига бор-

дик. Дўйконлар, бошқа савдо расталари ҳам якшанба куни ишламас экан. Одам кам, томоша қиласиган жойларни тополмай, қайтдик. Тил билмагандан кейин қийин-да.

Мехмонхонада майда-чўйда хўжалик ишлари билан шуғулландик. Телевизор кўрдик. Беш-олтита канал ишлайди, биридан иккинчисига олгинг келаверади...

Кечки овқатни хоналарга олиб келиб беришди. Бир шишадан пиво билан. Шундан кейин биз ҳаммамиз Зокирjon aka хонасига йиғилиб, соат тўққизни сабрсизлик билан кута бошладик. Бундан бир неча кун аввал ҳинҷ телевидениеси орқали Ҳиндистон тарихи ҳақида кўп қисмли видео фильм берилаётгани, бугун эса ана шу фильмнинг Ақбаршоҳга бағишиланган қисми кўрсатилажагини эшитган эдик. Ниҳоят, шу фильмни кўришга муяссар бўлдик. Гарчи яхши тушунмаган бўлсак-да (Аҳмаджон ҳам ҳаммасини таржима қилиб, изоҳлаб беришга улгурмасди), бу кўп қисмли фильмда бобурийлар ҳаёти ва фаолиятига алоҳида қисмлар бағишилангани, уларга, жумладан бугунги қисмининг бош қаҳрамони бўлмиш Ақбаршоҳга меҳр-муҳаббатнинг юксаклигидан ниҳоятда мамнун бўлдик. Тасодифми, омадми — Покистонда ҳам, Ҳиндистонда ҳам бобурийлар тўғрисидағи видофильмларга тўғри келдик ва кўриб олам-олам завқ олдик, қалбларимиз фурур, ифтихор туйғуларига тўлди.

АҚБАРШОҲНИНГ ҲАЙРАТОМУЗ ҶАЛЛАЛАРИ

30 август, душанба.

Мириқиб дам олиб одатдагидай соат олтиларда турдик. Собиржон aka, Тўлқин aka учаламиз иккинчи қаватдаги 106-хонада эдик. Қават балкони қаттагина бўлиб, майсазор қилинган, таянма курсилар қўйилган эди. Тонгги суҳбатни шу ерда ўтириб бошладик. Ёқимили шабада эсиб турибди. Ажриқ, калта қилиб ўрилган, худди гулсиз яшил гиламга ўхшайди. Умуман, ажриқ ўстириш, унга шакл бериш, яшил майдон-хиёбон бунёд қилишни Ҳиндистондан ўрганса арзир экан.

Рўпарада пастак томлар... Тунука, шиферлари устидан тош фишт ва бошқа нарсалар бостириб қўйилган. Уйлардан нарида, дараҳтлар орасидан баланд қаватли замонавий бинолар кўриниб турибди.

Шаҳар айлангани чиқдик. Жайпур одамлари бошқа шаҳарларга қараганда анча буғодай ранг эди. Туя қўшилган арава тез-тез учрайди. Мевалардан банаң кўп экан. Папайя — қовун дараҳти ҳам нисбатан сероб эди. Хуллас, Жайпур анча қурғоқ шаҳар бўлиб, намлик у қадар юқори эмас экан.

Дўйонларда Кашмир гиламдўзлиги маҳсулотлари кўп эди.

— Аслида Кашмир, — дея изоҳ берди Аҳмаджон, — шол билан машҳур, Ҳайдаробод — марвариди билан. Панжоб — ҳунармандчилиги билан, Калькутта — чарм курткаси билан, Калхакари — шиппаги билан, Бомбей — қимматчилиги билан, Жайпур эса, гиламчилиги, каштачилиги билан донг чиқарган...

Жайпурнинг биз учун аҳамиятли яна бир жиҳати бор. Бу — менинг ҳинд ҳамкасб-ҳамқаламларимнинг ўзбекларга бўлган муносабати... Ёдингизда бўлса, юқорида ўзбек-ҳинд адабий алоқалари, ўзаро дўстлигининг қадимишлиги борасида сўз кетганда, ҳар икки ҳалқ оғзаки ижодида мавжуд ва машҳур бир ривоят — бухоролик Иzzатбек ва панжоблик соҳибжамол қиз Сўхниларинг соф муҳаббати тўғрисидаги афсонани эслаган эдик. Жайпурлик таниқли шоира Лакшми Кумари Чундават хоним (у 1960 иили Ўзбекистонда бўлган) бизни ана шу машҳур ривоятнинг бошқа бир вариантидан хабардор этади ва у ривоят мазмумни, моҳиятини, аҳамиятини илҳом ва ҳаяжон билан ҳикоя қилиб беради. Заҳириддин Мұҳаммад Бобурга бағишланган рисолалардан бирида келтирилган бу қимматли ҳикояни биз ҳам ўз ўқувчиларимиз эътиборига ҳавола қилишни маъқул кўрдик.

«ЎЗБЕК ЙИГИТИ ЖАЛОЛ ВА ҲИНД ҚИЗИ БУБНАНИНГ МУҲАББАТ ДОСТОНИ

Бизнинг Рожастон қишлоқларида яшовчи кишилар ўзбек ҳалқининг аксар сўзларини билишлари сизларни ажаблантирса керак. Бирор хушқад ва бақувват кишини кўрганларида, албаттаги: — «Бу ўзбек-ку», — дейишиади, чунки Бобур аскарлари ичida баланд бўйли бақувват кишилар кўп бўлган.

Ўзбек тилидаги кўп сўзлар Рожастон тилига ҳам сингиб кетган. Жалолхон исмли ўзбек йигити — ҳалқ қўшиқлари ва достонларимизнинг қаҳрамонидир. Асли

бухоролик бўлган Жалолхон болалигидаёқ Ҳиндистонга боради ва у ерда ҳиндистонлик Бубна исмли қизни кўриб қолади. Уларнинг муҳаббат қиссалари «Фарҳод ва Ширин», «Лайли ва Мажнун» достонлари билан бир қаторда ўрин олиб шуҳрат қозонган. Бу достон ҳар бир уйда ҳикоя қилинади, қўшиқ қилиб куйланади. Жалол Рожастон ҳалқи қалбидан ўчмас ўрин олган, шунинг учун уни кишилар ҳиндистонлик деб билишади. Тўй-ҳашамларда аёллар қизни узатиб келишганда Жалолхон достони қўшиқ қилиб куйланмаса, уни тўй демайдилар.

Баҳор ва ёмғирлар мавсумида эрини бирон ёқса кузатган аёллар ҳижрон азобини Жалолхон достонини ўқиб изҳор қиласидилар.

Жалолхон Рожастон ҳалқ қўшиқларининг бош қаҳрамони бўлибгина қолмай, балки у ошиқ ёр, эр маъноларида ҳам ишлатилади. Жалол қўшиқлари Рожастоннинг юзлаб қишлоқлари осмонини ларзага келтириб, булатларни латиф рақс этишга чорлади. Жалолхон қўшиқлари юз йиллар ўтишига қарамай, ҳозирги кунда ҳам минглаб кишиларни ўзига жалб этиб, гўё янгидек яшнаб туради, чунки унинг муҳаббати самимий, теран ва пок муҳаббат. Мен ўзбек қаҳрамони Жалолхон ва ҳиндистонлик Бубналарнинг муҳаббат достони ўзбек шарқшунослари томонидан ўрганилишини истардим.

Лакими Кумари Чундават, ҳинг шоираси».

Афсуски, «Ўзбек қаҳрамони Жалолхон ва ҳиндистонлик Бубналарнинг муҳаббат достони» тарихи ўзбек шарқшунослари томонидан нечоғлик ўрганилгани мен учун қоронғи... Шу ўринда академик олимимиз Эркин Юсуповнинг куюниб, ачиниб ёзган сўzlари ёдимга тушди. У бир мақоласида Ўзбекистон Фанлар академиясидаги ўзбек ҳалқи тарихи, маданиятига оид ноёб қўлёзмаларимизни ҳозирги суръат билан тўрт минг йилда ҳам ўқиб-ўрганиб бўлмайди, деган маънода гап қилган эди... Шундоқ ёнгинасидағи токчаларда, жовонларда тахланиб ётган тайёр қўлёзмаларни ўрганишга жон куйдирмаган одамлар олис Ҳиндистонга бориб бир афсона тарихини суриштириш учун бош қотиришармиди...

Марказда катта бир иншоотни кўрдик. Уни «Ҳаво маҳал» («Шамоллар саройи») дейишаркан. Сабаби—

кондиционерсиз салқинлатиб туриладиган қилиб қурилган экан. Бизда уйларни иситиш қанчалик мұхим масала бўлса, Ҳиндистонда совутиш шунчалик ҳаётий муаммодир.

Ҳиндистоннинг шимоли-ғарбидағи шаҳар, Рожастон штатининг маъмурий, иқтисодий ва маданий маркази бўлган Жайпур, гарчи аҳолиси жиҳатидан бизнинг Андижондан салкам уч баробар катта бўлсада, Ҳиндистоннинг энг йирик шаҳарлари рўйхатига кирмайди. Қомусий манбаларда негадир шаҳарнинг сайёҳлар дикқат-эътиборини жалб этувчи тарихий ёдгорликларидан бобурийларга даҳлдор ашёлар сақланадиган мозийгоҳ тўғрисида, маъморчилик нуқтаи назаридан ниҳоятда ўзига хос, бетакрор иншоот бўлган Амир қалъя ҳақида кам сўз юритилади. Агар мен шаҳарнинг жануби-шимолидаги паст тоғлар орасида салобат тўкиб турган ана шу кўхна обидалар комплексини кўрмаганимда Ҳиндистон ҳақида, бобурийлар қурдирган ёдгорликлар ҳақида кемтиқ тасаввур билан қайтишим аниқ экан.

Амир қалъага олиб борувчи кун ботишга қараб кетган йўлнинг ўн томонида зангор суви оҳиста мавжланиб, қуёш нурида ялт-юлт қилиб турган каттакон кўл бўлиб, унинг ўртасида бир иморат кўзга ташланаб турарди. У узоқдан гўё денгизнинг саёзроқ жойида ярмигача ғарқ бўлиб, қумга ботиб қолган кемага ўхшаб кўринарди. Акбаршоҳ давридан қолган бу «Жаъл маҳал» («Кўлдаги сарой») менга унутилган лекин сирларга тўла ғаройиб бир обида бўлиб туюлди.

«Сарой»га борадиган йўл йўқ эди. Демак, у ростдан ҳам унутилган бир ёдгорлиқdir.

Йўл чети бетон панжарада тўсилган бўлиб, панжара билан кўл ўртасидағи ўн беш-ийигирма қадамли қирғоқда жангал, буталар тартибсиз ўсиб ётарди. «Беларус»симон бир трактор жангал, буталарни кўчирап, аёллар, қизлар уларни йиғиштиришарди — ўтин учун бўлса керак.

Бетон панжарага бир неча қорамтирижигарранг забардаст фил боғлоқлик эди. Улардан ёнма-ён боғланган иккитаси ўйнашгиси келгандаи хартумларини чўзишиб, бир-бирининг остларини ялар ва ғалат ҳаракатлар қилишарди. Баҳайбат жониворларнинг ҳазили менга бачканалиқдай эришроқ туюлди.

«Кўлдаги сарой»ни яқиндан кўриш имкони йўқлигига ачиниб, йўлимизда давом этар эканмиз, Акбар-

шоҳнинг Жайпурдаň уйлангани, хотини ва қайнотасининг таклифи, истакларига биноан кўлдаги ва тоғдаги саройларни қурдирганини эслалиб, муҳокама қилиб кетдик. Зокиржон ака шоҳ хотинларининг мавқеи жуда баланд бўлгани, умуман хотинлар истаса ҳар қандай эрни ўз йўлига сола олиши ҳақида гапириб, «бекорга «хотин» дейилмаган, бу сўз «хон тун»-дан олинган бўлиб, «тун хони», «тунги хон» маъноларини англатади-да», деди.

Амир қалъя шаҳарнинг четида, Дехлига кетаверишдаги атрофи унча баланд бўлмаган тоғлар тепасига ва орасига қурилган экан. Ҳиндистонда кўрган ёдгорликлардан энг ўзига хоси менимча мана шу бўлди. Сал қолувди-я баъзи шерикларимиз гапи билан бу ерга чиқмай кетиб қолишимизга. Ҳа, энди, буям шу пайтгача кўрганларимизга ўхшаган бир қалъадир-да, дейишувди... Тепага машинада ёки маҳсус киракаш филларда чиқилар экан. Машинада чиқиши нархи қиммат, филда жуда узоқ вақт кетарди. Дехлига кеч қоламиз, деб анча оёқ тираф туришди. Лекин Зокиржон ака: йўқ, чиқамиз, кўрамиз — қанча пул кетсаям, қанча вақт кетсаям, деди охир қатъий қилиб. Зокиржон ака бирон масала юзасидан аввал ўзи аниқ бир фикрга келгандан кейин маслаҳат тариқасида кўпчилик ўртасига ташлар, бир зум фикрлар оқимининг ҳар томонга оқишини кузатиб турарди-да, охирида бошқа гап сифмайдиган қилиб, раҳбарона оҳангда қатъий хulosани айтарди... Шунда ҳам уч киши қолди, бештамиз виллиссимон машинада тепага чиқиб кетдик. Айлана, тор, тош терилган йўллардан чиқиб бордик. Фақат олди ҳам, орқаси ҳам тортадиган мишинагина чиқа олар экан.

Атрофи қўрғон, чорси бўлвар ўртасида бир нечта безатиғлиқ фил турибди. Улардан бири устига чиқиб, телетасвирга, суратга тушдик. Кейин тоғ тепаси текисланиб қурилган бу ажойиб қалъани (бульвардан яна кенг зиналар орқали юқорига чиқиларди) томоша қила бошладик. Агар шу қалъа-қасрни бир четдан таърифлаб-тасвиrlаб чиқилса катта бир китоб бўлиши шубҳасиз!..

Мен бир нарсага — бир шахс умри ичида шунча катта, сертармоқли иншоотнинг қуриб битказилганига ҳайрон бўлдим. Ва яна бу иншоот архитектурасига қойил қолдим. Бизда менимча бундай кўламдаги қурилиш лоийхасининг ўзини бутун бир бошли институт бир нέча

ўн йиллаб ишлаган ва мамлакат ғазнасини ўпиреб ташлаган бўларди. Хусусан нақшлар, .безаклар шунчалар майда, мураккаб, жозибали, бетакрор... Айниқса ичкаридаги деҳлизсимон хоналар: ойнаванд, шишали, беҳисоб ранг ва турдаги, беҳисоб ва бетимсол шакллардаги нақшлар... Хусусан мўъжазгина, тепаси — шифти гумбазсимон хона мени батамом ром ва лол этди.

Экскурсовод хонанинг эшигини ёпиб, иккита шам ёққан эди, гумбаз осмонга айланди ва беҳисоб юлдузлар живир-живир қила бошлади. Шамлар жилса, юлдузлар ҳам ҳаракатга келар, гўё осмон айланётгандек бўларди. Шифт бурчакларининг жилоланиши, товланишлари ниҳоятда гўзал, асабларга ором берарди. Менимча бу хона шоҳ ва маликанинг хобхонаси бўлган. Шундай пайтда шоҳ бўлгиси келиб кетади одамнинг...

Деворлари ойнали бу катта, узун бинонинг олди кенг майдон эди. Қават-бақават тепа айвонлар, хоналарга кўтариладиган зиналар бири иккинчисига ўхшамас эди. Дам олиш жойларига, ҳовуз бўйларига олиб чиқадиган айланма йўлаклар, шамол пурковчи оралиқлар, айвонлар пештоқи ва остидаги, устунлардаги фил ва бошқа ҳайвонлар шакли оралатиб ишланган безак-нақшлар — ҳаммаси бир сўз билан айтганда ҳайратангиз эди.

Менинг хаёлимдан: бу пурвиқор ва гўзал обида неча юз йиллардан бери бобурийларнинг ҳаваси, эътиқоди, виждони, санъатини ҳали-ҳануз намойиш этиб турибди, бизнинг замонда қайси темир-бетон бино неча йилга бардош бераркин ва неча йилга бардош берган тақдирда ҳам келажак авлод нимасидан завқ олиб, нима деб баҳоларкин, деган ўйлар кечди... (У пайтларда юртимизда ҳали нақшинкор, гулдор, фишин бинолар қуриш бошланмаган эди).

Мириқиб, қониқиб, аммо барибир томошага тўймай, пастга тушсак, машинамиз томида иккита маймун қувалашиб ўйнаяпти...

Соат бирларда Деҳдига қараб жўнадик. Масофа манзилгача 238 километр қолибди. Эллик чақиримча юрган эдик, машинамизнинг деярли янгигина баллони йиртилиб, кўчиб кетди. Устахона олдида тўхтадик. Иккита камир ямаб, дамлаб беришга 100 рупий олишди. 5 рупийга икки литр қайноқ сув қўйиб беришди.

Шу ерда ўтирасак, трактор ўтиб қолди. Унинг кичкинагина аравасида беш-олти ҳинд ишчи аёли қўшиқ айтиб боришарди. Ҳиндистон ҳудудида кўчада қўшиқ

айтиб юрган одамларни²⁴ кун давомида биринчи марта учратишимиш эди. Дарҳақиқат, бу ҳамлакат одамларининг аҳволи киноларида кўрсатилгандаи, доим ашула айтиб, рақсга тушиб юраверадиган даражада эмас экан...

Йўллар, кўприк қурилишларини кўряпмиз. Ҳамма жойда эркак каму аёл кўп (бу бечоралар асосий ишчи кучи эди). Уларнинг баъзилари ҳарир сарийси билан юзини ҳам тўсив олишган. Лекин беллари очиқ, қопқора, тиришиб кетган, тер томчилари қуёш нурида ялтираб кўринади... Ҳақиқий «темир хотинлар» шулар экан...

Умуман, Ҳиндистонда йўл ва кўприк қурилиши кўп эди. Йўлнинг тўлдириб қўйиш мумкин бўлган ариқ ўзанисимон жойларига ҳам ҳафсала билан, бетон кўприк қуришяпти...

Деҳлига қараб боряпмиз. Сув кам. Дараҳт кўпу лекин далалар экинсиз...

Юқ ортилган туялар, туяли аравалар... Қаранг, шундоқ юмшоқ табиатли халқ фил, туя каби баҳайбат, жангари ҳайвонларни яғир қилиб ишлатяпти-я... Эх, одамзот!..

Деҳлига 140 чақирим қолганда яшил далалар, экинзорлар бошланди.

Йўлда папайя сўйиб едик. Шаклан сариқ қовунга ўхшайди, ичи ҳам сариқ, данаги, яъни уруфи мошга ўхшайди сал узунчоқроқ, мазаси эса ҳандалакни эслатади.

Бу иссиқ мамлакат ноз-неъматларидан менга манго ва ананас жуда ёқди, яхши пишган бўлса, мазаси ниҳоятда ширин бўларкан. Бананнинг таъми чучмалроқ туядди...

Хўқизлар подасини кўрдик. Шоҳлари бошқа бир ҳайвонларни кига ўхшамайдиган, жудаям ўзига хос, худди қўлда ясалгандай гажжақдор эди; икки томондан доирасимон айланиб келиб, учлари бир-бирига тегай-тегай деб турибди.

Кечки пайт ҳалқа йўлдан кириб, Деҳлининг тайё-рагоҳига уловчи «Марварид йўл»дан узоқ юриб, ўзимизнинг қадрдан «Интернейшнл-Ин» меҳмонхонамизни топиб бордик.

Деҳлининг биз бориб келган бошқа шаҳарларга нисбатан ҳам иссиқроқлигини ҳис этдик...

ЯНА ДЕҲЛИДА. ЛАЪЛ ҚАЛЪА

31 август, сесанба.

Деҳли, хусусан меҳмонхона анча қадрдан бўлиб қолгани учунми, шу кеча жуда хотиржам, мириқиб ухладим. Эрталаб Ўзбекистонимизнинг Мустақиллик куни муносабати билан қутлаб, Президентимиз номига шошилинчнома ёздики.

Кейин ўтган сафар кўролмай армон бўлиб қолган Лаъл қалъя («Қизил форт»)ни томоша қилгани бордик. Ҳали-ҳамон Деҳлининг, нафақат Деҳли, балки бутун Ҳиндистоннинг кўрки ва фахри бўлиб турган бу ажойиб иншоотлар комплекси бобурий Шоҳ Жаҳон бўнёд эттирган санъат, меъморчилик обидаларидан биридир. Умуман, ҳақли равища эътироф этишганидай, Шоҳ Жаҳон жуда омадли подшо бўлган ва Ҳиндистон давлатини мустаҳкамлаш, шуҳратига шуҳрат қўшишга жуда катта ҳисса қўшган. Унинг даврида мамлакатда ободончилик яхшиланган, юрт фаровон бўлган. Бу жиҳатдан ҳинд тарихчиси Сайид Ҳошимийнинг қуйидаги сўzlари фоят характерлидир: «Давлатнинг бюджети Шоҳ Жаҳон даврида шунчалик ба-ландга кўтарилиди, ундан олдин ҳам, кейин ҳам бунчалик юксак бўлмаган. Ҳаттоки, кўп мамлакатларга ҳукмронлик қилган инглизлар замонида ҳам давлат хазинасида бунчалик бойлик тўпланмаган. Ер солиқларидан 270 миллион рупия тушарди. Қаңдаҳор ва Кобулдан келадиган маблағлар бу рақамга кирмаган. Бу молу дунё ҳеч қандай зулмсиз қўлга киритилар эдики, ҳатто инглизлар одамларни эзганда ҳам шунча бойлик йиға олишмаган. Ҳалқ Шоҳ Жаҳон замонида жуда яхши ҳаёт кечирган, шоҳнинг меҳри ва адолатидан баҳраманд бўлган. Инглиз сайёҳларидан бири шундай деган: «Шоҳ, қўл остидагиларга нисбатан отаси боласига бўлгандек меҳрибон эди».

«Лаъл қалъя»нинг Жамну, Салим, Лоҳур, Деҳли деб номланган тўртта дарвозаси бўлиб, биз гид Бед Пракаш етакчилигида машҳур Лоҳур дарвозасидан кириб бордик. Шоҳ Жаҳон шу дарвозадан чиқиб номоз ўқиши учун Жума (ҳиндалар «жама» дейишаркан) масжидига борган, 1947 йили 15 августда ҳинд ҳалқи озодликни қўлга киритган куни мамлакат байроби мана шу дарвоза пештоқига тикилган.

Гид Бед Пракашнинг ҳикоя қилишича, қалъа қурилиши 1639 йили бошланган, тўққиз йилда биттан, шундан кейин бу жой пойтахт деб эълон қилинган.

Қалъа бош биносининг олди томонида, иккинчи қаватда «Девони ом» (халқни қабул қилиш) айвони (иккинчи қаватда) бор. Ложасимон бу жойнинг девор ва устунларига оқ мармар ишлатилган (қалъанинг бошқа жойлари асосан қизил тош, мармардан тикланган ва шунинг учун ҳам «Лаъл (Қизил) қалъа» деби аталган), турли қимматбаҳо тошлар билан безалган.

Қабулхонадаги шоҳ, ўтирадиган курси орқасига форс тилида «Подшо Худонинг ердаги сояси» деган ҳадис битилган. Шоҳ Жаҳон қабул учун чиқиб ана шу курсига ўтирганида икки ёнида ўғиллари Доро Шукуҳ, Шуъжо, Мурод ва Аврангзеблар туришган. Булардан сал четроқда вазир Шоабдуллахон ўтирган. Халқ пастда майдонда тик турган.

Қабулхонанинг нақшинкор шифтини гуллар, қушлар тасвири безаб турибди. Мусиқа чалинганда қушлар жўр бўлиб сайрайди...

Суратларда ана шу ҳол ифода этилган.

Қалъанинг айланаси икки км, ўртадаги катта-кичик майдонлар, йўлакларга оқ мармар тўшалган. Чиройли, кумуш панжаралар билан безалган. Афсуски Эрон ҳукмдори Нодиршоҳ Ҳиндистонга бостириб кирганида (1739 йил) кумуш панжараларни олиб кетган. Оқ мармарларни эса инглизлар кўчириб олиб, Калькуттадаги Виктория музейи биносига ишлатишган.

Бед Пракашнинг айтишича отаси ва акаларига кўп азоб берган Аврангзеб умри охирларида ўзи дўппи тикиб, пулига гуноҳларини ювиш учун масжид қурдирган.

Қалъа ичидаги катта ҳаммом бўлиб, жуда яхши иситилган, аммо иситиш сири маълум қилинмаган. Афсуски, ҳозир Деҳлида умумий ҳаммом деган нарса йўқ, деди гид. Лекин шахсан менинг бу гапга ишонгим келмади. Наҳотки шундоқ улкан шаҳарда ҳаммом бўлмаса? Ақлга сифмайди.

Девони хос деган жойнинг устунлари, шифтлари ўзига хос нақшли гуллар билан безатилган, зар юргизилган. Бу ерда мармар супа бўлган. Супадаги қимматбаҳо курси-тахтни ҳам Нодиршоҳ қалъадаги қимматбаҳо тошлар ва бошқа безаклар қатори ўмариб кетган экан. Девони хоснинг ички пештоқида «Агар жаннат ер устида бўлса, у шу ердадир» деган ёзув битилган. Адолат, ҳақиқат рамзи сифатида тарози тасвири туширилган.

Орқада, шундоқ қалъа девори ёнидан Жамна оқдан. Инглизлар дарё ўзанини орқароқقا жилдириб, орага йўл солишган экан.

Ергўлада иссиқдан сақланадиган салқин хоналар бўлган.

Подшоҳ ором оладиган махсус бино — «Хос маҳал» деворларию шифтлари шишадан барпо қилинган катта бир бино — «Шиша маҳал» деб, Шиша маҳал ўртасидаги айвонсимон, шифти баланд жой — «Ранг маҳал» деб аталган. Битта чироқ ёқилса юлдузлардай жило пайдо бўлган. Бу жой Имтиёз Маҳал исмли раққоса номига қўйилган бўлиб, у ўша пайтда саройдаги энг зўр раққоса сифатида алоҳида эътибор қозонган,— деди гидимиз. У рақсга тушганида ойнаванд шифтда унинг акси ўғтиз-қирқта бўлиб кўриниб турган экан. Ҳозир бу шифтга қараб ачинасан одам. Инглиз босқинчилари рақс майдони бўлган шундай ажоийиб жойдан ошхона сифатида фойдаланишган ва оқибатда шифтлар қорайиб, нақшлар ўз жозибасини йўқотган... Бир вақтлар нечоғлик обод бўлган, нечоғлик ҳаёт, ишқ-муҳаббат қайнаган бу ерларда...

Шу ўринда Имтиёз Маҳал тўғрисида батафсилоқ тўхталишни лозим топаман. Чунки ҳинд манбаларида Имтиёз Маҳални Аврангзебнинг набираси, ҳукмдор Жаҳондор шоҳ билан боғлаб нақл этилади. Жумладан Пран Невил уни раққоса Лал Кунварга нисбат беради ва «рақс маликаси» деб атайди. Умуман бобурий шаҳзода ва подшолар ҳаётнинг гаштини суришни билишган, рақс томоша қилишни чандон яхши кўришган, айримлари тожу тахту жонларини тикиш даражасида раққосаларга ошиқу бекарор бўлишган, деб ёзди у.

Ўша муаллифнинг келтиришича бобурий шоҳларнинг раққосалар билан бўлган ишқий саргузаштлари ва оташин муҳаббатлари тўғрисида кўп ривоятлар тўқилган, улар ҳозир ҳам ҳалқ ўртасида тилдан тилга ўтиб юради. Ана шундай ривоятларда ҳикоя қилишича, масалан Ақбаршоҳ санъатнинг ашаддий шинавандаси бўлган. У бутун Шимолий Ҳиндистонга довруқ қозонган сахаранпурлик раққоса «бўдан, лоладан, баҳор рангидан ҳам гўзал» Рупматининг беқиёс ҳусни-латофати, қўшиқ айтиш борасидаги юксак истеъдодига ғойибона ошиқ бўлиб қолиб, унга эришмоқ ниятида Малвага қўшин тортиб боради-да, қизни асирга олади. Бироқ раққоса асира бўлишдан заҳар ичиб, ўз жонига қасд қилишни афзал кўради. Жаҳонгир шоҳнинг аф-

соғибжамол Аноргулига бўлган ишқи юқорида баён этилган. Унинг ўғли Доро Шукуҳ эса Раънодил исмли раққосани севиб қолади, унга уйланади ва раққосага сарой маликаси унвонини беради. Айтишлари-ча, ҳатто ашаддий тақводор Аврангзеб ҳам уни ўзининг малоҳати ва қўшиқлари билан мафтун этган раққоса Зайнобидига қаттиқ қўнгил қўйган. Уларнинг ишқий муносабатлари раққосанинг тасодифий вафоти билан ниҳоя топади, бироқ бу оташин муҳаббат қўшиқларда ҳамон яшаб келади. Жаҳондор шоҳ билан Лал Кунварнинг ўзаро шайдоликлари эса аввалги барча «Лайли-Мажнун» қиссаларидан ҳам қизиқроқ таърифланади. Лал Кунвар ўз даврининг энг таниқли раққосаси, айни вақтда жуда кўп юракларга фулғула солган соғибжамол эди. Уни «Ҳиндистон рақсининг маликаси» деб аташарди. У оқиласи, мислсиз барнолиги, шўх-шаддотлиги, ёқимли овози, хиромондалиги билан Жаҳондор шоҳни ўзига ром этади. Улар шу қадар яқин бўлиб кетадиларки, ҳатто жангу жадал пайтларида ҳам бирбирларидан асло ажралмайдилар. Биродаркүшлик урушларидан ғалаба билан қайтган Жаҳондор шоҳ Дехлидаги салтанатта кириб келар экан, ўз маҳбубасига малика унвони ва Имтиёз Маҳал («сарой эркаси») исмишаърифини бериш тўғрисида фармони олий эълон қиласи. Ҳатто унга шоҳдик тамғаси тақдим этилиб, қимматбаҳо либослар ва зеб-зийнатлардан ташқари, майда-чуйда харажатлар учун йилига 20 миллион рупий ажратилади. Унинг ихтиёрита 500 аскардан иборат гвардия биркитиб қўйилади. Жаҳондор шоҳ Лал Кунвардан фарзанд кўришни жуда-жуда хоҳларди. Ўша даврда «Чирори Дехли» деб аталувчи Шайх Насридин Судхининг ҳовузида чўмилган одам фарзандлик бўлади, деган ривоят юради. Жаҳондор шоҳ билан Лал Кунвар иккиси ўғил кўриш умидида ҳар якшанба ана шу ҳовузда чўмилишарди.

Фарруҳ Сияр билан Агра учун бўлган жангда Жаҳондор шоҳ мағлубиятга учрайди. Шунда суюкли эрининг асирга тушиб қолишидан қўрқсан Имтиёз Маҳал уни ўз филига ўтқазиб Дехлига олиб қочади. Улар кўп машшакатлар тортишиб, ўн беш кун деганда Дехлига етиб келишади. Кундузлари ёвдан беркинишиб, тунда йўл юришади. Бироқ ўз вазири Зулфикор томонидан сотилган император қўлга олинади ва Қизил қалъага қамаб қўйилади. Имтиёз Маҳалга, унинг илтимосига кўра қамоқда Жаҳондор билан бирга ўти-

ришга ижозат берилади. Янги ҳукмдор Фаррух Сияр ҳукми билан Жаҳондорни қатлга олиб кетмоқчи бўлишганида, Имтиёз Маҳал дод-фарёд кўтариб, эри, маҳбубининг оёқларига маҳкам ёпишиб олади. Уни куч билан ажратиб олишади ва ҳалок бўлган императорларнинг бевалари ҳамда оила аъзолари яшайдиган жойга — Сухагпурига жўнатиб юборишади...

Мана шу гапларни ўқигандан кейин мен Жаҳонгир шоҳ тўғрисидаги ривоятлар ҳам бежиз тўқилмаган, чоғи, ривоятларда жон борга ўхшайди деган хulosага келдим. Ҳақиқатан ҳам бобурийларда муҳаббат ва эҳтирос кучли бўлган шекилли-да. Ахир Тож Маҳал қасри, Шоҳ Жаҳон ва Мумтоз Маҳал ҳақиқатаги ҳақиқатлар ҳам ана шундай оташин муҳаббат ифодаси-ку!..

Мана шу, ҳозир биз кўриб турган қалъа ҳовлисинг шарқи-жанубий бурчагида ҳам малика Мумтоз Маҳал номи билан аталувчи алоҳида бино бор. Демак, уни ҳам Шоҳ Жаҳон суюкли рафиқаси шаъни хотирасига қурдирган. Бу бинода Аврангзебнинг оила аъзолари яшаган. Инглизлар бу хоналарни қамоқҳонага айлантиришган. Ҳозир эса мозийгоҳга мосластирилган бўлиб, бобурий сultonлар ҳаётини акс эттирувчи ашёлар қўйилган. Экспозиция «Муғуллар ҳукмронлиги — 1526—1857» ёзувидан бошланади.

„Кечқурун, соат етти яримларда меҳмонхонага консулимиз Аҳмаджон Луқмонов келди. Унинг Ўзбекистон Мустақиллиги куни муносабати билан Ҳиндстоннинг Деҳлидан кўрсатиладиган асосий программаси «Дурдаршан» орқали чиқиши инглиз тилида бўлди. Бирга кўрдик. Кейин бирга овқатландик. Республикализмнинг мустақиллиги шарафига гаплар, тилаклар бўлди. Эртага консулхонамизда етмиш-саксон кишига зиёфат берилар экан. Луқмонов ҳаммамизга алоҳида таклифнома ёзиб берди ва менимча самимий таклиф қилди. «Мен сизларни Бомбей орқали кетиб қолишмадимикин, агар келиб қолиша, байрам кечамизда қатнашишса яхши бўларди, деб кутаётган эдим», деди.

Раҳбаримиз уйдан чиққанимизга қирқ кун бўлди, оқсоқоллар чарчай бошладилар, бунинг устига кийимларимиз ҳам унақа катта даврабоп эмас, деб узр айтди.

— Биронта дазмол топилиб қолар, бир кун минг кун эмас, биз ғариларни ташлаб кетманглар, ёнимизда турсантлар яхши бўлади, — деди консулимиз ҳазил билан. Бу ҳазил заминида ўтинч оҳангি ҳам бор эди.

Менинг назаримда раҳбаримизда ҳам консулимиз таклифига рози бўлиш хоҳиши йўқ эмас эди, лекин баъзи шерикларимизнинг қайфияти, ҳолати ва истаклари билан жўнаб юбориш фикрига келган эди.

Сайфиддин ҳожи ака чиндан ҳам чарчадими, ё набираларини сўғиндими, ҳарқалай сал сўмсайиб қолган эди. Чакқон, серғайрат, серзавқ одам бирдан бўшашиб, хомуш тортиб қолса ғалати, эриш туюларкан ва бошқаларни ҳавотирга соларкан.

Ёшларда бугун қолиб республикамизнинг мустақиллик байрамини янги Деҳлидек улкан ва гўзал шаҳарда консулимиз ва унинг ҳамкаслари, Ўзбекистоннинг хориждаги хайриҳоҳлари билан нишонлаш, она юртимиз шаънига чет элликлар томонидан айтиладиган илиқ сўзлар, истакларни эшитиш иштиёқи кучли эди. Лекин катталарда жўнаш иштиёқи янада кучлироқ, эди ва бошқалар уларнинг райига қарши бормоқликни ўзларига эп кўрмасдилар. Бунақа сафарда баъзан битта гап ё таклиф ҳам ортиқча туюлиб, умумий қайфиятни, вазиятни ўзгартириб юбориши мумкин эди.

Ҳарқалай, яна ўйлашиб, маслаҳатлашиб кўрамиз, деган гап билан Луқмоновни кузатдик.

IV қ и с м

ҚАЙТИШ

ХИНД ЭЛИДАГИ СҮНГИ КУНЛАР

1 сентябр, чоршанба.

Бугун Ўзбекистон Мустақиллиги куни. Бу қутлуғ байрамни халқимиз нечөөлик баланд рухда нишонла-яптийкин? Биз ватандан олисда бўлсак-да Мустақиллик шодиёналари, тантаналарининг олий мақомда ўтәётганини, ҳамюртларимизнинг қувончи, шодликлари чексизлигини ҳис қилиб турибмиз. Ўзбекистон осмонида қуёш чараклаб турганини, кишиларимизнинг табассумдан чароғон юзларини, кўкка шиддат билан отилаётган фаввораларни кўраётгандаймиз, қулоқларимизга, шууримизга болажонларнинг шодон қийқириқлари, ҳофизларимизнинг ватан, ҳуррият, омонлик ҳақидаги жўшқин қўшиқлари, қушлар хонишининг ёқимли оҳанглари қуюлиб кирмоқда...

Биз байрам нафасини шундоққина ёнимизда ҳам туймоққа муяссар бўлдик. Ўзбекистоннинг Ҳиндистондаги бир бўлаги бўлмиш консулхонамида ҳам байрам кайфияти ҳукмрон, уни нишонлаш тадориги қизғин эди. Биз ҳам республикамиз Президентига, Андижон вилояти ҳокими номига ёзган табриқ-телеграм-маларимизни шу ерда машинкалатдик.

Манжу келди. Бизни кўриб, ҳам хурсанд бўлганидан, ҳам ажабланганидан унинг кўзлари чараклаб кетди. Кеча у ҳам бизни бугунги маросимга қолишга даъват этган, жўнашга чоғланган кайфиятимизни кўриб, ранжигандай бўлган ва ҳозир бизни бугун қолишибди, деб ўйлаган эди.

Дарвоқе, эрталаб «бугун кетамиз» деган қарорга келингани маълум бўлган эди. Кимдир «оқсоқоллар кечаси раҳбарни кўндиришибди-да», деди.

Аҳмаджон Луқмонов ва унинг ёрдамчилари Баҳромжон, Манжу яна бизни бугунча қолиб, мустақиллик байрамимиз муносабати билан уюштирилаётган суҳбат-зиёфатда иштирок этишимизни қайта-қайта

ильтимос қилишди. Лекин экспедиция раҳбарияти ва бош маслаҳатчиларнинг фикри қатъий эди... Мезбонлар билан дийдамизни қаттиқ қилиб туриб хайрлашдик. Луқмонов юзида андак дилгирлик аломатлари сезилгандай бўлиб қолди. Ростдан ҳам, бир кун минг кун эмас эди... Бояқишиз консулимиз бизни кўриб қанчалар суюнган, бизга анча ёрдами теккан эди...

Биз оз бозор айланган бўлиб, қадрдан меҳмонхонамиз «Интернейшнл»га бордик. Нарса-буюмларни жомадонларга жойлаб, кетарга чоғландик-да, ўша атрофдаги дўконларни яна бирров «зиёрат», тўгрироги тижорат қилдик. Магнитофон кассеталари сотиладиган растада мен яхши кўрган ва ҳурмат қиласиган ҳинд хонандалари Лота Мангешкар ва Мукешларнинг тўртта кассетага ёзилган ашуулаларига харидор бўлиб, бироқ қимматсираб (150 рупий, яъни бизнинг пулга олти минг сўм эди) олмаган эдим, лекин олсам яхши бўлар эди, деган фикр хаёлимдан кетмаётган эди, бу ҳам бир армон бўлиб қолмасин, дедим-да, кўзимни чирт юмиб пулни санадим.

Ҳар бир кассета 37 ярим рупийга тўғри келарди, савдолашибашга уриниб кўрдим. Аммо ақалли беш рупийга ҳам тушишмади. Демак, бу машҳур ҳофиз ва ҳофизани ҳиндларнинг ўзлари ҳам қадрлашар экан. Чунки бошқа хонандаларнинг кассеталарини йигирма беъш, ҳатто йигирма рупийга ҳам сотишмоқда эди. Дарвоҳе, ёндаги дўкондан 135 рупийга ўзимга кўйлак ҳам сотиб олдим...

Сўнг Деҳли билан видолащдик-да, нотаниш кўчалардан жуда узоқ айланиб, кўп юриб Амритсар йўлини топиб чиқдик.

Юқоридаги ишимиздан табиат ҳам бир оз ранжидими, ёмғир ёға бошлади.

Амритсарнинг таниш ва текис йўлидан «Тойота»-миз шувиллаб қайтмоқда. Машина ичида жимлик ҳукм сурмоқда, афтидан ҳамма ўз хаёллари билан, босган йўлларимиз, Ҳиндистон худудида кўрган-билгандарини кўнгил кўзгусидан яна бир бор ўтказиш, ўз ниятлари ва уларнинг ижросини сарҳисоб қилиш билан банд эди.

Дарҳақиқат, мана Ҳиндистонда йигирма кундан ортиқ юрдик. Нималарни кўрдик, нима ишлар қилдик?.. Шахсан менинг, аввало, дунё ҳақидаги, бу катта Шарқ мамлакати тўғрисидаги тасаввур ва тушунчаларим кенгайди, бойиди, маълум хуласаларга келдим. Энг муҳидин

ми Бобур бобомиз ва бобурийлар сулоласи ҳукмрон-лигининг Ҳиндистон тарихи, маданиятининг ажрал-мас узвий бўлаги эканлигига ишонч ҳосил қилдим. Ҳиндистон табииатидан олам-олам завқ олдим. Тўғри, баъзи ерлардаги ивирсиқликлардан таъбим хира ҳам бўлди, лекин бутунлай бенуқсон, кам-кўстсиз одам ҳам, иш ҳам, жой ҳам бўлмайди-ку... Катта, бепоён мамлакатни бошқариш ҳам осон эмас. Кўчаларда ётган-ларнинг ишсизлиги, бошпанасизлигига уларнинг ўзла-ри, яъни дангаса, танбаллиги ҳам сабабдир. Ахир экиб, дехқончилик қиласа бўладиган бепоён ерлар ётибди-ку... Балки ҳароратнинг ортиқча баландлиги ҳам инсон организмини бўшаштириб, ишёқмас қилиб қўяр... Лекин ҳозир биз учун энг муҳими – Ватанга қайтаётганимиз эди...

Экспедиция аъзоларигина эмас, «Тойота»миз ҳам чарчай бошлаган экан. Йўлда битта баллон дам қўйиб юборди. Камераси иссиқданми, қирчилиб кетган экан, эҳтиёт баллонникини олиб қўйишиди.

Ярим тунда Лудхиана шаҳрига етиб келдик ва «Вел-коме» («Хуш келибсиз») деган меҳмонхона олдида тўхтадик. Меҳмонхона ўрта миёнадан ҳам пастроқ экан, аммо бошқасини излашга вақтимиз ҳам, жой танлашга тоқатимиз ҳам йўқ эди.

2 сентябр, пайшанба.

Ажабки, бекорчи, ишсиз кўп бўлишига қарамай, Ҳиндистон шаҳарларида ҳаёт жуда эрта қайнай бошларкан. Лудхианада ҳам саҳарлаб кўчалар одамлар билан гавжум, балон-камера устахоналари, ошхоналар аллақачон иш бошлаб юборган эди. «Мапед» мингтан жувонлар, велосипёди қизлар кўп эди.

Меҳмонхонамиз рўпарасидаги торроқ кўчा бошла-нишидаги ошхоналар одди анча тоза, супурилгандай кўринди. Ишни нонуштадан бошлаш ҳаммага маъқул эди. Аввал овқат емаймиз, қатиқ, чой, чепоти бўлса бас, деган таклиф бўлди. Кейин бирдан овқат ейишга қарор қилинди. Чепоти ўрнига ёғлиқ нон (чепотидан қалинроқ, булочкасимон) буориди. Кимнингдир қатиқ ўрнига сут ичгиси келиб қолди... Аҳмаджон ҳар бир янги таклифни ошпазга етказиб турар, ошпаз ҳам капгирини кўтарганча иккиланиб қоларди. Шундай пайтларда таржимонлик ҳам ҳавас қиладиган касб эмас экан, деб ўйлаб қўядим ичимда.

Катта-кичик шаҳарлардан ўтишмиз. Марказларда, ҳаёт қайноқ жойларда, ошхоналар олдида оқ, қизғиши, қора чүчқалар болаларини эргаштириб, гала-гала бўлиб ахлат титкилаб юришарди. Бундай ҳолга одамлар ҳам кўнишиб кетишган шекилли, парво ҳам қилишмайди... Мен Бобурнинг «бу эл бурун тўнғиз сақлар эдилар, бизнинг замонда бартараф қилдилар» деган гапини эслайман. Демак, чўчқа боқиши бобурийлардан кейин яна расм бўлган...

Умуман, йўлдаги манзаралар тез-тез ўзгариб турарди. Таппи қилаётган аёлларни кўриб, шарқ ҳалқлари турмушидаги ўхшашлиқдан ҳайратланамиз. Бирдан дала бошланиб, кўз олдимиизда оппоқ қушлар сочишган паҳтадай ёйилиб ўтлаётган янги шолизорлар намоён бўлади. Бир жойда ўлаксахўрларнинг жуда катта тўпига дуч келдик. Йўлдан озгина ичкарида, яланг бир жойда тахминан бир неча юзтаси ниҳоятда зич, бир-бирига тегиб туришарди. Йиғилиш ўтказишпти-микин ё раҳбар сайлашптимикин, деб ҳазиллашдик. Менинг назаримда эса, улар мотам тутишаётганга ўхшаб кўринди.

Амритсарга соат ўндан ўтганда етиб келдик. Баллон сотадиган ва созлайдиган дўкон-устахонага янги баллон буюриб қўйиб, кутиб ўтиридик. Қаердандир олиб келишиб, созлаб қўйиб беришди (150 долларга). Эҳтиёт баллон ҳам қилдириб олдик. Шу билан кўнглимиз анча жойига тушди. Эҳтиёт баллон йўқ, қайда тўхтаб қоламизикин, деб хавотирланиб келаётган эдик.

Магазинларни тезгина айланиб, қолган ҳинд рупийларимизга совға-салом олган бўлдик-да, йўлга тушдик ва соат бир яримда (туш маҳали) Ваагага (бизда нохуш таассурот қолдирган, бироқ Ҳиндистон табиати ҳақида дастлабки тасаввур тудирган жойга) етиб келдик. (Ахир шу ерда салкам уч кун қолиб, қанча хуноб бўлдик, изтироб чекдик, юракда ҳадик билан хабар кутиб ўтиридик).

Ишимиз анча тез битди. Ҳинд чегарачилари «Тойота»мизга сарҳад дарвозаларини ланг қилиб очиб беришди. Хуллас Ҳиндистон ҳудудига жуда қийинчилик билан ўтган эдик, осонгина чиқиб кетдик ва соат уч яримларда Покистон заминига ўтдик. Энди бу божхонада хужжатларимизнинг расмийлаштириб беришларини кутиб ўтирибмиз. Ҳаво хийла салқинлаб қолибди. Ҳарқалай ўтган сафаргичалик дамимиз қайтмай, анча хотиржам ўтиравердик. Балки, барибир ўтказиб

юборишади-да, деган фикр ҳам бизга таскин берганидан дилимиз равшан эди.

Лоҳўр яна бизни ҳароратли ҳавоси, анҳор тўла сувлари, гавжум кўчалари билан қарши олди.

ЯНА ЛОҲЎРДА

Таниш анҳор бўйлаб шаҳарга кириб боряпмиз. Анҳор ёқаси бетон супа қилинган бўлиб, ўтган сафарлар эътибор бермаган эканман, майда лампочкалар ўрнатилаган эди. Анҳор узун ва ниҳоятда тўғри бўлгани учун лампочкалар ипга тизилган маржондай текис ва чиройли кўринар, тилладай товланиб туради. Кечқурнлари лампочкалар акси сув бетида жилоланиб, янада гўзал манзара кашф этса керак.

Ваагадаги Покистон божхонаси бизга Ҳамидхон исмли ходимларини қўшиб беришди. У ўттиз ёшлардаги шўх, хушчақчақ йигит эди. Манимча у анча дидали, фаросатли ҳам эди. Машинани шаҳарнинг биз кўрмаган чиройли кўчаларидан бошлаб бораарди.

Маъмурнинг сафар қофози ва бошқа хужжатларга кўл қўйдириш учун божхона бошлигининг шаҳар четроғидаги уйига бордик. Йўқ экан. Яна шаҳарга қайтдик. Қўноқ хона излаб анча юрдик. (Бизда энди танлаш учун имкон ва ҳафсала пайдо бўлган эди). Ниҳоят «Шобра» деган шинамгина меҳмонхонани тоғдик.

Меҳмонхона ресторанида ош едик. Таркиби (сабзи ва бошқа масаллиғлари), таъми ҳам ўзимизнинг анжанча паловга анча яқин эди. Сўнг машинага маслаҳат учун йифилдик. Дарвоҷе, Ҳиндистон чегарасидан ўтища чўнтакларимизда қолган анча-мунча ҳинд руپийларини йишишириб, нима олишини билмай, беш-олти шиша пиво сотиб олган эдик. Чарчоқларни тарқатиш, таранглашган асад торларини ёзиш, қолаверса, Ҳиндистон ҳудудидан эсон-омон Покистон ҳудудига ўтиб олганимиз, умуман, сафаримизнинг асосий қисми муваффақиятли якунланаётганини ҳиндларнинг тотимли, тана ҳароратини бир қадар мўътадиллаштирувчи пивоси билан нишонладик. Лекин бу хурсандчилик бизга анча қимматга тушишига сал қолди. Қимматга тушди ҳам. Маълумки, Покистон мусулмон давлати бўлиб, спиртли ичимлик ичиш таъқиқланади. Буни биз билардик ва шунинг учун ҳам пивони машинада саранжом қилиб қўя қолган эдик. Лекин биз бир нарсани—шишаларни олиб чиқиб ташлашни эсдан чи-

қарган эканмиз. Машина ичини титкилашларини ким ўйлабди дейсиз. Эртага йўлда бир четроққа ташлаб юборамиз деган эдик.

Маъмур Ҳамидхон эртага келаман, деб уйига кетган эди. Зокиржон ака билан Аҳмаджон енгил машина кира қилиб, божхона бошлиғи уйига яна боришса, у машинада нималар борлигини бир кўриб қўйинглар, деб икки кишини қўшиб берибди.

Божхона ходимлари шишаларни кўриб қолиб, анча тўполон кўтаришди. Катта жарима тўлайсизлар, бўлмаса, Ўзбекистон давлатига ёзиб юборамиз, бизнинг давлатимиз қонунини бузгансизлар, деб пўписа қилишди. Зокиржон ака уларни аранг юмшатиб, чойнак-пиёла сервизлардан инъом этгандан кейингина кетишиди, биз ҳам енгил нафас олдик. Шунда мен «совға» ҳар қандай қаттиқ, кўнгилни (раҳбар-бошлиқнинг, ҳатто божхона зобитларидаги чегарачи оддий аскарлар дилини ҳам) юмшатиб, мум қилиб юборишига, яна бир карра ишонч ҳосил қилдим.

З сентябр, жума.

Бугун дам олиш куни экан. Эрталаб хотиржам ноңушта қилдик. Маъмур Ҳамидхон келди. У анча очиқ қўнгил, самимий, ҳазилкашроқ эди. Кечқурунги воқеани айтган эдик, роса кулди.

Божхонадаги ишларимизнинг чаласи бор экан, яна Баагага жўнадик. Эрталабдан анҳорда эркаклар чўмилишяпти, қирғоқда болалар ювенишяпти, аёллар бош тарашияпти, кир ювишяпти. Саёзроқ жойларда қора сигирлар ҳам сузиб юрибди.

Божхона бошлиғининг ўринбосари Осмон Али Шайх бизни чой билан меҳмон қилиб, ишимизни тезгина битириб берди. Қуюқ хайрлашиб, соат ўн икки яримларда Баагадан чиқиб кетдик.

Лоҳўрни четроқ кўчалардан айланиб ўта бошладик. Йўллар ниҳоятда кенг, қатнов бир томонлама эди. Умуман Лоҳўр анчагина чиройли шаҳар экан, ўтган сафар яхши кўрмаган эканмиз.

Бу шаҳарда ҳам ихчам мотицикл ниҳоятда кўп экан. Эркаклар шу кичкинагина уловда хотини, бир-иккитадан болаларини мингаштириб бемалол юришарди.

Икки қирғонини ям-яшил дарахтлар, гуллар безаб турган анҳор бўйлаб (бу анҳор Лоҳўрни кесиб ўтиб кетарди) боряпмиз, боряпмиз...

Анҳор жудаям узундай, охири йўқдай туюларди менга, худди Катта Фарғона канали қаби. Ниҳоят, шаҳардан анча чиққанимиздан кейин, соат иккиларда, анҳор ўнг томонга, биз чапроққа қайрилиб кетдик.

Ҳиндистонда мусулмонлар кўп бўлса-да, умумий аҳоли беҳисоб кўплиги учун улар орасида унча сезилмай кетаркан. Бунинг устига Ҳиндистонда мусулмон масжидлари ниҳоятда кам, номоз ўқиётган кимсани кўрмадик ҳисоб. Покистонда эса.., жумладан Лоҳўрда ҳамма дўконларини ёпиб, бошқа юмушларини ташлаб, жума номозига кетишаётганинг гувоҳи бўлдик. Лоҳўрдан ташқарида, каттароқ қишлоқ ё шаҳарчаларда ҳам масжидларга одамлар гурас-гурас кириб кетишяпти.

Бир шаҳарчада тўхтаб тушлик қиёдик. Шу ердаги дўконда пўчоги оқ-сариқ қовун кўрдик. Афғонистондан олиб келишар экан. Нархига ақдим бовар қилмади: 1 килоси 100 рупий (бизнинг пулга тўрт минг сўм) дейдӣ.

Биз Лоҳўр-Мўлтон-Кветта йўлидан бораардик: анча равон, текис, обод эди. Икки томон ям-яшил шоли, гўза, маккажўхори, шакарқамиш плантацияларидан иборат. Дараҳт қалин, тез-тез катта-кичик анҳор ҳам учраб туради. Ўтган сафар Парвез деган қўнқавой бизни роса расво йўллар билан айлантириб олиб келган экан-да, деб бояқиши анча койидик.

Йўлда пружинасимон бурама шоҳли эчкилар галасини кўриб, ҳайвонот дунёсининг бу ажойиботини ҳайрат билан томоша қиёдик.

Мўлтонга кечаси кириб келдик ва «NEW PELAX» («Нью Пелакс») деган гўзал меҳмонхонага жойлашдик.

«ФУРБАТГА ЛАЪНАТЛАР БЎЛСИН»

4 сентябр, шанба.

Эрталаб кўчага чиқсан, меҳмонхонамиз таши ичи-га қараганда, анчагина одми, шаҳар кўчалари ҳам но-ободроқ эди. Шаҳарнинг жануб томон чеккароғидаги тарихий ёдгорликларни, Муҳамма Ибн Туғлуқ шоҳ ўзи учун қурдирган мақбарани томоша қилгач, шаҳарнинг шимол томонига юриб, Мўлтон университетини топдик. Дарвозада полисмен тураркан. Дарвозадан ўтгач ўртаси гулзор, икки ёни қуюқ дараҳтзор йўлдан ичкарига кириб бордик. Бу манзара менга Масков университети ҳовлисини эслатди. Гўзал, шинам бинолар

орасидан ўтган йўл атрофи ажриқзор яшил майдонлардан иборат эди.

Одатда, тарихий шаҳарлар ва қишлоқларда бўлганингизда беихтиёр унинг ўтмишидаги қиёфаси билан ҳозирги ҳолатини қиёслайсиз. Лекин мен Мўлтон ўтмиши ҳақида тўлароқ маълумотга эга эмас эдим. «Бобурнома»нинг бизга маълум қисмларида Мўлтон йўл-йўлакай айтиб ўтилгану шаҳар қиёфаси, ундаги ҳаёт тарзи тўғриларида муфассал баён қилинмаган.

Бизни тарих куллиётининг декани, доктор Ошиқ Муҳаммадхон Дурроний жаноблари ғоят очиқ, чехра билан қутиб олди. Эски қадрдонлардай қучоқлашиб кўришди. Унинг самимий, дилкаш, камтар инсонлиги шундоққина юз-кўзидан билиниб турарди. У бизни хонасига олиб кириб, ҳаммамиз билан бир-бир танишди ва бизнинг саволимизга биноан аввал Баҳо-вуддин Закариё номидаги ушбу университет ҳақида қисқача маълумот берди. 1965 йили очилган бу илмдаргоҳида ҳозир йигирмата куллиёт бўлиб, ҳар йили икки минг нафар талаба қабул қилинаркан. Минг ўринли ётоқхонаси бор экан. Университет ҳовлисинг умумий майдони 400 гектар экан.

Мўлтон шаҳрининг аҳолиси ўн лак (1 миллион) экан.

Мўлтон тарихи ҳақида китоблар битган Муҳаммад Дурроний бизга жуда кўп нарсаларни завқ-шавқ билан гапириб берди, биз унинг ватаңпарварлик туйгулари жўш уриб турган ҳикояларини мароқ билан тингладик.

— Мўлтон Покистондаги қадимий шаҳарлардан бири, — дея сўз бошлиди Дурроний, — милоддан аввал, тўртинчи асрда барпо этилган ва кўп ўтмай Искандар Зулқарнайн бостириб келган. Бироқ у бу ерда катта талофат кўриб, қайтишда, йўлда ҳалок бўлган. Кейин, Ашока¹ подшолиги даврида, бутун Ҳиндистонда бўлгани қаби, бу ерда ҳам буддизм ривожланиб кетди. 713-йили Мўлтонни Муҳаммад бин Қосум бошлилигидаги араблар эгаллаб, ислом динининг ҳукм-

¹ Ашока—Ҳиндистонда Маурья давлатининг учинчи ҳокими. Милоддан аввалиг 268—232 йилларда ҳукмронлик қилган. Унинг отаси Чандврагупта ҳам Бобурга ўшаб Ҳиндистонни ягона давлатга бирлаштиришни мақсад қилган. Ашока отасининг ниятини қисман амала оширган. Унинг даврида Ҳиндистон иқтисодий жиҳатдан анча кучайган, ҳудуди кенгайган. Буддизм ривожланиб, кўплаб будда ибодатхоналари курилган. Ашоканинг қоя тошларга ўйib ёздирган фармонлари ҳозиргача сақланади. Ана шунинг учун ҳам Жавоҳирларъ Неру Ҳиндистон тарихи ҳақида гапирганида, Акбаршоҳ билан Ашока хизматларига алоҳида ургу берган эди.

ронлигини ўрнатиши. Мана ҳозиргача бизда шу дин ҳукмроён, Ўнинчи аср бошларида бошқа халқлар келишган. Ўн биринчи асрда Маҳмуд Газнавий бутунлай босиб олган ва олтмиш йил ҳукмронлик қилган. Ўн иккинчи асрда Шаҳобиддин Муҳаммад Фурий Афғонистондан келиб, бутун салтанатни — Дәхлигача бўлган жойларни ўзига бўйсундирган. Кейин у Шимолий Ҳиндистонгача бостириб борди ва ҳамма жойда ислом динини, мусулмончилик ақидаларини мустаҳкамлашга ҳаракат қилди. Ана шу даврда Мўлтон аҳолиси тўп-тўп бўлиб кела бошлаган бошқа халқлар ҳисобига кўпайиб кетди ва уларнинг таъсирида янги маданият шаклланди. Чунки бизга бошқа халқларнинг тили, кийимлари, саллалари ҳам кириб келди ва маҳаллий аҳоли ўз-ўзидан уларга тақлид қила бошладилар. Ўн олтинчи асрда андижонлик Заҳириддин Муҳаммад Бобур Афғонистондан келиб Қандахорни, Лоҳўрни олгач, Мўлтонни ҳам эгаллади ва шу ердан Ҳинд сари юриш бошлади.

Бобур ўзининг «Бобурнома»сида Мўлтон шаҳри номини бир неча бор йўл-йўлакай тилга олиб ўтади холос, бу тарихий шаҳарга қандай келгани ва уни, қандай эгаллагани ҳақида тўхталиб ўтирмаиди. Балки «Бобурнома»нинг йўқолган саҳифаларида бу ҳақда ба-тафсил ёзилган бўлиши ҳам мумкин эди. Тарих фанлари доктори, профессор Рустамбек ҳожи Шамсиддин ўғли Ҳиндистон ва Покистонда инглиз тилида нашр этилган тадқиқотларда Бобурнинг Мўлтонга биринчи марта 1519 йили, кейин 1524 йили юриш қилиб шу йили Мўлтонни, Ланчадаги бир қанча қабилаларни Шоҳ Ҳасан билан жанг қилиб қўлга киритгани тасвириланганини қайд этади.

— Бобурийлар орасида, айниқса Акбар кучли шахс бўлган, — дея сўзида давом этди Муҳаммад Дурро-ний. — У ҳунармандчилик, меъморчиликни жуда ривожлантирган, бутун Ўрта Осиёдан мутахассисларни, ҳар хил соҳадаги олимларни Ҳиндистонга таклиф қилиб олдириб келган. (Ҳиндистонга бунақа оммавий келиш 13-асрда ҳам бўлган эди).

Аврангзеб ҳам катта подшолардан бири бўлди. Бутун Ҳиндистонни ўзига бўйсундирди. Ислом динини халқ орасида қаттиқ тарғиб қилди. Унинг ўзи сочидан тирноғигача мусулмон эди. Аврангзеб даврида илму ҳунарда, яшаш тарзларида, уй-жой қуришда ҳиндаларнинг мусулмонларга эргашиши, уларга тақлид қилиш-

лари кучайди. Худди биз Америкага, Сизлар русларга тақлид қилгандай... Шундай замонлар бўлиб ўтди.

Ҳиндистонда мусулмончилик 1700-йилларда энг юқори чўққига кўтарилиб, кейин пастлай бошлади. Пула шахрида бир қабила ғалаён қилгандан кейин, ҳиндлар у ер-бу ерда мусулмончилик русларни, ақидаларига қарши бош кўтара бошладилар. Ҳиндлар билан мусулмонлар орасидаги низолар сабабли улар ўртасида оралиқ пайдо бўлди, инглизлар айни ана шу оралиқقا суқилиб кира бошладилар. Аввал улар савдогарлар сифатида келишиб, кейин очиқдан-очиқ босқинчлилекка ўтишди...

Доктор Дурроний жуда сўзамол, дилкаш, суҳбати ширин олим, хушфеъл, хушчақчақ инсон эди. Истараси иссиқлиги учун доим кулимсираб турганга ўхшарди. Гап орасида «ача» («яхши») сўзини кўп ишлатаркан — фарғоналил ёзувчимиз Йўлдош Сўлаймонга ўшаб.

Асли, ота-боболари бошқа юртдан (Афғонистондан) келиб қолишгани сабабли, ҳар ҳолда Дурронийнинг Ҳиндистонга келиб қолганларга, жумладан Бобур ва унинг сулолаларига ҳайриҳоҳлиги, ҳурмати баландлиги билиниб турарди. Олимнинг сўнгти бобурий шоҳ Баҳодир ва унинг авлодлари ҳақидаги хотирана-мо маълумотлари шахсан мен учун янгилик бўлди.

— Баҳодиршоҳ ўлгач, унинг авлодларидан бир оила Мўлтонга кўчиб келиб, шаҳардан ўн олти мил¹ наридаги ўрмонда яшириниб яшай бошлашган. Кейинчалик улар ҳалққа қўшилиб кетишли. Уларнинг учинчи авлодини 1950-йилларда ўзим кўрганман. Бўйдор, келишган, бақувват кишилар эди. (Менинг уйим ўша томонда эди). Гурбат бобурийларни емирди, — дейди олим бошини сарак-сарак қилиб. — Гурбатга лаънатлар бўлсин — бир авлодни йўқотиб юборди...

Дарвоқе, суҳбатда Муҳаммад Дурронийнинг шогирди, Покистоннинг бобурийлар давридан номзоддик илмий иши ёзган муалима Хумера Дасти ҳам қатнашарди. Ўттиз беш ёшлар чамасидаги, нозиккина бу жувон анча камтар, камсуқум эди. Унинг жажжигина кумушранг булоқиси ўзига жуда ярашиб турарди.

Муҳаммад Дурроний бизни уйига (менимча сид-қидилдан) таклиф қилди, бир пиёла чойимизни ичиб

¹ Ҳиндистонда 1 мил Бобур тахминига кўра тўрт минг қадам ёки икки чақирим бўлган.

кетинглар, деди шарқона лутғ қилиб. Узр сўраб, шошаётганимизни айтган эдик, таассуф билдири ва эҳтиёт бўлинглар, йўл носоз ва нотинчроқ, дея йўлкўриқ, кўрсатди, маслаҳатлар берди. Кветта йўлидаги Лўралай шаҳрида Амирхон Дурроний исмли ўғли ишларкан, унинг номига хат битиб берди.

Олим биз билан яна қадрдонлардай ва тағин қайта кўришишга умид ва ишончи бор одамдай хайрлашаркан, божхона бошлигининг ўринбосари Осман Али Шайхга ўхшаб «Ассалому алайкум», деб қолди. Покистонликларнинг бу одати, яъни бизда кўришган чоғ ишлатиладиган бу муқаддас иборанинг хайрлашаётган маҳал айтилиши аввалига менга эриш туюлди. Кейин ибора мазмунини ўйлаб кўриб, эҳтимол мантиқан олганда булар ҳақдир, деган фикрга келдим. Дарҳақиқат хайр-хўшлашаётуб бир-бировга омонлик, саломатлик тиланади-ку...

Шаҳарга қайтдик. Тор йўлдарда от арава, эшак арава, годи кўп эди. Умуман олганда улов қатнови жуда тифиз ва бетартиб эди. Кўчалар, уйлар ўрта асрларни эслатарди.

ҲАЙБАР ДОВОНИ

Тун. Соат иккиларда Мўлтондан чиқиб кетдик. Кўп ўтмай доктор (биздаги «профессор» деган унвонга тўғри келади) Дурроний айтганидай носоз йўллар бошланди ва борган сари баттарлаша борди. Бунинг устинга кўча тор — бир машина аранг сиғарди.

Ҳайбар довонига яқинлашганда икки ерда дарё ўзанидан, дўнгак-дўнгак бўлиб ётган тошлар орасидан ўтиб, тоғлик жойга етдик. Довон бошланди. Йўл тор, бу довондан ўтавериб йўлнинг ҳадисини олған юқ машина ҳайдовчилари шиiddат билан бостириб келишаверарди. Юқорида таърифланганидай машиналар ниҳоятда башанг, ҳайдовчилар эса... соч-соқоллари ўсган, ўрмондан чиққанга ўхшаганлари кўп эди. Хотинини ясантириб, ўзи хароб кейинган одам каби, ўзига қарамай, бепарво юришаркан. Балки узоқ масофа — бир неча кунлик йўл шу ҳолга солиб қўяр...

Қуёш ботиш арафасида эди. Баланд қоялар узра ажойиб манзара намоён бўлди. Офтоб булувлар ортида, лекин шафақ қон талағандай қип-қизил. Икки томонда Сулаймон тоғларининг ўркач-ўркач тизмала-

ри қорайиб, худди тутунлар орасидан сузиб бораёт-ганга ўхшайди. Паст — дара эса гўё улкан пальма дарахтларидан иборат ям-яшил боғ эди.

Оҳиста кўтарилилар эканмиз, ўнгдаги дара борган сари чуқурлашиб борарди. Баланд тоғ ёнидан қисилиб ўтадиган қалтис бурилишлар кўп эди. Қоялар ёнидан бўртиб чиқсан улкан-улкан ҳарсанг тошлар йўл устига осилиб тургандай, тушиб кетаётгандай туюларди.

Тоғ ҳавоси ҳам, шабадаси ҳам илиқ эди...

Довон юқорисига кўтарилганимиз сари оралиқдаги дара ваҳимали тус ола борар, қарасак юрак ҳаприқар, қайрилишларда эса «шувиллаб» кетарди.

Бекатсимон жойда тўхтадик. Одатий йўл ошхона-чойхоналари, масжидлар бор экан. Ҳайдовчилар машиналарини йўл четига—дара қиршовига тўхтатишиб, шом номозини ўқишига ошиқишар, чап томон тоғ ёнбағридаги ошхонада апил-тапил тамадди қилаётганлар ҳам кўп эди.

Раҳбаримизнинг бош ошпазлигида шўрвага уннадик. Зокиржон aka катта алюмин кастирулга бир килодан картошка, пиёз, бир ярим кило помидорнинг ҳаммасини ташлади. Биз овқатнинг тахири чиқиб кетса керак деб хавотирланувдик, шунаقا ширин бўптики, қорин очлигиданми, анчадан бери анжанча қўлбола овқат емаганимиз учунми, ё тоғ иқдимининг таъсирида ростдан ҳам мазали бўлганми, шўрва оғзимга шундай ширин татидики... Бир мен эмас, ҳамма шу фикрда эди, раҳбар-ошпазга қайта-қайта раҳмату офаринлар айтиб шўрвадан қайта-қайта ичдик.

Ошхона эгалари — соч-соқоли тартибсиз ўсган кишилар бизга тундроқ ва ваҳималироқ, кўринишувди, ҳолбуки жуда самимий, одамохун экан. Уларнинг кийинишлири ҳам бизда нохуц таассурот қолдирганди. Одатда қора танлилар оқ либос ранги андак бўлса-да юзга уриб туриши учун, шунингдек, иссиқ иқдимли юртларда қуёш нурини қайтаради деб, кўпроқ оқ кийим кийишади, бу ерда, жазира маҳаллаларни эса, хусусан ҳозир биз шу жойда учратиб турган одамлар (асосан эркаклар)нинг аксарият кўпчилиги қора кўйлак ва қора шалвар кийишган эди. (Мен ўзимизга ўхшаган йўловчилар, ҳайдовчиларни ҳам назарда тутяпман).

«Мезбонларимиз» бизнинг Ўзбекистондан эканлигимишни, ҳалқимиз мустақилликка эришганини эшишиб, хурсанд бўлишиди. Бу хабарни худди суюнчилагандай бир-бирига етказишарди, ўз мулоҳазаларини

баён этишарди. Улар атрофимизни ўраб олишган, ҳар хил саволлар беришарди.

Ошхона эгалари хизмат ҳақини қистов билан аранг олишди. Дарҳақиқат, биз уларнинг ўн дона чепотисини едигу кирагази ва кастроулидан фойдаландик холос. Лекин бошқа жойларда камини ҳам талаб қилиб олишарди-да...

Бу йўлда ҳам қароқчилар бор деб ваҳима қилишган, шунинг учун биз ўтган сафарги ахволга тушиб қолмайлик, деб, довондан кундузи ўтишга қарор қилган эдик. Мезбонлар, бу жой сизларга тўғри келмайди, каравот етарли эмас, пашша кўп, яна ўн бир чакирим юрсангиз довоннинг энг баландида яхши жой бор, деб маслаҳат беришди. Қуюқ хайрлашиб жўна-дик. Довоннинг энг қийин, танг йўли бошланди. Сабзи жиягисимон айланалардан айланиб-айланиб кўта-риляпмиз, кўтариляпмиз. Оддимизда, орқамизда баҳайбат юқ машиналари... Ой гоҳ, олдинга ўтиб йўл бошлайди, гоҳ орқада қолиб, бизга эргашади.

Гоҳо, рўпарадан машина келиб қолса, йўлга сифи-май анча-анча туриб қоламиз. Орқага тисариш жуда хавфли ва изма-из келаётган машина ҳам бор. Рўпарадан келаётган ҳайдовчи ҳам орқага — баландга тисарилмайди... Бунақа пайтда машинанинг ҳамма фидди-раклари остига тош қўйиб, кенгроқ жой, чора излаймиз. Орқада ҳам, олдинда ҳам машина қаторлашиб кетади, беқаноат ҳайдовчилар тўпланишиб бир-бирла-рига йўл-йўриқ кўрсата бошлайди. Дарҳақиқат, жин-дай қалтис ҳаракат катта фожеага олиб бориши турган гап эди. Ёнимиздаги жарлиқнинг тубига кўз етмайди...

Бобур мана шу довондан бир неча бор от суриб, лашкар тортиб ўтган. Ҳозир-ку, ҳарқалай, тоғлар қирқилиб, текисланиб, йўл мъалум бир шаклга со-линган, асфалтланган. Бобур даврида, бундан тўрт юз етмиш йил илгари қанчалик носоз ва ваҳимали бўлганини тасаввур қилиш ҳам қийин. Ҳойнаҳой илон изи сўқмоқдан, катта-кичик тошлардан иборат нотекис, мashaққатли, кўрқинчли йўл бўлгани аниқ. Лекин табиатига тақдирдан зорланиш, қийинчиликдан шикоят ёт бўлган жасур саркарда, матонатли инсон Бобур Шоҳ, бу ҳайбатли довондан ўтиш заҳматлари ҳақида лом-мим демайди, неча марта тилга олган бўлса, ҳаргал жўнгина: «кўталдин (довондан—Қ.К.) иниб, Ҳайбар тангисидан (гарасидан — Қ.К.) ўтуб...», ёки «Ҳайбар кўталининг тубига тушулди», деб қайд

этиб қўя қолади... У пайтларда менимча бу довон, дара қалин жанглазор бўлиб, ёввойи, йиртқич ҳайвонларга макон бўлгандир, улар ҳар лаҳза карвонларга, йўловчиларга ҳужум қилиб, даҳшат солиб тургандир. Ёт шарпадан ҳуркиган отларнинг суриб кетиш ҳоллари юз бергандир. Шундай ҳодисалар Бобурнинг ҳарбий сафарлари чоғида ҳам содир бўлгандир ва анча-мунча талофатлар кўргандир... Ўша лаҳзаларда шуларни ўйлаб, Бобурнинг чинакам анжанча чапанилиги, орият, иззатни юксак тутишдек феъл-атворга эга бўлганлигидан, ана шундай улуғ инсон таваллуд топган бисёр хосиятли замин, юрт менинг ҳам ватаним эканидан фахр туйгулари яна бир бор қалбим қирғоқларидан тошди.

...Хуллае, қийинчилик ва ҳадик билан майдоң қадамлаб кўтарилар эканмиз, довоннинг назаримда энг тик, қия, ваҳимали жойларидан ўтдик. Яна ҳам кечаси бўлгани учун дара-жарликнинг нечоғлик чуқур ва қўрқинчлилиги, тепамиздаги тоғларнинг қанчалик баландлиги, худди тушиб кетаётгандай, омонатга ўхшаб туюлишлари — бор салобати, бор ваҳимаси билан сезилмасди. Чунки қалин ям-яшил дарахтлар, қиёқсимон ўтлар қоялару дараларни парда бўлиб тўсиб турарди.

— Ўтган сафар шу жойдан ўтаётганимизда кўпчилик ётиб олган, — деди Фарруҳ қулоғимга шивирлаб.

Ниҳоят, кўзланган манзилга етдик. Чиндан жуда кенг майдон эди. Шу жойда, осмонга анча яқин ерда тунашга қарор қиласди. Одатдаги бамбук ёғочи ва зиғир поясидан ясалган тўқима каравотларга жой тўшаб ётдик. Мен «етти оғайнни» юлдузларимни қидириб топладим. Ой юлдузларга соя солиб тургани учун салузокроқ ерлар яхши кўринмасди.

Майдон — очиқ, карвон саройда биздан ташқари кўноқлар ҳам кўп эди. У ер-бу ерда фўнғир-фўнғир қилиб сухбатлашиб ўтиришарди.

Бу тепалик биз босиб ўтган ҳудудларнинг энг баланди эди.

Ҳаво салқинроқ эдиким, чойшаб ёпиниб ётишга тўғри келди. Ҳатто машинадагилар ҳам ойналарни ёпиб олишди.

Үйқум қочди. Яна Бобур Мирзоимизни, унинг бесарамjon ҳаётини ўйлаб кетдим. Шоҳлик унга шу қадар зарилмиди? Шунча минглаб чақирим йўлларни азобу уқубатлар билан босиб ўтиб, Ҳиндистонда давлат тузиб ҳукмдорлик қилиши шартмиийкин? Шун-

дай ноқулай иқдимга мослашиб, бошқаларни — зада навқарларию, ожиза-аёллари, қизларини ҳам кўндириб, ўз узоқ, дини, эътиқоди бошқа ёт ўлкаларда қолиб кетишининг асл сабаблари нима эдийкин?.. Ҳарқалай, фақат тож-тахт иштиёқигина эмаслиги аниқ... Тўғри, у шундай катта ҳудудга Ислом дини ва ақидаларини тарқатди, қанчадан-қанча файридинларнинг қалбига исломий имон уругларини сочди. Бу уруглар униб, ўси, Бобурдан кейин, унинг авлодлари даврида кўпдан-кўп мева берди... Хўш, ўзи-чи, ўзи нима орттириди? Ўзи... «Андижонлик Захириддин Муҳаммад Бобур» деган улуг ном орттириди. Биз учун фаҳр ва ифтиҳор орттириди. Буюк бобурийлар салтанатини яратувчи сифатида кишилик тарихидан мангу ўрин олди.

САҲРО ЙЎЛИ — УЗУН ЙЎЛ

5 сентябр, якшанба.

Соат олтиларда турдик. Атроф яйраб томоша қилгувлик: майдоннинг шимол томони яна баланд тоғларга туташиб кетган, жануб тарафда эса, биз тунда кўп азиятлар чекиб чиқсан айлана йўллар, элас-элас кўриниб турадиган ям-яшил, бепоён водий ястаниб ётарди.

Шошилмай ювиниб, хотиржам ўтириб нонушта қилгач, йўлга тушдик.

Бир оз юрганимиздан кейин (энди ваҳимали ўрлар орқада қолиб кетган, биз пастга қараб туша бошлаб-гандик) кенг яланг жой келди. Тўхтадик. Қуёш тифуриб чиқиб келаётган палла эди. Ҳар ким ўз иши ва хаёллари билан шуғуланишга ярим соат вақт берилди. Кино, телетасвирчилар юксак тог манзараларини суратга олиш билан банд бўлишди. Зокиржон aka Бобурнинг геологияга доир фикрларини шарҳлаб Фаррӯхга интервью берди. У тошларнинг қорайиб кетиши қўёшнинг таъсиридир, деб изоҳлади. Геолог Бобур ва Ҳайбар довони. Бу ғоят характерли ва алоҳида мавзудир... Сайфиiddин ҳожи aka сопол синиқларини қидириб кетди. Мен бургут қанотига ўхшаш бир ясси тошга ўлтириб, ўй суриб; кечган кунларни хотирлаб, эсадликларни қофозга тушира бошладимким, Тўлқин aka менинг ушбу ҳолатимни тасвирга тушуриб эди, «Бобурийлар изидан» фильмида экранни тўлдириб кўринмишдир... Собиржон аканинг яна бироз мазалари

бўлмай туриб эди, у машинада ўтирибоқ атрофни томоша қилмоққа тутинди...

Биз Япониянинг ҳар жиҳатдан қулийликларга эга, жумладан ичида совутгич-шамол ҳайдагич мосламаси бор учқур «Тойота»сида, замонавий, асфалт йўлларда юриб ҳам чарчаб, эзилиб келаяпмиз. Амир Темур, Бобур ва уларнинг аскарлари, хотинлари, болалари ўша пайтдаги дашту саҳролар, қоя-тоғлардан ўтган қум, тош йўлларда лўкиллаган туялар, отлар устида қандоқ юришганикун? Биз Ҳиндистоннинг ярмини бир айланиб чиқишига 28 кун вақт сарфладиқ. Улар бир неча ойлаб юришган-а... Куч-қувватларига, сабр-тоқатларига қойил-ей...

Яна йўлдамиз. Атроф гунг тошлар... Худди маҳсус тайёрлаб олиб келингандай чорқиррасимон, усти ва ости теп-текис бронза тусли тошлар кўп... Ҳақиқий тор йўллари... Лекин на Арслонбоб, на Шоҳимардан ва на қамчик довонига ўхшайди... Дараларда сув кўринмайди. Бироқ барглари палма япроқларини эслатадиган тизза бўйли қамишсимон кажура (ундан елпуғич қилишаркан), тиканли ўсимликлар тўп-тўп бўлиб ўсиб ётибди. Юлгиннинг новдалари ингичкароқ, яшил янтоқнинг тикани юмшокрок, майинроқдай туюларди. Ўша ўтлар, дараҳтлар ортида, тепалик — тоғ қиршовларида бир неча марта ўқ овози янгради. Биз каклик отишаётган бўлса керак, деб тахмин қилдик. Озгина юрганимиздан кейин елкасига ҳар хил милтиқ осиб тепадан тушиб келаётган кишилар кўринди.

Покистон йўлларида ҳам янги қурилишлар (кўприклиар, иншоотлар) кўп учрардӣ, лекин Ҳиндистондаги қурилишлардан фарқли ўлароқ, бу ёқда фақат эркаклар ишлашарди. Биронта аёл зоти кўринмайди.

Тез-тез саҳро кораблари ҳисобланмиш туялар тўдасига дуч келардик. Мана шу жиҳатданми, чўлу биёбонларининг кўплигиданми, Покистон Туркманистонни эслатарди. Саҳро ҳудуди нақш солингандай таассурот қолдирадиган кунгира-кунгира қояли тоғлар билан алмашиниб турарди.

Келишда ҳам харитага қараб йўл юрган эдик, лекин қайтишда харита тез-тез қўлдан-қўлга ўтиб, унга қайта-қайта мурожаат қила бошладик. Биримиз қўйиб, биримиз қолган масофани ўлчаб, қачон она юртга етиб боришимизни чамалардик. Биз экспедициямизнинг энг бардошли аъзоси Собиржон акани ва машинани авайлардик.

Ҳиндиқуш тизмалари қуршовидан чиқиб кетиш қийин бўлди. Тоғли йўлда кундуз соат 1 гача юрдик. Кветтага яқинлашганимиз сари тоғлар биздан узоқлашиб, ўзимиз томонларга хос бўлган мевали дараҳтлар, экинлар кўпроқ учрай бошлади. Ўрик, шафтоли мева-лари тутаган эди. Олмалар шохи эса мевасининг кўпли-гидан ларzon-ларzon эди. Айниқса, анор, мирза тे-раклар менга Андижонни, Гуркуровни кўпроқ эслатарди. Карам, помидор, мош, сабзи, ошқовоқ, бақла-жон, кашнич — ҳамма нарса бор эди. Тангри ёрлақа-ган қишлоқлар экан, деб ўйладим.

Бир жойда, йўл билан туташиб, ичкарига чўзилиб кетган боғда олма теришаётган экан. Маъмуримиз Ҳамидхон кириб кетди ва у билан бир одам бир этак олма кўтариб чиқди. Семиренкага ўхшаш олтин рангли, йирик-йирик олма эди. Пул берсак, олмади. Бобурнинг Андижонда полиз бошида қовун сотмоқ расм эмас, деган сўзларини ўқиган чамаси...

Тоғлар дам узоқлашиб кетар, дам яқинлашиб, шундоқ биқинимизга келиб қоларди. Йўл билан ёндош тоғларнинг тик ёnlари тарам-тарам бўлиб, бир қарашда қалаштириб, тахта тахлаб қўйилганга ўхшаб кўринарди.

Лўралай деган жойда тушлик қилиб, йўлда давом этдяк. (Муҳаммад Дурронийнинг ўғлини излашга вақт ҳам, эҳтиёж ҳам бўлмади).

Яна тоғлар... Палахса-палахса тошларни ғиштси-мон қилиб бўлаклаётган одамларни кўрдик. Тоғларнинг, бу тошларнинг полоэзой даврига мансублигини тахмин қилдик.

Асосий манзил — Машҳад ҳали ҳийла олис эди. Биз шу кетища у ерга қачон етиб боришимиз мумкинлигини хомчўт қиласар, сабрсизланардик. Лоҳурдан Мўлтонгача 450 чақирим йўл босдик. Мўлтондан Куветтагача — 650, Кветта-Тафтан—720, Тафтан-Зоҳидон—140 чақирим эди. Зоҳидондан у ёфи ҳам ҳази-лакам масофа эмас.

Биз кун ботиш томонга қараб юрардик. Зокиржон Машрабов геология ва минералогия илмлари ва табиат, тоғ жинслари ҳақида гапириб бораради. Кун ботиш арафасида, шафақ нурлари тоғлар ёнида алвон байроқдай ёйилиб кетган паллада машинамиз қумга ботиб қолди. Яна ҳаммамиз ярим яланғоч бўлиб машинани суриб қумдан чиқариш билан овора бўлдик. Тўлқин aka билан Фаррух ҳам енг шимариб ишга

тушишди. Чунки ҳозирги ҳолатимиз улар учун ғоят «тасвирбоп, характерли» лавҳа эди...

Йўлда тез-тез туялар учрарди. Йўл четидан қўнғироқларини жиринглатиб, биргина сарбон етакчилигига қатор бўлиб тизилиб бораётган, паст адирлар ён бағрида ўтлаётган ёки кавш қайтариб ётган бир ўркачли (икки ўркачлиги негадир кам кўринарди) туялар... Демак, мана шу далилнинг ўзидан ҳам Покистонда саҳролар кўплигини фараз қилиш мумкин. Буни қарангки, шундай жойларда ҳам анча-мунча одамлар яшашяпти, меҳнат қилишяпти. Шаҳардан узоқ, оммадан узоқ, чанг-тўзондан бошқа овунадиган эрмак ҳам йўқ бўлса керак... Эҳтимол, улар вақтинча яшаш, пул топиш учун келишгандир, лекин умрлари ўтмоқда-ку. Балки бу қисматдир...

Биз наҳотки Покистондай катта бир мамлакатнинг иккита йирик шаҳари ўртасидаги йўл шунаقا расво, файзсиз, камқатнов (биздан бошқа машина, йўловчилар деярли учрамасди) бўлса, дея ажабланиб, диққат бўлган эдик, кейин билсак, Лўралайдан кейин адашиб кетган эканмиз. Ушбу тош қумлик, тупроқли йўлларда роса узоқ, айланиб юрдик. Баллон дам қўйиб юборди. Алмаштиридик. Умуман нотекис, чафир йўл ҳаммани эзib ташлади. Йўл, сафар зерикарли туюла бошлади. Бунинг устига Собиржон aka бетоб. Унинг қўнглига сифмайди, деб магнитофон ҳам қўймаймиз. «Тойота»-нинг совутгичлари ҳам чарчади шекилли ёки кучли жазирамани совутиб беришга улгуролмаяптими, ҳарқалай, машина ичида ҳам ҳарорат кўтарилиб, одамни бетоқат қила бошлаганди. Аввалига биз совутгич мурватларини кимдир бураб пасайтириб қўяётган бўлса керак, деб ўйладик. Ундай эмас экан. Собиржон акага шабада тегмасин деб, ойналарни озгина қия очиб, бир пасда яна ёпиб қўймиз. Умуман унга қийин бўлди. Дард ёмон нарса-да: ҳар қандай паҳлавон келбатли, шиддаткор, кесиб-кесиб гапирадиган одамни ҳам бир-икки кундаёқ чўқтириб, омонат-омонат қадам босадиган, секин-секин сўзлайдиган қилиб қўяди. Бироқ, биз Собиржон аканинг, яна такрор ёзаяпман, бардошига, дардга чидамлилигига қойил қолардик. Бирон марта ўнтағанини эшитмадик, дардни сабот билан, ички бир қувват билан енгишга ҳаракат қилас, диққати ошиб кетганидан баъзан-баъзан уф тортиб қўярди холос. Табиийки, унинг иштаҳаси ҳам йўқ эди. Зокиржон aka сутдан ичинг деб қистайверган эди, сут ачиброқ қолибди, деди.

Кейин маълум бўлишича, дўсти ва раҳбарнинг меҳри-
бонлитини ошкора рад этолмай, шундай дейишга маж-
бур бўлибди. Аммо, Зокиржон аканинг ғамхўрлик қили-
ши ҳам табиий, шундай бўлиши керак ҳам эди. Чунки
биз, аъзолар фақат ўзимиз учун қайғурсак, раҳбар
ҳамма учун қайғуриши, ҳаммамизни уйларимизга соғ-
саломат етказишни худодан тилаши турган гап-да...

Кветта шаҳрига яқинлашганимизда осмон тиниқиб,
олам юлдузлар билан чароғон бўлиб кетди. Ана шу
маҳал шундоқцина ўнг томонимизда, ерга яқин жой-
да биз билан қадам-бақадам кетаётган, анчадан бери
«қидириб» тополмаётган «Етти оғайни» юлдузларимни
кўриб қолдим. Негадир кайфиятим созланиб, енгил
нафас ола бошладим...

Нихоят, кеч соат ўнга яқин Кветтага кириб келдик
ва истаб-сўраб, ўзимизнинг қадрдон «Муслим» меҳ-
монхонамизни топдик. Ажабо, ўз уйига қайтиб келган
одамдай, ўзимизни эркин ҳис қила бошладик.

ТУШЛАРИМДА АНДИЖОН...

6 сентябр, душанба.

Собиржон ака кечаси иситмалаб, яхши ухломаб-
ди. Эрталабдан дори истадик. Ҳали аксарият дорихо-
налар очмаган эди (соат 8 лар эди). Бунинг устига
буғун шаҳид бўлганлар хотираси куни экан. Бозор-
лардаги дорихоналарни ҳам истадик. Охири поликли-
ника топиб, докторга учралди. Укол қилиб, дорига
қофоз ёзиб берди. Дориларни олдик ва соат ўн иккига
яқин Тафтан (чегара)га қараб жўнадик.

Зокиржон аканинг ғамхўр раҳбар, меҳрибон ин-
сонлигига яна бир бора гувоҳ бўлдик. У Собиржон
ака ҳолидан мудом ҳол сўраб турар, унинг соғлигини
яхшилаш, кайфиятини кўтариш чораларини изларди.
Унинг ташаббуси билан йўлдаги ошхоналардан бири-
да Собиржон ака учун сут қайнаттириб, термосга қу-
йиб олдик.

Яна тоғлар орасидан кетиб боряпмиз. Дунёда сув
кўп дейдилар. Менинг мана шу сафар давомидаги ху-
лосамга кўра, оламда дашту биёбон ҳам ва яна тоғлар
ҳам кўп экан. Тоғлар шакли-шамойили, рангининг тур-
ли-туман бўлишини ҳам Лоҳўр-Тафтан йўлларида
кўрдик. Тоғларнинг шамолу қуюнлар, иссиқ ва аёз-

лар, қүёш нурию ёмғир найзалари таъсирида емирил-ганлиги, нураганлиги сезилиб туарди. Тоғлар ҳам қарир экан, деган ўй кечди менд. Гиёҳ, унмас тош тоғлар узуңдан-узоқ қора тусли, куйған кўмир каби палахса-палахса, қат-қат, четлари чатнаб, тўкилай-тўкилай деб турганга ўхшарди.

Дарвоҷе, бу кеча тушимга яна Андижон кирибди. Яқин бир одам негадир йифлаяпти...

Йўл анча дурустлашиб қолди, лекин тор эди. Қоронғи тушганда чўмич юлдуз ўнг томонимизда кўринди. У ерга жудаям яқиндай эди.

Жакмаш деган қишлоқда тўхтадик. Маъмуримиз Ҳамидхоннинг бир таниши ҳарбийларнинг шундоққина йўл бўйидаги янги лекин наридан-бери солинган меҳмонхонасининг қоровули экан. Ўчашгандай чироқ, йўқ экан. Тошфонар ёрдамида шўрва пиширдик. Овқатдан сўнг шундоқ ташқарига, ерга жой тўшаб, гаплашиб ётдик.

Чолнинг транзисторидан Тошкентни топиб, «Сўнгти ахборот»ни эшигтдик. Полвонтощдан, ўзимизнинг Андижондан нефт чиқибди!.. Ниҳоятда хурсанд бўлдик. Бунинг устига Ўзбекистон радиосини сафар давомида биринчи бор эшлишимиз эди. Ахборотдан кейин концерт бошланди. Собиржон ака ҳам анча дуруст эди. Шу муносабат билан бир оз ўйин-кулги қилдик. Латифагўйлик бўлди.

Шу пайтда осмонда юлдузлар ниҳоятда кўп ва чарофон эди. Фарби-шымолдан шарқи жанубга қараб ўтган, эҳтимол, аксинчадир, сомон йўли жуда аниқ ва тиник кўринарди. «Етти оғайни» юлдузлар ҳам ниҳоятда ярқироқ ва ерга жуда яқин эди. Осмоннинг бунчалар сериолдуз ва Заминга шу қадар яқин бўлишини сафар давомида биринчи кўришим эди. Ҳадемай, «катта аиқ» юлдузлари бирин-кетин бота бошлади ва учтаси, яъни думи қолди ва кўп ўтмай, иккитаси, кейин биттаси қолди ва у ҳам ботиб кетди. Мен илгари, ўзимиз томонда бу юлдузларнинг бутунлай ботишини астойдил кузатмаган эдим. Юлдузлар ботаётган кезда осмон, коинот, сайёralар ҳаракати аниқ ва яққол кўринаркан.

7 сентябр, сешанба.

Азонда йўлга тушдик. Энди чўл бошланди. Қора чўл. Зокиржон ака буни ҳам тоғларнинг нурашига боғлаб изоҳлаб берди.

Кейинроқ, катта-катта қум барханлари кўпая борди. Ажабки, бир сиқим қум уюлмаси устида ҳам юлғунсимон кўкат ўсиб турарди. Тошли, текис ерда эса ҳеч бир гиёқ, йўқ эди. Айрим жойларда қум кўчкиласири йўлни қисман ё бутунлай тўсиб қўйган эди...

Чошгоҳда чегарага яқинлашдик. Маъмуримиз Ҳамидхон биз билан хайр-хўшлашиб, оқ йўл тилай бошлади. У жуда серзавқ, хушчақчак, одамохун йигит бўлиб, кетишдаги покистонлик маъмур Парвезнинг мутлақо акси эди.

Ҳамидхоннинг дунёқарали ҳам маъқул, бунинг усттига ҳазилкашгина эди. Айниқса, кенжамиз Фарруҳ билан сўзда ҳам, кўлда ҳам кўп ҳазиллашишарди! Аҳмаджон ёрдамида улар бир-бирининг жигига тегишарди. Ҳамидхоннинг Фариҳон, Ферузхон исмли ўғиллари, Осма исмли қизи бўлиб, тўртинчиси туғилиш арафасида экан. Ўғил бўлса, отини Фарруҳ қўй, деб ҳазиллашдик. «Но.. — деди у кулиб, — Аммо, Бобурхон қўйишим мумкин». Биз унинг мана шу ниятини қатъйлаштириш учун уни маъқулладик. Бобурнинг шоҳ сифатидаги, инсоний фазилатлари ҳақида биримиз қўйиб, биримиз олиб гапира кетдик. Охири Ҳамидхон яхши, агар ўғил туғилсаёқ исмини Бобурхон қўйганим бўлсин, деб бизга ваъда берди.

— Бундай масалаларни хотининг билан маслаҳатлашмай, ўзинг ҳал қиласверасанми? — деб сўрадик, атай нима деркин деган мақсадда.

— Мен йигит кишиман, — деди у бизнинг гапимизни жиддий қабул қилиб. — Шарқликман, қолаверса, мен ҳам сизларга ўхшаб мусулмонман. Ё сизларда унақамасми?

Хуллас бизнинг ҳазиллашаётганимизни сезди ва яна бизга изҳори дил қила бошлади:

— Яхши-ёмон гапирган бўлсан узр, мен ўз қадрдонларим билан сафар қилгандек бўлдим. Мен сафарда бошқаларда, ёмон таассурот қолдирмасам, дейман. Одатим шунаقا, ҳазил-хузилни яхши кўраман, самимий бўлишга, қўлимдан келса, ўзгаларга ёрдам беришга ҳаракат қиласман. Сизларни кўрганим, танишганимдан жуда хурсандман, лекин тез ажралаётганимдан афсусдаман. Ҳамидхоннинг сўzlари чиндан ҳам самимий эди. У худодан сафаримизни бехатар ва бешикаст қилишини тилади.

Ҳамидхон гўё ҳамкасби Парвезнинг совуқроқ, муносабатлари учун узр сўраётгандек, уни ҳам маъзур

тутинглар ва биз ҳакимиизда, яъни покистонликлар, Покистон ҳақида яхши тасаввурда қайтинглар, демоқчи бўлаётгандай туюлди менинг назаримда.

Биз ҳам бу дилкаш йигитта миннатдорчилик билдирик. У ҳар биримиз билан қучоқлашиб хайрлашиб қолди.

Соат ўн иккиларда Покистон чегарасидан Эрон чегарасига ўтдик ва машинани рўйхатдан ўтказадиган жойга кирдик. Кино, телекамераларни сўрғичлаб қўямиз, бизда суратга, тасвирга олиш муминмас, Машҳадга кирмайсизлар, муддатларингиз оз қолибди, вақтингиз етмайди, бошқа йўлдан юрасизлар, деб анча хуноб қилишди.

Зерикиб у ёқ-бу ёққа босиб юрдик, кутиб ўтирадик. Божхона унча тоза эмас, ўтирадиган жой ҳам ийӯқ эди.

Сайфиддин ҳожи аканинг катак рўмолчаси бор эди. Уни гоҳ елкасига ташлаб, гоҳ қуйлаги ёқаси остидан бўйнига ўраб боғлаб олар, гоҳ пешонасига қўйиб, икки учини қулоқлари тепасига қистириб олар, гоҳ бошига ёпиб олар, тўр учлари енгил, илиқ шабадада ҳилпиллаб турарди.

Домла менга ҳамма нарса мумкин деб ўйловчилар тоифасидан эди. Дарҳақиқат, Ҳожи аканинг ўзига ана шу юқоридаги қиликлари ҳам ярашар, шундай пайтда у менга миллий киноларимиз учун жуда бол қаҳрамонга ўхшаб кўринарди.

Биз Эрон ҳақида гап кетганда бир вақtlар Хуросоннинг машҳур бўлган шаҳарларидан бири, Навоий бир қанча муддат ҳокимлик қилган Астрободни эслаб, уни бир кўришни орзулаган эдик. Лекин йўлларда учраётган қанча-қанча кўхна шаҳарлар номи орасида негадир «Астробод» деган ном кўзга чалинмасди. Иложи бўлса кўриб ўтмоқчи эдик. Бир неча одамдан сўрадик. Кўпчилик елка қисарди. Охири ёши каттароқ одам Астрободнинг ҳозир Гургон деб аталишини, бу ердан анча узоқлиги, бизнинг йўлимизга чаплитини айтди. Биз афсуслансанк-да (боришга кўзимиз етмасди) Астрободнинг дарагини топиб олганимиздан хурсанд бўлдик.

Ниҳоят, Эрондан ўтиб чегарага ҳам етиб келдик. Ҳар хил расмиятчиликлар: паспорт текшириш, «кирди-чиқди» деб муҳр босиш... кетаётганда тўлғазилган декларацияни ҳам суриштиришаркан. Машинамизнинг ичи, ташию тагларини маҳсус чуқурлик-хандакка тушишиб, овчарка итлари билан текширишди. Асосан

наркотик нарсалар қидиришаркан. Бу қилиқлари менга ҳақоратдай туюлди. Ахир биз илмий экспедиция бўлсак, кимлигимиз афти-ангоримиздан кўриниб турса... Лекин чегарачиларга ҳатто отангта ҳам ишонмайсан, деб қасам ичиришса керак-да... Начора, чегара-божхонанинг ўз қонун-қоидалари, темир тартиб-интизоми бўлади, унга ҳамма бўйсуниши шарт... Демак, бизнинг ҳам бу ердаги замзамаларга оғир-вазминлик билан бардош бериб, оллодан ўзимизга сабр-тоқат ти-лашдан ўзга чорамиз йўқ.

ОНА ЮРТ НАФАСИ

Гарчи қўрқадиган, хавотирланадиган ҳеч нарса бўлмаса ҳам, бир чегарадан иккинчи юрт ҳудудига ўтиб олганингда беихтиёр енгил тортасан экан. Бу ерда ҳам шундай бўлди. Туркманистон заминига (аслида бу ҳам бошқа мамлакату, лекин ҳарқалай ўзимизники деган тушунча онгимиздан ҳали бутунлай чиқиб кетмаган-да) қадам қўйганимиз заҳоти Фаррух билан Аҳмаджон қарсак чалишиб, ерга чўккалашиб, қувончини, ватанга, она тупроққа бўлган мұҳаббатини изҳор этишди. Қувончга ҳамма шерик бўлди. Ҳатто оқсоқолларимизнинг чехралари ҳам яшнаб кетди. Ҳали асосий текширув, яъни божхона деган асаб эгови олдинда яна бўлса-да, барибир ҳудди ўз юртимизга ўтиб олгандек хурсанд, масрур эдик. (Божгиронда ҳужжатдаги арзимаган камчилик ё англашилмовчилик учун уч-тўрт кундан бери Эронга ўтолмай туришган сайёҳ, ўзбекларни кўрдик-да).

Бизнинг қувончимизни чегара билан божхона орагифидаги дарада, шундоқ йўлда гала-гала бўлиб юришган бесаноқ какликлар қарши олишди. Уларнинг кўпчилиги эндинга учишни ўрганаётган жўжалар экан. Афсуски биз уларни чўчитиб юбордик...

Шундай қилиб, хорижий юртлар билан хайрлашиб, божхонадан ўтгач, Ашхободга жўнар эканмиз, қардош, жондош туркманлар қўзимизга ўтдай кўринарди. Кечки пайт, соат бешга яқин Ашхободга (чегарадан 40 км.) етиб келиб, «Айна» ресторанида тушлик ва кечқурунлик қилдик. Овқат четда қиммат экан, деб юрган эдик, даҳшати шу ерда бўлди. Уч-тўрт хил, жаъми саккизта ликопчада газак емишлар: юпқа лаппак яхна гўшт, ҳудди шундай товук, тузланган бодринг, сир ва кўкат,

саккизта бифштекс, олтита кулчанон, уч чойнак чой—салкам 78 минг сўм (рубл) бўлди!

Лекин, биз яна Ашхободдамиз, яъни қўшниникида. Экспедиция ўз вазифасини ҳарқалай муваффақиятли бажариб, ёруғ юз билан қайтмоқда... — Раҳбаримиз шунга яқин гапларни айта туриб, боя чегарадан ўттанимизда ҳаммангизни ерга тушириб, бир-бир бағримга босмоқчи эдим. Лекин кўзимдан ёш чиқа бошлагани учун ўзимни тутдим, — деди ва яна кўзларида севинч ёшлари йилтиллаб, ҳаяжони, эҳтироси овозини бўғиб қўйди. Менимча орамизда энг серзавқ ва ҳиссиётчан одам — Зокирjon Машрабов эди. У иш юришмаганда куюна олар, юришганда суюна оларди. Зокирjon акада узоқ йиллик раҳбарлиқдан қолган қайсарлик ҳам бор эди. Бирор унинг ғашига тегса, ўша одам айтган фикр, таклифнинг тескарисини қиласди (яъни, «етов»га юрмас эди). Қаттиқ тортишиб қолса ҳам, бироздан кейин яна боягида мумомала қилиб кетаверарди. Буни у атайлаб, ўзини зўрлаб қилмасди, табиати ўзи шунаقا эди...

Ресторандан чиққанимизда вақт кечга томон бормоқда эди. Кўчанинг у юзидағи меҳмонхонага бир кириб чиқдик... Яширишнинг ҳожати йўқ, экспедиция ғазнаси ҳам, шахсий киссалар ҳам бўшаб қолган, боя ресторанда боримизни ўртага ташлаган эдик. Яъни, меҳмонхона излашнинг унча қизиги ҳам йўқ, эди. Марига қараб жўнавордик. Масофа — 400 км.

Тун. Обиджон ака рулда, мен штурман эдим. Соат ўн бир — ўн иккилар. Иттифоқо яна «етти оғайнин» юлдузларимни кўриб қолдим. Улар Зоҳидон — Машҳад йўлидагидай чап ёнимизда, ерга яқин жойда эди. Чўл осмони бепоён ва мусаффо, юлдузларга тўла эди. Сомон йўли эса яна шундоқ, бошимиз узра кесиб ўтган эди. Биз кўқда чалқанча тушганча нурсизгина қизариб турган бир тилик қовунсимон ой томонга кетардик.

Чўл шабадаси ниҳоятда ёқимли эди.

Йўлда қовун сотаёттаниларни уйғотиб қовунхўрлик қилдик. Лекин унча ширин эмас экан. Президентимиз одатдагидай баҳолашмай шартта сўя бошлади ва ўртacha учта қовунга эгаларининг оғиздан чиқдан бир минг беш юз сўмни нақд тўладик.

Марига етиб келиб, ўзимизнинг қадрдон «Санжар» меҳмонхонамизни топгунимизча соат тунги икки бўлди. Матъмура аёл (ўрис эди) уйқусираф, фақат 93-йилги рублни оламиз, деб анча тарҳашлик қилди. (Биз са-

фардан қайтгунча ўрис пулимиз янгиланиб кеттан эди). Доллар билан тўланадиган бўлса, бир ўрин 40 доллар экан. Зокиржой ака иккимиз ўрис опани бир амаллаб Г хонага кўндиридик-да, оқсоқоллар — Зокиржон ва Сайфиддин ҳожи акаларни жойлаб, қолганларимиз машинада ётдик.

Яхшики Жайхун дарёсининг кўприги бутун жойида экан, яқингина, осонгина ўтиб одик ва яна кўп юрмай, Туркманистон божхонасидан ҳам ўтиб, Аму-Бухоро канали бўйлаб, Бухорога яқинлашяпмиз. Чап томон бепоён чўл. Лекин юлгин ўскин. Ўнгда, канал ёқасида эса тол, жийда дараҳтлари чўл шамолида оҳис-та тебраниб турарди.

Бухоро шаҳрига кириб, театр билан ёндош «Гулистан» ошхонасида кўнгилдагидай тушлик қилдик. Мирриқиб карам шўрва ичдик. Кабобхўрлик қилдик. Ўз миллий таомларимизга нима етсин-а!... Йўлда кўк тўнли қовун олган эдик, ниҳоятда ширин чиқди. Ошхона ходими Зокиржон отдоши Зокиржон ақани таниб, (тевизорда кўрган экан), бизга хуштакаллуф билан хизмат қилди.

Кейин шаҳар оралаб, Арк ёнидан Самарқандга йўл одик.

Каттақўрғонга кечаси етиб келдик. Кўча бўйларида қабобпазлар кўпайиб кетибди. (Сафарга бораётганимизда бунчалик эмас эди, демак юртда анча ўзгаришлар юз бергани аниқ). Кўпчилик шундоқ уйининг олдига кабобхона очиб олибди. Бирининг олдида тўхтадик. Чорпояларга кўрпачалар тўшалиб, дастурхон ёзиб қўйилибди. Чой, ўзимизнинг оби нон, шакароб билан кабобхўрлик қилдик. Кейин қовун сўйдик. Маза қилиб, шоҳона ором олдик. Ҳаво салқин, енгил шабада эсиб турибди — ўз юртимизнинг жонбахш шабадаси...

Кечаси, соат ўн иккода қадрдан Жума шаҳарчамизга етиб, пахта заводининг профилакторийсига жойлашдик.

ВАТАНДАН ЯХШИ ЁР БЎЛМАС

12 сентябр, якшанба.

Биз уйга томон шиддат билан ошиқардик. Машина ҳам тез ва равон юрарди. Фақат, ҳар қадамда йўл, автомобил назорати ходимлари тўхтатишиб, ҳар лаҳзасини санаб бораётган қимматли вақтларимизнинг

анча бир қисмини елга совуришарди. Шунда Сайфиддин ҳожи аканинг Ҳиндистон ва Покистонда юрган пайтимиизда ажабланиб «тавба, лоақал кўнгил учун тўхтатиб, қаердан келяпсизлар, йўл бўлсин, деб қўйишмайди-я», дея, ўпкалаганларини эслаймиз, манави, ўзимизниларни кўринг, лоақал биронтаси тўсмай қўйишмайди-я, деб хуноб бўлардик. Йўл қўриқчиларини эса хуноб қилиш мумкин эмас... Улар машинанинг орқа томонидаги юклар, яъни кўрла-тўшак ва бошқа ашқол-дашқолларга (албатта совфа-саломлар ҳам бор) ишора қилишиб «О, Ҳиндистондан, Эрондан роса босибсизлар-да», дейишарди. Авваллари, Зокиржон ака ҳар гал бизнинг савдогар-тижоратчи ё ақалли оддий туристлар ҳам эмас, илмий экспедиция аъзолари эканлигимизни эринмай тушунтиришга ҳаракат қиласди. Охири зериқди. Бор-е, деб, ё ўзимизни кўрмаганга олиб тўхтатмасак, орқамиздан қувиб келишарди.

Ҳамма бедор, деярли ҳеч ким ухламасди.

Бедорлик сабаби ДАН ходимларигина эмас эди. Она юрт, яқинларни соғиниш ҳисси Андижонга яқинлашган сари кучайиб борар ва ана шу туйғу ҳам ухлашга йўл қўймасди. Ёруф юз билан кўришишга ишончдан кўнгил хотиржамлик, қониқиши ҳиссиёти дилга фулу ва фурур соларди. Ахир бизни озмунча одам кутяптими. Оила, ёру биродарлар, раҳбарлар ва «қани, булар нима каромат кўрсатиб келишаркин», деб юрганлар. Хайриятки, бизнинг уларга олиб келаётган бойликларимиз бор: бу, аввало бизнинг Шарқ юртлари тўғрисидаги таассуротларимиз, Бобур бобомиз ва унинг авлодлари қолдирган бекиёс, бебаҳо ёдгорликлар, обидалар ҳақидаги маълумотлар, кино, телеленталарга туширилган қимматли тасвирлар, китоблар, суратлар... Бобурийларнинг энг кейинги авлоди ვა жажжи Африна тўғрисидаги хушхабар...

Таассуротлар ичida мен қойил қолган яна бир нарса бор эди — бу — мен бўлган Шарқ мамлакатларида миллий кийимларнинг сақланиб келаётганлиги эди. Масалан, Ҳиндистонда қадимги ҳиндолар қандай кийинишган бўлса, ҳозирги халқнинг ҳам асосий қисми ана шундай либосда юришибди. Ахир уларда қанча-қанча ғарбликлар, жумладан инглизлар тўқсон йил ҳукмронлик қилишган-ку. Ёки, Покистон божхонаси бўлим бошлигининг оппоқ, узун якtagи ўзига қандай ярашиб туриби-я. Эрон аёлларининг қора чодраси, афрон эркакларининг узун кўйлаклари устидан кия-

диган камзуллари, аёлларининг паранжи-чиммат-ёпин-чиқлари. Албаттга бундай ҳолатларни бутунлай оқлаб бўлмас, балки маданият, тараққиётга, замонга ҳам сал мослашиш керақдир, лекин ҳарқалай бизчалик бўлиб кетиш ҳам яхши эмасдир. Эркакларимиз миллий кийим нималигини ҳам эсдан чиқариб юборишидди-ёв. Қиз-аёлларимиз бўлса, кийиниш, модада ғарб аёлларидан ҳам ўтаман, дейди...

Тун яримлаб бормоқда. Одатда бундай вақтларда бирон жойда тўхтаб, эрта аzonда йўлга чиқайлик, дея таклиф қилувчилар бўларди ва уни ҳамма қўллаб-қувватларди. Бутун, бу кеча эса ҳамма жим эди, ҳамма сергак ва ҳаяжонда эди. (Ахир уйларимиздан чиқиб кетганимизга салкам икки ой — 54 кун бўляпти).

Шу сергаклик, ҳаяжон ва тезроқ қадрдонлар ҳузурига етиш иштиёқи билан Хўжандда ҳам, Конибодомда ҳам тўхтамадик. Соат тунги иккida Кўқонга етиб келдик ва «Қўқон» меҳмонхонасига жойлашдик. Ҳаяжонда меҳмонхона излаб, шаҳарни икки марта айланиб чиқдик, сўрашга одам йўқ эди. Ҳар қанча ошиқ-сак ҳам, Андижонга тун ярмида кириб боришини маъқул кўрмадик. Бир кеча сабр қилиб, эрталаб боришга келишдик.

13 сентябр, душанба.

Эрталаб, кўйлак-шимларни дазмоллаб, сал ўзимизга ўхшаб олдик. Унгача Зокиржон aka телеграфга чиқиб, Андижонимиз раҳбарияти билан гаплашиб, ҳадемай етиб боришимизни айтиб келди.

Кўқондан чиқаверишдаги гавжум ошхонада анжир билан нонушта қилдик. (Сафар давомида биз қайтиб боргунча анжир қолармикин, деб орзиқкан эдик). Сўнг Андижонга «от» сурдик.

Кўқондан Андижон вилоят чегарасигача унча узоқ эмас эди. Машинамиз ҳам елдай учар, лекин нимагадир Ёзёвонга етиб бориш чўзилиб кетди.

Ниҳоят, «Бўз туманига хуш келибсиз» деган ёзув кўзимизга яраклаб кўринди. Шу ерда бизни туман ҳокими Адҳамжон Ўринбоев, бошқа раҳбарлар, атлас кўйлакли қизлар нон-туз, гуллар билан кутиб олишди. Карнай-сурнай, ноғора садолари оламни тутмоқда эди.

Кейин бизни Боғишамолга — Бобур бобомиз абадий маскан қурган азиз ва табаррук жойга бошлаб кетишли. У ерда бизни Андижон фахрийлари, оқсо-

қоллар, зиёлиларнинг вакиллари ош-сув билан кутишаётган экан.

Биз чуқур эҳтиром ва таъзим билан Бобурга (рамзий қабрига, у пайтда ҳали унинг ҳайкали қад кўтартмаган эди), Андижонга салом бердик, соғинчимиз, меҳримизни изҳор этдик, кўрган-билгандаримиз, таассуротларимизнинг дастлабки, юза қатини очиб ҳамюрларни баҳраманд, этдик.

Азиз ва қадрдан одамлар, адабиёт ва Бобур муҳлислари, авлодлари орасида туриб, телетасвирчимиз Фаррухнинг республика телевидениесига интервью учун: «экспедиция аъзоси сифатида сафар сизга нималар берди», деган саволига шундай жавоб бердим:

— Ҳиндистоннинг табиий гўзал табиати ва юмшоқ табиатли одамлари менда зўр таассурот қолдирди. Лекин ватанимиздан қанча узоқлашган сари ватан туйғусини шу қадар чуқурроқ ҳис қила бордим. Ўз одамларимизнинг нақадар ажойиб, одамохун, олижаноб, дилкаш ва кўнгилга яқинлигини бошқа юрт халқлари билан мулоқотда бўлганимдан кейин янада яхшироқ тушундим. Ва яна, Ҳиротда ва бошқа азиз, тарихий жойларга борганимда Навоий, Бобур каби боболаримизнинг қандай машаққатлар, изтироблар, азоблар эвазига буюк бўлишганини англадим.

Ва яна, Ҳиндистонда, ватандан олисда, хулқ-атвори ўзгача одамлар орасида бизга ўнгайсиз иқлими мамлакатларда юрар эканман, Бобурнинг ўша: «Толеъ йўқи жонимга балолиқ бўлди...» деб бошланадиган машҳур рубоийсининг мағзини янада яхшироқ чақдим.

Чунки мен сафардан қайтиб, Андижон заминига қадам қўйгач, ҳеч қаерда, ҳеч қачон «ватандин яхши ёр ўлмас»лигига яна бир карра эмас, бу карраларнинг кўпайтмаси қанча бўлиши мумкин бўлса, шунча карра ишонч ҳосил қилдим!..

Дунёда энг гўзал юрт — Ўзбекистон ва Андижон экан!

МУАЛЛИФ УЗРИ

Ушбу сафарнома асосан сафар чоғида кўрган-билгандарим, йўлбонлар, олимлар, кексалар тилидан эшитгандарим, китоблардан ўқигандарим асосида ёзилди. Албатта, эшитгандаримни тарихий манбаларга мумкин қадар солиштиришга уриндим. Шунда ҳам, мабодо айрим рақамлар, шарҳлар, номларда анча-мунча

ноаниқликлар ўтиб кетган бўлса, мұхтарам китобхон маъзур тутар, деб умид қиласан. (Тарихий манбаларнинг ўзида ҳам маълумотлар, тафсилотларда хилмалик кўп учради).

ИЛОВА

2 июл, 1996 йил.

«ЧОЙ ОТА»

(Экспедициянинг биринчи сафари чоғида Зокиржон Машрабовга «Бой ота», Собиржон Шокаримовга «Чой ота» деб (албатта ҳазил тариқасида) лақаб қўйилган эди). Шу мавзуда ушбу назмни битдим:

«Ҳайёт-хўйт» деб йўлга чиқдик — уловимиз «Тойўта»,
«Тойўтамас, бу — аргумоқ, гижинглаган той, ота.

Саккизовлон — саккиз оҳанг, йўлбошчимиз — алп қомат
Машраб ўғли Зокиржонидир, тахаллуси «Бой ота».

Бобур авлодларин излаб кездик Бенгал қўлтуғин,
Босиб ўтдик қанча довон, қанча дарё, сой, ота.

Ҳамсафарлар бири олим, бири асиб, журналист,
Мижозлар ҳам турфа хилдир, бирин деймиз «Чой ота».

Кимга «дезинфексияю», Аврангобод пивоси,
Кимга қатиқ, кимга тамак кўринаги ой, ота.

Покистону Ҳиндистоннинг чўлу қишлоқларида
Ип қалавот бўлди бизга тахти равон жой, ота.

Вага деган «ров»дан ўтолмай неча кун ҳинг ерига,
Сал қолди-я ишларимиз бўлишига лой, ота.

Юмшатишга божхоначи, ясовуллар танглайн
Попон дўппи, пакки пичоқ бўлди-да зап мой, ота.

«Мұҳаббат эҳромин» кўриб, таъблар бўлди кўп хира,
Кўзларимиз чиқсун уни кўргунча шундай, ота.

Жайпур йўли жангалида қароқчилар хавфигдан
Қочиб эдик, машинамиз сувга ботди, ҳой ота.

Эллик тўрт кун «тойўта»да ўтировриб буқчайиб,
Қаддимиз ҳам бўлиб кетди камалакдай ёй, ота.

Яхшиямки уловимиз совутгичи жойида,
Акс ҳолда аҳволимиз бўлар эдивой, ота.

Бой отамиз омон бўлса, галда Хитой — ипак йўл,
Бир неча от, хачир, туя этилса бас шай, ота.

ХОТИМА ЁКИ САФАРДАН СҮНГГИ ФАСЛ

1993 йил — андижонликлар учун Бобур йили эди. Заҳириддин Бобур таваллудининг 510 йиллигини жуда кенг нишонлаш, Андижон шаҳрига қўйиш учун Бобурнинг икки ҳайкалини ишлатиш, «Бобур миллий боғи»да амалга оширилаётган жуда катта қурилиш ва ўзгаришлар, бошқа йирик-йирик тадбирлар Зокиржон Машрабовни кутмоқда эди.

Бобур миллий боғининг шундоқ сийнасида қад ростлаётган Бобур абадий оромгоҳи, яъни рамзий қабр-мақбараси битай деб қолган эди, бу жой қақраган адирлик ер бўлиб, ўтган йили вилоят раҳбарияти, маҳалла оқсоқоллари, уламолар, Андижон адабий жамоатчилиги вакиллари иштирокида Кобулдаги Бобур қабр-мақбарасидан олиб келинган тупроқ «дағн» этилган ва «қабр» устига Кобулдаги мақбаранинг айнан нусхасини қуриш мўлжалланган эди. Ана шу маросимда «қабр»га тупроқ тортар эканмиз, шоир Фозил Эмин кўзларида ёш йилтилаганини кўриб, мен ҳам ўз мижжаларимга нам сизганини ҳис қилган эдим.

Ҳинди斯顿 сафаридан қайтганимиздан икки ҳафтача кейин (Зокиржон aka ташкилотчилигида) яна рамзий қабр ёнига вилоят ва Андижон шаҳар раҳбариятидан, уламолар, адабиётчilar таклиф этилди. Қўй сўйилди, ош берилди ва рамзий қабрга, Кобулдан келтирилган тупроқ ёнига, Бобур илк бор дағн этилган Аградаги мақbara деворлари остидан мен ҳовучлаб олган тупроқ ҳам қўйилди.

Шундай қилиб, Бобур ўз юртига рамзан бутунлай олиб келинди. Балки бундан буюк бобомизнинг руҳи ҳам чексиз шод бўлаётгандир...

Хеч шубҳа йўқки, Бобур бутун умри давомида Андижонга талпиниб яшаган. Лекин ўша пайтдаги тарихий вазият, Андижондаги Бобур аждодлари, уруғ-аймоқлари, aka-укалар ўртасидаги парокандалик, сарой аъёнларининг фанимлиги, хиёнати ва бошқа сабаблар бунга йўл қўймаган. Шунинг учун Бобур ўзи Андижонга яқинроқ, ватан ҳидини шамол келтириб турадиган жойга — Кобулдаги баланд, хушҳаво тоғлар бағрига ўзи бунёд эттирган боққа дағн этишларини васият қилган...

Тақдирнинг ғалатлигини қаранг-а: тириклигида не-не саргардоңликларни бошидан кечирган буюк шоир ва шаҳаншоҳнинг жасади, хоки-тупроғи ҳам қанчалар сарсон бўлди-я: Оромбоғдан Жамна бўйидаги мақбарага, у ердан бир неча минг чақиримли Кобулга... Мана, эндининг асили жойидан абадий мақон топди. Иншоолло, энди унинг руҳини ҳеч ким безовта қилмагай...

Зокиржон ака яна Бобур боғидаги қурилишлар гирдобига шўнғиди. Айни вақтда у Тошкентда яратилаётган Бобур ҳайкалларини тезлаштириш, ҳайкалтарошларга кўмаклашишни ҳам ўз зиммасига олган эди. Бу жонсарак, сергайрат одам экспедиция сафарига бағишиланган «Бобурийлар изидан» номли ҳужжатли-оммабоп фильм сценарийсини ёзишда менга бош маслаҳатчи ва ҳаммуаллиф ҳам эди.

Иккимиз Тошкентга ҳам қатнай бошладик. «Лабзак» меҳмонхонаси асосий қўнала ва паккамиз эди. Ҳамсафаримиз, кинотасвирчи Тўлқин Рўзиев, ҳайкалтарошлар Қодир Салоҳиддинов, Равшан Миртоҗиевлар оқшомлари бу ерга ташриф буюришар, ишларимиз боришини муҳокама қиласар, кенгашар эдик. Туни билан баттол чивинлар билан олиша-олиша, эрта туриб, Зокиржон ака Фазалкентга—тагсупа-тошларни тарашлаб беришни гаплашиб келишга ёки ҳайкаллар ишланаётган жойга, мен эсам Тўлқин ака билан киностудияга — «Достон» ижодий уюшмасига кетардик.

Кечқурун меҳмонхонага қайтгач, мен сценарийни давом эттирадим, бир дунё ишларни битириб келган Зокиржон ака эса чалаларини битқазиш учун телефон ёнига ўрнашиб ўтиради. Хона бурчларига, каравотлар тагига бекиниб олган мазахўрак чивинлар эса ўтқир тишларини қайрашиб, чироқни ўчириб ўринларга чўзилишимизни сабрсизлик билан кутишарди.

Биз ҳафтанинг ярмида Андижонда, ярмида Тошкентда бўлиб, шанба куни тушдан кейин қайтардик. Айниқса, ҳайкал остига қўйиладиган мармар тошни топиш қийин бўлди. Уни излаб Зокиржон ака билан бир неча марта Наманган вилоятининг Поп туманидаги Чоркесар деган жойга ҳам бордик.

Хуллас ишлар қийинчиллик билан юришарди. Қодир ака билан Равшанбек ҳали албастр, ҳали цемент йўқ, деб келишарди. Зокиржон ака яна таниш-билишларини ишга солар, юқори маҳкамаларга ҳисоб бериб турар ва гоҳида мадад сўрарди.

Равшанбек ишлаётган ҳайкал Вазирлар Маҳкамаси назарида эди. Бошқа мутасадди ўртоқлар тез-тез Оқтепага келишиб, ҳайкал хомакисини муҳокама қилишарди. (Ана шундай муҳокамаларнинг бирида мен ҳам қатнашдим).

Равшанбек Миртожиев тасвирида маҳобатли Бобур тулпор отда тогу-тошлар орасидан, яъни туманли ва долғали ўтмиш қаъридан чиқиб ва гўё узоқ, бегона юртлардан машаққатли йўлларни босиб, ўз юртига, юртдошларига таъзим бажо айлаб, қўлинни кўксига қўйиб турган эди. Отнинг орқа ярми тоглар ичидаги қолгани учун ҳайкал, хусусан от яримта бўлиб, фалатироқ қўринаётгани айтилди. Равшанбек: бу ҳолат, биринчидан унинг ижодий тафаккури маҳсули, яъни рамзийликни кучайтириш мақсадида танланганини, иккичидан, савлатдор отнинг белидан пастки баъзи қисмларини рўй рост тасвирилашга истиҳоласи ўринли эди. Аслида унинг шарқона истиҳоласи ўринли эди. Лекин санъат—санъатда. У шарқона ҳаё, андиша билан ҳар доим ҳам келишавермайди.

— Ҳечқиси йўқ, бўрттирмайроқ ишласа, бўлар, — дейиши.

Бу фикр кўпчилик томонидан қўллаб-қувватлангач, ҳайкалтарошга ҳам маъқул тушди.

Киностудияда эса монтаж ишлари бошланиб кетди. Биз монтажчи Оля деган аёл билан Тўлқин ака олиб қелган ажойиб тасвиirlарни сценарийга мослаштириш учун эрталабдан кечгача лента айлантирадик. Тасвиirlар шундай ноёб ва ажойиб эдикি, ўтказиб, ташлаб юборишга кўзинг қиймайди. 18 қутидан икки қути тасвири танлаб олиш керак эди. Қолган кадрлар жудаям увол эди. Ҳатто Оля ҳам ачиниб, афсусланиб бош чайқарди. Тўлқин ака шударажада дарё одам эканки, жуда ачинарли иш бўлаётганини айтсам, катталар икки қисмга аранг рози бўлишиди-ку, нима қиламиз энди, майли-да, дейди. Зокиржон ака билан маслаҳатлашиб режиссеримиз Даврон Салимовга фикримизни етказдик. У ҳам аслида биз билан ҳамфикр эди, 54 кунлик сафар давомидда олинган тасвиirlарни йигирма дақиқага келтириш, бу — у ер-бу ердан юлиб-юлиб олишдан бошқа нарса эмаслигини жуда яхши ҳис қилаётган ва у ҳам бу ҳақда жиддий қайфураётган эди. Киноматография қўмитаси раисидан яна бир қисмга рухсат олишга муваффақ бўлди.

— Энди чидаса бўлади, — дедик ҳаммамиз. Тўлқин ака ҳам мамнун эди.

Фильмнинг номини «Бобурийлар изидан» деб қўйдик.

Студияда Тўлқин ака суратлари асосида, Шухрат Курбонбоев режиссёргида «Бобур саломи» деган икки қисмли яна бир ҳужжатли оммабоп фильм ишланаётган эди. Мавжуд сценарий матни билан тасвиirlар мос тушмаётганидан Шухратнинг боши қотиб юрган экан. Мендан ёрдам беришни илтимос қилиб қолди. Тўлқин ака ҳам «яхши бўлади», деди. Бажонидил рози бўлдим. Ҳа-да, умримда кино соҳасига яқинлашмаган одам бирданига иккита ҳужжатли оммабоп фильм ижодкорлари сафида турсам, ёмонми? Менга шундай ишонч билдиришса, рози бўлмаслигим ҳам борми...

Хуллас, икки ой ичида иккита сценарий ёздим, иккала фильм монтажида ҳам бошдан-оёқ монтажчи билан бирга бўлдим. Одатда муаллифлар сценарийни ёзib бериб, бу ёфи билан ишлари бўлмас экан, шунинг учун ҳам янги киночи дўстларим мендан хурсанд эдилар ва деярли ҳар куни меҳмон қилиб, сийлашарди. Айниқса, Тўлқин ака... Деярли ҳар куни у билан бирга қайтарканмиз, Анҳорнинг пиёдалар учун мўлжалланган темир кўпригидан ўтиб, собиқ комсомол кўлининг жанубий, кичик дарвозаси ёнидаги дўкон ва ошхонада бир тўхтаб олар... ё шу жойда ҳаммамиз (Даврон, Шухратлар билан) «ҳордиқ ёзди...» қилиб ўтирадик...

Ниҳоят ноябрнинг охирларида икки ҳайкал, иккала фильм ҳам тайёр бўлди, ҳайкаллар Андижонга олиб келинди.

Бобур таваллудининг 510 йиллик тантаналари 17 декабр, жума куни бошланди. Андижонда ҳаво анча совуқ эди. Тошкентдан республикамизнинг таниқли шоир ва ёзувчилари, санъаткорлари, фан ва маданият арбоблари, пойтахтимиз жамоатчилигининг вакиллари буюк бобомиз тўйида қатнашиш учун вилоятимизга ташриф буюрдилар. Улар орасида Ўзбекистон халқ ёзувчилари ва шоирлари Сайд Аҳмад, Пиримкул Қодиров, Шукрулло, Абдулла Орипов, Муҳаммад Али, Ҳалима Худойбердиева, Ўзбекистон Фанлар академиясининг мухбир аъзоси Сабоҳат Азимжонова, Ўзбекистон фанлар академияси Қўлёзмалар институти профессори Фозила Сулаймонова, шоирлардан Эътибор Охунова, Ҳамроқул Ризо, Муҳаммад Юсуф, Мирзо Кенжабек ва бошқа таниқли кишилар бор эди.

Тантаналар эртасига давом этди. Андижон Тошкентдан ва узоқ юртлардан келган азиз меҳмонларни — Ўзбекистон республикаси ҳукумат вакиллари, Ҳиндистоннинг Ўзбекистондаги элчиси Делип Мехта, Туркияning Ўзбекистондаги элчиси Вулқон Чўтири, Ҳиндистоннинг олис Ҳайдаробод шаҳридан экспедиция аъзолари илк бор топишган Бобур авлодлари — Зиёвуддин, Масихуддин ва Шажауддин Тусийларни, мамлакатимизнинг деярли барча вилоятларидан келишган вакилларни очиқ бағр ва шоду хуррамлик билан кутиб олди.

Андижоннинг маркази — Бобур майдонидаги буюк бобомизнинг отлиғ ҳайкали очилиш маросимидан сўнг меҳмонлар ва Андижон аҳли Бобур миллий боғига (собиқ Богишамолга) йўл олдилар.

Шу куни Андижон, айниқса Богишамол даҳаси кулранг туман ичida гўё ҳарир парда ёпиниб оҳиста сузаёттандай кўринарди. Вилоят газеталари бу туманий файри-табиий хислатли одамларининг сўзларига асосланиб, Бобур, унинг аждодлари, буюк бобокалонларимиз руҳларига ўхшатдилар.

Ҳаво совуқ бўлишига қарамай, боғ атрофи, йўллар халқ билан тўла эди.

Бир ёнда Бобур миллий боғининг Арк дарвозаси, буюк шоирнинг бутун қадди-басти, шоирона кайфияти ифодаланган ҳайкали «Бобур ва жаҳон маданияти» мозийгоҳларининг очилиши, Бобур рамзий қабри ёнида куръон тиловотлари, иккинчи томонда андижонликлар билан тўла ёзги концерт майдонида Ўзбекистоннинг машҳур ҳофизларининг Бобур фазалларидан иборат янгроқ ашуналари... ва ҳаяжонли қийқириқлар давом этарди.

Бобурийларнинг яқинда топилган ҳозирги авлоди вакиллари — Тусийлар ҳар бир воқеага, ҳар бир андижонликка, шаҳримизнинг ҳар бир дарахти, гулига гўё суқланишиб, ҳавас билан тикилишар, бобокалонлари яшаган юрт ҳавосидан тўйиб-тўйиб нафас олишарди.

Дарҳақиқат, Андижоннинг бугунги қувончи чексиз, ҳусни-тароватини таърифлашга тил ожиз, сўз кам эди. Ана шу тантаналар иштирокчиси бўлган таниқли бир шоир шундай деди:

— Биз Андижонга юкингани, Бобур авлодларига сифингани, унинг фазилатларини ўзимизга юқтиргани келдик...

Ўша лаҳзаларда мен андижонлилик, улуғ Бобурга ватандошлиқдан фахрланиш, фуур туйғусининг юк-

сак ва жўшқинлигидан улкан бахтта йўлиқдан киши каби ҳаяжонланар эрдим... Менимча шу куни бади-ятта, илму фанга озгина даҳли бўлган ё қизиқувчи инсон, қалбида ватан деган буюк туйғу бўлишини ҳис эта олувчи ҳар бир андижонлик шодланар, фурурланар, ҳаяжонланар эди...

Чунки, Бобур ҳайкалини кўриш, бир умр мусофирилик доғини тортиб, бегона юртларда қолиб кетган буюк юртдошининг Андижонга қайтиши—андижонликларнинг (аждодларию ҳозиргиларининг) орзу, армони эди. Мана шу орзу, мана шу тарихий армон ушади.

Ушбу эҳтиросларга тўла, мунааввар дамларда шоирнинг дили ва шуурида шеърий сатрлар чарх уриши табиийдир:

БОБУР ҲАЙКАЛИ ҚОШИДА

Ҳузурингта келдим, эй улуф устоз,
Азиз сиймошнги этгали тавоғ.
Ҳайрият, ёнимда кўринмас бутун
Ёзувчи — қиммиш имоми, савоб?

Бизга маёқ бўлди шеър, ҳикмат эмас,
Фақат олға, деган сеҳрли даъват.
Босган изимизни қириб-қиртишилаб,
Кўз юмид, қайгадир таллиндик фақат.

Шеърингни бегона имлода ўқиб,
Қалби яро бўлди не-не шоирнинг.
Сен-чи, туравердинг сирли термулиб,
Бундай балолари кўп деб меҳварнинг.

Қанча узоқлашган сари замон, вақт,
Юракларга яқин бўлган шоир-ей.
Қуёш ҳам ёрита олмас дилмарга
Ҳар разали чақин бўлган шоир-ей.

Доно ҳам, сўқир ҳам кўрмоқда бугун
Сўзлар қатигаги чехрангни равшан.
Шеъриятнинг буюк, эзгулигига
Замон шоҳлари ҳам бермоқдагир тан.

Қайдан эсаётган бўлса ҳам майли,
Кул босган чўғларни пуфлаб ўтди ел.
Боболар юзига бокмоқда дадил
Караҳтиклидан фориғ ўзбек деган Эл.

Ҳа, энди Ўзбекистонимизнинг мустақил, ҳур мамлакатга айланиши шарофати билан Бобурнинг манглайига ички ғанимларимиз томонидан ёпиширилган «босқинчи» деган тамға олиб ташланган эди!..

Бобур тантаналари Андижон тарихига зарҳал ҳарфлар билан мангуга битилгани қаби, бизнинг кўз ўнгимизда ҳам умрбод муҳрланиб қолиши шубҳасиз...

Беихтиёр Бобурнинг қуийдаги аламнок мисралари ёдга тушади:

*Мурод васлинг эрур, айла ёд Бобурни,
Унутмагил яна бу номурод Бобурни...*

Йўқ, Бобур бобо, биз Сизни ҳеч қачон унутмаганимиз, фақат қалбимиз қаърида сақлаб келдик холос, дея ҳайқиргим келди...

ДЕМАК:

*Ҳар кимки вафо қилса, вафо топқусидир,
Ҳар кимки жафо қилса, жафо топқусидир.
Яхши киши кўрмагай ямонлиқ, ҳаргиз,
Ҳар кимки ямон бўлса, жазо топқусидир...*

1993 — 1996 йил,
21 июл, шанба.

КЎНГЛИМДАГИ ГУЛЛАРИМ

ПУЛСИРОТ

Брнода¹, кенгтина йўлак шифтида
Бир тимсоҳ осиғлиқ туарар тош қотиб.
Жилмайиб тўхтар Гид унинг остида,
Сайёҳлар кўнглида фулу уйғотиб.
Сўрар: орангизда эр-хотин борми?
Шу ҳайкал тагидан ўтсин эрингиз.
Хиёнаткор бўлса...

Думи тимсоҳнинг
Қимиirlаб кетади. Синааб кўрингиз.
Ялт этиб қарайди йигит кўзига
Ўзбаки кийинган сўлим бир жувон.
Балки у ўйлади: билиб олмоққа
Энг қулай фурсат бу, энг қулай имкон.
Сайёҳлар нигоҳи қистар йигитни,
Барчанинг дилида ғалат иштиёқ.
Йигит-чи, аёлга мўлтирас бети
Қизиб, вужудига югуриб титроқ,
«Мабодо... мабодо...» ўйлар эҳтимол...
«Э, агар... — бўзарар аёлнинг юзи, —

¹ Брно — Чехословакиядаги шаҳар.

КУТИЛМАГАН МЕҲМОН

Кириб келди хонамга бир кеч
Кумуш сочли жийда дарахти.
Шошиб қолдим, ўйламовдим ҳеч —
Кутмагандай тасодиф бахтни.

Күп йил бўлди — кўришмагандик...
Таклиф қилдим уй тўридан жой.
У пойгақда тураверди тик,
Сал хомушроқ эди ҳарқалай.

Ёдга олдик ўтган кунларни,
Күз ёши ҳам қилди у бир оз.
Сұхбатимиз қовушмади күп,
Мен бош ирғаб ўтирдим холос.

Чоғланаркан қайтишга, секин
Күргим келиб кирудим, деди.
Чиқиб кетди шарпасиз, ғамгин,
Юрагимда узилди недир.

Жийда кетди, йўлак, хонада
Эски таниш ва хуш бўй қолди.
Ҳамдами йўқ, фарид аёлдай
Бунча дилгир..., деган ўй қолди.

ГУЛЛАРИНГНИ СОФИНДИМ

Гуллар ҳамма жойда бирдай
чиройли,
Ҳиди бирдай ёқимли, хушбўй,
Дея ўйлардим.
Гулларингни соғиниб қолдим,
Ҳар тонгдаги қувончимни
Софиндим жуда,
Юрагимга рух, инарди
Маъсум ҳидлардан.
Бу ерда ҳам гуллар кўп жуда.
Бу ерда ҳам гуллар чиройли —
Янгилайди ҳар тонг ҳамшира,
бироқ,
Беморлигим эсга келар
Кўзим тушган чоқ
Ва наздимда
Фақат гуллар ифори эмас,
Аллақаңдай дориларнинг
Иси анқир гулдандан.
Мен гулгамас,
Гуллар менга термулгандай
Раҳми келиб, ачиниб.
Фақат менинг кўнглим учун
жилмаймоқчи бўлаётгандай...
Ахир мен ҳам яхши кўраман
Бир оз мағрур,
Бир оз иболи,
Яшнаб турган дуркун гулларни.
Ҳолбуки, мен
Гуллар ҳамма жойда бирдайн
кўркам,
Ҳиди ҳамма жойда ёқимли,
хушбўй,
Жозибали, дея ўйлардим...

Гулларингни соғиндим жуда,
Гулларингни...

СЕН ЙИГЛАСАНГ...

Армонлардан ногоҳ сўз очсанг,
Ўқинчларга тўлса гар кўнглинг.
Энтикиб, энтикиб йигласанг
Фамгин тушга айланар ўнгим.

Кўз ёшларинг жозиллаб томар
Юрагимнинг нақ ярасига.
Поёни йўқ азоблар бор-а
Икки жаҳон оворасига.

Кўз ёшигнинг ҳар бир томчиси
Вужудимни эзар — зил-зил тош.
Кўз ёшигнинг бир томчинини
Қуритмоққа ожиздир қуёш.

Сен йигласанг... афёр шоҳ отиб,
Холимиздан кулмасми, эркам?
Сен йигласанг... шод, бехавотир
Бағрин менга очарми эртам?

Сен йигласанг ботгум гуноҳга,
Ич-ичимдан мен ҳам йиглайман,
Сен йигласанг... икки дунёга
Сигмайман.
Сигмайман...

ТЎРТЛИКЛАР

Ёру дўст танлашда диддан айрилма,
Диддан айрилсанг ҳам бурдан айрилма.
Бурд ҳам панд бериши мумкин бу замон,
Гул бўйидан, ёр ҳидидан айрилма.

* * *

Ошиқликка жуда нодир эмасман,
Ёқа чок этмоққа қодир эмасман.
Танамга, гоҳ юрга сигмайман, бироқ,
Бош олиб кетмоққа Бобур эмасман.

* * *

Ишқ аҳлидай серзавқ, олий насиб йўқ,
Ишқ дамин кесгувчи қаҳру ғазаб йўқ.
Севмоқ — баҳт, севилмоқ толе-ку, аммо,
Пинҳон оҳ урмоқдан ортиқ азоб йўқ.

* * *

Қечиккан аҳд-паймонар ҳазилга ўхшар,
Бу — ҳаёт ўйини, таги зилга ўхшар.
Кўнгиллар қалтироқда, ақлу хуш ҳуркак,
Бахту зорлик қоришиқ фаслга ўхшар.

* * *

Ўзингга ойдай талъат тила,
Боқий чирой, малоҳат тила.
Бор сифатни тила ўзингта,
Менга эса... сабр-тоқат тила.

КЕЧ БЎЛСА ҲАМ

Энди мени ўкситмайди
Барвақт оқарган сочим.
Аламларим ортда қолди,
Булоқ очди қувончим.

Энди мени ўкситмайди
Муҳаббатсиз йилларим,
Кеч бўлса ҳам яшнаб кетди
Кўнглимдаги гулларим.

БЕМАҲАЛ...

Бемаҳал келган қувончни
Лаб қатига қимтиб юборди.
Бемаҳал келган ажалга
Чап бермоқнинг эвин қилоди.

Бемаҳал келган муҳаббат
Қошида ожиз мўлтирап.
Бемаҳал келган бу неъмат
Бол косага оғу тўлдирап.

СОФИНЧ

Тор созига ўхшайди софинч —
Таранглашган сари жаранглар.
Шундай экан, дея қизларжон,
Торни яна узиб олманглар.

СЕВМАГАН ОДАМ

Қалбини қандай илитаркин
Севмаган одам.
Үзини нима деб овутаркин
Севмаган одам?
Үйлаб-үйлаб келолмадим
Бир фикрга,
Асли, ким деб аталаркин
Севмаган одам?

МАЛАК БИЛАН МУЛОҚОТ

- Мавж урганда кафтда сочинг, айлайди бехуш...
- Ҳар тонг гуллар атри билан қилгум парвариш.
- Айт, қароғинг жозибаси ўтдир бунча ҳам?
- «Кўзинг чўлпон билан қондош» деб қўяр онам.
- Ҳай, ҳай чеҳра ҳам бўлурму мунаvvар шунчаги...
- Ой нурига чўмилгум-да ахир ҳар кеча.
- Мисли мұхаббат гунчаси ул лаъли лаблар...
- Суқли қўзлар зада айлар, жоним азоблар.
- Ул оҳангми ё овозинг — оқар ҳавода?
- Машқ қиласиз саъва билан ҳар куни боғда.
- Дилю жоним ўртадинг-ку, юртинг қай чаман?
- Андижонсой бўйларида униб ўсганман.
- Алдама, ҳай мен ҳам ахир дунё кўрганман,
«Малакларда макон бўлмас», деб ўқиганман.

ДЕСАНГИЗ, ДЕНГ

Хуснимфа неча волаю ҳайрон, десангиз, денг,
Лутфим яна қанчалара армон десангиз, денг.

Парвоналарим қай бириға раҳми қилай, о,
Кўйимда сенам бўлма-да гирён, десангиз, денг.

Куйдиргали хўп моҳир экансиз, нетай аммо,
Эҳсон, карамим сенга-да ҳижрон десангиз, денг.

Васлим йўлида кўп-ку риёзат, қутар унда
Минг бир чифириқ, ғов, селу тўфон, десангиз, денг.

Сўргил мени ҳажримга дучор ким, ани ҳолин —
Банда қилурам бўлса-да султон, десангиз, денг.

Ишқим ўти — оташида — ҳаттоки — самандар
Мушкул жуда қолмоғи соғ-омон, десангиз, денг.

Ошиғлиғи Бекнинг сиза рост, балки шарафмас,
Биз қулни-да тағин бита қурбон, десангиз, денг.

МУҲАББАТ НЕ?

Висолга интизор этмак маҳоли тарки одатми?
Ҳажр номлиғ бу удум ё момолардан асоратми?

Нечукким кўрмадим бир ошиқи масруру мамнуңни,
Ато қасби таваллою оҳу-воҳу надоматми?

Азобимиз санам нозу фироқ ўтиға тутатқу,
Ва ё қанча ситам чексак, алар жонига роҳатми?

Вафо қасриға жафо тоғидин қўрғон ясар доим,
Вафо йўлин тутар бўлса, гўзалларга маломатми?

Қўлида жонини тутиб елиб юрса ёр изидин,
Писанд этмай, чимирса қош, ахир шу ҳам адолатми?

Ҳусн қошида лол, ожиз ошиқ аҳли ҳануз ҳайрон:
Аломатми Юсуф чин ё мисолга тоқ далолатми?

Ўқуб қанча китобатлар жавобин топмади Бек ҳеч:
Муҳаббат бу — синоатми, залолатми ё омадми?

СЕНДА ХОЛОСМИ?

Нозаниним, нози туман сенда холосми?
Нозук адо оҳу билан сенда холосми?

Ишвагар-ей, ойга қараб чимриласан, ҳам
Солланасан, ё сийм-тан сенда холосми?

Мунча таманно ўтасан дилга солиб ўт,
Сарви равон, хипча бадан сенда холосми?

Тўсма юзинг зулфинг ила жоними ўртаб,
Ёнди кўзим, рўйи суман сенда холосми?

Жим турасан, лутфинга ё зор этсанму,
Кериласан, боли сухан сенда холосми?

Гамза билан чучваралаб лаълиларингни
Бурма санам, гунча даҳан сенда холосми?

Неча шаҳар сулувлари менгзамади, рост,
Оlam аро ҳусни чаман сенда холосми?

Бекка аталган ситаму нозу фироқлар
Ўзга малақда йўқмикан, сенда холосми?

ВАСЛИНГ ТИЛАБ ЎТСАМ

Айб этма деволингни силаб, сийпалаб ўтсам,
Жонимни ҳовучлаб, яшурин, асталаб ўтсам,
Девонаға йўйма яна сен ҳафталаб ўтсам,
Дарчанг кўзидан мўралаб, оҳ, қалтираб ўтсам,
Шифо лаълингға ташнаизор хаста лаб ўтсам,

Кўнглим қуши кўкларда саранг учмаса дейман,
Гулзору чаманлар уни чин хушласа дейман,
Иссик чамани — ёр дилида қишиласа дейман,
Дилдору қушим айру сира тушмаса дейман,
Умрим бўйи жононима жон дасталаб ўтсам.

Мен хўп синадим бу аломат олами гажрин,
Бас қилса нетаркин менга ёр оғули ҳажрин,
Бергаймикин-ей бир куни бу сабрими ажрин,
Сийлайдими ишқ элида сарсон муҳожирин
На бўлур-ей бир дамгина васлинг тилаб ўтсам.

Зорим, талабим ҳами қўп дайру фанода,
Кўнглим яна қолмиш юзи моҳ гули раънода,
Ёдим мени ёрдаю анга ҳамду санода,
Ўлпониға шаҳрим йўғу бир жоним омода,
Ёр этса вафо, эркаланиб, эркалаб ўтсам.

Оҳ, борми муҳаббат ярасин малҳами, эй Бек,
Дилдор ситами топғусими барҳами, эй, Бек,
Ул моҳидилим бўлса агар ҳамдами эй, Бек,
Ҳам бори дилим ҳожасию маҳрами эй, Бек,
Дунёға татир ишқ қўшиғин басталаб ўтсам.

ЧИҚА ҚОЛСА

Кун бота қолсаю ой юз нигорим чиқа қолса,
Мен бир нигоҳига ташнаи зорим чиқа қолса.

Дуррани қимтибу лаблари хандонига босиб,
Хур каби соллана товус хиромим чиқа қолса.

Ҳар япроғу гиё кўнглима ҳамдаму ҳамроҳ,
Дарёга оқизай дардими ёрим чиқа қолса.

Булбулу қумри жимар барглар аросига сингиб,
Дук-дук урагим, ишвакорим чиқа қолса.

Томчи сифат тилим учиди титрайди омонат —
Кетмасидан думалаб дил изҳорим, чиқа қолса.

Чирсиллади тубидан косаи сабри-қарорим,
Дарзини этгали пайванд заргорим чиқа қолса.

Ҳар ваъдасида синаб аҳдими безмади ёр, Бек,
Шўхи забониму кўзи хуморим чиқа қолса.

КЕЧИККАН ОЙ

Ел уйғониб, тонглар отди, кетмадингму тун сорингга?
Адашдингму йўл тополмай жонажон ул диёрингта?

Жамолинг сув узра кўриб, бериб оро яна ўзга,
Кечикдингму ё висолга, мубталои дийдорингга?

Қани измингта фидо үл канизаклар, кўрингач кун
Сени ҳоли қўйдиларму ошиқи бекарорингта?

Юзинг ранги заъфарондур, ўзинг ҳорғин
фаромушрок,
Ичиқдингму ё менингдек санам беэътиборингта?

Сукунинг боиси недур, қаро кийган келинчакдек,
Нечун мовий парда тортдинг зилоли гул узорингта?

Шифои дард истасанг гар кел ҳилолим, манам ошиқ,
Юзимга бос юзунг, зора нафъси қиласа ҳуморингта?

Ўқинма, ой айланиб бир тушар измиға гардун боз,
Не ажаб, Бек берса инсоғ ул ситамгар-киборингта.

ХАЁЛ КЎКИДА

Губор инмай тикилмоға моҳим юзи, қароғига.
Нигоҳимни чўмилтирсан зилол чашми-булоғига.

Хаёл кўкида сўнг парвоз этиб, яйраб бамисли қуш.
Учиди зулфин ҳалинчагида қўнсан сочи боғига.

Бўлур эрди журъат ожиз — жононаю қиёмат иш —
Шамол сийнам чокин сўкиб, сўзум айтсан қулоғига.

Майл қилса раҳм айлаб, қўлимга у ҳайф-ку, ҳайф.
Тилар эрдим нажот, кўзум суреб қошу қабогига.

Масиҳаю Ҳизр суви на ҳожатким менга басдир —
Учиб-қайттар чоғи лабим сириб ўтсам дудоғига.

Ризодурман санам қанча жафо менга раво қўрса,
Берурман дош умр борича фироғи, димоғига.

Ор этмангиз фуурни поймол этди дея, Бекдин.
Ки, шоҳ Бобур қўйибдур бош варивашлар аёғига.

ДАЪВОИМ ЙЎҚ

Ерда ҳам, осмонда ҳам сендин ўзга моҳ-оийим йўқ,
Минг қасамким ҳуснинг-а, ўзга ойга даъвоим йўқ.

Мен нечук қилғум даъво ўзга бир ой висолинким.
Гар сенингсиз оламо заминим ҳам самоим йўқ.

Ўйла — олам — ишқ эли, анда ёлғиз муганний-мен,
Ким, сени васфи юзингдин суюкроқ навоим йўқ.

Оҳу нолам тескари мужгон ўлиб эзар бағрим.
Кипригинг наштаридан ўзга чора давоим йўқ.

Дил ярам оғриб мудом, этмагай гар юзим равшан,
Сени ўйлашдин улуғ завқу нашъу намоим йўқ.

Келтиур субҳи сабо сен чиқорган нафасларинг,
Мен нафас олгум фақат ондин, ортиқ ҳавоим йўқ.

Не тиласан Бек, яна ошиғи бошукур бўлғай,
Жонга жон бермақдин аъло мени муддаоим йўқ.

МУНДАРИЖА

Пиримқул Қодиров. Бобур Мирзо изидан 5

БИРИНЧИ ҚИСМ

Ушалмаган орзулар сари	7
Ўзбекистон йўлларида	11
Ўз юртингда адашма	15
Туркманистон чўлларида	21
Туркман қизлари	23
«Санжар» айвонидаги сұхбат	25
Яхшилар кўп дунёда	27
Афғон билан туғилган ватан	31
Тоғ йўлида учраган сулув	33
Орзудаги шаҳар	36
Аянчли зиёраттоҳлар. Қани машҳур Мусалло?	40
Кўзим чиқсин...	44
Амир Темурни кўрган намозгоҳ	47
Ҳиротнинг қадимий кўчаларида	50
Султон хотирасига қолган тош	53
Наҳотки орқага қайтсан?	56
Шаҳидлар мозори	58
Чекиниш	60

ИККИНЧИ ҚИСМ

Фирдавсийнинг мовий диёри 63

ЭРОН

Сарҳадда бир жонон	63
Гўзал Машҳад	67
Ажойиботта тўла бу диёр	69
Ўҳшашиб, аччиқ қисматлар	73
Тўлқин ака ранжиган тонг	78

ПОКИСТОН

Қайдасан, Лоҳўр?	82
Лоҳўр манзаралари. Ошиқ Салим	94
Тонгти таҳлика ва чарақлаган умидлар	98
Ишқ, гирдобида қолган малика	104
Мозийга назар. Армонларим	111

УЧИНЧИ ҚИСМ

СЕҲРЛИ ҲИНДИСТОН

Чегарада уч кечা	119
Ниҳоят дарвоза очилди!	131
Энг тарихий жанг	137

Понипат жангига қўйилган ёдгорлик	142
Эски ва Янги Дехлида	144
Қимматта тушган ҳавас	156
Ҳинд дастурхони	167
Шаддот ҳинҷ қизи — қуралай кўз Манжу	171
Ўлуғлар мозори	177
Муҳаббат ва садоқат кошонаси	182
Бугун менинг түтилган куним	191
Мафтункор шахс	199
Боги ором — боги беором	207
Олтин Бенгалияни излаб	217
Бир пийёла сувга алмашмам	225
Наргис ватани	231
Аврангзеб қиличи. Олтин сопли пичоқ	236
Ҳинд сув парилари	243
Бу муҳаббат қасри эмас...	248
Бобур авлодлари бор экан!	255
Маъшуқа исми билан аталган шаҳар	265
Бобурйлар хонадонида байрам	268
Иккинчи Тож Маҳал	273
Илҳом париси	279
Қуролимиз пичоқ эди	285
Акбаршоҳнинг ҳайратомуз қалъалари	291
Яна Дехлида. Лайъл қалъа	298

Т ў р т и н ч и қ и с м

ҚАЙТИШ

Ҳинҷ элидаги сўнгти кунлар	304
Яна Ҳоҳўрда	308
«Фурбатта лаънатлар бўлсин»	310
Ҳайбар довони	314
Саҳро йўли — узун йўл	318
Тушларимда Андикон	322
Она юрт нафаси	326
Ватандин яхши ёр бўлмас	328
Муаллиф узри	331
ХОТИМА ёки Сафардан кейинги фасл	334
Қўнглимдаги гулларим... (Шеърлар)	339

ҚАМЧИБЕК КЕНЖА

ХИНД СОРИФА

(САФАРНОМА)

«Шарқ» нашиёт-матбаа концерни
Бош таҳририяти
Тошкент — 2000

Муҳаррир А. Бобониёзов
Рассом К. Акчулаков
Бадиий муҳаррир Ф. Башарова
Техник муҳаррир Д. Габдрахманова
Мусаҳдиҳ Ж. Тоирова

Теришга берилди 2.03.2000. Босишга рухсат этилди 12.06.2000.
Бичими 84Х108^{1/32}. Балтика гарнитураси. Офсет босма табоғи.
Нашриёт ҳисоб табоғи 18,5. Адади 5000 дона. Буюртма № 442.
Баҳоси шартнома асосида.

**«Шарқ» нашриёт-матбаа концернининг босмахонаси,
700083, Тошкент шаҳри, «Буюк Турон» кўчаси, 41.**